





Bequest of
Rev. Th. C. Scadding, D.D.
to the Library
of the
University of Toronto
1901

Ex Libris
Henrici Scadding,
Torontonensis.

BEQUEST OF
REV. CANON SCADDING, D. D.
TORONTO, 1901.







W. J. P. in del.

G. J. P. in sculp.

439
177

VS

CAII VELLEII
PATERCULI) VS

HISTORIÆ ROMANÆ.

LIBRI DUO.

*Nova Editio ex collatione veterum
Editorum emendata.*



PARISIIS,

Apud J. BARBOU, viâ Mathurinensium

M. DCC. LXXVII.

5 2 6 4 5
2 / 1 / 0 2

1875

1875

1875

1875

ОТБОР



1875

1875

1875



D E

VELLEII PATERCULI

VITA ET SCRIPTIS,

EX GERARDI JOANNIS VOSSII

Opere de Historicis Latinis.

VELLEIUS Paterculus primùm tribu-
nus militum in Thracia fuit ; hinc præ-
fectus equitum in Germania ; exinde quæ-
stor, inque quæstura, remissâ sorte pro-
vinciæ, legatus Tiberii bello Pannonico,
denique primo Tiberii anno cum fratre
prætor destinatus : quæ universa de se
ipso narrat Velleius. Hosce honores, &
quos tum majores & consanguinei gesse-
rint, his verbis complecti studuit Aven-
tinus, eos referens e quibus in primo an-
nalia scribe profecit. *Publius Vel-
leius Paterculus, homo militaris, ex cele-
berrimis Campanorum Principibus progna-
tus, in Germania sub Tiberio præfectus*

a ij,

equitum fuit. Tribunus antè castrorum, item quæstor & legatus in bello Pannonico. Scripsit sexto [decimo sexto dicere debuerat] imperii Tiberiani anno. Item majores ejus, atavi, abavi, avi, patruus, pater, Magnus Celer frater, disciplinâ bellicâ, ac rebus civilibus clarissimi exstiterè duces, prætores, judices, senatores, præfecti fabrûm, tribuni castrorum, legati imperatoribus Romanis fuerunt. Hæc Aventinus.

Hic Velleius duos historiæ scripsit libros ad M. Vinicium consulem, progenerum Tiberii Cæsaris, Tacito etiam memoratum in sexto Annalium, qui illum patre, & avo, consularibus, ortum dicit: item Dioni libro extremo, ubi eum a Messallina docet interfectum, quod caput cum ea collimare nollet. *Vinucium* aliqui appellant; sed Dioni quoque est Οὐινικίος. Librorum Velleii bona pars deperiit. Dictio ejus planè Romana atque elegans; quædam etiam habet quæ haud alibi invenias; sed in sui ævi rebus nimis domui Augustæ, & Sejano adulatur. Justiores commentarios promittit Libro II. *Harum præteritarumque rerum ordo, quum justius aliorum voluminibus promittitur, tum, uti spero, nostris explicabitur. Ac postea. Captum alterum, alterum deditum, justis voluminibus ordine narrabimus, ut spero.*

Si Beatum Rhenanum audimus, qui primus Velleium in lucem protraxit, est idem ille quem Tacitus vocat P. Velleium. Nec alia mens, vel Jacobi Schegkii, vel Valentis Acidalii; eamque sententiam probant codice Burerii, ubi *Publius* appellatur, non *Cajus*, uti est in vulgatis: sed nihil tale in variantibus Burerii lectionibus reperias. Est & tertia sententia: nam *Marcum* vocat Priscianus libro VI. Ita enim habet & antiquissima editio Veneta anni CIOCCCCLXXVI, & recentissima Heliae Putschii: immo & optimæ notæ codex MS. meus, ut omnino huic sententiæ potius accedam.

Porro & fragmentum quoddam Velleii, quod frustra in editis quæras, invenisse se ait Wolfgangus Lazius, libro I. commentariorum Reipublicæ Romanæ, capite VIII. Inscriptio illius erat *VELLEII EXCERPTA EX GALLICA HISTORIA*. Fragmentum ipsum istiusmodi est.

Dum hæc circa Rhenum geruntur, in Noricorum finibus grave vulnus populus Romanus accepit. Quippe Germanorum gentes, quod Rhætias occupaverant, non longè ab Alpibus, tractu pari, patentibus campis, ubi duo rapidissimi amnes inter se confluunt, in ipsis Noricis finibus civitatem, non quidem muro, sed vallo, fos-

sâque cinxerunt ; quam appellabant Cifara, ex nomine Deæ Cifæ, quam religiosissimè colebant ; cujus templum quoque ex lignis barbarico ritu constructum , postquam eò colonia Romanorum deducta est , inviolatum permansit , ac vetustate collapsum , nomen colli servavit. Hanc urbem Titus Annius prætor , ad arcendas barbarorum excursiones , Kal. Sextil. exercitu circumvenit. Ad meridianam oppidi partem , quæ sola a continenti erat , prætor ipse , cum legione Martia , operosissimè communivit : ad Occidentem verò , quâ barbarorum adventus erat , Avar , Bogudis regis filius , cum equitatu omni & auxiliaribus Macedonum copiis , inter flumen & vallum , loco castris parum amplo , infelici temeritate extra flumen confedit. Pulchra indoles , non minùs Romanis quàm Græcis litteris instructa. Igitur LIX die , quàm eò ventum est , quum is dies Deæ Cifæ celeberrimus , ludum & lasciviam magis , quàm formidinem , ostentaret ; immanis barbarorum multitudo , ex proximis sylvis repentiè erumpens , ex improvise castra irrupit. Equitatum omnem , & , quod miseriùs erat , auxilia sociorum delet. Avar , quum in hostium potestatem regio habitu vivus venisset , pecudis more mactatur. Oppidani verò , non minori fortunâ , sed majori virtute , prætorem , in au-

xilium sociis properantem, adoriuntur. Romani haud segniter resistunt. Duo principes oppidanorum, Habbino & Caccus, in primis pugnantes cadunt. Et inclinata jam res oppidanorum erat, nî maturassent auxilium ferre socii, in altera ripa jam victoriâ potiti. Denique coadunatis viribus castra irrumpunt: prætorem, qui paulò altiore tumultum frustra ceperat, Romanâ vi resistentem obtruncant: legionem divinam, ut ne nuntius superesset, funditus delent. Verres solus, tribunus militum, amne transmissio, in proximis paludibus se occultans, honestam mortem subterfugit. Nec multò post Siciliæ proconsul immani avaritiâ turpem mortem promeruit.

Etiam Lib. V. ejusdem operis, cap. V, & aliis aliquot locis, Velleiani hujus fragmenti meminit Lazius. Sed qui nasum habet, satis odoratur stylum ejus sapere scriptorem, qui seculis aliquot Velleio junior sit. Nec in re pauca sunt quæ peccentur: ea proferrem, nisi id cum cura fecisset vir summus, Marcus Velferus, in rerum Augustarum Vindelicarum libris. Sed monere operæ pretium videtur, fragmentum hoc totum, paucis tamen insertis, legi apud Conradum a Lichtenau, Abbatem Urspergensem: quem in Chronico vide post ea, quæ de anno

MCLXVII exposuit. Lemma ejus capituli est : *De Augusta Vindelicorum , vel Rætiae.* Ætatem ejusce Conradi inde cognoscimus , quòd initio pontificatûs Innocentii tertii , hoc est anno CIOXCXVIII , laicum se , atque adeo minorenem fuisse , dicat : anno autem CIOCCXV referat se Abbatem factum Urspergensem ; historiam verò suam perducit ad annum CIOCCXXIX. Quare , aut ex Abbate Urspergensi id fragmentum fuerit ; aut inde , unde ea hauserat Urspergensis.



EXCERPTA

*Ex Annalibus Velleianis Henrici
Dodwelli , per Christophorum
Cellarium.*

- Anni*
U. C.
735. **V**ELLEIUS hoc anno natus videtur. Avus, Caius Velleius, præfectus fabrûm, Neapoli se ipse transfixit. *Lib. 1. c. 76.* Pater, præfectus equitum, cui noster in eodem munere successit : *c. 104.*
749. Togam virilem sumpsit : inde tirocinium militiæ equestris, cujus decem numerantur stipendia. *Plutarch. in C. Graccho.* Primus hujus militiæ gradus, præfectura cohortis. *Sueton. Claud. c. 25.*
752. Ad secundum equestris militiæ gradum, tribunatum militum, ascendit sub Vinicio, consulis, ad quem scribit, patre. *Lib. 2. c. 101. & Suet. ibid.* Sed Dodwello videtur hic tribunatus tantum beneficiarius fuisse.
753. Cum Caio Cæsare Velleius in Orientem proficiscitur, adestque quum Caius cum Parthorum rege in ripa Euphratis congreditur. *Cap. eodem 101.*

754.

Incipit bellum Germanicum sub avo Vinicii consulis. *Cap. 104.* Tum Velleius videtur ad tertium gradum militiae suae evectus, tribunatum castrorum, si modò is diversus a tribunatu est militum. *Cap. 104.*

757.

Tiberius adoptatur : mox illum secutus Velleius in Germaniam, per novem annos cum ipso est, primùm praeffectus alae sive equitum, deinde legatus ; *ibid. c. 104.* quum Sentius Saturninus adhuc praeffectus Germaniae, Augusti legatus esset, *c. 105.* etiam per unum & alterum annum insequentem.

759.

Deficiunt Pannonii & Dalmatae sub praefecto Illyrici Valerio Messallino. Ea occasione Velleius partem exercitus ab Urbe ad Tiberium ducit, jam quaestor designatus : *cap. 111.* Praeficitur Velleius hujus anni hybernis : *cap. 113. extr.* Agrippa Posthumus, qui unà cum Tiberio adoptatus fuerat, abdicatur : *capitibus. 104, & 112.*

760.

Tiberio de mora suspecto additur Germanicus tum quaestor. *Dio Cassius ; 55. p. 569.* Velleius anni initio, Romae ad quaesturam ineundam, sine erat in Pannonia cum Tiberio, remisso anno quaesturae provincialis : *cap. 111.* Meruit etiam sub Germanico ; frater Velleii Magius Celer cum Tiberio.

761. Annus Pannonici belli secundus, quo illud confecit Tiberius.
762. Annus belli Illyriciani tertius, quo Dalmatas in ordinem Tiberius redegit, legato & adjutore Velleii fratre Magio: *cap. 115.* hoc anno cæsus Varus cum legionibus in Germania. *Dio, lib. 56.*
763. Quam ob rem iterum Tiberius missus in Germaniam. *Sueton. Tib. 18.*
764. Et hunc annum Tiberius usque ad hyberna exegit in Germania. Hinc ipse & Germanicus Romam redeunt; hic etiam consulatum init. *Dio; 56. Sueton. cap. 20.*
765. Tiberius triumphat: sequuntur triumphantem Velleius & frater Magius Celler donis ornati militaribus. *Ipse Vell. cap. 121. Sueton. Tib. cap. 20.*
766. Hoc anno tribunatum plebis, cui antea designatus fuerat, *lib. 2. cap. 111,* Velleius gessit, per quem, aut ædilitatem (nulla autem ædilitatis vestigia apparent) ad præturam aditus erat.
767. Velleio & fratri, candidatis Cæsaris, destinari prætoribus contigit. Hi ultimi ab Augusto commendati, & primi a Tiberio, *lib. 2. cap. 124.* hoc enim anno, ante comitia prætoria, mortuus est Augustus.

768. | Velleius cum fratre prætores.
783. | Scribit Velleius hanc historiam ad
Marcum Vinicium consulem.
784. | Cæsus, ut videtur, Velleius inter
eos est, quibus Sejani amicitia nocuit,
cujus laudator semper fuit, etiam sus-
pecto jam tempore. *Lib. 2. capit. 116,*
127, & 128.

E R R A T A

*Hæc graviora ; & si quæ alia deprehendet ,
Lectôr benevolus condonabit.*

IN VELLEIO.

- PAG. 81. v. 22. *leg.* Rubiconem.
P. 94. v. 30. *leg.* proruto.
P. 137. v. 17. *leg.* Hermundurorum.

IN FLORO.

- PAG. 10. v. 16. *legè* infimul.
P. 97. v. 24. *leg* dimisit exercitum.
P. 107. v. 3. *leg.* Bithyniam.
P. 116. cap. 8. v. 16. *leg.* quis.
P. 131. v. 24. *dele* vocem qui.



CAII VELLEII
PATERCULI
HISTORIÆ ROMANÆ,
AD MARCUM VINICIUM
CONSULEM,
LIBER PRIMUS.

CAPUT I.

* * * tempestate distractus a duce suo Nestore, Metapontum condidit. Teucer, non receptus a patre Telamone, ob se-
gnitiam non vindicatæ fratris injuriæ, Cy-
prum adpulsus, cognominem patriæ suæ

A

Salamina constituit. Pyrrhus, Achilles filius, Epirum occupavit; Phidippus Ephyrum in Thesprotia. At rex regum Agamemnon, tempestate in Cretam insulam reiectus, tres ibi urbes statuit, duas a patriæ nomine, unam a victoriæ memoriâ; Mycenâs, Tegeam, Pergamum. Idem mox, scelere patruelis fratris Ægisthi, hereditarium exercentis in eum odium, & facinore uxoris oppressus, occiditur: regni potitur Ægisthus per annos septem. Hunc Orestes, matremque, sociâ consiliorum omnium sorore Electrâ, virilis animi feminâ, obtruncat. Factum ejus a Diis comprobatum spatio vitæ, & felicitate imperii apparuit: quippe vixit annis nonaginta, regnavit septuaginta: qui se etiam a Pyrrho, Achilles filio, virtute vindicavit: nam, quod pactæ ejus, Menelai atque Helenæ filiae Hermiones nuptias occupaverat, Delphis eum interfecit. Per hæc tempora Lydus & Tyrrenus fratres, quum regnarent in Lydia, sterilitate frugum compulsi, fortiti sunt, uter cum parte multitudinis patriâ decederet. Sors Tyrrenum contigit: pervectus in Italiam, & loco, & incolis, & mari nobile, ac perpetuum a se nomen dedit. Post Orestis interitum, filii ejus Penthilus & Tisamenus regnare triennio.

II. Tum, ferè anno octogesimo post Trojam captam, centesimo & vicesimo, quàm Hercules ad Deos excefferat, Pelopis progenies, quæ omni hoc tempore, pulsus Heraclidis, Peloponnesi imperium obtinuerat, ab Herculis progenie expellitur. Duces recuperandi imperii fuere, Temenus, Cresphontes, Aristodemus, quorum atavus fuerat. Eodem ferè tempore Athenæ sub regibus esse desierunt; quorum ultimus rex fuit Codrus, Melanthis filius, vir non prætereundus: quippe, quum Lacedæmonii gravi bello Atticos premerent, respondissetque Pythius, quorum dux ab hoste esset occisus, eos futuros superiores; depositâ veste regiâ, pastorem cultum induit, immixtusque castris hostium de industriâ, imprudenter, rixam ciens, interemptus est. Codrum cum morte æterna gloria, Athenienses secuta victoria est. Quis eum non miretur, qui his artibus mortem quæsierit, quibus ab ignavis vita quæri solet? Hujus filius Medon primus Archon Athenis fuit. Ab hoc posteri apud Atticos dicti Medontidæ: sed ii, insequentisque Archontes, usque ad Charopem, dum viverent, eum honorem usurpabant. Peloponnesii, digredientes finibus Atticis, Megaram, mediam Corintho Athenisque urbem, con-

A ij

didere. Eâ tempestate & Tyria classis , plurimùm pollens mari , in ultimo Hispaniæ tractu , in extremo nostri orbis termino insulam circumfusam Oceano , per exiguo a continenti divisam freto , Gades condidit. Ab iisdem post paucos annos in Africa Utica condita est. Exclusi ab Heraclidis Orestis liberi , jactatique quum variis casibus , tum sævitiâ maris , quindecimo anno sedem cepere circa Lesbum insulam.

III. Tum Græcia maximis concussa est motibus : Achæi , ex Laconica pulsi , eas occupavere sedes , quas nunc obtinent : Pelaigi Athenas commigravere ; acerque belli juvenis , nomine Theffalus , natione Thesprotius , cum magna civium manu , eam regionem armis occupavit , quæ nunc ab ejus nomine Theffalia appellatur , antè Myrmidonum vocitata civitas. Quo nomine mirari convenit eos , qui , Iliaca componentes tempora , de ea regione , ut Theffalia commemorant. Quod quum alii faciant , Tragici frequentissimè faciunt , quibus minimè id concedendum est : nihil enim ex persona poëtæ , sed omnia sub eorum , qui illo tempore vixerunt , dixerunt. Quod si quis a Theffalo , Herculis filio , eos appellatos Theffalos dicet , reddenda erit ei ratio , cur numquam ante

hunc insequentem Theſſalum ea gens id nominis uſurpaverit. Paulò antè Aletes, ſextus ab Hercule, Hippotis filius, Corinthum, quæ antea fuerat Ephyre, clauſtra Peloponneſi continentem, in Iſthmo condidit. Neque eſt quod miremur ab Homero nominari Corinthum : nam ex perſona Poëtæ & hanc urbem, & quaſdam Ionum colonias iis nominibus appellat, quibus vocabantur ætate ejus, multò poſt Ilium captum conditæ.

IV. Athenienſes in Eubœa Chalcida & Erethriam colonis occupavere ; Lacedæmonii in Asia Magnesiā. Nec multò poſt Chalcidenſes, orti, ut prædiximus, Atticis, Hippocle & Megasthene ducibus, Cumas in Italia condiderunt. Hujus classiſ curſum eſſe directum alii columbæ antecedentis volatu ferunt ; alii nocturno æris ſono, qualis Cerealibus ſacris cieri ſolet. Pars horum civium magno poſt intervallo Neapolim condidit. Utriuſque urbis eximia ſemper in Romanos fides facit eas nobilitate, atque amœnitate ſuâ digniſſimas : ſed aliis diligentior ritûs patrii manſit cuſtodia ; Cumanos Oſca mutavit viciniā. Vires autem veteres earum urbium hodieque magnitudo oſtentat mœnium. Subſequenti tempore magna viſ Græcæ juventutis, abundantia virium ſe-

des quæritans , in Asiam se effudit : nam & Iones , duce Ione profecti Athenis , nobilissimam partem regionis maritimæ occupavere , quæ hodieque appellatur Ionia ; urbesque constituere , Ephesum , Miletum , Colophona , Prienen , Lebedum , Myuntem , Erythram , Clazomenas , Phocæam ; multasque in Ægæo atque Icario occupavere insulas , Samum , Chium , Andrum , Tenum , Parum , Delum , aliasque ignobiles. Et mox Æolii , eâdem profecti Græciâ , longissimisque acti erroribus , non minùs illustres obtinuerunt locos , clarasque urbes condiderunt , Smyrnam , Cymen , Larissam , Myrinam , Mitylenemque , & alias urbes , quæ sunt in Lesbos insulâ.

V. Clarissimum deinde Homeri illuxit ingenium , sine exemplo maximum ; qui magnitudine operis , & fulgore carminum solus appellari *Poëta* meruit : in quo hoc maximum est , quòd neque ante illum , quem ille imitaretur , neque post illum , qui eum imitari posset , inventus est : neque quemquam alium , cujus operis primus auctor fuerit , in eo perfectissimum , præter Homerum & Archilocum , reperiemus. Hic longiùs a temporibus belli , quod composuit , Troici , quàm quidam rentur , abfuit : nam ferme ante annos

nongentos quinquaginta floruit, intra mille natus est. Quo nomine, non est mirandum, quòd sæpe illud usurpat, *οἱ τοὶ νῦν βροτοὶ εἰσι* : hoc enim ut hominum, ita seculorum notatur differentia. Quem si quis cæcum genitum putat, omnibus sensibus orbis est.

VI. Insequenti tempore imperium Asiaticum ab Assyriis, qui id obtinuerant annis mille septingentis, translatum est ad Medos, abhinc annos ferme septingentos septuaginta. Quippe Sardanapalum eorum regem, mollitiis fluentem & nimium felicem malo suo, tertio & tricesimo loco ab Nino & Semiramide, qui Babylona condiderant, natum, ita ut semper successor regni paterni foret filius, Pharnaces Medus imperio vitæque privavit. Eâ ætate clarissimus Graii nominis Lycurgus Lacedæmonius, vir generis regii, fuit severissimarum justissimarumque legum auctor, & disciplinæ convenientissimæ vir; cujus quamdiu Sparta diligens fuit, excelsissimè floruit. Hoc tractu temporum ante annos quinque & sexaginta, quàm urbs Romana conderetur, ab Elissa Tyria, quam quidam Dido autumant, Carthago conditur. Circa quod tempus Caranus, vir generis regii, sextus-decimus ab Hercule, profectus Argis, regnum

8 C. VELL. PATERC.

Macedoniæ occupavit , a quo Magnus Alexander quum fuerit septimus-decimus , jure materni generis Achille auctore , paterni Hercule gloriatus est. [*Æmilius Sura de annis populi Romani : Assyrii , principes omnium gentium , rerum potiti sunt , deinde Medi , postea Persæ , deinde Macedones. Exinde , duobus regibus , Philippo & Antiocho , qui a Macedonibus oriundi erant , haud multò post Carthaginem subactam , devictis , summa imperii ad populum Romanum pervenit. Inter hoc tempus , & initium Nini regis Assyriorum , qui princeps rerum potitus , intersunt anni mille nongenti nonaginta quinque.*]

Quæ hîc uncis inclusa a Velleianis characterum formâ distinguuntur , non videntur esse Velleii , sed ex alicujus annotatione ad oram libri scripta , in textum irrepsisse. Id patet ex eorum , quæ præcedunt , connexione cum sequentibus , in quibus ad Carani tempus ætas Hesiodi refertur.

VII. Hujus temporis æqualis Hesiodus fuit , circa centum viginti annos distinctus ab Homeri ætate , vir perelegantis ingenii , & mollissimâ dulcedine carminum memorabilis , otii quietisque cupidissimus , ut tempore tanto viro , ita operis auctoritate proximus : qui vitavit ,

ne in id quod Homerus , incideret , patriamque & parentes testatus est ; sed patriam , quia multatus ab ea erat , contumeliosissimè. Dum in externis moror , incidi in rem domesticam , maximique erroris , & multum discrepantem auctorum opinionibus. Nam quidam , hujus temporis tractu , aiunt , a Tuscis Capuam Nolaque conditam ante annos ferè octingentos triginta : quibus equidem assenserim : sed Marcus Cato quantum differt ! qui dicat , Capuam ab eisdem Tuscis conditam , ac subinde Nola : stetisse autem Capuam , antequam a Romanis caperetur , annis circiter ducentis sexaginta : quod si ita est , quum sint a Capua capta anni ducenti quadraginta , ut condita est , anni sunt ferè quingenti. Ego (pace diligentiae Catonis dixerim) vix crediderim , tam maturè tantam urbem crevisse , floruisse , concidisse , surrexisse.

VIII. Clarissimum deinde omnium ludicrum certamen , & ad exercitandam corporis animique virtutem efficacissimum , Olympiorum initum , habuit auctorem Iphitum Elium. Is eos ludos , mercatumque instituit ante annos , quàm tu , Marce Vinici , consulatum inires , octingentos quatuor. Hoc sacrum eodem loco instituisse fertur abhinc annos ferè

mille ducentos quinquaginta Atreus, quum Pelopi patri funebres ludos faceret : quod quidem in ludicro omnis generis certaminum Hercules victor exstitit. Tum Athenis perpetui Archontes esse desierunt, quum fuisset ultimus Alcmaeon ; coeperuntque in denos annos creari : quæ consuetudo in annos septuaginta mansit, ac deinde annuis commissa est magistratibus respublica. Ex iis, qui denis annis præfuerunt, primus fuit Charops, ultimus Eryxias ; ex annuis, primus Creon. Sextâ Olympiade, post duos & viginti annos, quàm prima constituta fuerat, Romulus, Martis filius, ultus injurias avi, Romam Urbem Parilibus in Palatio condidit : a quo tempore ad vos consules, anni sunt septingenti octoginta duo. Id actum post Trojam captam annis quadringentis triginta septem. Id gessit Romulus adjutus legionibus Latini avi sui : libenter enim iis, qui ita prodiderunt, accesserim ; quum aliter firmare urbem novam, tam vicinis Veientibus, aliisque Etruscis ac Sabinis, cum imbelli & pastoralis manu vix potuerit : quamquam, jam Asylo facto inter duos lucos, auxit. Hic centum homines electos, appellatosque Patres, instar habuit consilii publici. Hanc originem nomen Patriciorum habet. Raptus virginum

Sabinarum , * * * *

Hic ingens hiatus , qui Velleianæ hîstoriæ partem maximam & præclarissimam absor-
buit , nempe ab urbe condita ad tempus belli
Macedonici contra regem Perseum , qui po-
pulo Romano gravior , *quàm timuerat , hostis*
exstitit. Ita enim cum Lipsio legendum vide-
tur , pro vulgato *expetit*.

IX. * * * * quam timuerat hostis ;
expetit. Nam biennio adeo variâ fortunâ
cum consulibus conflixerat , ut plerumque
superior fuerit , magnamque partem Græ-
ciæ in societatem suam perduceret. Quin
Rhodii quoque , fidelissimi antea Roma-
nis , tum dubiâ fide , speculati fortunam ,
proniores regis partibus fuisse visi sunt ;
& rex Eumenes in eo bello medius fuit
animo , neque fratris initiis , neque suæ
respondit consuetudini. Tum senatus po-
pulusque Romanus Lucium Æmilium Paul-
lum , qui & prætor , & consul triumphä-
verat , virum in tantum laudandum , in
quantum intelligi virtus potest , consulem
creavit , filium ejus Paulli , qui ad Can-
nas quàm tergiversanter perniciosam rei-
publicæ pugnam inierat , tam fortiter in ea
mortem obierat. Is Perseum ingenti præ-
lio apud urbem nomine Pydnam in Ma-
cedonia fufum fugatumque castris exiit ,

deletisque ejus copiis, destitutum omni spe coëgit e Macedonia profugere: quam ille linquens, in insulam Samothraciam profugit, templique se religioni supplicem credidit. Ad eum Cn. Octavius prætor, qui classi præerat, pervenit; & ratione magis quàm vi persuasit, ut se Romanorum fidei committeret. Ita Paullus maximum nobilissimumque regem in triumpho duxit. Quo anno & Octavii prætoris navalis, & Anicii, regem Illyriorum Gentium ante currum agentis, triumphi fuere celebres. Quàm sit assidua eminentis fortunæ comes invidia, altissimisque adhæreat, etiam hoc colligi potest; quòd, quum Anicii, Octaviique triumphum nemo interpellaret, fuere, qui Paulli impedire obniterentur: cujus tantum priores excessit, vel magnitudine regis Persei, vel specie simulacrorum, vel modo pecuniæ, ut bis millies centies HS ærario contulerit, & omnium antè actorum comparisonem amplitudine vicerit.

X. Per idem tempus, quum Antiochus Epiphanes, qui Athenis Olympicum inchoavit, tum rex Syriæ, Ptolemæum puerum Alexandriæ obsideret; missus est ad eum legatus Marcus Popilius Lænas, qui juberet incepto desistere; mandataque exposuìt, & regem deliberaturum se

dicentem , circumscripsit virgulâ , jussitque , priùs responsum reddere , quàm egrederetur finito arenæ circulo. Sic cogitationem regiam Romana disjecit constantia , obeditumque imperio. Lucio autem Paullo , magnæ victoriæ compoti , quatuor filii fuere. Ex iis duos , natu majores , unum Publio Scipioni , Publii Africani filio , nihil ex paternâ majestate , præter speciem nominis , vigoremque eloquentiæ retinenti , in adoptionem dederat ; alterum Fabio Maximo : duos minores natu , prætextatos , quo tempore victoriam adeptus est , habuit. Is quum in concione extra urbem , more majorum , ante triumphi diem , ordinem actorum suorum commemoraret , Deos immortales precatus est , ut , si quis eorum invideret operibus ac fortunæ suæ , in ipsum potius sævirent , quàm in rempublicam. Quæ vox , veluti oraculo emissâ , magnâ parte eum spoliavit sanguinis sui : nam alterum ex suis , quos in familia retinuerat , liberis , ante paucos triumphi , alterum post pauciores amisit dies. Aspera circa hæc tempora censura Fulvii Flacci , & Postumii Albinii fuit : quippe Fulvii censoris frater , & quidem consors , Cn. Fulvius , senatu motus est ab iis censoribus.

XI. Post victum captumque Persen ,

qui quadriennio pòst in libera custodiâ Albæ decessit, Pseudophilippus, a mendacio simulatæ originis appellatus, qui se Philippum regiæque stirpis ferebat, quum esset ultimæ, armis occupatâ Macedoniâ, assumptis regni insignibus, brevi temeritatis pœnas dedit. Quippe Quintus Metellus prætor, cui ex virtute Macedonici nomen inditum, præclârâ victoriâ ipsum gentemque superavit, & immani etiam Achæos rebellare incipientes fudit acie. Hic est Metellus Macedonicus, qui porticus, quæ fuere circumdatæ duabus ædibus sine inscriptione positis, quæ nunc Octaviæ porticibus ambiuntur, fecerat; quique hanc turmam statuarum equestrium, quæ frontem ædium spectant, hodieque maximum ornamentum ejus loci, ex Macedonia detulit. Cujus turmæ hanc causam referunt: Magnum Alexandrum impetrasse a Lysippo, singulari talium auctore operum, ut eorum equitum qui ex ipsius turma apud Granicum flumen ceciderant, expressâ similitudine figurarum, faceret statuas, & ipsius quoque iis interponeret. Hic idem, primus omnium Romæ, ædem ex marmore in iis ipsis monumentis molitus, vel magnificentiæ vel luxuriæ princeps fuit. Vix ullius gentis, ætatis, ordinis hominem in-

veneris , cujus felicitatem fortunæ Metelli compares : nam , præter excellentes triumphos , honoresque amplissimos , & principale in republica fastigium , extantumque vitæ spatium , & acres innocentisque pro republica cum inimicis contentiones , quatuor filios sustulit , omnes adultæ ætatis vidit , omnès reliquit superstites & honoratissimos. Mortui ejus lectum pro Rostris sustulerunt quatuor filii , unus consularis & censorius , alter consularis , tertius consul , quartus candidatus consulatûs , quem honorem adeptus est. Hoc est nimirum magis feliciter de vita migrare , quàm mori.

XII. Universâ deinde , ut prædiximus , instinctâ in bellum Achaiâ , cujus pars magna ejusdem Metelli Macedonici virtute armisque fracta erat , maximè Corinthiis in arma , cum gravibus etiam in Romanos contumeliis , instigantibus , destinatus ei bello gerendo consul Mummius. Et sub idem tempus , magis , quia volebant Romani , quidquid de Carthaginiensibus diceretur , credere , quàm quia credenda afferebantur , statuit senatus Carthaginem excidere. Ita eodem tempore Publius Scipio Æmilianus , vir avitis Publii Africani , paternisque L. Paulli virtutibus simillimus , omnibus belli ac togæ

dotibus, ingeniique ac studiorum eminentissimus seculi sui, qui nihil in vita nisi laudandum aut fecit aut dixit ac sensit; quem, Paulo genitum, adoptatum a Scipione Africani filio, diximus, ædilitatem petens consul creatus est. Bellum Carthagini jam ante biennium a prioribus consulibus illatum majore vi intulit; quum antè in Hispania murali coronâ, in Africa obsidionali donatus esset; in Hispania verò etiam ex provocatione, ipse modicus virium, immanis magnitudinis hostem interemisset. Eamque urbem, magis invidiâ imperii, quàm ullis ejus temporis noxis, invisam Romano nomini, funditus sustulit; fecitque suæ virtutis monumentum, quod fuerat avi ejus clementiæ. Carthago diruta est, quum stetisset annis sexcentis sexaginta septem, abhinc annos centum septuaginta septem, Cn. Cornelio Lentulo, L. Mummiō consulibus. Hunc finem habuit Romani imperii Carthago æmula; cum qua bellare majores nostri cœpere Claudio, & Fulvio coss. ante annos ducentos nonaginta sex, quàm tu, M. Vinici, consulatum inires. Ita per annos centum quindecim, aut bellum inter eos populos, aut belli præparatio, aut infida pax fuit: neque se Roma, jam terrarum orbe superato, securam speravit

fore , si nomen usquam stantis maneret Carthaginis ; adeo odium , certaminibus ortum , ultra metum durat , & ne in victis quidem deponitur , neque antè invictum esse desinit , quàm esse desiit.

XIII. Ante triennium quàm Carthago deleretur , M. Cato , perpetuus diruendæ ejus auctor , L. Censorino , M. Manlio coff. mortem obiit. Eodem anno , quo Carthago concidit , L. Mummius Corinthum , post annos nongentos quinquaginta duos , quàm ab Alete Hippotis filio erat condita , funditus eruit. Uterque imperator , devictæ a se gentis nomine honoratus , alter Africanus , alter appellatus est Achaicus ; nec quisquam ex novis hominibus prior Mummio cognomen virtute partum vindicavit. Diversi imperatoribus mores , diversa fuere studia. Quippe Scipio tam elegans liberalium studiorum , omnisque doctrinæ & auctor , & admirator fuit , ut Polybium , Panætiumque , præcellentes ingenio viros , domi militiæque secum habuerit : neque enim quisquam hoc Scipione elegantius intervalla negotiorum otio dispunxit , semperque aut belli aut pacis serviit artibus : semper inter arma ac studia versatus , aut corpus periculis aut animum disciplinis exercuit. Mummius tam rudis fuit , ut captâ Co-

rintho , quum maximorum artificum perfectas manibus tabulas ac statuas , in Italiam portandas locaret , juberet prædici conducentibus , si eas perdidissent , novas eos reddituros. Non tamen puto dubites , Vinici , quin magis pro republica fuerit , manere adhuc rudem Corinthiorum intellectum , quàm in tantum ea intelligi ; & quin hac prudentiâ illa imprudentia decori publico fuerit convenientior.

XIV. Quum facilius cujusque rei in unum contracta species , quàm divisa temporibus , oculis animisque inhæreat , statui priorem hujus voluminis , posterioremque partem , non inutili rerum notitiâ in arctum contractâ distinguere , atque huic loco inferere , quæ quoque tempore , post Romam a Gallis captam , deducta sit colonia jussu senatûs : nam militarium & causæ & auctores & ipsarum præfulgent nomina : huic rei per idem tempus civitates propagatas , auctumque Romanum nomen communione juris , haud intempestivè subtexturi videmur. Post septem annos , quàm Galli urbem ceperunt , *Sutrium* deducta colonia est , & post annum *Setina* , novemque interjectis annis *Nepe* ; deinde , interpositis duobus & triginta , *Aricini* in civitatem recepti. Abhinc annos autem trecentos quinquaginta ,

Sp. Postumio , Veturio Calvino coff. *Campanis* data est civitas , partique *Samnium* , sine suffragio ; & eodem anno *Cales* deducta colonia. Interjecto deinde triennio *Fundani* & *Formiani* in civitatem recepti , eo ipso anno , quo *Alexandria* condita est ; insequentibusque consulibus , a Sp. Postumio , Philone Publilio censoribus *Acerranis* data civitas , & post triennium *Tarracinam* deducta colonia ; interpositoque quadriennio *Luceria* ; ac deinde , interjecto triennio , *Suessa Aurunca* , & *Saticula* , *Interamna*que post biennium. Decem deinde hoc munere anni vacaverunt : tunc *Sora* , atque *Alba* deductæ coloniæ , & *Carseoli* post biennium. At quintum Fabio , Decio Mure quartum coff. quo anno Pyrrhus regnare cœpit , *Sinuessam* , *Minturnasque* missi coloni , post quadriennium *Venusiam* ; interjectoque biennio , M. Curio , & Rufino Cornelio coff. *Sabinis* sine suffragio data civitas. Id actum ante annos ferme trecentos viginti : at *Cosam* & *Pæstum* abhinc annos ferme trecentos , Fabio Dorfone & Claudio Caninâ coff. Interjecto quinquennio , Sempronio Sopho , & Appio Cæci filio coff. *Ariminum* , *Beneventum* coloni missi ; & suffragii ferendi jus *Sabinis* datum. At initio belli primi Punici *Firmum* & *Castrum* colonis occupata : & post an-

num *Æsernia*, postque viginti duos annos *Æsulum* & *Alsium*; *Fregellæ*que post biennium; proximoque anno, Torquato Sempronioque coss. *Brundisium*, & post triennium *Spoletium*; quo anno Floraliū ludorum factum est initium: postque biennium deducta *Valentia*, & sub adventum in Italiam Annibalis, *Cremona* atque *Placentia*.

XV. Deinde, neque dum Annibal in Italia moratur, neque proximis post excessum ejus annis, vacavit Romanis colonias condere; quum esset in bello conquiendus potius miles, quàm dimittendus, & post bellum vires refovendæ magis, quàm spargendæ. Cn. autem Manlio Volsone & Fulvio Nobiliore coss. *Bononia* deducta colonia, abhinc annos ferme ducentos septemdecim; &, post quadriennium, *Pisaurum* ac *Potentia*; interjectoque triennio, *Aquileia* & *Gravisca*; & post quadriennium *Luca*. Eodem temporum tractu, quamquam apud quosdam ambigitur, *Puteolos* *Salernum*que & *Buxentum* missi coloni. *Auximum* autem in Picenum, abhinc annos ferme centum octoginta septem, ante triennium, quàm Cassius censor, a Lupercali in Palatium versus, theatrum facere instituit: cui in demoliendo eximia civitatis severitas & consul Scipio resistere: quod ego inter

clarissima publicæ voluntatis argumenta numeraverim. Cassio autem Longino & Sextio Calvino, qui Sallues apud Aquas, quæ ab eo Sextiæ appellantur, devicit, consulibus, *Fabrateria* deducta est, abhinc annos ferme centum quinquaginta septem, & post annum *Scylacium*, *Minnervium*, *Tarentum*, *Neptunia*, *Carthago*que in Africa, prima, ut prædiximus, extra Italiam, colonia condita est. De *Dertona* ambigitur. *Narbo* autem *Martius* in Gallia, Porcio Marcioque coff. abhinc circiter annos centum quinquaginta tres, deducta colonia est. Post tres & viginti annos in Vagiennis *Eporædia*, Mario sexies Valerioque Flacco coff. Neque facile memoriæ mandaverim, quæ, nisi militaris, post hoc tempus deducta sit.

XVI. Quum hæc particula operis velut formam propositi excefferit, quamquam intelligo, mihi in hac tam præcipiti festinatione, quæ me rotæ pronive gurgitis ac vorticis modo nusquam patitur consistere, pêne magis necessaria prætereunda, quàm supervacua amplectenda; nequeo tamen temperare mihi, quin rem sæpe agitatam animo meo, neque ad liquidum ratione perductam, signem stylo. Quis enim abunde mirari potest, quòd eminentissima cujusque professionis ingenia, in eandem formam, & in idem

arctati temporis congruens spatium, & quemadmodum clausa capsâ aliove septo diversi generis animalia, nihilo minùs separata alienis, in unum quæque corpus congregantur; ita cujusque clari operis capacia ingenia in similitudinem & temporum & profectuum semetipsa ab aliis separaverunt? Una, neque multorum annorum spatio divisa, ætas, per divini spiritûs viros, Æschylum, Sophoclem, Euripidem, illustravit tragœdias: una priscam illam & veterem sub Cratino, Aristophane & Eupolide comœdiam; ac novam comicam Menandrus, æqualesque ejus ætatis magis quàm operis, Philemon ac Diphilus, & invenere intra paucissimos annos, neque imitanda reliquere. Philosophorum quoque ingenia, Socratico ore defluentia, omnium, quos paulò antè enumeravimus, quanto post Platonis Aristotelisque mortem florere spatio? Quid ante Isocratem, quid post ejus auditores eorumque discipulos clarum in oratoribus fuit? adeo quidem arctatum angustiis temporum, ut nemo memoriâ dignus alter ab altero videri nequiverint.

XVII. Neque hoc in Græcis, quàm in Romanis, evenit magis. Nam, nisi aspera ac rudia repetas, & inventi laudanda nomine, in Accio circaque eum Ro-

mana tragœdia est : dulcesque Latini leporis facetiæ , per Cæcilium Terentiumque & Afranium , suppari ætate nituerunt. Historicos (ut & Livium quoque priorum ætati adstruas) præter Catonem & quosdam veteres & obscuros , minùs octoginta annis circumdatum ævum tulit ; ut nec Poëtarum in antiquius citeriusve processit ubertas. At oratio , ac vis forensis , perfectumque prosæ eloquentiæ decus , ut idem separetur Cato (pace P. Crassi , Scipionisque & Lælii , & Gracchorum , & Fannii , & Ser. Galbæ dixerim) ita universa sub principe operis sui erupit Tullio ; ut delectari ante eum paucissimis , mirari verò neminem possis , nisi aut ab illo visum , aut qui illum viderit. Hoc idem evenisse Grammaticis , Plastis , Pictoribus , Scalptoribus , quisquis temporum institerit notis , reperiet , & eminentia cujusque operis arctissimis temporum claustris circumdata. Hujus ergo , præcedentisque seculi , ingeniorum similitudines congregantis & in studium par , & in emolumentum , causas quum semper requiro , numquam reperio , quas esse veras confidam , sed fortasse verisimiles , inter quas has maximè. Alit æmulatio ingenia ; & nunc invidia , nunc admiratio incitationem accendit ; naturâque , quod summo studio petatum est , ascendit in

summum ; difficilisque in perfecto mora est ; naturaliterque , quod procedere non potest , recedit : & ut primò ad consequendos , quos priores ducimus , accendimur , ita ubi aut præteriri , aut æquari eos posse desperavimus , studium cum spe senescit ; & quod assequi non potest , sequi desinit ; & , velut occupatam relinquens materiam , quærit novam ; præteritoque eo , in quo eminere non possumus , aliquid in quo nitamur conquirimus ; sequiturque , ut frequens ac mobilis transitus maximum perfecti operis impedimentum sit.

XVIII. Transit admiratio a conditione temporum , & ad urbium. Una urbs Attica pluribus annis eloquentiâ , quàm universa Græcia , uberiùsque floruit ; adeo ut corpora gentis illius separata sint in alias civitates , ingenia verò solis Atheniensium muris clausa existimes. Neque ego hoc magis miratus sim , quàm neminem Argivum , Thebanum , Lacedæmonium oratorem aut dum vixit auctoritate , aut post mortem memoriâ dignum existimatum : quæ urbes , & multæ aliæ , talium studiorum fuere steriles , nisi Thebas unum os Pindari illuminaret ; nam Alcmana Lacones falsò sibi vindicant.



LIBER SECUNDUS.

C A P U T I.

POTENTIÆ Romanorum prior Scipio viam aperuerat, luxuriæ posterior aperuit. Quippe remoto Carthaginis metu, sublataque imperii æmulâ, non gradu, sed præcipiti cursu a virtute descitum, ad vitia transcursum; vetus disciplina deserta, nova inducta; in somnum a vigiliis, ab armis ad voluptates, a negotiis in otium conversa civitas. Tum Scipio Nasica in Capitolio porticus; tum, quas prædiximus, Metellus; tum in circo Cn. Octavius multò amœnissimam, moliti sunt; publicamque magnificentiam secuta privata luxuria est. Triste deinde & contumeliosum bellum in Hispania, duce latronum Viriatho, secutum est: quod ita variâ fortunâ gestum est, ut sæpius Romanorum gereretur adversâ. Sed interempto Viriatho, fraude magis quàm virtute Servilii Cæpionis, Numantinum gravius exarsit. Hæc urbs numquam decem millibus plura pro-

priæ juventutis armavit ; sed vel ferociâ ingenii , vel inscitiâ nostrorum ducum , vel fortunæ indulgentiâ , quum alios duces , tum Pompeium , magni nominis virum , ad turpissima deduxit fœdera (hic primus e Pompeiis consul fuit) nec minùs turpia ac detestabilia Mancinum Hostilium consulem : sed Pompeium gratia impunitum habuit , Mancinum verecundia ; quippe , non recusando perduxit huc , ut per Feciales nudus ac post tergum religatis manibus dederetur hostibus : quem illi recipere se negaverunt , sicut quondam Caudini fecerunt , dicentes publicam violationem fidei non debere unius lui sanguine.

II. Immanem deditio Mancini civitatis movit diffensionem : quippe Tib. Gracchus , Tib. Gracchi clarissimi atque eminentissimi viri filius , P. Africani ex filia nepos , quo quæstore & auctore id fœdus ictum erat , nunc graviter ferens aliquid a se factum infirmari , nunc similis vel judicii vel pœnæ metuens discrimen , tribunus plebis creatus , vir alioqui vitâ innocentissimus , ingenio florentissimus , proposito sanctissimus , tantis denique adornatus virtutibus , quantas perfecta & naturâ & industriâ mortalis conditio recipit , P. Mucio Scævola , L. Calpurnio consuli-

bus, abhinc annos centum sexaginta duos, descivit a bonis; pollicitusque toti Italiæ civitatem, simul etiam promulgatis agrariis legibus, omnibus statum concupiscentibus, summa imis miscuit; & in præruptum atque anceps periculum adduxit rempublicam, Octavioque collegæ pro bono publico stanti imperium abrogavit: triumviros agris dividendis coloniisque deducendis creavit se, socerumque suum consularem Appium, & Gracchum fratrem, admodum juvenem.

III. Tum P. Scipio Nasica, ejus, qui optimus vir a senatu judicatus erat, nepos; ejus, qui censor porticus in Capitolio fecerat, filius; pronepos autem Cn. Scipionis celeberrimi viri, P. Africani patruī, privatusque & togatus, quum esset consobrinus Tib. Gracchi, patriam cognationi præferens, & quidquid publicè salutare non esset, privatim alienum existimans (ob eas virtutes primus omnium absens pontifex maximus factus est) circumdatâ lævo brachio togæ laciniâ, ex superiore parte Capitolii, summis gradibus insistens, hortatus est, qui salvam vellent rempublicam se sequerentur. Tum optimates, senatus, atque equestris ordinis pars melior & major, & intacta perniciosis consiliis plebs, irruere in

B ij

Gracchum stantem in area cum catervis suis , & concientem pene totius Italiæ frequentiam. Is fugiens , decurrensque clivo Capitolino , fragmine subsellii ictus , vitam , quàm gloriosissimè degere potuerat , immaturâ morte finivit. Hoc initium in urbe Roma civilis sanguinis , gladio-
rumque impunitatis fuit. Inde jus vi obrutum , potentiorque habitus prior ; discordiæque civium , antea conditionibus sanari solitæ , ferro dijudicatæ ; bellaque non causis inita , sed prout eorum merces fuit. Quod haud mirum est : non enim ibi consistunt exempla , unde cœperunt , sed quamlibet in tenuem recepta tramitem , latissimè evagandi sibi viam faciunt ; & , ubi semel recto deerratum est , in præceps pervenitur : nec quisquam sibi putat turpe , quod alii fuit fructuosum.

IV. Interim , dum hæc in Italia geruntur , Aristonicus , mortuo rege Attalo , a quo Asia populo Romano hereditate relicta erat , sicut relicta postea est a Nicomede Bithynia , mentitus regiæ stirpis originem , armis eam occupat. Is victus a M. Perperna , ductusque in triumpho ; sed M'. Aquillio capite pœnas dedit , quum initio belli Crassum Mucianum , virum juris scientissimum , dece-

dentem ex Asia proconsulem interemis-
 set. Et P. Scipio Africanus Æmilianus, qui
 Carthaginem deleverat, post tot acceptas
 circa Numantiam clades, creatus iterum
 consul, missusque in Hispaniam, fortunæ
 virtutique, expertæ in Africa, respondit
 in Hispania; & intra annum ac tres men-
 ses, quàm eò venerat, circumdatam ope-
 ribus Numantiam excisamque æquavit so-
 lo: nec quisquam ullius gentis hominum
 ante eum clariore urbium excidio nomen
 suum perpetuæ commendavit memoriæ.
 Quippe, excisâ Carthagine ac Numantiâ,
 ab alterius nos metu, alterius vindicavit
 contumeliis. Hic, eum interrogante tri-
 buno Carbone, *quid de Tib. Gracchi cæde*
sentiret? respondit, *si is occupandæ reipu-*
blicæ animum habuisset, jure cæsum. Et,
 quum omnis concio adclamasset: *Hostium,*
 inquit, *armatorum toties clamore non terri-*
tus, quî possum vestro moveri, quorum no-
verca est Italia? Reversus in Urbem, in-
 tra breve tempus, M'. Aquillio, C. Sem-
 pronio coss. abhinc annos centum quin-
 quaginta, post duos consulatus duosque
 triumphos, & bis excisos terrores reipu-
 blicæ, manè in lectulo repertus est mor-
 tuus, ita ut quædam elisarum faucium in
 cervice reperirentur notæ. De tanti viri
 morte nulla habita est quæstio; ejusque

corpus velato capite elatum est, cujus operâ super totum terrarum orbem Roma extulerat caput. Seu fatalem, ut plures, seu conflatam insidiis, ut aliqui prodidere memoriæ, mortem obiit; vitam certè dignissimam egit, quæ nullius ad id temporis præterquam avito fulgore vinceretur. Decessit anno ferme quinquagesimo sexto: de quo si quis ambiget, recurrat ad priorem consulatum ejus, in quem creatus est anno trigesimo sexto: ita dubitare desinet.

V. Ante tempus excisæ Numantiae, præclara in Hispania militia A. Bruti fuit: qui, penetratis omnibus Hispaniæ gentibus, ingenti vi hominum, urbiumque potitus numero, aditis quæ vix audita erant, Gallæci cognomen meruit. Et ante eum paucis annis tam severum illius Q. Macedonici in his gentibus imperium fuit, ut, quum urbem Contrebiam nomine in Hispania oppugnaret, pulsas præcipiti loco quinque cohortes legionarias eodem protinus subire juberet, facientibusque omnibus in procinctu testamenta, velut ad certam mortem eundum foret, non deterritus proposito, perseverantia ducis, quem moriturum miserat militem, victorem recepit. Tantum effecit mixtus timori pudor, spesque desperatione quæsita. Hic

virtute ac severitate facti ; at Fabius Æmilianus , Paulli exemplo , disciplinæ in Hispania fuit clarissimus.

VI. Decem deinde interpositis annis , qui Tib. Gracchum , idem Caium fratrem ejus occupavit furor , tam virtutibus ejus omnibus , quàm huic errori similem , ingenio etiam eloquentiâque longè præstantiorem. Qui , quum summâ quiete animi civitatis princeps esse posset , vel vindicandæ fraternæ mortis gratiâ , vel præmunendæ regalis potentiae , ejusdem exempli tribunatum ingressus , longè majora & acriora repetens , dabat civitatem omnibus Italicis : extendebat eam pene usque Alpes ; dividebat agros ; vetabat quemquam civem plus quingentis jugeribus habere , quod aliquando lege Liciniâ cautum erat ; nova constituebat portoria ; novis coloniis replebat provincias ; judicia a senatu transferebat ad equites ; frumentum plebi dare instituerat ; nihil immotum , nihil tranquillum , nihil quietum denique in eodem statu relinquebat ; quin alterum etiam continuavit tribunatum. Hunc L. Opimius consul , qui prætor Fregeillas exciderat , persecutus armis , unâque Fulvium Flaccum consularem ac triumphalem virum , æquè prava cupientem , quem C. Gracchus in locum Tiberii fratris

triumvirum nominaverat, eumque socium regalis assumpserat potentiae, morte afficit. Id unum nefarie ab Opimio proditum, quod capitis, non dicam Gracchi, sed civis Romani pretium se daturum, idque auro repensurum proposuit. Flaccus in Aventino, armatos ad pugnam ciens, cum filio majore jugulatus est. Gracchus profugiens, quum jam comprehenderetur ab iis, quos Opimius miserat, cervicem Euporo servo præbuit; qui non segnius se ipse interemit, quàm domino succurrerat. Quo die singularis Pomponii, equitis Romani, in Gracchum fides fuit: qui more Coclitis, sustentatis in ponte hostibus ejus, gladio se transfixit. Ut Tiberii Gracchi antea corpus, ita Caii, mirâ crudelitate victorum, in Tiberim dejectum est.

VII. Hunc Tib. Gracchi liberi, P. Scipionis Africani nepotes, vivâ adhuc matre Corneliâ Africani filiâ, viri optimis ingeniis malè usi, vitæ mortisque habuere exitum: qui si civilem dignitatis concupissent modum, quidquid tumultuando adipisci gestierunt, quietis obtulisset respublica. Huic atrocitati adjectum scelus unicum: quippe juvenis, specie excellens, necdum duodevicesimum transgressus annum, immunisque delictorum paternorum, Fulvii Flacci filius, quem pater legatum de con-

ditionibus miserat, ab Opimio interemptus est. Quem quum aruspex Tuscus amicus flentem in vincula duci vidisset: Quin tu hoc potius, inquit, facis? protinusque illiso capite in postem lapideum januæ carceris, effusoque cerebro, exspiravit. Crudelesque mox quæstiones in amicos clientesque Gracchorum habitæ sunt: sed Opimium, virum alioqui sanctum & gravem, damnatum postea judicio publico, memoria ipsius sævitiae, nulla civilis persecuta est misericordia. Eadem Rutilium Popillumque, qui consules asperri-
mè in Tib. Gracchi amicos sævierant, postea judiciorum publicorum meritò oppressit invidia. Rei tantæ parum ad notitiam pertinens interponetur. Hic est Opimius, a quo consule celeberrimum Opimiani vini nomen; quod jam nullum esse, spatio annorum colligi potest; quum ab eo sint ad te, Marce Vinici, consulem, anni centum quinquaginta unus. Factum Opimii, quòd inimicitiarum quæsita erat ultio, minor secuta auctoritas; & visa ultio, privato odio magis, quàm publicæ vindictæ data.

VIII. Subinde Porcio Marcioque co-
deducta colonia, *Narbo Martius*. Mandetur deinde memoriæ severitas judiciorum: quippe C. Cato consularis, M. Catonis

nepos, Africani sororis filius, repetundarum ex Macedonia damnatus est, quum lis ejus quater millibus aestimaretur, adeo illi viri magis voluntatem peccandi intuebantur, quàm modum; factaque ad consilium dirigebant, & quid, non in quantum admissum foret, aestimabant. Circa eadem tempora M. & C. Metelli fratres uno die triumphaverunt. Non minùs clarum exemplum, & adhuc unicum Fulvii Flacci, ejus, qui Capuam ceperat, filiorum, sed alterius in adoptionem dati, in collegio consulum fuit; adoptivus in Acidini Manlii familiam datus: nam censura Metellorum, patruium non germanorum fratrum fuit; quod solis contigerat Scipionibus. Tum Cimbri & Teutoni transcendere Rhenum, multis mox nostris suisque cladibus nobiles. Per eadem tempora clarus ejus Minucii, qui porticus, quæ hodieque celebres sunt, molitus est, e Scordiscis triumphus fuit.

IX. Eodem tractu temporum nituerunt oratores Scipio Æmilianus, Læliusque, Ser. Galba, duo Gracchi, C. Fannius, Carbo Papirius. Nec prætereundus Metellus Numidicus, & Scaurus, & ante omnes L. Crassus, & M. Antonius. Quorum ætati ingeniisque succedere C. Cæsar Strabo, P. Sulpicius: nam Q. Mucius juris

scientiâ, quàm propriæ eloquentiæ nomine, celebrior fuit. Clara etiam per idem ævi spatium fuere ingenia, in Togatis Afranii, in Tragœdiis Pacuvii atque Accii, usque in Græcorum ingeniorum comparisonem evecti, magnumque inter hos ipsos facientis operi suo locum; adeo quidem, ut in illis limæ, in hoc pene plus videatur fuisse sanguinis. Celebre & Lucilii nomen fuit, qui sub P. Africano, Numantino bello eques militaverat: quo quidem tempore juvenis adhuc Jugurtha, ac Marius, sub eodem Africano militantes, in iisdem castris didicere, quæ postea in contrariis facerent. Historiarum auctor jam tum Sisenna erat juvenis, sed opus belli civilis Sullani post aliquot annos ab eo seniore editum est. Vetusior Sisennâ fuit Cœlius, æqualis Sisennæ Rutilius, Claudiusque Quadrigarius, & Valerius Antias. Sanè non ignoremus, eâdem ætate fuisse Pomponium, sensibus celebrem, verbis rudem, & novitate inventi a se operis commendabilem.

X. Persequamur notam severitatem censorum, Cassii Longini, Cæpionisque, qui abhinc annos centum quinquaginta septem, Lepidum Æmilium augurem, quod sex millibus ædes conduxisset, adesse iusserunt. At nunc, si quis tanti habitet, vix

ut senator agnoscitur : adeo maturè a rectis in vitia , a vitiis in prava , a pravis in præcipitia pervenitur. Eodem tractu temporum & Domitii ex Arvernīs , & Fabii ex Allobrogibus victoria fuit nobilis. Fabio , Paulli nepoti , ex victoria cognomen Allobrogico inditum. Notetur Domitiæ familiæ peculiaris quædam , & ut clarissima , ita arctata numero felicitas. Quatuor ante hunc , nobilissimæ simplicitatis juvenem , Cn. Domitium , fuere singulis omnino parentibus geniti , sed omnes ad consulatum , sacerdotiaque , ad triumphi autem pene omnes pervenerunt insignia.

XI. Bellum deinde Jugurthinum gestum est per Q. Metellum , nulli secundum seculi sui. Hujus legatus fuit C. Marius , quem prædiximus , natus equestri loco , hirtus atque horridus , vitæque sanctus , quantum bello optimus , tantum pace pessimus , immodicus gloriæ , insatiabilis , impotens , semperque inquietus : hic per publicanos , aliosque in Africa negotiantes , criminatus Metelli lentitudinem , trahentis jam in tertium annum bellum , & naturalem nobilitatis superbiam , morandique in imperiis cupiditatem , effecit , ut , quum com-
meatu petito Romam venisset , consul crearetur , bellicque pene patrati a Metello , qui bis Jugurtham acie fuderat , summa

committeretur sibi. Metelli tamen & triumphus fuit clarissimus, & meritum; virtutique cognomen Numidici inditum. Ut paulò antè Domitiæ familiæ, ita Cæciliæ notanda claritudo est: quippe intra duodecim ferme annos hujus temporis consules fuere Metelli, aut censores, aut triumpharunt ampliùs duodecim; ut appareat, quemadmodum urbium imperiorumque, ita gentium nunc florere fortunam, nunc senescere, nunc interire.

XII. At C. Marius L. Sullam, jam tunc, ut præcaventibus fatis, copulatum sibi Quæstorem habuit, & per eum missum ad regem Bocchum, Jugurthâ rege, abhinc annos ferme centum triginta octo, potitus est: designatusque iterum consul, in Urbem reversus, secundi consulatûs initio Calend. Jan. eum in triumpho duxit. Effusa, ut prædiximus, immanis vis Germanarum gentium, quibus nomen Cimbris, ac Teutonis erat, quum Cæpionem Manliumque coff. & antè Carbonem Silanumque fudissent fugâssentque in Galliis, & exuissent exercitu; Scaurumque & Aurelium coff. & alios celeberrimi nominis viros trucidâssent; populus Romanus non alium repellendis tantis hostibus magis idoneum imperatorem, quàm Marium, est ratus. Tum multiplicati consulatus ejus.

Tertius in apparatu belli consumptus, quo anno Cn. Domitius tribunus plebis legem tulit, ut sacerdotes, quos antea collegæ sufficiebant, populus crearet. Quarto, trans Alpes circa Aquas Sextias cum Teutonis confligit; ampliùs centum quinquaginta millibus hostium priore ac postero die ab eo trucidatis, gensque excisa Teutonum. Quinto, circa Alpes in campis, quibus nomen erat Raudiis, ipse consul, & proconsul Q. Lutatius Catulus fortunatissimo decertavere prælio; cæsa, aut capta ampliùs centum millia hominum. Hâc victoriâ videtur meruisse Marius, ne ejus nati rempublicam pœniteret, ac bona malis repensâsse. Sextus consulatus veluti præmium ei meritorum datus. Non tamen hujus consulatûs fraudetur gloriâ; quo Servilii Glauciæ, Saturninique Apuleii furorem, continuatis honoribus rempublicam lacerantium, & gladiis quoque & cæde comitia discutientium, consul armis compescuit, hominesque exitiabiles in Hostilia curia morte multavit.

XIII. Deinde interjectis paucis annis, tribunatum iniit M. Livius Drusus, vir nobilissimus, eloquentissimus, sanctissimus, meliore in omnia ingenio animoque, quàm fortunâ usus. Qui quum senatui præcum restituere cuperet decus, & judicia

ab equitibus ad eum transferre ordinem [quippe eam potestatem nacti equites Gracchanis legibus, quum in multos clarissimos atque innocentissimos viros sævissent, tum Publium Rutilium, virum non seculi sui, sed omnis ævi optimum, interrogatum lege repetundarum, maximo cum gemitu civitatis, damnaverant] in iis ipsis, quæ pro senatu moliebatur, senatum habuit adversarium, non intelligentem, si qua de plebis commodis ab eo agerentur, veluti inescandæ illiciendæque multitudinis causâ fieri, ut minoribus perceptis majora permetteret. Denique ea fortuna Drusi fuit, ut malefacta collegarum, quàm ejus optimè ab ipso cogitata, senatus probaret magis; & honorem, qui ab eo deferebatur, sperneret; injurias, quæ ab aliis intuebantur, æquo animo reciperet; & hujus summæ gloriæ invideret, illorum modicam ferret.

XIV. Tum conversus Drusi animus, quando bene cœpta malè cèdebant, ad dandam civitatem Italiæ. Quod quum moliens revertisset e foro, immensâ illâ & incognitâ, quæ eum semper comitabatur, cinctus multitudine, in atrio domûs suæ cultello percussus, qui affixus lateri ejus relictus est, intra paucas horas decessit. Sed quum ultimum redderet spiritum, in-

tuens circumstantium mœrentiumque frequentiam, effudit vocem convenientissimam conscientiæ suæ : *Ecquando*, inquit, *propinqui amicique, similem mei civem habebit respublica ?* Hunc finem clarissimus juvenis vitæ habuit ; cujus morum minimè omittatur argumentum. Quum ædificaret domum in Palatio in eo loco, ubi est, quæ quondam Ciceronis, mox Censorini fuit, nunc Statilii Sisennæ est, promitteretque ei architectus, ita se eam ædificaturum, ut libera a conspectu, immunis ab omnibus arbitris esset, neque quisquam in eam despicere posset : *Tu verò*, inquit, *si quid in te artis est, ita compone domum meam, ut, quidquid agam, ab omnibus perspicì possit.*

XV. In legibus Gracchi inter perniciosissima numeraverim, quòd extra Italiam colonias posuit. Id majores [quum viderent tantò potentiorē Tyro Carthaginem, Massiliam Phocæâ, Syracusas Corintho, Cyzicum ac Byzantium Mileto genitali solo] diligenter vitaverant, ut cives Romanos ad censendum ex provinciis in Italiam revocaverint. Prima autem extra Italiam colonia Carthago condita est. Mors Drusi jam pridem tumescens bellum excitavit Italicum : quippe L. Cæsare, P. Rutilio coff. abhinc annos centum viginti,

universa Italia, quum id malum ab Asculanis ortum esset [quippe Servium prætorem Fonteiumque legatum occiderant] ac deinde a Marsis exceptum, in omnes penetrasset regiones, arma adversus Romanos cepit; quorum ut fortuna atrox, ita causa fuit iustissima; petebant enim eam civitatem, cujus imperium armis tuebantur: per omnes annos atque omnia bella, duplici numero se militum equitumque fungi, neque in ejus civitatis jus recipi, quæ per eos in idipsum pervenisset fastigium, per quod homines ejusdem & gentis & sanguinis, ut externos alienosque, fastidire posset. Id bellum ampliùs trecenta millia juventutis Italicæ abstulit. Clarissimi autem imperatores fuerunt Romani eo bello, Cn. Pompeius, Cn. Pompeii Magni pater, C. Marius, de quo prædiximus, L. Sulla, anno antè præturâ functus, Q. Metellus, Numidici filius, qui meritum cognomen Pii consecutus erat. Quippe expulsus civitate a L. Saturnino tribuno plebis, quod solus in leges ejus jurare noluerat, pietate suâ, auctoritate senatûs, consensu reipublicæ, restituit patrem. Nec triumphis honoribusque, quàm aut causâ exsilii, aut exsilio, aut reditu clarior fuit Numidicus.

XVI. Italicorum autem fuerunt celeberrimi duces, Silo Poppædus, Herius

Asinius , Insteius Cato , C. Pontidius ;
Telesinus Pontius , Marius Egnatius , Pa-
pius Mutilus. Neque ego verecundiâ do-
mestici sanguinis gloriæ quidquam , dum
verum refero , subtraham : quippe multum
Minatii Magii , atavi mei. Aſculanensis ,
tribuendum est memoriæ ; qui nepos Decii
Magii , Campanorum principis , celebra-
rimi & fidelissimi viri , tantam hoc bello
Romanis fidem præstitit , ut cum legione ,
quam ipse in Hirpinis conscripserat , Her-
culaneum simul cum T. Didio caperet ,
Pompeios cum L. Sulla oppugnaret , Co-
samque occuparet ; cujus de virtutibus
quum alii , tum maximè dilucidèque Q.
Hortensius in Annalibus suis retulit. Cu-
jus pietati plenam populus Romanus gra-
tiam retulit , ipsum viritum civitate donan-
do , duos filios ejus creando prætores ,
quum seni adhuc crearentur. Tam varia
atque atrox fortuna Italici belli fuit , ut
per biennium continuum duo Romani con-
sules , Rutilius ac deinde Cato Porcius ab
hostibus occiderentur ; exercitus Populi
Romani multis in locis funderentur , ut-
que ad saga iretur , diuque in eo habitu
maneretur. Caput imperii sui Corfinium
legerant , quod appellarent Italicum. Pau-
latim deinde recipiendo in civitatem , qui
arma aut non ceperant , aut deposuerant

maturiùs , vires refectæ sunt ; Pompeio Sullâque & Mario fluentem procumbentemque rempublicam restituentibus.

XVII. Finito ex maxima parte , nisi quæ Nolani belli manebant reliquiæ , Italico bello [quo quidem Romani victis afflictisque ipsi exarmati , quàm integris universis civitatem dare maluerunt] consulatum inierunt Q. Pompeius & L. Cornelius Sulla , vir qui neque ad finem victoriæ fatis laudari , neque post victoriam abundè vituperari potest. Hic natus familiâ nobili , sextus a Cornelio Rufino , qui bello Pyrrhi inter celeberrimos fuërat duces , quum familiæ ejus claritudo intermissa esset , diu ita se gessit , ut nullam petendi consulatum cogitationem habere videretur : deinde post præturam illustratus bello Italico , & antè in Gallia legatione sub Mario , quâ eminentissimos duces hostium fuderat , ex successu animum sumpsit ; petensque consulatum , pene omnium civium suffragiis factus est ; sed eum honorem undequinquagesimo ætatis suæ anno affecutus est.

XVIII. Per ea tempora Mithridates Ponticus rex , vir neque silendus neque dicendus sine cura , bello acerrimus , virtute eximius , aliquando fortunâ , semper animo maximus , consiliis dux , miles ma-

nu, odio in Romanos Annibal, occupatâ Asiâ, necatisque in ea omnibus civibus Romanis, quos quidem eâdem die atque horâ, redditis civitatibus litteris, ingenti cum pollicitatione præmiorum interimijusserat [quo tempore neque fortitudine adversus Mithridatem, neque fide in Romanos quisquam Rhodiis par fuit. Horum fidem Mitylenæorum perfidia illuminavit, qui M. Aquillium aliosque Mithridati victos tradiderunt; quibus libertas, in unius Theophanis gratiam, postea a Pompeio restituta est] quum terribilis Italiæ quoque videretur imminere, sorte obvenit Sullæ Asia provincia. Is egressus urbe, quum circa Nolum moraretur [quippe ea urbs pertinacissimè arma retinebat, exercituque Romano obsidebatur, velut pœniteret ejus fidei, quam omnium sanctissimam bello præstiterat Punico] P. Sulpicius tribunus plebis disertus, acer, opibus, gratiâ, amicitiiis, vigore ingenii atque animi celeberrimus, quum antea rectissimâ voluntate apud populum maximam quæsisset dignitatem, quasi pigeret eum virtutum suarum, & bene consulta ei malè cederent, subitò pravus & præceps, C. Mario, post septuagesimum annum omnia imperia & omnes provincias concupiscenti addixit, legemque ad populum tulit, quâ

Sullæ imperium abrogaretur , C. Mario bellum decerneretur Mithridaticum , aliasque leges perniciosas & exitiabiles , neque tolerandas liberæ civitati tulit : quin etiam Q. Pompeii consulis filium , eundemque Sullæ generum , per emissarios factionis suæ interfecit.

XIX. Tum Sulla contracto exercitu ad Urbem rediit , eamque armis occupavit ; duodecim auctores novarum pessimarumque rerum , inter quos Marium cum filio & P. Sulpicio , Urbe exturbavit , ac lege latâ exfules fecit. Sulpicium etiam affecuti equites , in Laurentinis paludibus jugulare ; caputque ejus erectum & ostentatum pro rostris , velut omen imminentis proscriptionis fuit. Marius post sextum consulatum annoque septuagesimo , nudus ac limo obrutus , oculis tantummodo ac naribus eminentibus , extractus arundineti , circa paludem Maricæ , in quam se , fugiens confectantes Sullæ equites , abdiderat , injecto in collum loro , in carcerem Minturnensium jussu Duumviri perductus est. Ad quem interficiendum missus cum gladio servus publicus , natione Germanus , qui fortè ab imperatore eo , bello Cimbrico , captus erat , ut agnovit Marium , magno ejulatu expromenti indignationem casûs tanti viri , abjecto gladio profugit

e carcere. Tum cives, ab hoste, misereri paulò antè principis viri docti, instructum eum viatico collatâque veste, in navem imposuerunt. At ille, affecutus circa Ænariam filium, cursum in Africam direxit; inopemque vitam in tugurio ruinarum Carthaginiensium toleravit: quum Marius aspiciens Carthaginem, illa intuens Marium, alter alteri possent esse solatio.

XX. Hoc primùm anno, sanguine consulis Romani militis imbutæ manus sunt: quippe Pompeius collega Sullæ, ab exercitu Cn. Pompeii proconsulis, seditione, sed quam dux creaverat, interfectus est. Non erat Mario Sulpicioque Cinna temperatior: itaque quum ita civitas Italiæ data esset, ut in octo tribus contribuerentur novi cives, ne potentia eorum & multitudo veterum civium dignitatem frangeret, plusque possent recepti in beneficium, quàm auctores beneficii; Cinna in omnibus tribubus eos se distributurum pollicitus est. Quo nomine ingentem totius Italiæ frequentiam in Urbem acciverat: e qua pulsus collegæ optimatiumque viribus, quum in Campaniam tenderet, ex auctoritate senatûs consulatus ei abrogatus est, suffectusque in ejus locum L. Cornelius Merula flamen Dialis. Hæc injuria homine, quàm exemplo dignior fuit. Tum

Cinna, corruptis primò centurionibus ac tribunis, mox etiam spe largitionis militibus, ab eo exercitu, qui circa Nolum erat, receptus est. Is, quum universus in verba ejus jurasset, retinens insignia consulatûs, patriæ bellum intulit, fretus ingenti numero novorum civium, e quorum delectu trecentas ampliùs cohortes conscripserat, ac triginta legionum instar impleverat. Opus erat partibus, auctoritate, gratiâ; cujus augendæ C. Marium cum filio de exsilio revocavit, quique cum iis pulsi erant.

XXI. Dum bellum autem infert patriæ Cinna, Cn. Pompeius Magni pater [cujus præclarâ operâ bello Marsico præcipuè circa Picenum agrum, ut præscripsimus, usa erat respublica, quique Asculum ceperat, circa quam urbem, quum in multis aliis regionibus exercitus dispersi forent, quinque & septuaginta millia civium Romanorum, ampliùs sexaginta millia Italicorum unâ die conflixerant] frustratus spe continuandi consulatûs, ita se dubium mediumque partibus præstitit, ut omnia ex proprio usu ageret, temporibusque insidiari videretur, & huc atque illuc, unde spes major affuisset potentiæ, se exercitumque deflecteret: sed ad ultimum magno atrocique prælio cum Cinna conflixit. Cu-

jus commissi patratique sub ipsis mœnibus oculisque urbis Romanæ , pugnantibus spectantibusque quàm fuerit eventus exitiabilis , vix verbis exprimi potest. Post hoc , quum utrumque exercitum , velut parum bello exhaustum , laceraret pestilentia , Cn. Pompeius decessit : cujus interitûs voluptas , amissorum aut gladio aut morbo civium pene damno repensata est ; populusque Romanus , quam vivo iracundiam debuerat , in corpus mortui contulit. Seu duæ seu tres Pompeiorum fuere familiæ , primus ejus nominis , ante annos ferè centum sexaginta octo , Q. Pompeius cum Cn. Servilio consul fuit. Cinna & Marius , haud incruentis utrimque certaminibus editis , Urbem occupaverunt ; sed prior ingressus Cinna , de recipiendo Mario legem tulit.

XXII. Mox C. Marius pestifero civibus suis reditu intravit mœnia. Nihil illâ victoriâ fuisset crudelius , nisi mox Sullana esset secuta : neque licentiâ in mediocres sævitum , sed excelsissimi quoque atque eminentissimi civitatis viri variis suppliciorum generibus affecti. In iis consul Octavius , vir lenissimi animi , jussu Cinnæ interceptus est. Merula autem , qui se sub adventum Cinnæ consulatu abdicaverat , incisis venis superfusoque altaribus sanguine ,
quos

quos sæpe pro salute reipublicæ flamen Dialis precatus erat Deos , eos in execrationem Cinnæ partiumque ejus tum precatus , optimè de republica meritum spiritum reddidit. M. Antonius , princeps civitatis atque eloquentiæ , gladiis militum , quos ipsos facundiâ suâ moratus erat , jussu Marii Cinnæque confossus est. Q. Lutatius Catulus , & aliarum virtutum , & belli Cimbrici gloriâ , quæ illi cum Mario communis fuerat , celeberrimus , quum ad mortem conquireretur , conclusit se loco nuper calce arenâque perpolito , ilatoque igni qui vim odoris excitaret , simul exitiali hausto spiritu , simul incluso suo , mortem magis voto quàm arbitrio inimicorum obiit. Omnia erant præcipitia in republica , nec tamen adhuc quisquam inveniebatur , qui bona civis Romani aut donare auderet , aut petere sustineret. Postea id quoque accessit , ut sævitiae causam avaritia præberet , & modus culpæ ex pecuniæ modo constitueretur ; & qui fuisset locuples , fieret nocens , sui quisque periculi merces foret ; nec quidquam videretur turpe , quod esset quæstuosum.

XXIII. Secundum deinde consulatum Cinna , & septimum Marius in priorum dedecus iniit : cujus initio morbo oppressus decessit , vir in bello hostibus ; in otio

civibus infestissimus, quietisque impatentissimus. In hujus locum suffectus Valerius Flaccus turpissimæ legis auctor, quâ creditoribus quadrantem solvi jusserat: cujus facti merita eum pœna intra biennium consecuta est. Dominante in Italia Cinnâ, major pars nobilitatis ad Sullam in Achaïam, ac deinde post in Asiam per fugit. Sulla interim cum Mithridatis præfectis, circa Athenas Bœotiamque & Macedoniam ita dimicavit, ut & Athenas reciperet, & plurimo circa multiplices Piræei portus munitiones labore expleto, amplius ducenta millia hostium interficeret, nec minùs multa caperet. Si quis hoc rebellandi tempus, quo Athenæ oppugnatae a Sulla sunt, imputat Atheniensibus, nimirum veri vetustatisque ignarus est: adeo enim certa Atheniensium in Romanos fides fuit, ut semper & in omni re quidquid sincerâ fide gereretur, id Romani Atticâ fieri prædicarent. Ceterum tum oppressi Mithridatis armis homines miserimæ conditionis, quum ab inimicis tenerentur, oppugnabantur ab amicis; & animos extra mœnia, corpora necessitati fervientes intra muros habebant. Transgressus deinde in Asiam Sulla, parentem ante omnia, supplicemque Mithridaten invenit; quem multatum pecuniâ ac parte na-

vium , Asiâ omnibusque aliis provinciis , quas armis occupaverat , decedere coëgit , captivos recepit , in perfugas noxiosque animadvertit , paternis , id est , Ponticis finibus contentum esse jussit.

XXIV. C. Flavius Fimbria , qui præfectus equitum ante adventum Sullæ , Valerium Flaccum consularem virum interfecerat , exercituque occupato imperator appellatus , fortè Mithridaten pepulerat prælio , sub adventum Sullæ se ipse interemit , adolescens , quæ pessimè ausus erat , fortiter exsecutus. Eodem anno P. Lænas tribunus plebis Sex. Lucilium , qui priore anno tribunus plebis fuerat , saxo Tarpeio dejecit ; & quum collegæ ejus , quibus diem dixerat , metu ad Sullam profugissent , aquâ ignique iis interdixit. Tum Sulla , compositis transmarinis rebus , quum ad eum , primum omnium Romanorum , legati Parthorum venissent , & in iis quidam Magi ex notis corporis respondissent , cœlestem ejus vitam & memoriam futuram ; revectus in Italiam , haud plura quàm triginta armatorum millia adversum ducenta millia amplius hostium exposuit Brundisii. Vix quidquam in Sullæ operibus clarius dixerim , quàm quòd , quum per triennium Cinnanæ Marianæque partes Italiam obsiderent , neque illaturum se bellum iis

dissimulavit ; nec , quod erat in manibus ; omisit , existimavitque antè frangendum hostem , quàm ulciscendum civem ; repulsoque externo metu , ubi quod alienum esset vicisset , superaret quod erat domesticum. Ante adventum L. Sullæ , Cinna seditione ortâ ab exercitu interemptus est ; vir dignior , qui arbitrio victorum moretur , quàm iracundiâ militum : de quo verè dici potest , ausum eum , quæ nemo auderet bonus , perfecisse , quæ a nullo nisi fortissimo perfici possent ; & fuisse eum in consultando temerarium , in exsequendo virum. Carbo , nullo suffecto collegâ , solus toto anno consul fuit.

XXV. Putares , Sullam venisse in Italiam , non belli vindicem , sed pacis auctorem : tanta cum quiete exercitum per Calabriam Apuliamque , cum singulari cura frugum , agrorum , hominum , urbium , perduxit in Campaniam , tentavitque justis legibus & æquis conditionibus bellum componere : sed iis , quibus & pessima & immodica cupiditas erat , non poterat pax placere. Crescebat interim in dies Sullæ exercitus , confluentibus ad eum optimo quoque & sanissimo. Felici deinde circa Capuam eventu Scipionem Norbanumque consules superat : quorum Norbanus acie victus ; Scipio ab exercitu suo

desertus ac proditus , inviolatus a Sulla dimissus est. Adeo enim Sulla dissimilis fuit bellator ac victor , ut dum vincit iustissimo lenior , post victoriam audito fuerit crudelior : nam & consulem , ut prædiximus , exarmatum, Q. Sertorium , pro quantum mox belli facem ! & multos alios , potitus eorum , dimisit incolumes : credo , ut in eodem homine duplicis ac diversissimi animi conspiceretur exemplum. Post victoriam , quâ descendens montem Tifata cum C. Norbano concurrerat Sulla , grates Dianæ , cujus numini regio illa sacra est , solvit ; aquas salubritate mendentisque corporibus nobiles , agrosque omnes addixit Deæ. Hujus gratæ religionis memoriam & inscriptio templi affixa post hodieque , & tabula testatur ærea intra ædem.

XXVI. Inde consules Carbo tertium , & C. Marius , septies Consulis filius , annos natus viginti sex , vir animi magis quam ævi paterni , multa fortiterque molitus , neque usquam inferior nomine consulis , apud Sacriportum pulsus a Sulla acie , Præneste , quod antè naturâ munitum præsidiiis firmaverat , se exercitumque contulit. Ne quid unquam malis publicis deesset , in qua civitate semper virtutibus certatum erat , certabatur sceleribus ; optimusque

sibi videbatur, qui fuerat pessimus. Quippe dum ad Sacriportum dimicatur, Damasippus prætor Domitium, Scævola etiam Pontificem maximum, & divini humanique juris auctorem celeberrimum, & C. Carbonem prætorium, consulis fratrem, & Antistium ædilitium, velut faventes Sullæ partibus, in curia Hostilia trucidavit. Non perdat nobilissimi facti gloriam Calpurnia, Bestiæ filia, uxor Antistii, quæ jugulato, ut prædiximus, viro, gladio se ipsam transfixit. Quantum hujus gloriæ famæque accessit ! nunc virtute eminet, patriâ latet.

XXVII. At Pontius Telesinus dux Samnitium, vir domi bellicque fortissimus, penitusque Romano nomini infestissimus, contractis circiter quadraginta millibus fortissimæ pertinacissimæque in retinendis armis juventutis, Carbone ac Mario consulibus, abhinc annos centum undecim, Calendis Novembribus, ita ad portam Collinam cum Sulla dimicavit, ut ad summum discrimen & eum & rempublicam perduceret : quæ non majus periculum adiit, Annibalis intra tertium milliarium castra conspicata, quàm eo die, quo circumvolans ordines exercitûs sui Telesinus, dictitantque adesse Romanis ultimum diem, vociferabatur eruendam delendamque Ur-

bem ; adjiciens , numquam defuturos rap-
 tores Italicæ libertatis lupos , nisi sylva ,
 in quam refugere solerent , esset excisa.
 Post primam demum horam noctis & Ro-
 mana acies respiravit , & hostium cessit.
 Telesinus postera die semianimis repertus
 est , victoris magis quàm morientis vultum
 præferens ; cujus abscissum caput ferri
 gestarique circa Præneste Sulla jussit. Tum
 demum desperatis rebus suis C. Marius
 adolescens per cuniculos , qui miro opere
 fabricati in diversas agrorum partes ferunt ,
 conatus erumpere , quum foramine e terra
 emersisset , a dispositis in idipsum inter-
 emptus est. Sunt , qui suâ manu , sunt qui
 concurrentem mutuis ictibus cum minore
 fratre Telesino , unâ obfesso & erumpente ,
 occubuisse prodiderint. Utcumque cecidit ,
 hodieque tantâ patris imaginè non obscura-
 tur ejus memoria ; de quo juvenè quid existi-
 maverit Sulla in promptu est : occiso enim
 demum eo , felicitis nomen assumpsit , quod
 quidem usurpasset justissimè , si eundem
 & vincendi & vivendi finem habuisset.
 Oppugnationi autem Prænestis ac Marii
 præfuerat Ofella Lucretius , qui quum antè
 Marianarum fuisset partium , prætor ad
 Sullam transfugerat. Felicitatem diei , quò
 Samnitium Telesinique pulsus est exerci-
 tus , Sulla perpetuâ ludorum Circensium

honoravit memoriâ , quibus sine nomine Sullanæ victoriæ celebrantur.

XXVIII. Paulò antè quàm Sulla ad Sacriportum dimicaret , magnificis præliis partium ejus viri hostium exercitum fuderant ; duo Servilii apud Clusium , Metellus pius apud Faventiam , M. Lucullus circa Fidentiam. Videbantur finita belli civilis mala , quum Sullæ crudelitate aucta sunt : quippe dictator creatus (cujus honoris usurpatione per annos centum viginti intermissa ; nam proximus post annum quàm Annibal Italiâ excefferat : uti appareat populum Romanum usum dictatoris non tam desiderasse , quàm timuisse potestatem) imperio , quo priores ad vindicandam maximis periculis rempublicam usi fuerant , immodicæ crudelitatis licentiâ usus est. Primus ille , & utinam ultimus ! exemplum proscriptionis invenit , ut , in qua civitate petulantis convicii judicium histrioni exoleto redditur , in ea jugulati civis Romani publicè constituere-tur auctoramentum , plurimumque haberet , qui plurimos interemisset ; neque occisi hostis , quàm civis , uberius foret præmium ; fieretque quisque merces mortis suæ. Nec tamen in eos , qui contrà arma tulerant , sed in multos infantes sævitum : adjectum etiam , ut bona proscriptorum

venirent ; exclusique paternis opibus liberi, etiam petendorum honorum jure prohiberentur ; simulque , quod indignissimum est , senatorum filii & onera ordinis sustinerent , & jura perderent.

XXIX. Sub adventum in Italiam L. Sullæ , Cn. Pompeius , ejus Cn. Pompeii filius, quem magnificentissimas res in consulatu gessisse bello Marsico prædiximus , viginti tres annos natus , abhinc annos centum tredecim , privatis ut opibus , ita consiliis magna ausus , magnificèque conata exsecutus , ad vindicandam restituendamque dignitatem patriæ , firmum ex agro Piceno , qui totus paternis ejus clientelis refertus erat , contraxit exercitum. Cujus viri magnitudo multorum voluminum instar exigit ; sed operis modus paucis eam narrari jubet. Fuit hic genitus matre Luciliâ , stirpis senatoriæ , formâ excellens , non eâ , quâ flos commendatur ætatis , sed ex dignitate constanti , quæ in illam conveniens amplitudinem , fortunam quoque ejus ad ultimum vitæ comitata est diem : innocentia eximius , sanctitate præcipuus , eloquentia mediis ; potentiæ , quæ honoris causâ ad eum deferretur , non ut ab eo occuparetur , cupidissimus ; dux bello peritissimus ; civis in toga (nisi ubi vereretur ne quem haberet parem) mo-

deftissimus ; amicitiarum tenax , in offensis exorabilis , in reconcilianda gratia fidelissimus , in accipienda satisfactione facillimus ; potentiâ suâ numquam aut rarò ad impotentiam usus , pene omnium vitiorum expers , nisi numeraretur inter maxima , in civitate libera dominaque gentium , indignari , quum omnes cives jure haberet pares , quemquam æqualem dignitate conspiciere. Hic a toga virili assuetus commilitio prudentissimi ducis parentis sui , bonum & capax recta discendi ingenium singulari rerum militarium prudentiâ excoluit , ut a Sertorio Metellus laudaretur magis , Pompeius timeretur validiùs.

XXX. Tum M. Perperna prætorius e proscriptis , gentis clarioris quàm animi , Sertorium inter cœnam Oscæ interemit ; Romanisque certam victoriam , partibus suis excidium , sibi turpissimam mortem pessimo auctoravit facinore. Metellus & Pompeius ex Hispanis triumpharunt ; sed Pompeius hoc quoque triumpho , adhuc eques Romanus , ante diem quàm consulatum iniret , curru Urbem inVectus est. Quem virum quis non miretur , per tot extraordinaria imperia in summum fastigium vectum , iniquo tulisse animo , C. Cæsaris in altero consulatu petendo senatum populumque Romanum rationem ha-

bere ? Adeo familiare est hominibus , omnia sibi ignoscere , nihil aliis remittere ; & invidiam rerum non ad causam , sed ad voluntatem personasque dirigere. Hoc consulatu Pompeius tribunitiam potestatem restituit : cujus Sulla imaginem sine re reliquerat. Dum Sertorianum bellum in Hispania geritur , sexaginta quatuor fugitivi e ludo gladiatorio Capuâ profugientes , duce Spartaco , raptis ex ea urbe gladiis , primò Vesuvium montem petiere ; mox , crescente in dies multitudine , gravibus variisque casibus affecere Italiam : quorum numerus in tantum adolevit , ut quâ ultimò dimicavere acie , quadraginta millia hominum se Romano exercitui opposuerint. Hujus patrati gloria penes M. Crassum fuit , mox Romanorum omnium principem.

XXXI. Converterat Cn. Pompeii persona totum in se terrarum orbem , & per omnia major cive habebatur : quum consul perquam laudabiliter jurasset , *se in nullam provinciam ex eo magistratu iturum* , idque servâisset , post biennium A. Gabinius tribunus legem tulit , ut , quum belli more , non latrociniorum , orbem classibus jam , non furtivis expeditionibus , piratæ terrerent , quasdam etiam Italiæ urbes diripuissent , Cn. Pompeius ad eos opprimendos mitteretur , essetque

ei imperium æquum in omnibus provinciis cum proconsulibus usque ad quinquagesimum milliarium a mari. Quo Senatûs-consulto pene totius terrarum orbis imperium uni viro deferrebat : sed tamen idem hoc ante biennium in M. Antonii prætura decretum erat. Sed interdum persona, ut exemplo nocet, ita invidiam auget aut levat. In Antonio homines æquo animo passi erant. Rarò enim invidetur eorum honoribus, quorum vis non timetur; contra in iis homines extraordinaria reformidant, qui ea suo arbitrio aut deposituri, aut retenturi videntur, & modum in voluntate habent. Dissuadebant optimates, sed consilia impetu victa sunt.

XXXII. Digna est memoriâ Q. Catuli quum auctoritas tum verecundia : qui quum dissuadens legem in concione dixisset, esse quidem præclarum virum Cn. Pompeium, sed nimium jam liberæ reipublicæ, neque omnia in uno reponenda : adjecissetque, si quid huic acciderit, quem in ejus locum substituetis ? succlamavit universa concio, *Te, Q. Catule*. Tum ille victus consensu omnium, & tam honorifico civitatis testimonio, e concione discessit. Hic hominis verecundiam, populi justitiam mirari libet : hujus, quòd non ultrà contendit; plebis, quòd dissuadentem &

adversarium voluntatis suæ vero testimonio fraudare noluit. Per idem tempus Cotta judicandi munus, quod C. Gracchus ereptum senatui ad equites, Sulla ab illis ad senatum transtulerant, æqualiter inter utrumque ordinem partitus est; & Otho Roscius lege suâ equitibus in theatro loca restituit. At Cn. Pompeius, multis & præclaris viris in id bellum assumptis, descriptoque in omnes recessus maris præsidio navium, brevi, inexsuperabili manu, terrarum orbem liberavit, prædonesque per multa prælia multis locis victos, circa Ciliciam classe aggressus, fudit ac fugavit; & quò maturius bellum tam latè diffusum conficeret, reliquias eorum contractas, in urbibus remotoque a mari loco, in certa sede constituit. Sunt qui hunc carpant; sed quamquam in auctore satis rationis est, tamen ratio quemlibet magnum auctorem faceret: datâ enim facultate sine rapto vivendi, rapinis arcuit.

XXXIII. Quum esset in fine bellum Piraticum, quum & L. Lucullus (qui ante septem annos ex consulatu sortitus Asiam, Mithridati oppositus erat, magnasque ac memorabiles res ibi gesserat, Mithridaten sæpe multis locis fuderat, egregiâ Cyzicum liberarat victoriâ, Tigranen regum maximum in Armenia vicerat, ultimam-

que bello manum pene magis noluerat imponere quàm non potuerat ; qui alioqui per omnia laudabilis , & bello pene invictus , pecuniæ expellebatur cupidine) idem bellum adhuc administraret ; Manilius tribunus plebis , semper venalis & alienæ minister potentiae , legem tulit , ut bellum Mithridaticum per Cn. Pompeium administraretur. Accepta ea , magnisque certatum inter imperatores jurgiis , quum Pompeius Lucullo infamiam pecuniæ , Lucullus Pompeio interminatam cupiditatem objiceret imperii ; neuterque ab eo , quo arguebatur , mendacii argui posset : nam neque Pompeius , ut primum ad rempublicam aggressus est , quemquam animo parem tulit ; & in quibus rebus primus esse debebat , solus esse cupiebat : neque eo viro quisquam aut alia omnia minus , aut gloriam magis concupiit : in appetendis honoribus immodicus , in gerendis recundissimus , ut qui eos , ut libentissimè iniret , ita finiret æquo animo ; & , quod cupisset arbitrio suo sumere , alieno deponeret. Et Lucullus , summus alioqui vir , profusæ hujus in ædificiis convictibusque & apparatus luxuriæ primus auctor fuit : quem ob injectas moles mari , & receptum suffossis montibus in terras mare , haud infacètè Magnus Pompeius Xerxen togatum vocare assueverat.

XXXIV. Per id tempus a Q. Metello Creta insula in populi Romani potestatem redacta est, quæ ducibus Panare & Lasthene, viginti quatuor millibus juvenum coactis, velocitate pernicibus, armorum laborumque patientissimis, sagittarum usu celeberrimis, per triennium Romanos exercitus fatigaverat. Ne ab hujus quidem usura gloriæ temperavit animum Cn. Pompeius, quin victoriæ partem conaretur vindicare. Sed & Luculli & Metelli triumphum quum ipsorum singularis virtus, tum etiam invidia Pompeii apud optimum quemque fecit favorabilem. Per hæc tempora M. Cicerro, qui omnia incrementa sua sibi debuit: vir novitatis nobilissimæ, & ut vitâ clarus, ita ingenio maximus; qui effecit, ne quorum arma viceramus, eorum ingenio vinceremur; consul Sergii Catilinæ Lentulique & Cethegi & aliorum utriusque ordinis virorum conjurationem singulari virtute, constantiâ, vigiliâ, curâque aperuit. Catilina metu consularis imperii urbe pulsus est; Lentulus consularis & prætor iterum, Cethegusque & alii clari nominis viri, auctore senatu, jussu consulis in carcere necati sunt.

XXXV. Ille senatûs dies, quo hæc acta sunt, virtutem M. Catonis jam multis in rebus conspicuam atque prænitentem

altissimè illuminavit. Hic genitus proavo M. Catone , principe illo familiæ Porciæ , homo virtuti simillimus , & per omnia ingenio Diis quàm hominibus propior ; qui numquam rectè fecit , ut facere videretur , sed quia aliter facere non poterat , cuique id solum visum est rationem habere , quod haberet justitiam ; omnibus humanis vitiis immunis , semper fortunam in sua potestate habuit. Hic tribunus plebis designatus , adhuc admodum adolescens , quum alii suaderent , ut per municipia Lentulus conjuratique custodirentur , pene inter ultimos interrogatus sententiam , tantâ vi animi atque ingenii invecus est in conjurationem , ut ardore oris orationem omnium , lenitatem suadentium , societate consilii suspectam fecerit : sic impendentia ex ruinis incendiisque Urbis , & commutatione statûs publici pericula exposuit , ita consulis virtutem amplificavit , ut universus senatus in ejus sententiam transiret , animadvertendumque in eos , quos prædiximus , censeret ; majorque pars ordinis ejus Catonem prosequerentur domum. At Catilina non segniùs vota obiit , quàm sceleris conandi consilia inierat : quippe fortissimè dimicans , quem spiritum supplicio debuerat , prælio reddidit.

XXXVI. Consulatus Ciceronis non

mediocre adjecit decus natus eo anno Divus Augustus, abhinc annos octoginta duos ; omnibus omnium gentium viris magnitudine suâ inducturus caliginem. Jam pene supervacaneum videri potest, eminentium ingeniorum notare tempora : quis enim ignorat diremptos gradibus ætatis floruisse hoc tempore Ciceronem, Hortensium, sanèque Crassum, Catonem, Sulpicium ; moxque Brutum, Calidum, Coelium, Calvum, & proximum Ciceroni Cæsarem ; eorumque velut alumnos Corvinum ac Pollionem Asinium, æmulumque Thucydidis Sallustium ; auctoresque carminum Varronem ac Lucretium, neque ullo in suscepti operis sui carmine minorem Catullum. Pene stulta est inhærentium oculis ingeniorum enumeratio, inter quæ maximè nostri ævi eminent princeps carminum Virgilius Rabiriusque, & consecutus Sallustium Livius, Tibullusque & Naso, perfectissimi in forma operis sui : nam vivorum ut magna admiratio, ita censura difficilis est.

XXXVII. Dum hæc in Urbe Italiaque geruntur, Cn. Pompeius memorabile adversus Mithridaten, qui post Luculli profectionem magnas novi exercitûs vires reparaverat, bellum gessit. At rex fusus fugatusque, & omnibus exutus copiis, Ar-

meniam Tigranenque generum petit, regem ejus temporis, nisi quàm Luculli armis erat infractus, potentissimum. Simul itaque duos persecutus Pompeius, intravit Armeniam. Prior filius Tigranis, sed discors patri, pervenit ad Pompeium; mox ipse supplex & præsens se regnumque ditioni ejus permisit, præfatus: neminem alium neque Romanum neque ullius gentis virum futurum fuisse, cujus se societati commissurus foret, quàm Cn. Pompeium: proinde omnem sibi vel adversam vel secundam, cujus auctor ille esset, fortunam tolerabilem futuram: non esse turpe ab eo vinci, quem vincere esset nefas: neque ei inhonestè aliquem submitti, quem fortuna super omnes extulisset. Servatus regi honos imperii, sed multato ingenti pecuniâ; quæ omnis, sicuti Pompeio moris erat, redacta in quæstoris potestatem, ac publicis descripta litteris. Syria aliæque, quas occupaverat, provinciæ ereptæ; & aliæ restitutæ populo Romano, aliæ tum primùm in ejus potestatem redactæ, ut Syria, quæ tum primùm facta est stipendiaria. Finis imperii regii terminatus Armeniâ.

XXXVIII. Haud absurdum videtur propositi operis regulæ, paucis percurrere, quæ cujusque ductu gens ac natio re-

data in formulam provinciæ , stipendia
 pacta sit ; notabimus , ut quæ facilius , quàm
 partibus , simul universa conspici possint.
 Primus in Siciliam trajecit exercitum con-
 sul Claudius , & provinciam eam post an-
 nos fermè quinquaginta duos , captis Sy-
 racusis , fecit Marcellus Claudius. Primus
 Africam Regulus , nono fermè anno primi
 Punici belli ; sed post ducentos quatuor
 annos Publius Scipio Æmilianus , erutâ
 Carthagine , abhinc annos centum octo-
 ginta duos , Africam in formulam redegit
 provinciæ. Sardinia inter primum , & se-
 cundum bellum Punicum , ductu T. Manlii
 consulis , certum recepit imperii jugum.
 Immane bellicæ civitatis argumentum ,
 quòd semel sub Regibus , iterum hoc T.
 Manlio consule , tertio Augusto principe ,
 certæ pacis argumentum Janus Geminus
 clausus dedit. In Hispanias primi omnium
 duxere exercitus Cn. & P. Scipiones initio
 secundi belli Punici , abhinc annos ducen-
 tos quinquaginta : inde variè possessa , &
 sæpe amissa partibus , universa ductu Au-
 gusti facta stipendiaria est. Macedoniam
 Paullus , Mummius Achaiam , Fulvius no-
 bilior subegit Ætoliam : Asiam L. Scipio
 Africani frater eripuit Antiocho , sed be-
 neficio senatûs populique Romani , mox
 ab Attalis possessam regibus , M. Perper-

na, capto Aristonico, fecit tributariam. Cypro devictâ nullis assignanda gloria est : quippe senatusconsulto, ministerio Catonis, regis morte, quam ille conscientia acciverat, facta provincia est. Creta, Metelli ductu, longissimæ libertatis fine multata. Et Syria Pontusque Cn. Pompeii virtutis monumenta sunt

XXXIX. Gallias primùm, Domitio & Fabio nepote Paulli, qui Allobrogicus vocatus est, intratas cum exercitu, magnâ mox clade nostrâ sæpe & affectavimus & amisimus : sed fulgentissimum C. Cæsaris opus in iis conspicitur ; quippe ejus ductu auspiciisque infractæ, pene idem, quod totus terrarum orbis, ignavum conferunt stipendium. Ab eodem facta Numidia. Ciliciam perdomuit Isauricus ; & post bellum Antiochinum, Vulso Manlius Gallo-Græciam. Bithynia, ut prædiximus, testamento Nicomedis relicta hereditaria. Divus Augustus præter Hispanias aliasque gentes, quarum titulis forum ejus prænitet, pene idem, factâ Ægypto stipendiariâ, quantum pater ejus Galliâ, in ærarium redditus contulit. At Tib. Cæsar, quam certam Hispanis parendi confessionem extorserat parens, Illyriis Dalmatisque extorsit. Rhætiâ autem & Vindelicos ac Noricos, Pannoniamque & Scordiscos,

novas imperio nostro subjunxit provincias. Ut has armis , ita auctoritate Cappadociam populo Romano fecit stipendiariam. Sed revertamur ad ordinem.

XL. Secuta deinde Cn. Pompeii militia , gloriæ laborisne majoris incertum est. Penetratæ cum victoria Media , Albania , Iberia ; ac deinde flexum agmen ad eas nationes , quæ dextra atque intima Ponti incolunt , Colchos , Heniochosque , & Achæos ; & oppressus auspiciis Pompeii , insidiis filii Pharnacis , Mithridates , ultimus omnium juris sui regum , præter Parthicos. Tum victor omnium , quas adiebat , gentium Pompeius , suoque & civium voto major , & per omnia fortunam hominis egressus , revertit in Italiam. Cujus reditum favorabilem opinio fecerat : quippe plerique non sine exercitu venturum in Urbem affirmabant , & libertati publicæ statuturum arbitrio suo modum. Quò magis hoc homines timuerant , eò gratior civilis tanti imperatoris reditus fuit : omni quippe Brundisii dimisso exercitu , nihil præter nomen imperatoris retinens , cum privato comitatu , quem semper illi vacare moris fuit , in Urbem rediit ; magnificentissimumque de tot regibus per biduum egit triumphum , longèque majorem omni ante se illatâ pecuniâ in ærarium , præter-

quam a Paulo , ex manubiis intulit. Absente Cn. Pompeio , T. Ampius & T. Labienus tribuni plebis legem tulerunt , ut is ludis Circensibus coronâ aureâ , & omni cultu triumphantium uteretur , scenicis autem prætextâ coronâque laureâ. Id ille non plus quàm semel (& hoc sanè nimium fuit) usurpare sustinuit. Hujus viri fastigium tantis auctibus fortuna extulit , ut primùm ex Africa , iterum ex Europa , tertio ex Asia triumpharet ; & quot partes terrarum orbis sunt , totidem faceret monumenta victoriæ suæ. Numquam eminentia invidiâ carent. Itaque & Lucullus , memor tamen acceptæ injuriæ , & Metellus Creticus , non injustè querens (quippe ornamentum triumphii ejus captivos duces Pompeius subduxerat) & cum iis pars optimatum refragabatur , ne aut promissa civitatibus a Pompeio , aut benemeritis præmia , ad arbitrium ejus , persolverentur.

XLI. Secutus deinde est consulatus C. Cæsaris , qui scribenti manum injicit , & quamlibet festinantem in se morari cogit. Hic nobilissimâ Juliorum genitus familiâ , & quod inter omnes antiquissimos constabat , ab Anchise ac Venere deducens genus , formâ omnium civium excellentissimus , vigore animi acerrimus , muni-

ficentiæ effusissimus , animo super humanam & naturam & fidem evectus ; magnitudine cogitationum , celeritate bellandi , patientiâ periculorum , Magno illi Alexandro , sed sobrio , neque iracundo simillimus ; qui denique semper & somno & cibo in vitam non in voluptatem uteretur ; quum fuisset C. Mario sanguine conjunctissimus , atque idem Cinnæ gener , cujus filiam ut repudiaret nullo metu compelli potuit (quum M. Piso consularis Anniam , quæ Cinnæ uxor fuerat , in Sullæ dimisisset gratiam) habuissetque ferè octodecim annos eo tempore , quo Sulla rerum potitus est ; magis ministris Sullæ adjutoribusque partium , quàm ipso , conquirentibus eum ad necem , mutatâ veste , dissimilemque fortunæ suæ indutus habitum , nocte Urbe elapsus est. Idem postea admodum juvenis , quum a piratis captus esset , ita se per omne spatium , quo ab eis retentus est , apud eos gessit , ut pariter iis terrori venerationique esset ; neque umquam aut nocte aut die (cur enim quod vel maximum est , si narrari verbis speciosis non potest , omittatur ?) aut exalcearetur aut discingeretur ; in hoc scilicet , ne si quando aliquid ex solito variaret , suspectus iis , qui oculis tantummodo eum custodiebant , foret.

XLII. Longum est narrare, quid & quoties ausus sit; quanto opere conata ejus, qui obtinebat Asiam magistratus populi Romani, metu suo destituerit. Illud referatur, documentum tanti mox evasuri viri. Quæ nox eam diem secuta est, quâ publicâ civitatum pecuniâ redemptus est [ita tamen ut cogeret antè obsides a piratis civitatibus dari] contractâ classe, & privatus, & tumultuariâ, in vectus in eum locum, in quo ipsi prædones erant, partem classis fugavit, partem mersit, aliquot naves multosque mortales cepit; lætusque nocturnæ expeditionis triumpho ad suos reversus est, mandatisque custodiæ quos ceperat, in Bithyniam perrexit ad proconsulem Junium [is enim Asiam tum obtinebat] petens, ut auctor fieret fumen- di de captivis supplicii. Quod quum ille se facturum negasset, venditurumque captivos dixisset [quippe sequebatur invidia inertiam] incredibili celeritate revectus ad mare, prius quàm de ea re ulli proconsulis redderentur epistolæ, omnes quos ceperat suffixit cruci.

XLIII. Idem mox ad sacerdotium ineundum [quippe absens pontifex factus erat, quum in Cottæ consularis locum pene puer a Mario Cinnaque Flamen Dialis creatus, victoriâ Sullæ, qui omnia ab
iis

iis acta fecerat irrita , amisisset id sacerdotium] festinans in Italiam , ne conspiceretur a prædonibus , omnia tunc obtinentibus maria , & meritò jam infestis sibi , quatuor scalmorum navem unà cum duobus amicis decemque servis ingressus , effusissimum Adriatici maris trajecit sinum. Quo quidem in cursu conspectis , ut putabat , piratarum navibus , quum exuisset vestem , alligassetque pugionem ad femur , alterutri se fortunæ parans , mox intellexit frustratum esse visum suum , arborumque ex longinquo ordinem antemnarum præbuisse imaginem. Reliqua ejus acta in Urbe , nobilissimaque Dolabellæ accusatio , & major civitatis in ea favor quàm reis præstari solet ; contentionesque civiles cum Q. Catulo , atque aliis eminentissimis viris , celeberrimæ ; & ante præturam victus maximi pontificatûs petitione Q. Catulus , omnium confessione senatûs princeps ; & restituta in ædilitate , adversante quidem nobilitate , monumenta C. Marii ; simulque revocati ad jus dignitatis proscriptorum liberi ; & prætura quæsturaque mirabili virtute atque industriâ obita in Hispania , quum esset quæstor sub Vetere Antistio , avo hujus Veteris consularis atque pontificis , duorum consularium & sacerdotum patris , viri in tantum boni ,

in quantum humana simplicitas intelligi potest ; quò notiora sunt , minùs ~~egent~~ stylo.

XLIV. Hoc igitur consule , inter eum & Cn. Pompeium & M. Crassum inita potentiae societas , quæ Urbi orbique terrarum , nec minùs diverso quoque tempore , ipsis exitiabilis fuit. Hoc consilium sequendi Pompeius causam habuerat , ut tandem acta in transmarinis provinciis , quibus , ut prædiximus , multi obtrectabant , per Cæsarem confirmarentur consulem : Cæsar autem , quòd animadvertibat , se cedendo Pompeii gloriæ aucturum suam , & invidiâ communis potentiae in illum relegatâ , confirmaturum vires suas ; Crassus , ut , quem principatum solus assequi non poterat , auctoritate Pompeii , viribus teneret Cæsaris. Affinitas etiam inter Cæsarem Pompeiumque contracta nuptiis : quippe filiam C. Cæsaris Cn. Pompeius duxit uxorem. In hoc consulatu Cæsar legem tulit , ut ager Campanus plebi divideretur , suafore legis Pompeio. Ita circiter viginti millia civium eò deducta , & jus ab his restitutum post annos circiter centum quinquaginta duos , quàm bello Punico ab Romanis Capuâ in formam præfecturæ reducta erat. Bibulus collega Cæsaris , quum actiones ejus magis vellet impedire quàm

posset , majore parte anni domi se tenuit : quo facto , dum augere vult invidiam collegæ , auxit potentiam. Tum Cæsari decretæ in quinquennium Galliæ.

XLV. Per idem tempus P. Clodius , homo nobilis , disertus , audax , qui neque dicendi neque faciendi ullum , nisi quem vellet , nosset modum , malorum propositorum exsecutor acerrimus , infamis etiam fororis stupro , & actus incesti reus ob initum inter religiosissima populi Romani sacra adulterium ; quum graves inimicitias cum Cicerone exerceret [quid enim inter tam dissimiles amicum esse poterat ?] & a patribus ad plebem transisset , legem in tribunatu tulit : qui civem Romanum indemnatum interemisset , ei aquâ & igni interdiceretur. Cujus verbis etsi non nominabatur Cicero , tamen solus petebatur. Ita vir , optimè meritis de republica , conservatæ patriæ pretium calamitate exsiliū tulit. Non caruerunt suspicione oppressi Ciceronis Cæsar & Pompeius. Hoc sibi videbatur contraxisse Cicero , quòd inter viginti viros dividendo agro Campano esse noluiisset. Idem intra biennium , serâ Pompeii curâ , verum , ut cœpit , interritâ , votisque Italiæ , ac decretis senatûs , virtute atque actione Annii Milonis tribuni plebis , dignitati patriæque restitutus est.

Neque post Numidici exsilium aut reditum, quisquam aut expulsus invidiosius, aut receptus est lætius : cujus domus, quàm infestè a Clodio disjecta erat, tam speciosè a senatu restituta est. Idem P. Clodius in senatu, sub honorificentissimo ministerii titulo, M. Catonem a republica relegavit : quippe legem tulit, ut is quæstor cum jure prætorio, adjecto etiam quæstore, mitteretur in insulam Cyprum, ad spoliandum regno Ptolemæum, omnibus morum vitiis eam contumeliam meritum. Sed ille, sub adventum Catonis, vitæ suæ vim intulit : unde pecuniam longè speratâ majorem Cato Romam retulit. Ejus integritatem laudari, nefas est : insolentia pene argui potest, quòd, unà cum consulibus ac senatu effusâ civitate obviam, quum per Tiberim subiret navibus, non antè is egressus est, quàm ad eum locum pervenit, ubi erat exponenda pecunia.

XLVI. Quum deinde immanes res, vix multis voluminibus explicandas, C. Cæsar in Gallia ageret ; nec contentus plurimis ac felicissimis victoriis, innumerabilibusque cæsis & captis hostium millibus, etiam in Britanniam trajecisset exercitum, alterum pene imperio nostro ac suo quærens orbem : interim par consulum Pompeius & Crassus alterum iniere consulatum,

qui neque petitus honestè ab his, neque probabiliter gestus est. Cæsari lege, quam Pompeius ad populum tulit, prorogatae in idem spatium temporis provinciae; Crasso bellum Parthicum in animo molienti Syria decreta: qui vir cetera sanctissimus immunisque voluptatibus, neque in pecunia, neque in gloria concupiscenda aut modum nôrat, aut capiebat terminum. Hunc proficiscentem in Syriam diris cum omnibus tribuni plebis frustra retinere conati; quorum execrationes, si in ipsum tantummodo valuissent, utile imperatoris damnum, salvo exercitu, fuisset reipublicae. Transgressum Euphraten Crassum, petentemque Seleuciam, circumfusus immanibus copiis equitum, rex Orodes unà cum parte majore Romani exercitûs interemit: reliquias legionum C. Cassius, atrocissimi mox auctor facinoris, tum quæstor, conservavit, Syriamque adeo in populi Romani potestate retinuit, ut transgressos in eam Parthos felici rerum eventu fugaret ac funderet.

XLVII. Per hæc insequentiaque, & quæ prædiximus tempora, ampliùs quadringenta millia hostium a C. Cæsare cæsa sunt, plura capta. Pugnatum sæpe directâ acie, sæpe in agminibus, sæpe eruptionibus: bis penetrata Britannia: novem denique

æstatibus, vix ullâ non iustissimus triumphus emeritus. Circa Alesiam verò tantæ res gestæ, quantas audere vix hominis; perficere pene nullius, nisi Dei, fuerit. Septimo ferimè anno Cæsar morabatur in Galliis, quum medium jam ex invidia potentiæ malè cohærentis inter Cn. Pompeium & C. Cæsarem concordiæ pignus, Julia uxor Magni decessit; atque omnia inter destinatos tanto discrimini duces dirimente Fortunâ, filius quoque Pompeii, Juliâ natus, intra breve spatium obiit. Tum in gladios cædesque civium furente ambitu, cujus neque finis reperiebatur nec modus, tertius consulatus soli Cn. Pompeio, etiam adversantium antea dignati ejus judicio delatus est: cujus ille honoris gloriâ, veluti reconciliatis sibi optimatibus, maximè a C. Cæsare alienatus est: sed ejus consulatûs omnem vim in coërcitionem ambitûs exercuit. Quo tempore P. Clodius a Milone, candidato consulatûs, exemplo inutili, factò salutari reipublicæ, circa Bovillas, contractâ ex occursum rixâ, jugulatus est. Milonem reum non magis invidia facti, quàm Pompeii damnavit voluntas. Quem quidem M. Cato palam latâ absolvit sententiâ; quam si maturiùs tulisset, non defuissent qui sequerentur exemplum, probarentque eum

civem occisum , quo nemo perniciosior reipublicæ , neque bonis inimicius vixerat.

XLVIII. Intra breve deinde spatium belli civilis exarserunt initia ; quum iustissimus quisque & a Cæsare & a Pompeio vellet dimitti exercitus. Quippe Pompeius in secundo consulatu Hispanias sibi decerni voluerat , easque per triennium , absens ipse ac præsidens Urbi , per Afranium & Petreium , consularem ac prætorium , legatos suos , administrabat ; & iis , qui a Cæsare dimittendos exercitus contendebant , assentabatur ; iis , qui ab ipso quoque , adversabatur : qui si ante biennium quàm ad arma itum est , perfectis muneribus theatri & aliorum operum quæ ei circumdedit , gravissimâ tentatus valetudine decessisset in Campania [quo quidem tempore universa Italia vota pro salute ejus , primo omnium civium , suscepit] defuisset fortunæ destruendi ejus locus ; & quam apud superos habuerat magnitudinem , illibatam detulisset ad inferos. Bello autem civili , & tot , quæ deinde per continuos viginti annos consecuta sunt , malis , non alius majorem flagrantioremque quàm C. Curio tribunus plebis subjecit facem ; vir nobilis , eloquens ; audax , suæ alienæque & fortunæ & pudicitiae prodigus , homo ingeniosissimè

nequam, & facundus malo publico, cuius animo, voluptatibus vel libidinibus, neque opes ullæ neque cupiditates sufficere possent. Hic primò pro Pompeii partibus, id est, ut tunc habebatur, pro republica, mox simulatione contra Pompeium & Cæsarem, sed animo pro Cæsare stetit. Id gratis an accepto centies sestertiūm fecerit, ut accepimus, in medio relinqueamus. Ad ultimum saluberrimas & coalescentis conditiones pacis, quas & Cæsar iustissimo animo postulabat, & Pompeius æquo recipiebat, discussit ac rupit, unicè cavente Cicerone concordiae publicæ. Harum præteritarumque rerum ordo quum iustis aliorum voluminibus promitur, tum, uti spero, nostris explicabitur.

. XLIX. Nunc proposito operi sua forma reddatur, si prius gratulatus ero Q. Catulo, duobus Lucullis, Metelloque, & Hortensio; qui quum sine invidia in republica floruissent, eminuissentque sine periculo, quietâ aut certè non præcipitatâ, fatali ante initium bellorum civilium morte functi sunt. Lentulo & Marcello coff. post Urbem conditam annis septingentis tribus, & anno septuagesimo octavo, quàm tu, M. Vinici, consulatum inires, bellum civile exarsit. Alterius ducis causa melior videbatur, alterius erat firmior. Hic omnia

speciosa, illuc valentia. Pompeium senatûs auctoritas, Cæsarem militum armavit fiducia. Consules senatusque causæ, non Pompeio, summam imperii detulerunt. Nihil relictum a Cæsare, quod servandæ pacis causâ tentari posset, nihil receptum a Pompeianis : quum alter consul iusto esset ferocior ; Lentulus verò salvâ republicâ salvus esse non posset ; M. autem Cato moriendum antè, quàm ullam conditionem civis accipiendam reipublicæ, contenderet : vir antiquus & gravis Pompeii partes laudaret magis, prudens sequeretur Cæsaris ; & illa gloriosa, hæc terribiliora duceret. Ut deinde, spretis omnibus quæ Cæsar postulaverat, tantummodo contentus cum una legione titulum retinere provinciæ, privatus in Urbem veniret, & se in petitione consulatûs suffragiis populi Romani committeret, decrevere : ratus bellandum Cæsar cum exercitu rubiconem transiit : Cn. Pompeius consulesque & major pars senatûs, relictâ Urbe ac deinde Italiâ, transmisere Dyrrachium.

L. At Cæsar, Domitio legionibusque Corfiniis, quæ unâ cum eo fuerant, positus, duce aliisque, qui voluerant abire ad Pompeium, sine dilatione dimissis, persecutus Brundisium, ita ut appareret.

D. v.

malle integris rebus & conditionibus finire bellum , quàm opprimere fugientes , quum transgressos reperisset consules , in Urbem revertit ; redditâque ratione consiliorum suorum in senatu & in concione , ac miserrimæ necessitudinis , quum alienis armis ad arma compulsus esset , Hispanias petere decrevit. Festinationem itineris ejus aliquamdiu morata Massilia est , fide melior , quàm consilio prudentior ; intempestivè principalium armorum arbitria captans , quibus ii se debent interponere , qui non parentem coërcere possunt. Exercitus deinde , qui sub Afranio consulari ac Petreio prætorio fuerat , ipsius adventûs vigore ac fulgore occupatus , se Cæsari tradidit. Uterque legatorum , & quisquis cujusque ordinis sequi eos voluerat , remissi ad Pompeium.

LI. Proximo anno , quum Dyrrachium ac vicina ei urbi regio , castris Pompeii teneretur [qui accitis ex omnibus transmarinis provinciis legionibus , equitum ac peditum auxiliis , regumque & tetrarcharum simulque dynastarum copiis , immanem exercitum confecerat , & mare præsidiis classium , ut rebatur , sepserat , quò minùs Cæsar legiones posset transmittere] suâ & celeritate & fortunâ C. Cæsar usus , nihil in mora habuit , quominus & quum

vellet, ipse exercitusque classibus perveniret, & primo pene castris Pompeii suajungeret, mox etiam obsidione munimentisque eum complecteretur. Sed inopia obsidentibus, quàm obsessis, erat gravior. Tum Balbus Cornelius, excedente humanam fidem temeritate, ingressus castra hostium, sæpiusque cum Lentulo collocutus, consule dubitante quanti se venderet, illis incrementis fecit viam, quibus non Hispaniensis natus, sed Hispanus in triumphum & pontificatum assurgeret, fieretque ex privato consularis. Variatum deinde præliis, sed uno longè magis Pompeianis prospero, quo graviter impulsus sunt Cæsaris milites.

LII. Tum Cæsar cum exercitu fatalem victoriæ suæ Thessaliam petiit. Pompeius longè diversa aliis suadentibus [quorum plerique hortabantur, ut in Italiam transmitteret: neque hercules quidquam partibus illis salubrius fuit: alii, ut bellum traheret, quod dignatione partium in dies ipsis magis prosperum fieret] usus impetu suo hostem secutus est. Aciem Pharsalicam, & illum cruentissimum Romano nomini diem, tantumque utriusque exercitus profusum sanguinis, & collisa inter se duo reipublicæ capita, effossumque alterum Romani imperii lumen, tot talesque

Pompeianarum partium cæfos viros, non recipit enarranda hic scripturæ modus. Illud notandum est: ut primùm C. Cæsar inclinatam vidit Pompeianorum aciem, neque prius neque antiquius quidquam habuit, quàm omnes partes [militari & verbo & consuetudine utar] dimitteret. Proh Dii immortales! quod hujus voluntatis erga Brutum suæ postea vir tam mitis pretium tulit! Nihil illâ victoriâ mirabilius, magnificentius, clarius fuit; quando neminem, nisi acie consumptum, civem patria desideravit: sed munus misericordiæ corrumpit pertinacia, quum libentiùs vitam victor jam daret, quàm victi acciperent.

LIII. Pompeius profugiens cum duobus Lentulis consularibus Sextoque filio & Favonio prætorio, quos comites ei fortuna aggregaverat, aliis ut Parthos, aliis ut Africam peteret, in qua fidelissimum partium suarum haberet regem Jubam, suadentibus, Ægyptum petere proposuit; memor beneficiorum, quæ in patrem ejus Ptolemæi, qui tum puero quàm juveni propior regnabat Alexandriæ, contulerat. Sed quis in adversis beneficiorum servat memoriam? aut quis ullam calamitosis deberi putat gratiam? aut quando fortuna non mutat fidem? Missi itaque ab

rege , qui venientem Cn. Pompeium (is jam a Mytilenis Corneliam uxorem receptam in navem , fugæ comitem habere cœperat) consilio Theodoti & Achillæ exciperent , hortarenturque ut ex oneraria in eam navem , quæ obviam processerat , transcenderet : quod quum fecisset , princeps Romani nominis , imperio arbitrioque Ægyptii mancipii , C. Cæsare , P. Servilio cons. jugulatus est. Hic post tres consulatus & totidem triumphos , domitumque terrarum orbem , sanctissimi ac præstantissimi viri , in id evecti super quod ascendi non potest , duodesexagesimum annum agentis , pridie natalem ipsius , vitæ fuit exitus ; in tantum in illo viro a se discordante fortunâ , ut , cui modò ad victoriam terra defuerat , deesset ad sepulturam. Quid aliud , quàm nimium occupatos dixerim , quos in ætate & tanti & pene nostri seculi viri fefellit quinquennium ? quum a C. Atilio & Q. Servilio consulibus tam facilis esset annorum digestio : quod adjeci , non ut arguerem , sed ne arguerer.

LIV. Non fuit tamen major in Cæsarem , quàm in Pompeium fuerat , regis eorumque , quorum is auctoritate regebatur , fides : quippe quum venientem eum tentassent insidiis , ac deinde bello laceffere

auderent, utrique summo imperatorum; alteri superstiti meritas pœnas luere suppliciiis. Nusquam erat Pompeius corpore, adhuc ubique nomine: quippe ingens partium ejus favor bellum excitaverat Africum: quod ciebat rex Juba & Scipio, vir consularis, ante biennium quàm exstingueretur Pompeius, lectus ab eo focer; eorumque copias auxerat M. Cato, ingenti cum difficultate itinerum locorumque inopiâ, perductis ad eos legionibus: qui vir, quum summum ei a militibus deferretur imperium, honoratiori parere maluit.

LV. Admonet promissæ brevitatis fides, quanto omnia transcurso dicenda sint. Sequens fortunam suam Cæsar, pervectus in Africam, quam, occiso Curione Julianarum duce partium, Pompeiani obtinebant exercitus, ibi primò variâ fortunâ, mox pugnavit suâ, inclinatæque hostium copiae. Nec dissimilis ibi adversus victos, quàm in priores, clementia Cæsaris fuit. Victorem Africani belli C. Cæsarem gravius excepit Hispaniense [nam victus ab eo Pharnaces vix quidquam gloriæ ejus adstruxit] quod Cn. Pompeius Magni filius, adolescens impetûs ad bellâ maximi, ingens ac terribile conflaverat, undique ad eum adhuc paterni nominis magnitudinem sequentium ex toto orbe terrarum

auxiliis confluentibus. Sua Cæsarem in Hispaniam comitata fortuna est; sed nulum umquam atrocius periculosiusque ab eo initum prælium; adeo ut plus quàm dubio Marte, descenderet equo, consistensque ante recedentem suorum aciem, increpitâ prius fortunâ, quòd se in eum servasset exitum, denuntiaret militibus vestigio se non recessurum; proinde viderent, quem & quo loco Imperatorem deserturi forent. Verecundiâ magis quàm virtute acies restitutæ sunt, a duce quàm a milite fortiùs. Cn. Pompeius, gravis vulnere inventus inter solitudines avias interemptus est. Labienum, Varumque acies abstulit.

LVI. Cæsar omnium victor regressus in Urbem, quod humanam excedat fidem, omnibus, qui contra se arma tulerant, ignovit; magnificentissimisque gladiatorii muneris, naumachiaë, & equitum pedumque, simul Elephantorum certaminis spectaculis, epulique per multos dies dati celebratione, replevit eam. Quinque egit triumphos. Gallici apparatus ex citro, Pontici ex acantho, Alexandrini testudine, Africi ebore, Hispaniensis argento rasili constitit. Pecunia ex manubiis lata paulò ampliùs sexies millies sestertiùm. Neque illi tanto viro & tam clementer

omnibus victoriis suis uso , plus quinque mensium principalis quies contigit : quippe quum mense Octobri in urbem revertisset , Idibus Martiis , conjurationis auctoribus Bruto & Cassio , quorum alterum promittendo consulatum non obligaverat , contrà differendo Cassium offenderat , adjectis etiam consiliariis cædis familiarissimis omnium , & fortunâ partium ejus in summum evectis fastigium , D. Bruto , & C. Trebonio , aliisque clari nominis viris , interemptus est. Cui magnam invidiam conciliârat M. Antonius , omnibus audendis paratissimus , consulatûs collega , imponendo capiti ejus Lupercalibus sedentis pro Rostris insigne regium , quod ab eo ita repulsum erat , ut non offensus videretur.

LVII. Laudandum experientiâ consilium est Panfæ atque Hirtii , qui semper prædixerant Cæsari , ut principatum armis quæsitum armis teneret : ille dictitans mori se , quàm timeri malle , dum clementiam , quam præstiterat , exspectat , incautus ab ingratis occupatus est , quum quidem plurima præfagia atque indicia Dii immortales futuri obtulissent periculi : nam & aruspices præmonuerant , ut diligentissimè Iduum Martiarum caveret diem ; & uxor Calpurnia , territa nocturno visu , ut

eâ die domi consisteret , orabat ; & libelli conjurationem nuntiantes dati , ab eo neque protinus lecti erant. Sed profectò ineluctabilis fatorum vis , cujuscumque fortunam mutare constituit , consilia corrumpit.

LVIII. Quo anno id patravere facinus. M. Brutus & C. Cassius , prætores erant ; D. Brutus consul designatus. Hi unâ cum conjurationis globo , stipati gladiatorum D. Bruti manu , Capitolium occupavere , quum consul Antonius [quem quum simul interimendum censuisset Cassius , testamentumque Cæsaris abolendum , Brutus repugnaverat ; dictitans , nihil ampliùs civibus præter tyranni , ita enim appellari Cæsarem facto ejus expediebat , petendum esse sanguinem] convocato senatu , quum jam Dolabella , quem substituturus sibi Cæsar designaverat consulem , fasces atque insignia corripuisset consularia , velut pacis auctor , liberos suos obsides in Capitolium misit , fidemque descendendi tutò interfectoris Cæsaris dedit , & illud decreti Atheniensium celeberrimi exemplum , relatum a Cicerone , oblivionis præteritarum rerum , decreto Patrum comprobatum est.

LIX. Cæsaris deinde testamentum apertum est , quo C. Octavium , nepotem sororis suæ Juliæ , adoptabat : de cujus ori-

gine, etiamsi præventis, & pauca dicenda sunt. Fuit C. Octavius, ut non patriciâ, ita admodum speciosâ equestri genitus familiâ, gravis, sanctus, innocens, dives. Hic prætor inter nobilissimos viros creatus, primo loco, quum ei dignatio Juliâ genitam Attiam conciliaffet uxorem, ex eo honore sortitus Macedoniam, appellatusque in eâ imperator; decedens ad petitionem consulatûs obiit, prætextato relicto filio, quem C. Cæsar, major ejus avunculus, educatum apud Philippum Vitricum, dilexit ut suum, natumque annos octodecim, Hispaniensis militiæ affecutum se postea comitem habuit, numquam aut alio usum hospitio, quàm suo, aut alio vectum vehiculo; pontificatûsque sacerdotio puerum honoravit. Et pacatis bellis civilibus, ad erudiendum liberalibus disciplinis singularis indolem juvenis, Apolloniam eum in studia miserat, mox belli Getici ac deinde Parthici habiturus commilitonem. Cui ut est nuntiatum de cæde avunculi, quum protinus ex vicinis legionibus centuriones suam suorumque militum operam ei pollicerentur, neque eam spernendam Salvidienus & Agrippa dicerent, ille festinans pervenire in Urbem, omnem ordinationem & necis & testamenti Brundisii comperit. Cui adventanti

Romam, immanis amicorum occurrit frequentia ; & quum intraret Urbem, Solis orbis super caput ejus, curvatus æqualiter, rotundatusque in colorem arcûs, veluti coronam tanti mox viri capiti imponens, conspectus est.

LX. Non placebat Attiæ matri Philip-poque Vitrico adiri nomen invidiosæ fortunæ Cæsaris ; sed asserebant salutaria reipublicæ terrarumque orbis fata conditorem conservatoremque Romani nominis. Sprevit itaque cœlestis animus humana consilia, & cum periculo potius summa, quàm tutò humilia, proposuit sequi ; maluitque avunculo & Cæsari de se, quàm Vitrico credere, dictitans, nefas esse, quo nomine Cæsari dignus esset visus, semetipsum videri indignum. Hunc protinus Antonius consul superbè excipit [neque is erat contemptus, sed metus] vixque admissio in Pompeianos hortos loquendi secum tempus dedit ; mox etiam, velut insidiis ejus petitus, scelestè insimulare cœpit : in quo turpiter deprehensa ejus vanitas est. Apertè deinde Antonii ac Dolabellæ consulum ad nefandam dominationem erupit furor. Sestertiûm septies millies, depositum a C. Cæsare ad ædem Opis, occupatum ab Antonio, actorum ejusdèm, insertis falsis, indubitatèque cor-

ruptis commentariis : atque omnia pretio temperata , vendente rempublicam consule. Idem provinciam , D. Bruto designato consuli decretam , Galliam occupare statuit : Dolabella transmarinas decrevit sibi ; interque naturaliter dissimillimos ac diversa volentes crescebat odium , eoque C. Cæsar juvenis quotidianis Antonii petebatur insidiis.

LXI. Torpebat oppressa dominatione Antonii civitas : indignatio & dolor omnibus , vis ad resistendum nulli aderat , quum C. Cæsar decimum nonum annum ingressus , mira ausus , ac summa consecutus , privato consilio majorem senatu pro republica animum habuit , primūque a Calatia , mox a Casilino veteranos excivit paternos. Quorum exemplum secuti alii , brevi in formam justī coiere exercitūs : mox quum Antonius occurrisset exercitui , quem ex transmarinis provinciis Brundisium venire jusserat , legio Martia & Quarta , cognitā & senatūs voluntate , & tanti juvenis indole , sublati signis , ad Cæsarem se contulerunt. Eum senatus honoratum equestri statuâ , quæ hodieque in Rostris posita ætatem ejus scripturâ indicat [qui honor non alii per trecentos annos quàm L. Sullæ , & Cn. Pompeio , & C. Cæsari contigerat] pro

prætoꝛe unâ cum consulis designatis Hirtio & Panfa, bellum cum Antonio gerere jussit. Id ab eo annum agente vicesimum fortissimè circa Mutinam administratum est; & D. Brutus obsidione liberatus. Antonius turpi ac nudâ fugâ coactus deferere Italiam: consulum autem alter in acie, alter post paucos dies ex vulnere mortem obiit.

LXII. Omnia antè, quàm fugaretur Antonius, honorificè a senatu in Cæsarem exercitumque ejus decreta sunt, maximè auctore Cicerone; sed ut recessit metus, erupit voluntas, protinusque partibus rediit animus. Bruto Cassioque provinciæ, quas jam ipsi sine ullo senatus-consulto occupaverant, decretæ; laudati quicumque his se exercitus tradidissent; omnia transmarina imperia eorum commissâ arbitrio. Quippe M. Brutus, & C. Cassius, nunc metuentes arma Antonii, nunc ad augendam ejus invidiam, simulantes se metuere; testati edictis, libenter se vel in perpetuo exsilio victuros, dum reipublicæ constaret concordia, nec ullam belli civilis præbituros materiam, plurimùm sibi honoris esse in conscientia facti sui, profecti Urbe atque Italiâ, intento ac pari animo, sine auctoritate publica, provincias exercitusque occupaverant, & ubi.

cumque ipsi essent, prætexentes esse rempublicam, pecunias etiam, quæ ex transmarinis provinciis Romam ab quæstoribus deportabantur, a volentibus acceperant: quæ omnia senatûs decretis comprehensa & comprobata sunt. Et D. Bruto, quod alieno beneficio viveret, decretus triumphus. Pansæ atque Hirtii corpora publicâ sepulturâ honorata. Cæsaris adeò nulla habita mentio, ut legati, qui ad exercitum ejus missi erant, juberentur summoto eo milites alloqui. Non fuit tam ingratus exercitus, quàm fuerat senatus: nam quum eam injuriam dissimulando Cæsar ferret, negavere milites sine imperatore suo ulla se audituros mandata, Hoc est illud tempus, quo Cicero, insito amore Pompeianarum partium, Cæsarem laudandum & tollendum censebat; quum aliud diceret, aliud intelligi vellet.

LXIII. Interim Antonius fugâ transgressus Alpes, primò per colloquia repulsus a M. Lepido, qui Pontifex maximus in C. Cæsaris locum furto creatus, decretâ sibi Hispaniâ, adhuc in Gallia morabatur; mox sæpius in conspectum veniens militum, quum & Lepido omnes imperatores forent meliores, & multis Antonius dum erat sobrius, per aversa castrorum prorupto vallo, militibus recep-

tus est ; qui titulo imperii cedebat Lepido, quum summa virium penes eum foret. Sub Antonii ingressum in castra Juventius Laterensis, vir vitâ ac morte consentaneus, quum acerrimè suasisset Lepido, ne se cum Antonio hoste judicatio jungeret, irritus consilii, gladio se ipse transfixit. Plancus deinde dubiâ, id est suâ fide, diu quarum esset partium secum luctatus, ac sibi difficilè consentiens, & nunc adjutor D. Bruti designati consulis, collegæ sui, senatuique se litteris venditans, mox ejusdem proditor : Asinius autem Pollio firmus proposito, & Julianis partibus fidus, Pompeianis adversus ; uterque exercitus tradidere Antonio.

LXIV. D. Brutus desertus primò a Planco, post etiam insidiis ejusdem petitus, paulatim relincente eum exercitu, fugiens, in hospitis cujusdam ignobilis viri, nomine Cameli, domo ab iis, quos miserat Antonius, jugulatus est ; justissimasque optimè de se merito viro C. Cæsari pœnas dedit : cujus quum primus omnium amicorum fuisset, interfector fuit ; & fortunæ, ex qua fructum tulerat, invidiam in auctorem relegabat ; censebatque æquum, quæ acceperat a Cæsare retinere, Cæsarem, qui illa dederat, perisse. Hæc sunt tempora, quibus M. Tullius continuis

actionibus æternas Antonii memoriæ impressit notas ; sed hic fulgentissimo & cœlesti ore ; at tribunus Canutius continuâ rabie lacerabat Antonium. Utrique vindicta libertatis morte stetit ; sed tribuni sanguine commissa proscriptio , Ciceronis , vel factiatio Antonio , poenâ finita. Lepidus deinde a senatu hostis judicatus est , ut antè fuerat Antonius.

LXV. Tum inter eum Cæsaremque & Antonium commercia epistolarum , & conditionum iacta mentio ; quum Antonius subinde Cæsarem admoneret , quàm inimicæ sibi Pompeianæ partes forent , & in quod jam emersissent fastigium ; & quanto Ciceronis studio Brutus Cassiusque attollerentur ; denuntiaretque , se cum Bruto Cassioque , qui jam decem & septem legionum potentes erant , juncturum vires suas , si Cæsar ejus aspernaretur concordiam ; diceretque , plus Cæsarem patris quàm se amici ultioni debere. Igitur inita potentiae societas , & hortantibus orantibusque exercitibus , inter Antonium etiam & Cæsarem facta affinitas , quum esset privigna Antonii desponsa Cæsari , consultumque iniit Cæsar pridie quàm viginti annos impleret , decimo Calendas Octobres , cum collega Q. Pedio , post Urbem conditam annis septingentis novem , ante
septuaginta

septuaginta duos quàm tu , M. Vinici , consulum inires. Vidit hic annus Ventidium , per quam urbem inter captivos Picentium in triumpho ductus erat , in ea consularem prætextam jungentem prætoriam. Idem hic postea triumphavit.

LXVI. Furente deinde Antonio , simulque Lepido , quorum uterque , ut prædiximus , reipublicæ hostes judicati erant , quum ambo mallent sibi nuntiari quid passi essent , quàm quid emeruissent , repugnante Cæsare , sed frustra adversus duos , instauratum Sullani exempli malum , proscriptio. Nihil tam indignum illo tempore fuit , quàm quòd aut Cæsar aliquem proscribere coactus est , aut ab ullo Cicero proscriptus est ; abscissaque scelere Antonii vox publica est , quum ejus salutem nemo defendisset , qui per tot annos & publicam civitatis & privatam civium defenderat. Nihil tamen egisti , M. Antoni [cogit enim excedere propositi formam operis , erumpens animo ac pectore indignatio] nihil , inquam , egisti , mercedem cœlestissimi oris & clarissimi capitis abscissi numerando , auctoramentoque funebri ad conservatoris quondam reipublicæ tantique consulis irritando necem. Rapiisti tu M. Ciceroni lucem sollicitam , & ætatem senilem , & vitam miseriorem

te principe , quàm sub te triumviro mortem : famam verò gloriamque factorum atque dictorum adeo non abstulisti , ut auxeris. Vivit vivetque per omnium seculorum memoriam ; dumque hoc vel fortè vel providentiâ vel utcumque constitutum rerum naturæ corpus , quod ille pene solus Romanorum animo vidit , ingenio complexus est , eloquentiâ illuminavit , manebit incolume , comitem ævi sui laudem Ciceronis trahet ; omnisque posteritas illius in te scripta mirabitur , tuum in eum factum exsecrabitur ; citiùsque in mundo genus hominum , quàm ea cadet.

LXVII. Hujus totius temporis fortunam ne deflere quidem quisquam satis dignè potuit , adeo nemo exprimere verbis potest. Id tamen notandum est , fuisse in proscriptos uxorum fidem summam , libertorum mediam , servorum aliquam , filiorum nullam ; adeo difficilis est hominibus utcumque conceptæ spei mora. Ne quid ulli sanctum relinqueretur , velut in dotem invitamentumque sceleris , Antonius L. Cæsarem avunculum , Lepidus Paullum fratrem proscripserant. Nec Plancio gratia defuit ad impetrandum , ut frater ejus Plancus Plotius proscriberetur. Eoque inter jocos militares , qui currum

Lepidi Plancique secuti erant, inter execrationem civium, usurpabant hunc versum : *De Germanis, non de Gallis, duo triumphant consules.*

LXVIII. Suo præteritum loco referatur ; neque enim persona umbram actæ rei capit. Dum in acie Pharsalica Africaque de summa rerum Cæsar dimicat, M. Cœlius, vir eloquio animoque Curioni simillimus, sed in utroque perfectior, nec minùs ingeniosè nequam, quum ne modico quidem servari posset [quippe pejor illi res familiaris quàm mens erat] in prætura novarum tabularum auctor exstitit ; nequiritque senatûs & auctoritate consulum deterreri, accito etiam Milone Annio, qui non impetrato reditu Julianis partibus infestus erat, in Urbe seditionem, haud magis occultè bellicum tumultum movens, primò summotus a republica, mox consularibus armis auctore senatu circa Thurios oppressus est. Incepto pari similis fortuna Milonis fuit ; qui Compsam in Hirpinis oppugnans, ictusque lapide, tum P. Clodio, tum patriæ, quam armis petebat, pœnas dedit ; vir inquires, & ultra sortem temerarius. Quatenus autem aliquid ex omissis peto, notetur immodicâ & intempestivâ libertate usos adversùs C. Cæsarem Marullum Epidium, Flaviumque

E ij

Cæsetium tribunos plebis, dum arguunt in eo regni voluntatem, pene vim dominationis expertos. In hoc tamen sæpe laccessiti principis ira excessit, ut cenforiâ potius contentus notâ, quàm animadversione dictatoriâ, summo veret eos a republica, testareturque, esse sibi miserrimum, quòd aut naturâ suâ ei excedendum foret, aut minuenda dignitas. Sed ad ordinem revertendum est.

LXIX. Jam & Dolabella in Asia C. Trebonium consularem, cui succedebat, fraude deceptum, Smyrnæ occiderat, virum adversus merita Cæsaris ingrattissimum, participemque cædis ejus, a quo ipse in consulare provectus fastigium fuerat: & C. Cassius, acceptis a Statio Murco & Crispo Marcio, prætoriiis viris imperatoribusque, prævalidis in Syria legionibus, inclusum Dolabellam, qui præoccupatâ Asiâ in Syriam pervenerat, Laodiceæ, expugnatâ eâ urbe, ceperat, ita tamen ut ad ictum servi sui Dolabella non segniter cervicem daret; & decem legiones in eo tractu sui juris fecerat: & M. Brutus C. Antonio fratri M. Antonii in Macedonia, Vatinioque circa Dyrrachium volentes legiones extorserat; sed Antonium bello laccessierat, Vatinium dignatione obruerat: quum & Brutus cuilibet ducum

præferendus videretur, & Vatinius nulli nomini non esset postferendus : in quo deformitas corporis cum turpitudine certabat ingenii, adeo ut animus ejus dignissimo domicilio inclusus videretur ; eratque septem legionibus validus. Et lege *Pediâ*, quam consul *Pedius* collega *Cæsaris* tulerat, omnibus, qui *Cæsarem* patrem interfecerant, aquâ ignique damnatis interdictum erat : quo tempore *Capito*, patruus meus, vir ordinis senatorii, *Agrippæ* subscripsit in *C. Cassium*. Dumque ea in Italia geruntur, acri atque prosperrimo bello *Cassius Rhodum*, rem immanis operis, ceperat ; *Brutus Lycios* devicerat, & inde in *Macedoniam* exercitus trajecerant ; quum per omnia repugnans naturæ suæ *Cassius* etiam *Bruti* clementiam vinceret. Neque reperias quos aut pronior *Fortuna* comitata sit, aut veluti fatigata maturius destituerit, quàm *Brutum* & *Cassium*.

LXX. Tum *Cæsar* & *Antonius* trajecerunt exercitus in *Macedoniam*, & apud urbem *Philippos* cum *M. Bruto* *Cassioque* acie concurrerunt. *Cornu*, cui *Brutus* præerat, impulsis hostibus, castra *Cæsaris* cepit : nam ipse *Cæsar*, etiamsi infirmissimus valetudine, obibat munia ducis, oratus etiam ab *Artorio* medico, ne in castris remaneret, manifestâ denuntiatione

quietis territo. Id autem, in quo Cassius fuerat, fugatum ac malè multatum, in altiora se receperat loca. Tum Cassius ex sua fortuna evéntum collegæ æstimans, quum dimisisset evócatum, jussissetque nuntiare sibi, quæ esset multitudo ac vis hominum, quæ ad se tenderet; tardiùs eo nuntiante, quum in vicino esset agmen cursu ad eum tendentium, neque pulvere facies aut signa denotari possent, existimans hostes esse qui irruerent, lacernâ caput circumdedit, extentamque cervicem interritus liberto præbuit. Deciderat Cassii caput, quum evocatus advenit, nuntians Brutum esse victorem: qui quum imperatorem prostratum videret; sequar, inquit, eum, quem mea occidit tarditas; & ita in gladium incubuit. Post paucos deinde dies Brutus confligit cum hostibus, & victus acie, quum in tumultum nocte ex fuga se recepisset, impetravit a Stratone Ægeate familiari suo, ut manum morituro commodaret sibi; erectoque lævo super caput brachio, quum mucronem gladii ejus dexterâ tenens sinistra admovisset mamillæ, ad eum ipsum locum, quâ cor emicat, impellens se in vulnus, uno ictu transfixus expiravit,

LXXI. Protinus Messalla, fulgentissimus juvenis, proximus in illis castris Bruti

Cassiique auctoritati, quum essent qui eum ducem poscerent, servari beneficio Cæsaris maluit, quàm dubiam spem armorum tentare amplius. Nec aut Cæsari quidquam ex victoriis suis fuit lætius, quàm servasse Corvinum; aut majus exemplum hominis grati ac pii, quàm Corvinus in Cæsarem fuit. Non aliud bellum cruentius cæde clarissimorum virorum fuit. Tum Catonis filius cecidit: eadem Lucillum Hortensiumque, eminentissimorum civium filios, fortuna abstulit. Nam Varro ad ludibrium moriturus Antonii, digna illo ac vera de exitu ejus magna cum libertate ominatus est. Drusus Livius, Juliae Augustæ pater, & Varus Quinctilius, ne tentatâ quidem hostis misericordiâ, alter se ipse in tabernaculo interemit; Varus autem liberti, quem id facere coegerat, manu, quum se insignibus honorum velasset, jugulatus est.

LXXII. Hunc exitum M. Bruti partium septimum & trigesimum annum agentis fortuna esse voluit; corrupto animo ejus in diem, quæ illi omnes virtutes unius temeritate facti abstulit. Fuit autem Dux Cassius melior, quanto vir Brutus; e quibus Brutum amicum habere malles, inimicum magis timeres Cassium: in altero major vis, in altero virtus. Qui si vi-

cissent, quantum reipublicæ interfuit, Cæsarem potius habere quàm Antonium principem; tantum retulisset habere Brutum quàm Cassium. Cn. Domitius, pater L. Domitii, nuper a nobis visi, eminentissimæ ac nobilissimæ simplicitatis viri, avus hujus Cn. Domitii clarissimi juvenis, occupatis navibus, cum magno sequentium consilia sua comitatu fugæ fortunæque se commisit, semetipso contentus duce partium. Staius Murcus, qui classi & custodiæ maris præfuerat, cum omni commissa sibi parte exercitûs naviumque, Sex. Pompeium Cn. Magni filium, qui ex Hispania revertens Siciliam armis occupaverat, petit; ad quem & e Brutianis castris, & ex Italia aliisque terrarum partibus, quos præfenti periculo fortuna subduxerat, proscripti confluebant: quippe nullum habentibus statum quilibet dux erat idoneus; quum fortuna non electionem daret, sed perfugium ostenderet; exitialemque tempestatem fugientibus statio pro portu foret.

LXXIII. Hic adolescens erat studiis rudis, sermone barbarus, impetu strenuus, manu promptus, cogitatione celer, fide patri dissimillimus, libertorum suorum libertus, servorumque servus, speciosis invidens, ut pareret humillimis: quem senatus pene totus adhuc e Pompeianis

constans partibus, post Antonii a Mutina fugam, eodem illo tempore quo Bruto Cassioque transmarinas provincias decreverat, revocatum ex Hispania, ubi adversus eum clarissimum bellum Pollio Asinius prætorius gesserat, in paterna bona restituerat, & oræ maritimæ præfecerat. Is tum ut prædiximus, occupatâ Siciliâ, servitia fugitivosque in numerum exercitûs sui recipiens, magnum modum legionum effecerat; perque Menam & Mene-craten, paternos libertos, præfectos classium, latrociniis ac prædationibus infestato mari, ad se exercitumque tuendum raptò utebatur, quum eum non depuderet vindicatum armis ac ductu patris sui mare infestare piraticis sceleribus.

LXXIV. Fractis Brutianis Cassianisque partibus, Antonius transmarinas obiturus provincias substitit; Cæsar in Italiam se recepit, eamque longè quàm speraverat tumultuosiore reperit. Quippe L. Antonius consul, vitiorum fratris sui consors, sed virtutum, quæ interdum in illo erant, expers, modò apud veteranos criminatus Cæsarem, modò eos qui iussâ divisione prædiorum ordinatisque coloniis agros amiserant, ad arma conciens, magnum exercitum conflaverat. Ex altera parte uxor Antonii Fulvia, nihil muliebre

præter corpus gerens, omnia armis tumultuque miscebat. Hæc belli sedem Præneste ceperat : Antonius, pulsus undique viribus Cæsaris, Perusiam se contulerat : Plancus Antonianarum adjutor partium, spem magis ostenderat auxilii, quàm opem ferebat Antonio. Usus Cæsar virtute & fortunâ suâ Perusiam expugnavit ; Antonium inviolatum dimisit : in Perusinos magis irâ militum quàm voluntate sævitum ducis : urbs incensa, cujus initium incendii princeps ejus loci fecit Macedonicus, qui, subiecto rebus ac penatibus suis igni, transfixum se gladio flammæ intulit.

LX XV. Per eadem tempora exarserat in Campania bellum, quod, professus eorum, qui perdiderant agros, patrocinium, ciebat Tib. Claudius Nero prætorius & pontifex, Tib. Cæsaris pater, magni vir animi doctissimique ingenii. Id quoque adventu Cæsaris sepultum atque discussum est. Quis fortunæ mutationes, quis dubios rerum humanarum casus satis mirari queat ? quis non diversa præsentibus, contrariaque exspectatis aut speret aut timeat ? Livia nobilissimi & fortissimi viri Drusi Claudiani filia, genere, probitate, formâ Romanarum eminentissima, quam postea conjugem Augusti vidimus, quam transgressi ad Deos sacerdotem ac filiam, tum

fugiens mox futuri sui Cæsaris arma , vix-
bimum hunc Tiberium Cæsarem , vindi-
cem Romani imperii , futurumque ejusdem
Cæsaris filium gestans sinu , per avia iti-
nerum , vitatis militum gladiis , uno comi-
tante , quò faciliùs occultaretur fuga , per-
venit ad mare , & cum viro Nerone per-
vecta in Siciliam est.

LXXVI. Quod alieno testimonium red-
derem , in eo non fraudabo avum meum.
Quippe C. Velleius , honoratissimo inter
illos trecentos sexaginta judices loco a
Pompeio lectus , ejusdem Marcique Bruti
ac Tib. Neronis præfectus fabrûm , vir
nulli secundus , in Campania , digressu Ne-
ronis a Neapoli , cujus ob singularem cum
eo amicitiam partium adjutor fuerat , gra-
vis jam ætate & corpore , quum comes
esse non posset , gladio se ipse transfixit.
Inviolatam excedere Italiâ Cæsar passus
Fulviam , Plancumque muliebris fugæ co-
mitem : nam Pollio Asinius cum septem
legionibus , diu retentâ in potestate Anto-
nii Venetiâ , magnis speciosisque rebus
circa Altinum , aliasque ejus regionis ur-
bes , editis , Antonium petens , vagum
adhuc Domitium , quem digressum e Bru-
tianis castris post cædem ejus prædiximus ,
& propriæ classis factum ducem , consiliis
suis illectum , ac fide datâ , junxit Antonio.

Quo factò quisquis æquum se præstiterit, sciat non minùs a Pollione in Antonium, quàm ab Antonio in Pollionem esse collatum. Adventus deinde in Italiam Antonii, præparatusque contra eum Cæsaris habuit belli metum ; sed pax circa Brundisium composita. Per quæ tempora Rufi Salvidieni scelestà consilia patefacta sunt ; qui natus obscurissimis initiis, parum habebat summa accepisse, & proximus a Cn. Pompeio, ipsoque Cæsare ex equestri ordine consul creatus esse, nisi in id ascendisset, e quo infra se & Cæsarem videret & rempublicam.

LXXVII. Tum, expostulante consensu populi, quem gravis urgebat infesto mari annona, cum Pompeio quoque circa Misenum pax inita : qui haud absurdè, quum in navi Cæsaremque & Antonium cœnâ exciperet, dixit, In carinis suis se cœnam dare ; referens hoc dictum ad loci nomen, in quo paterna domus ab Antonio possidebatur. In hoc pacis fœdere placuit Siciliam Achaiamque Pompeio concedere : in quo tamen animus inquires manere non potuit : id unum tantummodo salutare adventu suo patriæ attulit, quòd omnibus proscriptis aliisque, qui ad eum ex diversis causis fugerant, reditum salutemque pactus est : quæ res & alios clarissimos.

viros , & Neronem , & M. Silanum , Sentiumque Saturninum & Aruntium ac Titium restituit reipublicæ. Statium autem Murcum , qui adventu suo classisque celeberrimæ vires ejus duplicaverat , insimulatum falsis criminationibus , quia talem virum collegam officii Menas & Menecrates fastidierant , Pompeius in Sicilia interfecerat.

LXXVIII. Hoc tractu temporum Octaviam sororem Cæsaris M. Antonius duxit uxorem. Redierat Pompeius in Siciliam , Antonius in transmarinas provincias , quas magnis momentis Labienus , ex Brutianis castris profectus ad Parthos , producto eorum exercitu in Syriam , interfectoque legato Antonii , concusserat ; qui virtute & ductu Ventidii , unâ cum Parthorum copiis , celeberrimoque juvenum Pacoro regis filio , exstinctus est. Interim Cæsar per hæc tempora , ne res disciplinæ inimicissima otium corrumpere militem , crebris in Illyrico Dalmatiaque expeditionibus , patientiâ periculorum , bellicæ experienciâ durabat exercitum. Eâdem tempestate Calvinus Domitius , quum ex consulatu obtineret Hispaniam , gravissimi comparandique antiquis exempli auctor fuit : quippe primipili centurionem nomine Vibillum , ob turpem ex acie fugam , fuste percussit.

LXXIX. Crescente in dies & classe & famâ Pompeii, Cæsar molem belli ejus suscipere statuit. Ædificandis navibus, contrahendoque militi ac remigi, navalibusque adfuescendo certaminibus atque exercitationibus, præfectus est M. Agrippa virtutis nobilissimæ, labore, vigiliâ, periculo invictus, parendique, sed uni, scientissimus, aliis sanè imperandi cupidus, & per omnia extra dilationes positus, consultisque facta conjungens. Hic in Averno ac Lucrino lacu speciosissimâ classe fabricatâ, quotidianis exercitationibus militem remigemque ad summam & militaris & maritimæ rei perduxit scientiam. Hac classe Cæsar, quum prius, despondente ei Nerone, cui antè nupta fuerat, Liviam auspiciatis reipublicæ ominibus duxisset uxorem, Pompeio Siciliæque bellum intulit. Sed virum humanâ ope invictum graviter eo tempore fortuna concussit: quippe longè majorem partem classis, circa Veliam Palinurique promontorium, adorta vis Africi laceravit ac distulit. Ea patrando bello mora fuit, quod postea dubiâ & interdum ancipiti fortunâ gestum est: nam & classis eodem loco vexata est tempestate: & ut navali primo prælio apud Mylas ductu Agrippæ pugnatum prosperè, ita inopinato classis adventu gravis sub ipsius

Cæsaris oculis circà Tauromenium accepta clades : neque ab ipso periculum abfuit. Legiones quæ cum Cornificio erant, legato Cæsaris, expositæ in terra, pene a Pompeio oppressæ sunt. Sed ancipitis fortuna temporis maturâ virtute correctâ. Explicatis quippe utriusque partis classibus, pene omnibus exutus navibus Pompeius Asiam fugâ petivit ; jussuque M. Antonii, cujus opem petierat, dum inter duces & supplicem tumultuatur, & nunc dignitatem retinet, nunc vitam precatur, a Titio jugulatus est : cui in tantum duravit hoc facinore contractum odium, ut mox ludos in theatro Pompeii faciens, execratione populi spectaculo, quod præbebat, pelleretur.

LXXX. Acciverat gerens contra Pompeium bellum ex Africa Cæsar Lepidum cum duodecim semiplenis legionibus. Hic vir omnium vanissimus, neque ullâ virtute tam longam fortunæ indulgentiam meritus, exercitum Pompeii, quia propior fuerat, sequentem non ipsius sed Cæsaris auctoritatem ac fidem, sibi junxerat ; inflatusque ampliùs viginti legionum numero, in id furoris processerat, ut inutilis alienæ victoriæ comes, quam diu moratus erat, dissidendo in consiliis Cæsari, & semper diversa his, quæ aliis placebant,

dicendo, totam victoriam ut suam interpretaretur; audebatque denuntiare Cæsari, excederet Siciliâ. Non ab Scipionibus, aliisque veteribus Romanorum ducum quidquam ausum patratumque fortius, quàm tunc a Cæsare. Quippe quum inermis & lacernatus esset, præter nomen nihil trahens, ingressus castra Lepidi, evitatis quæ jussu hominis pravissimi tela in eum jacta erant, quum lacerna ejus perforata esset lanceâ, aquilam legionis rapere ausus est. Scires quid interesset inter duces. Armati inermem secuti sunt; decimoque anno, quàm ad dissimillimam vitæ suæ potentiam pervenerat Lepidus, & a militibus & a fortuna desertus, pulloque velatus amiculo, inter ultimam confluentium ad Cæsarem turbam latens, genibus ejus advolutus est. Vita rerumque suarum dominium concessa ei sunt; spoliata, quam tueri non poterat, dignitas.

LXXXI. Subita deinde exercitûs feditio (qui plerumque contemplatus frequentiam suam, a disciplina desciscit; & quod cogere se putat posse, rogare non sustinet) partim severitate, partim liberalitate discussa principis. Speciosumque per id tempus adjectum supplementum Campanæ coloniae: ejus relictæ erant publici; pro his longè uberiores redditus.

duodecies fextertiûm in Creta insula red-
diti, & aqua promissa, quæ hodieque sin-
gulare & salubritatis instar & amœnitatis
ornamentum est. Insigne coronæ classicæ,
quo nemo umquam Romanorum donatus
erat, hoc bello Agrippa singulari virtute
meruit. Victor deinde Cæsar reversus in
Urbem, contractas emptionibus complu-
res domos per procuratores, quò laxior
fieret ipsius, publicis se usibus destinare
professus est; templumque Apollini, &
circà porticus, facturum promisit, quod
ab eo singulari exstructum munificentia
est.

LXXXI. Quâ æstare Cæsar tam prof-
perè in Lepidum in Sicilia, bene fortuna
pro Cæsare & republica militavit ad orien-
tem. Quippe Antonius cum tredecim le-
gionibus ingressus Armeniam, ac deinde
Mediam, & per eas regiones Parthos pe-
tens, habuit regem eorum obvium; pri-
mòque duas legiones cum omnibus impe-
dimentis tormentisque & Statiano legato
amisit: mox sæpius ipse, cum summo to-
tius exercitûs discrimine, ea adiit pericu-
la, e quibus servari se posse desperave-
rat; amissâque non minùs quartâ parte
militum, captivi cujusdam, sed Romani,
consilio ac fide servatur: qui clade Cras-
siani exercitûs captus, quum fortunam non

animum mutasset, accessit nocte ad stationem Romanam, prædixitque, ne destinatum iter peterent, sed diverso silvestrique pervaderent. Hoc M. Antonio, ac tot illis legionibus saluti fuit : de quibus tamen, totoque exercitu, haud minùs pars quarta, ut prædiximus, militum ; calorum, servitiiue tertia desiderata est ; impedimentorum vix ulla superfuit. Hanc tamen Antonius fugam suam, quia vivus exierat, victoriam vocabat : qui tertiâ æstate reversus in Armeniam, regem ejus Artavasden, fraude deceptum, catenis, sed, ne quid honori deesset, aureis vinxit. Crescente deinde & amoris in Cleopatram incendio, & vitiorum, quæ semper facultatibus licentiâque & assentationibus aluntur, magnitudine, bellum patriæ inferre statuit, quum antè, novum se Liberum patrem appellari jussisset : quum redimitus hederis, coronâque velatus aureâ, & thyrsus tenens, cothurnisque succinctus, curru, velut Liber pater, vectus esset Alexandriæ.

LXXXIII. Inter hunc apparatus belli, Plancus non judicio recta legendi, neque amore reipublicæ aut Cæsaris [quippe hæc semper impugnabat] sed morbo proditor, quum fuisset humillimus assentator reginæ, & infra servos cliens, quum Antonii libra-

rius, quum obscœnissimarum rerum & auctor & minister, quum in omnia & omnibus venalis, quum cœruleatus & nudus, caputque redimitus arundine & caudam trahens, genibus innixus Glaucum saltasset, in convivio refrigeratus ab Antonio, ob manifestarum rapinarum indicia, transfugit ad Cæsarem : & idem postea clementiam victoris pro sua virtute interpretabatur ; dictitans, id probatum a Cæsare, cui ille ignoverat. Hunc mox avunculum Titius imitatus est. Haud absurdè Coponius vir e prætoriis gravissimus, P. Silii focer, quum recens transfuga multa ac nefanda Plancus absenti Antonio in senatu objiceret : *Multa*, inquit, *mehercules fecit Antonius pridie, quàm tu illum relinqueres.*

LXXXIV. Cæsare deinde & Messallâ Corvino consulibus debellatum apud Actium, ubi longè antequam dimicaretur, exploratissima Julianarum partium fuit victoria. Vigebat in hac parte miles atque imperator, illâ marcebant omnia : hinc remiges firmissimi, illinc inopiâ affectissimi : navium hinc magnitudo modica, cum celeritate, adversa illa specie erat terribilior : hinc ad Antonium nemo, illinc ad Cæsarem quotidie aliqui transfugiebant. Denique in ore atque oculis Antonianæ classis per Marcum Agrippam Leucas ex-

pugnata , Patræ captæ , Corinthus occupata , bis ante ultimum discrimen classis hostium superata. Rex Amyntas meliora & utiliora secutus (nam Deillius exempli sui tenax , ut a Dolabella ad Cassium) virque clarissimus Cn. Domitius , qui solus Antonianarum partium numquam reginam nisi nomine salutavit , maximo & præcipiti periculo transmisit ad Cæsarem.

LXXXV. Advenit deinde maximi discriminis dies , quo Cæsar , Antoniusque , productis classibus , pro salute alter , in ruinam alter terrarum orbis dimicavere. Dextrum navium Julianarum cornu M. Lurio commissum , lævum Aruntio , Agrippæ omne classici certaminis arbitrium. Cæsar ei parti destinatus , in quam a fortuna vocaretur , ubique aderat : classis Antonii regimen Publicolæ Sosioque commissum. At in terra locatum exercitum Taurus Cæsaris , Antonii regebat Canidius. Ubi initum certamen est , omnia in altera parte fuere , dux , remiges , milites ; in altera nihil præter milites : prima occupat fugam Cleopatra ; Antonius fugientis reginæ , quàm pugnantis militis sui , comes esse maluit ; & imperator , qui in desertores sævire debuerat , desertor exercitûs sui factus est. Illis etiam , detracto capite , in longum fortissimè pugnandi duravit con-

stantia; & desperatâ victoriâ, in mortem dimicabatur. Cæsar, quos ferro poterat interimere, verbis mulcere cupiens, clamanſque & ostendens fugiſſe Antonium, quærebat, pro quo & cum quo pugnarent? At illi, quum diu pro abſente dimicaſſent duce, ægrè ſummiſſis armis, ceſſere victoriam; citiùſque vitam veniamque Cæſar promiſit, quàm illis, ut ea precarentur, perſuaſum eſt. Fuitque in confeſſo, milites optimi imperatoris, imperatorem fugaciſſimi militis functum officio; ut dubites, ſuone, an Cleopatraræ arbitrio victoriam temperaturus fuerit, qui ad ejus arbitrium direxit fugam. Idem locatus in terra fecit exercitus, quum ſe Canidius præcipiti fugâ rapuiſſet ad Antonium.

LXXXVI. Quid ille dies terrarum orbi præſtiterit, ex quo in quem ſtatum pervenerit fortuna publica, quis in hoc tranſcursu tam arctati operis exprimere audeat? Victoria verò fuit clementiſſima; nec quiſquam interemptus eſt, niſi pauciſſimi, & hi qui deprecari quidem pro ſe non ſuſtinerent. Ex qua lenitate ducis colligi potuit, quem aut initio triumviratûs ſui, aut in campis Philippiis, ſi ſic licuiſſet, victoriæ ſuæ facturum fuerit modum. At Solum L. Arruntii priſcâ gravitate cele-

berrimi fides , mox diu cum clementia luctatus sua Cæsar , servavit incolumem. Non prætereatur Asinii Pollionis factum & dictum memorabile : namque quum se post Brundisinam pacem continuisset in Italia , neque aut vidisset umquam reginam , aut post enervatum amore ejus Antonii animum partibus ejus se immiscuisset , rogante Cæsare , ut secum ad bellum proficisceretur Actiacum : *Mea* , inquit , *in Antonium majora merita sunt , illius in me beneficia notiora : itaque discrimini vestro me subtraham , & ero præda victoris.*

LXXXVII. Proximo deinde anno persecutus reginam Antoniumque Alexandriam , ultimam bellis civilibus imposuit manum. Antonius se ipse non segniter interemit , adeo ut multa desidiæ crimina morte redimeret. At Cleopatra , frustratis custodibus , illatâ aspide , morsu sanè ejus , expers muliebris metûs spiritum reddidit. Fuitque & fortunâ & clementiâ Cæsaris dignum , quòd nemo ex iis , qui contra eum arma tulerant , ab eo jussu ejus interemptus. D. Brutum Antonii interemit crudelitas : Sex. Pompeium , ab eodem victum , idem Antonius , quum dignitatis quoque servandæ dedisset fidem , etiam spiritu privavit : Brutus & Cassius antè , quàm victorum experirentur animum , vo-

luntariâ morte obierunt. Antonii Cleopatræque quis fuerit exitus , narravimus. Canidius timidiùs decessit , quàm professioni ejus , quâ semper usus erat , congruebat. Ultimus autem ex interfectoribus Cæsaris Parmensis Cassius morte pœnas dedit , ut dederat Trebonius.

LXXXVIII. Dum ultimam bello Actiaco Alexandrinoque Cæsar imponit manum , M. Lepidus juvenis formâ quàm mente melior , Lepidi ejus , qui triumvir fuerat reipublicæ constituendæ filius , Junia Bruti sorore natus , interficiendi , simul in Urbem revertisset , Cæsaris consilia inierat. Tunc Urbis custodiis præpositus C. Mæcenas , equestri sed splendido genere natus , vir , ubi res vigiliam exigeret , sanè exsomnis , providens atque agendi sciens ; simul verò aliquid ex negotio remitti posset , otio ac mollitiis pene ultra feminam fluens , non minùs Agrippâ Cæsari carus , sed minùs honoratus ; quippe vixit angusto clavo pene contentus : nec minora consequi potuit , sed non tam concupivit. Hic speculatus est per summam quietem ac dissimulationem præcipitis consilia juvenis , & mirâ celeritate , nullâque cum perturbatione aut rerum aut hominum oppresso Lepido , immane novi ac resurrectioni belli civilis restinxit initium ; & ille

quidem malè consultorum pœnas exsolvit. Æquetur prædictæ Calpurniæ Antistii, Servilia Lepidi uxor, quæ, vivo igni devorato, præmaturam mortem immortalis nominis sui pensavit memoriâ.

LXXXIX. Cæsar autem reversus in Italiam atque Urbem, quo occurſu, quo favore omnium hominum, ætatum, ordinum exceptus sit; quæ magnificentia triumphorum ejus, quæ fuerit munerum, ne in operis quidem justæ materia, nedum hujus tam recisi, dignè exprimi potest. Nihil deinde optare a Diis homines, nihil Dii hominibus præstare possunt, nihil voto concipi, nihil felicitate consummari, quod non Augustus, post reditum in Urbem, reipublicæ populoque Romano terrarumque orbi repræsentaverit. Finita vicesimo anno bella civilia, sepulta externa, revocata pax, sopitus ubique armorum furor, restituta vis legibus, judiciis auctoritas, senatui majestas: imperium magistratuum ad pristinum redactum modum; tantummodo octo prætoribus allekti duo; prisca illa & antiqua reipublicæ forma revocata: Redit cultus agris, sacris honos, securitas hominibus; certa cuique rerum suarum possessio: leges emendatæ utiliter, latæ salubriter; senatus sine asperitate nec sine severitate lectus. Principes viri, triumphis-
que

que & amplissimis honoribus functi, hortatu principis ad ornandam Urbem illecti sunt. Consulatus tantummodo usque ad undecimum, quem continuaret Cæsar, quum sæpe obnitens repugnasset, impetrari potuit: nam dictaturam, quàm pertinaciter ei deferebat populus, tam constanter repulit. Bella sub imperatore gesta, pacatusque victoriis terrarum orbis, & tot extra Italiam domique opera, omne ævi sui spatium impensurum in id solum opus scriptorem fatigent. Nos memores professionis, universam imaginem principatûs ejus oculis animisque subjecimus.

X C. Sepultis, ut prædiximus, bellis civilibus, coalescentibusque reipublicæ membris eo curante, quæ tam longa armorum series laceraverat, Dalmatia viginti & ducentos annos rebellis ad certam confessionem pacata est imperii; Alpes feris multisque nationibus celebres perdomitæ; Hispaniæ, nunc ipsius præsentîâ, nunc Agrippæ, quem usque in tertium consulatum, & mox collegium tribunitiæ potestatis amicitia principis evexerat, multo varioque Marte pacatæ. In quas provincias quum initio, Scipione & Sempronio Longo consulibus, primo anno secundi Punici, abhinc annos ducentos quinquaginta, Romani exercitus missi essent, duce

Cn. Scipione, Africani patruo ; per annos ducentos in his multo mutuoque ita certatum est sanguine , ut amissis populi Romani tot imperatoribus exercitibusque , sæpe contumelia , etiam nonnumquam periculum Romano inferretur imperio. Illæ enim provinciæ Scipiones consumpserunt ; illæ contumelioso viginti annorum bello sub duce Viriatho majores nostros exercuerunt ; illæ , terrore Numantini belli , populum Romanum concusserunt : in illis turpe Q. Pompeii fœdus , turpiusque Mancini , senatus cum ignominia dediti imperatoris rescidit : illa tot consulares , tot prætorios absumpsit duces ; patrumque ætate , in tantum Sertorium armis extulit , ut per quinquennium dijudicari non potuerit , Hispanis Romanisne in armis plus esset roboris , & uter populus alteri pariturus foret. Has igitur provincias tam diffusas , tam frequentes , tam feras ad eam pacem abhinc annos fermè quinquaginta perduxit Cæsar Augustus , ut , quæ maximis bellis numquam vacaverant , eæ sub C. Antistio , ac deinde P. Silio legato ceterisque postea , etiam latrociniis vacarent.

XCI. Dum pacatur Occidens , ab Oriente ac rege Parthorum signa Romana , quæ Crasso oppresso Orodes , quæ Antonio

pulso filius ejus Phraates ceperant, Augusto remissa sunt : quod cognomen illi viro Planci sententiâ consensus universi senatûs populique Romani indidit. Erant tamen qui hunc felicissimum statum odissent. Quippe L. Murena & Fannius Cæpio, diversis moribus [nam Murena sine hoc facinore potuit videri bonus, Cæpio & ante hoc erat pessimus] quum inissent occidendi Cæsaris consilia, oppressi auctoritate publicâ, quod vi facere voluerant, jure passi sunt. Neque multò pòst Rufus Egnatius, per omnia gladiatorum quàm senatori propior, collecto in ædilitate favore populi, quem exstinguendis privatâ familiâ incendiis in dies auxerat, in tantum quidem, ut ei præturam continuaret, mox etiam consulatum petere ausus ; quum esset omni flagitiorum scelerumque conscientiammersus ; nec melior illi res familiaris quàm mens foret ; aggregatis simillimis sibi, interimere Cæsarem statuit, ut quo salvo salvus esse non poterat, eo sublato moreretur. Quippe ita se mores habent, ut publicâ quisque ruinâ malit occidere, quàm suâ proteri, & idem passurus, minus conspici. Neque hic prioribus in occultando felicius fuit ; addictusque carceri cum consciiis facinoris, mortem dignissimam vitâ suâ obiit.

XCII. Præclarum excellentis viri factum C. Sentii Saturnini , circa ea tempora consulis , ne fraudetur memoriâ. Aberat in ordinandis Asiæ Orientisque rebus Cæsar , circumferens terrarum orbi præsentia suâ pacis suæ bona : tum Sentius fortè & solus & absente Cæsare consul , quum alia , priscâ severitate summâque constantiâ , vetere consulum more ac severitate gessisset , protraxisset publicanorum fraudes , punisset avaritiam , regessisset in ærarium pecunias publicas , tum in comitiis habendis præcipuum egit consulem : nam & quæsturam petentes , quos indignos iudicavit , profiteri vetuit ; & quum id facturos se perseverarent , consularem , si in campum descendissent , vindictam minatus est ; & Egnatium , florentem favore publico , sperantemque , ut præturam ædilitati , ita consulatum præturæ se juncturum , profiteri vetuit ; & quum id non obtinuisset , juravit , etiam si factus esset consul suffragiis populi , tamen se eum non renuntiaturum. Quod ego factum cuilibet veterum consulum gloriæ comparandum reor , nisi quòd naturaliter audita visis laudamus libentiùs ; & præsentia invidia , præterita veneratione prosequimur ; & his nos obrui , illis instrui credimus.

XCIII. Ante triennium ferè quàm

Egnatianum scelus erumperet, circa Murenæ Cæpionisque conjurationis tempus, abhinc annos quinquaginta, M. Marcellus fororis Augusti Octaviæ filius, quem homines ita, si quid accidisset Cæsari, successorem potentiae ejus arbitrabantur futurum, ut tamen id per M. Agrippam securo ei posse contingere non existimarent, magnificentissimo munere ædilitatis edito, decessit admodum juvenis, sanè, ut aiunt, ingenuarum virtutum, lætusque animi & ingenii, fortunæque, in quam alebatur, capax. Post cujus obitum Agrippa, qui sub specie ministeriorum principalium profectus in Asiam, ut fama loquitur, ob tacitas cum Marcello offensiones, præsentem se subduxerat tempori, reversus inde, filiam Cæsaris Juliam, quam in matrimonio Marcellus habuerat, duxit uxorem; feminam neque sibi neque reipublicæ felicitis uteri.

XCIV. Hoc tractu temporum, Tib. Claudius Nero, quo trimo, ut prædiximus, Livia Drusi Claudiani filia, despondente Nerone cui antè nupta fuerat, Cæsari nupserat, innutritus cœlestium præceptorum disciplinis, juvenis genere, formâ, celsitudine corporis, optimis studiis, maximoque ingenio instructissimus, qui protinus, quantus est, sperari potuerat,

visusque prætulerit principem , quæstor undevicesimum annum agens , capeffere cœpit rempublicam , maximamque difficultatem annonæ , ac rei frumentariæ inopiam , ita Ostiæ atque in Urbe mandato vitrici moderatus est , ut per id , quod agebat , quantus evasurus esset eluceret. Nec multò post missus ab eodem vitrico cum exercitu ad visendas , ordinandasque , quæ sub Oriente sunt , provincias , præcipuis omnium virtutum experimentis in eo tractu editis , cum lègionibus ingressus Armeniam , redactâ eâ in potestatem populi Romani , regnum ejus Artavasdi dedit. Cujus rex quoque Parthorum tanti nominis famâ territus , liberos suos ad Cæsarem misit obsides.

XCV. Reversum inde Neronem Cæsar haud mediocris belli molem experiri statuit , adjutore operis dato fratre ipsius Druso Claudio , quem intra Cæsaris penates enixa erat Livia. Quippe uterque , divisis partibus Rhætos Vindelicosque aggressi , multis urbium & castellorum oppugnationibus , nec non directâ quoque acie feliciter functi , gentes locis tutissimas , aditu difficillimas , numero frequentes , feritate truces , majore cum periculo quàm damno Romani exercitûs , plurimorum earum sanguine perdomuerunt. Ante

quæ tempora censura Planci & Paulli , acta inter discordiam , neque ipsis honori , neque reipublicæ usui fuit ; quam alteri vis censoris , alteri vita deesset ; Paulus vix posset implere censorem , Plancus timere deberet , ne quidquam objicere posset adolescentibus , aut objicientes audire , quod non agnosceret senex.

XCVI. Mors deinde Agrippæ (qui novitatem suam multis rebus nobilitaverat , atque in hoc perduxerat , ut & Neronis esset focer ; cujusque liberos , nepotes suos , D. Augustus , præpositis Caii ac Lucii nominibus , adoptaverat) admovit propius Neronem Cæsari : quippe filia ejus Julia , quæ fuerat Agrippæ nupta , Neroni nupsit. Subinde bellum Pannonicum , quod inchoatum Agrippâ Marcoque Vinicio avo tuo consulibus , magnum atroxque & perquam vicinum imminebat Italiæ , per Neronem gestum est. Gentes Pannoniorum , Dalmatarumque nationes , situmque regionum ac fluminum , numerumque & modum virium , excelsissimasque & multiplices eo bello victorias tanti imperatoris , alio loco explicabimus. Hoc opus servet formam suam. Hujus victoriæ compos Nero , ovans triumphavit.

XCVII. Sed dum in hac parte imperii omnia geruntur prosperrimè , accepta

in Germania clades sub legato M. Lollio ; homine in omnia pecuniæ quàm rectè faciendi cupidiorè , & inter summam vitiorum dissimulationem vitiosissimo ; amissaque legionis quintæ aquila vocavit ab Urbe in Gallias Cæsarem. Cura deinde atque onus Germanici belli delegata Druso Claudio , fratri Neronis , adolescenti tot tantarumque virtutum , quot & quantas natura mortalis recipit , vel industria perficit ; cujus ingenium utrum bellicis magis operibus , an civilibus suffecerit artibus , in incerto est. Morum certè dulcedo ac suavitas , & adversus amicos æqua ac par sui æstimatio , inimitabilis fuisse dicitur : nam pulchritudo corporis proxima fraternæ fuit. Sed illum , magna ex parte domitorem Germaniæ , plurimo ejus gentis variis in locis profuso sanguine , factorum iniquitas , consulem , agentem annum tricesimum , rapuit. Moles deinde ejus belli translata in Neronem est , quod is suâ & virtute & fortunâ administravit ; peragratuque victor omnes partes Germaniæ , sine ullo detrimento commissi exercitûs , quod præcipuè huic duci semper curæ fuit , sic perdomuit eam , ut in formam pene stipendiariæ redigeret provinciæ. Tum alter triumphus , cum altero consûlatu , ei oblatus est.

XCVIII. Dum ea, quæ prædiximus, in Pannonia Germaniaque geruntur, atrox in Thracia bellum ortum, omnibus ejus gentis nationibus in arma accensis, L. Pisonis, quem hodieque diligentissimum atque eundem lenissimum securitatis urbanae custodem habemus, virtus compressit. Quippe legatus Cæsaris triennio cum his bellavit; gentesque ferocissimas, plurimo cum earum excidio, nunc acie, nunc expugnationibus, in pristinum pacis redegit modum, ejusque patratiōe Asiæ securitatem, Macedoniæ pacem reddidit. De quo viro hoc omnibus sentiendum ac prædicandum est, esse mores ejus vigore ac lenitate mixtissimos, & vix quemquam reperiri posse, qui aut otium validius diligat, aut facilius sufficiat negotio, & magis, quæ agenda sunt, curet sine ulla ostentatione agendi.

XCIX. Brevi interjecto spatio Tib. Nero, duobus consulatibus totidemque triumphis actis, tribunitiæ potestatis confortione æquatus Augusto, civium post unum (& hoc, quia volebat), eminentissimus, ducum maximus, famâ fortunâque celeberrimus, & verè alterum reipublicæ lumen & caput, mirâ quadam & incredibili atque inenarrabili pietate (cujus causæ mox detectæ sunt) quum Caius Cæsar

sumpsisset jam virilem togam, Lucius item maturus esset curis, ne fulgor suus orientium juvenum obstaret initiis, dissimulatâ causâ consilii sui, commeatum ab focero atque eodem vitrico acquiescendi a continuatione laborum petiit. Quis fuerit eo tempore civitatis habitus, qui singulorum animi, quæ digredientium a tanto viro omnium lacrymæ, quàm pene ei patria manum injecerit, justo servemus operi. Illud etiam in hoc transcurso dicendum est, ita septem annos Rhodi moratum, ut omnes, qui pro consulibus legatique in transmarinas profecti provincias, visendi ejus gratiâ ad eum convenientes semper privato [si illa majestas privata umquam fuit] fasces suos summisserint, fassique sint, otium ejus honoratius imperio suo.

C. Sensit terrarum orbis digressum a custodia Neronem Urbis: nam & Parthus, desciscens a societate Romana, adjecit Armeniæ manum; & Germania, aversis domitoris sui oculis, rebellavit. At in Urbe, eo ipso anno, quo magnificentissimi gladiatorii muneris naumachiæque spectaculis, D. Augustus, abhinc annos triginta, se & Gallo Caninio consulibus, dedicato Martis templo, animos oculosque populi Romani repleverat, fœda dictu, memoriâque horrenda in ipsius

domo tempestas erupit. Quippe filia ejus Julia, per omnia tanti parentis ac viri immemor, nihil, quod facere aut pati turpiter posset femina, luxuriâ, libidine infectum reliquit, magnitudinemque fortunæ suæ peccandi licentiâ metiebatur, quidquid liberet pro licito vindicans. Tum Julius Antonius, singulare exemplum clementiæ Cæsaris, violator ejus domûs, ipse sceleris a se commissi ultor fuit; quem, victo ejus patre, non tantum incolumitate donaverat, sed sacerdotio, præturâ, consulatu, provinciis honoratum, etiam matrimonio sororis suæ filiæ in arctissimam affinitatem receperat; Quinctiusque Crispinus, singularem nequitiam supercilio truci protegens, & Appius Claudius, & Sempronius Gracchus, ac Scipio, alique minoris nominis utriusque ordinis viri, quasi cujuslibet uxore violatâ, pœnas pependere, quum Cæsaris filiam, & Neronis violassent conjugem. Julia relegata in insulam, patriæque & parentum subducta oculis, quam tamen comitata mater Scribonia, voluntaria exsilio permansit comes.

CI. Breve ab hoc intercefferat spatium, quum C. Cæsar, antè aliis provinciis ad visendum obitis, in Syriam missus, convento prius Tib. Nerone, cui omnem

E vj.

honorem ut superiori habuit, tam variè se ibi gessit, ut nec laudaturum magna, nec vituperaturum mediocris materia deficiat, cum rege Parthorum juvene excelssimo, in insula quam amnis Euphrates ambiebat, æquato utriusque partis numero, coiit. Quod spectaculum stantis ex diverso hinc Romani, illinc Parthorum exercitûs, quum duo inter se eminentissima imperiorum & hominum coirent capita, perquam clarum & memorabile, sub initia stipendiorum meorum, tribuno militum mihi visere contigit: quem militiæ gradum antè sub patre tuo, M. Vinici, & P. Silio auspiciatus in Thracia Macedoniaque, mox Achaia Asiaque, & omnibus ad Orientem visis provinciis, & ore atque utroque maris Pontici latere, haud injucundâ tot rerum, locorum, gentium, urbium recordatione perfruor. Prior Parthus apud Caium in nostra ripa, posterior hic apud regem in hostili epulatus est.

CII. Quo tempore M. Lollii, quem veluti moderatorem juventæ filii sui Augustus esse voluerat, perfida & plena subdoli ac versuti animi consilia per Parthum indicata Cæsari, fama vulgavit: cujus mors intra paucos dies fortuita an voluntaria fuerit ignoro. Sed quàm hunc deces-

sisse lætati homines , tam paulò pòst obiisse Censorinum in iisdem provinciis graviter tulit civitas , virum demerendis hominibus genitum. Armeniam deinde ingressus , primâ parte introitus prosperè gessit ; mox in colloquium (cui se temerè crediderat) circa Artageram graviter a quodam , nomine Adduo , vulneratus , ex eo , ut corpus minùs habile , ita animum minùs utilem reipublicæ habere cœpit. Nec defuit conversatio hominum , vitia ejus assentatione alentium (etenim semper magnæ fortunæ comes adest adulatio) per quæ eò ductus erat , ut in ultimo ac remotissimo terrarum orbis angulo consenescere , quàm Romam regredi , mallet. Diu inde reluctatus , invitùsque revertens in Italiam , in urbe Lyciæ (Limyram nominant) morbo obiit ; quum ante annum fermè L. Cæsar , frater ejus , Hispanias petens , Massiliæ decessisset.

CIII. Sed fortuna , quæ subduxerat spem magni nominis , jam tum reipublicæ sua præsidia reddiderat : quippe ante utriusque horum obitum , patre tuo P. Vinicio consule , Tib. Nero , reversus Rhodo , incredibili lætitiâ patriam repleverat. Non est diu cunctatus Cæsar Augustus ; neque enim quærendus erat , quem legeret , sed legendus qui eminebat. Itaque

quod post Lucii mortem , adhuc Caio vivo , facere voluerat , atque vehementer repugnante Nerone erat inhibitus , post utriusque adolescentium obitum facere perseveravit , ut & tribunitiæ potestatis consortionem Neroni constitueret , multum quidem eo quum domi tum in senatu recusante , & eum , Ælio Cato & Sentio consulibus , quinto Kalend. Julias , post Urbem conditam annis septingentis quinquaginta sex , abhinc annis viginti sex , adoptaret. Lætitiâ illius diei , concursumque civitatis , & vota pene inferentium Cœlo manus , spemque conceptæ perpetuæ securitatis æternitatisque Romani imperii , vix in illo iusto opere abundè persequi poterimus , nedum hîc implere. Tentemus id unum dixisse , quàm ille (omnia) omnibus fuerit. Tum refulsit certa spes liberorum parentibus , viris matrimoniorum , dominis patrimonii , omnibus hominibus salutis , quietis , pacis , tranquillitatis ; adeo ut nec plus sperari potuerit , nec spei responderi felicius.

CIV. Adoptatus eâdem diè etiâ M. Agrippa , quem post mortem Agrippæ Julia enixa erat ; sed in Neronis adoptione illud adjectum , his ipsis Cæsaris verbis : *Hoc , inquit , reipublicæ causâ facio.* Non diu vindicem custodemque imperii

fui morata in Urbe patria , protinus in Germaniam misit , ubi ante triennium sub M. Vinicio , avo tuo , clarissimo viro , immensum exarserat bellum : erat & ab eo quibusdam in locis gestum , quibusdam sustentatum feliciter , eoque nomine decreta ei cum speciosissima inscriptione operum ornamenta triumphalia. Hoc tempus me , functum antè tribunatu castrorum , Tib. Cæsaris militem fecit : quippe protinus ab adoptione missus cum eo præfectus equitum in Germaniam , successor officii patris mei , coelestissimorum ejus operum , per annos continuos novem præfectus aut legatus , spectator & pro captu mediocritatis meæ adjutor fui. Neque illi spectaculo , quo frui sum , simile conditio mortalis recipere videtur mihi ; quum per celeberrimam Italiæ partem , & tractum omnem Galliæ provinciarum , veterem imperatorem , & antè meritis ac virtutibus , quàm nomine , Cæsarem revisentes , sibi quisque , quàm illi , gratularentur plenius. At verò militum conspectu ejus elicite gaudio lacrymæ , alacritasque , & salutationis nova quædam exultatio , & contingendi manum cupiditas , non continentium protinus , quin adjicerent : *Videmus te , imperator ! salvum recepimus !* ac deinde , *Ego tecum , Imperator , in Ar-*

menia, ego in Rhætia fui : ego à te in Vindelicis, ego in Pannonia, ego in Germania donatus sum.

CV. Neque verbis exprimi, & fortasse vix mereri fidem potest, intrata protinus Germania, subacti Caninefates, Attuarii, Bructeri, recepti Cherusci, & (utinam minùs mox nostrâ clade nobilis) transitus Visurgis; penetrata ulteriora: quum omnem partem asperrimi & periculosissimi belli Cæsar vindicaret, in iis, quæ minoris erant discriminis, Sentium Saturninum, qui tum legatus patris ejus in Germania fuerat, præfecisset, vtrum multiplicem virtutibus, navum, agilem, providum, militariumque officiorum patientem ac peritum pariter, sed eundem, ubi negotia fecissent locum otio, liberaliter lautèque eo abutentem; ita tamen, ut eum splendidum ac hilarem potiùs, quàm luxuriosum aut desidem diceres: de ejus viri claro celebrique consulatu prædiximus. Anni ejus æstiva, usque in mensem Decembrem producta, immanis emolumentum fecere victoriæ. Pietas sua Cæsarem, pene obstructis hyeme Alpibus, in Urbem traxit; at tutela imperii eum veris initio reduxit in Germaniam, in cujus mediis finibus, ad caput Lupiæ fluminis, hyberna digrediens princeps locaverat,

CVI. Proh Dii boni, quanti voluminis opera insequenti æstate sub duce Tiberio Cæsare gessimus ! Perlustrata armis tota Germania est : victæ gentes, pene nominibus incognitæ : receptæ Cauchorum nationes : omnis eorum juvenus, infinita numero, immensa corporibus, situ locorum tutissima, traditis armis, unà cum ducibus suis, septa fulgenti armatoque militum nostrorum agmine, ante imperatoris procubuit tribunal. Fracti Langobardi, gens etiam Germanâ feritate ferocior : denique quod numquam antea spe conceptum, nedum opere tentatum erat, ad quadringentesimum milliarium, a Rheno usque ad flumen Albim, qui Semnonum Hermundorumque fines præterfluit, Romanus cum signis perductus exercitus; & eodem, mirâ felicitate & curâ ducis, temporum quoque observantiâ, classis, quæ Oceani circumnavigaverat sinus, ab inaudito atque incognito antè mari flumine Albi subvecta, plurimarum gentium victori, cum abundantissima rerum omnium copia, exercitui Cæsarique se junxit.

CVII. Non tempero mihi, quin tantæ rerum magnitudini hoc, qualecumque est, inferam. Quum citeriorem ripam prædicti fluminis castris occupassemus, & ulterior armatâ hostium juventute fulgeret, sub

omnem motum nostrarum navium protinus refugientium, unus e barbaris, ætate senior, corpore excellens, dignitate, quantum ostendebat cultus, eminens, cavatum (ut illis mos est) ex materia conscendit alveum, solusque id navigii genus temperans, ad medium processit fluminis; & petiit, liceret sibi, sine periculo, in eam, quam armis tenebamus, egredi ripam, ac videre Cæsarem. Data petenti facultas. Tum appulso lintre, & diu tacitus contemplatus Cæsarem; *Nostra quidem*, inquit, *furit juvenus, quæ quum vestrum numen absentium colat, præsentium potiùs arma metuit, quàm sequitur fidem: sed ego beneficio ac permisso tuo, Cæsar, quos antè audiebam, hodie vidi Deos; nec feliciorem ullum vitæ meæ aut optavi aut sensi diem.* Impetratoque ut manum contingeret, reversus in naviculam, sine fine respectans Cæsarem, ripæ suorum appulsus est. Victor omnium gentium locorumque, quos adierat, Cæsar, cum incolumi inviolatoque, & semel tantummodo, magna cum clade hostium, fraude eorum tentato exercitu, in hyberna legiones reduxit, eâdem, quâ priore anno, festinatione Urbem petens.

CVIII. Nihil erat jam in Germania, quod vinci posset, præter gentem Mar-

comannorum ; quæ Maroboduo duce excitata sedibus suis , atque in interiora refugiens , incinctos Hercyniæ sylvæ campos incolebat. Nulla festinatio hujus viri mentionem transgredi debet. Maroboduus , genere nobilis , corpore prævalens , animo ferox , natione magis quàm ratione barbarus , non tumultuarium , neque fortuitum , neque mobilem & ex voluntate parentium constantem , inter suos occupavit principatum ; sed certum imperium , vimque regiam complexus animo , statuit , advocatâ procul a Romanis gente suâ , eò progredi , ubi , quum propter potentiora arma refugisset , sua faceret potentissima. Occupatis igitur , quos prædiximus , locis , finitimos omnes aut bello domuit , aut conditionibus juris sui fecit.

CIX. Corpus suum custodiâ , tum imperium perpetuis armorum exercitiis pene ad Romanæ disciplinæ formam redactum , brevi in eminens & nostro quoque imperio timendum perduxit fastigium ; gerebatque se ita adversùs Romanos , ut neque bello nos lacefferet , & si lacefferetur , superesse sibi vim ac voluntatem resistendi declararet. Legati , quos mittebat ad Cæsares , interdum ut supplicem commendabant , interdum ut pro pari loquerentur. Gentibus hominibusque a nobis

desciscentibus erat apud eum perfugium : totusque ex malè dissimulato agebat æmulum ; exercitumque quem septuaginta millium peditum , quatuor equitum fecerat , assiduis adversùs finitimos bellis exercendo , majori , quàm quod habebat , operi præparabat. Eratque etiam eò timendus , quòd quum Germaniam ad lævam & in fronte , Pannoniam ad dexteram , a tergo sedium suarum haberet Noricos , tamquam in omnes semper venturus , ab omnibus timebatur. Nec securam incrementi sui patiebatur esse Italiam ; quippe quum a summis Alpium jugis , quæ finem Italiæ terminant , initium ejus finium haud multo plus ducentis millibus passuum abesset. Hunc virum & hanc regionem proximo anno diversis e partibus Tib. Cæsar aggredi statuit. Sentio Saturnino mandatum , ut per Cattos , excisis continentibus Hercyniæ sylvis , legiones Boiohœmum [id regioni , quàm incolebat , Maroboduus , nomen est] duceret : ipse a Carnunto , qui locus Norici regni proximus ab hac parte erat , exercitum , qui in Illyrico merebat , ducere in Marcomannos orsus est.

CX. Rumpit , interdum moratur proposita hominum fortuna. Præparaverat jam hyberna Cæsar ad Danubium , ad-

motoque exercitu non plus quàm quinque dierum iter a primis hostium, Saturninum admoveri placuerat : cujus copiae pene æquali divisæ intervallo ab hoste, intra paucos dies in prædicto loco cum Cæsare juncturæ erant ; quum universa Pannonia, insolens longæ pacis bonis, & adulta viribus Dalmatia, omnibus tractûs ejus gentibus in societatem adductis, constitit, arma corripuit. Tum necessaria gloriosis præposita ; neque tutum visum, abdito in interiora exercitu, vacuum tam vicino hosti relinquere Italiam. Gentium nationumque, quæ rebellaverant, omnis numerus ampliùs octingenta millia explebat ; ducenta ferè peditum colligebantur, armis habilia ; equitum novem : cujus immensæ multitudinis, parentis acerrimis ac peritissimis ducibus, pars petere Italiam decreverat, junctam sibi Nauporti ac Tergestis confinio ; pars in Macedoniam se effuderat ; pars suis sedibus præsidium esse destinaverat. Proxima duobus, Batoni ac Pineti, ducibus auctoritas erat. In omnibus autem Pannoniis non disciplinæ tantummodo, sed linguæ quoque notitia Romanæ, plerisque etiam litterarum usus & familiaris animorum erat exercitatio. Itaque hercules, nulla umquam natio tam maturè consilio belli bellum junxit,

ac decreta patravit. Oppressi cives Romani, trucidati negotiatores; magnus vexillariorum numerus ad internecionem, ea in regione quæ plurimum ab imperatore aberat, cæsus; occupata armis Macedonia; omnia & in omnibus locis igni ferroque vastata: quin tantus etiam hujus belli metus fuit, ut stabilem illum, & obfirmatum tantorum bellorum experientiâ, Cæsaris Augusti animum quateret atque terreret.

CXI. Habiti itaque delectus, revocati undique & omnes veterani, viri feminæque ex censu libertinum coactæ dare militem. Audita in senatu vox principis, *decimo die, ni caveretur, posse hostem in urbis Romæ venire conspectum*. Senatorum equitumque Romanorum exactæ ad id bellum operæ pollicitæ. Omnia hæc frustra præparassemus, nisi, qui illa regeret, fuisset. Itaque, ut præsidium militum, respublica ab Augusto ducem in bellum poposcit Tiberium. Habuit in hoc quoque bello mediocritas nostra speciosi ministri locum. Finitâ equestri militiâ, designatus quæstor, necdum senator æquatus senatoribus, etiam designatus tribunus plebis, partem exercitûs ab Urbe, traditi ab Augusto, perduxit ad filium ejus. In quæstura deinde, remissâ sorte provinciæ, legatus

eiusdem ad eundem missus, quas nos primo anno acies hostium vidimus? quantis prudentiâ ducis opportunitatibus, furentes eorum vires universas evasimus partibus? quanto cum temperamento simul utilitatis res auctoritate imperatoris agi vidimus? quâ prudentiâ hyberna disposita sunt? quanto opere inclusus custodiis exercitûs nostri, ne quâ posset erumpere, inopsque copiarum & intra se furens, viribus hostis elanguesceret?

CXII. Felix eventu, forte conatu, primâ æstate belli, Messallini opus mandandum est memoriæ: qui vir, animo etiam quàm gente nobilior, dignissimus qui & patrem Corvinum habuisset, & cognomen suum Cottæ fratri relinqueret, præpositus Illyrico, subitâ rebellionē cum semiplena legione vicesima, circumdatus hostili exercitu, ampliùs viginti millia hostium fudit fugavitque; & ob id ornamentis triumphalibus honoratus est. Ita placebat Barbaris numerus suus, ita fiducia virium, ut, ubicumque Cæsar esset, nihil in se spei reponerent. Pars exercitûs eorum proposita ipsi duci, & ad arbitrium utilitatemque nostram macerata, perductaque ad exitiabilem famem, neque instantes sustinere, neque facientibus copiam pugnandi dirigentibusque aciem

ausa congredi, occupato monte Claudio, munitione se defendit : at ea pars, quæ obviam se effuderat exercitui, quem A. Cæcina & Silvanus Plautius consulares ex transmarinis adducebant provinciis, circumfusa quinque legionibus nostris auxiliaribusque & equitatu regio [quippe magnam Thracum manum junctus prædictis ducibus Rhoemetalces Thraciæ rex in adiutorium ejus belli secum trahebat] pene exitiabilem omnibus cladem intulit. Fugata regionum equestris acies, fugatæ alæ, convertiæ cohortes sunt : apud signa quoque legionum trepidatum. Sed Romana virtus militi plus eo tempore vindicatum gloriæ, quàm ducibus, reliquit : qui multum a more imperatoris sui discrepantes, antè in hostem inciderunt, quàm per exploratores, ubi hostis esset, cognoscerent. Jam igitur in dubiis rebus semetipsæ legiones adhortatæ, jugulatis ab hoste quibusdam tribunis militum, interempto præfecto castrorum, præfectisque cohortium, non incruentis centurionibus, e quibus etiam primi ordines cecidere, invasere hostes ; nec sustinuisse contenti, perruptâ eorum acie, ex insperato victoriam vindicaverunt. Hoc ferè tempore Agrippa, qui eodem die, quo Tiberius, adoptatus ab avo suo naturali erat, & jam ante biennium,

biennium, qualis esset, apparere cœperat, mirâ pravitate animi atque ingenii in præcipitia conversus, patris atque ejusdem avi sui animum alienavit sibi; moxque crescentibus in dies vitiis, dignum furore suo habuit exitum.

CXIII. Accipe nunc, M. Vinici, tantum in bello ducem, quantum in pace vides principem. Junctis exercitibus, quique sub Cæsare fuerant, quique ad eum venerant, contractisque in una castra decem legionibus, septuaginta amplius cohortibus, quatuordecim alis, & pluribus quàm decem veteranorum millibus, ad hoc magno voluntariorum numero, frequentique equite regio; tanto denique exercitu, quantus nullo umquam loco post bella fuerat civilia; omnes eo ipso læti erant, maximamque fiduciam victoriæ in numero reponebant. At imperator, optimus eorum, quæ agebat judex, & utilia speciosis præferens, quodque semper eum facientem vidi in omnibus bellis, quæ probanda essent, non quæ utique probarentur, sequens, paucis diebus exercitum qui venerat, ad refoendas ex itinere ejus vires, moratus; quum eum majorem, quàm ut temperari posset, nequeabilem gubernaculo cerneret, dimittere statuit; prosecutusque longo & perquam laborioso

itinere, cujus difficultas narrari vix potest, ut neque universos quisquam auderet aggredi, & partem digredientium, suorum quisque metu finium, universi tentare non possent, remisit eò undè venerant; & ipse asperimæ hyemis initio regressus Sisiciam, legatos, inter quos ipsi fuimus, partitis præfecit hybernis.

CXIV. O rem dictu non eminentem, sed solidâ verâque virtute atque utilitate maximam, experientiâ suavissimam, humanitate singularem! Per omne belli Germanici Pannonicique tempus, nemo e nobis, gradumve nostrum aut præcedentibus aut sequentibus, imbecillus fuit, cujus salus ac valetudo non ita sustentaretur Cæsaris curâ, tamquam distractissimus ille tantorum onerum mole huic uni negotio vacaret animus. Erat desiderantibus paratum junctum vehiculum; lectica ejus publicata, cujus usum quum alii, tum ego sensi. Jam medici, jam apparatus cibi, jam in hoc solum importatum instrumentum balinei, nullius non succurrit valetudini. Domus tantum ac domestici deerant; ceterum nihil, quod ab illis aut præstari aut desiderari posset. Adjiciam illud, quod, quisquis illis temporibus interfuit, ut alia quæ retuli, agnoscet protinus. Solus semper equo vectus est; solus cum iis;

quos invitaverat, majore parte æstivarum expeditionum, cœnavit sedens: non sequentibus disciplinam, quatenus exemplo non nocebatur, ignovit: admonitio frequens inerat, & castigatio, vindicta rarissima; agebatque medium plurima dissimulantis, aliqua inhibentis. Hyems emolumentum patrati belli contulit: sed insequenti æstate omnis Pannonia, reliquiis totius belli in Dalmatia manentibus, pacem petiit. Ferocem illam tot millium juventutem, paulò antè servitutem minatam Italiæ, conferentem arma, quibus usa erat, apud flumen nomine Bathinum, prostermentemque se universam genibus imperatoris, Batonemque & Pinetem excelsissimos duces, captum alterum, alterum a se deditum, justis voluminibus ordine narrabimus, ut spero. Autumno victor in hyberna reducitur exercitus; cujus omnibus copiis a Cæsare M. Lepidus præfectus est, vir nominis ac fortunæ suorum proximus: quem in quantum quisque aut cognoscere aut intelligere potuit, in tantum miratur ac diligit, tantorumque nominum, quibus ortus est, ornamentum judicat.

CXV. Cæsar ad alteram belli Dalmatici molem animum atque arma contulit: in qua regione quali adjutore legatoque

fratre meo , Magio Celere Velleiano ;
 usus sit , ipsius patrisque ejus prædicatione testatum est , & amplissimorum honorum , quibus triumphans eum Cæsar donavit , signat memoria. Initio æstatis Lepidus , educto hybernis exercitu , per gentes integras immunesque adhuc clade belli , & eò feroces ac truces , tendens ad Tiberium imperatorem , & cum difficultate locorum & cum vi hostium luctatus , magna cum clade obsistentium , excisis agris , exustis ædificiis , cæsis viris , lætus victoriâ , prædâque onustus , pervenit ad Cæsarem , & ob ea , quæ si propriis gessisset auspiciis , triumphare debuerat , ornamentis triumphalibus , consentiente cum iudicio principum voluntate senatûs , donatus est. Illa æstas maximi belli consummavit effectus. Quippe Perustæ & Desitiates Dalmatæ , situ locorum ac montium , ingeniorum ferociâ , mirâ etiam pugnandi scientiâ , & præcipuè angustis saltuum pene inexpugnabiles , non jam ductu , sed manibus atque armis ipsius Cæsaris tum demum pacati sunt , quum pene funditus eversi forent. Nihil in hoc tanto bello , nihil in Germania aut videre majus , aut mirari magis potui , quàm quod imperatori numquam adeò ulla opportuna visa est victoriæ occasio , quam damno amissi

pensaret militis ; semperque visum est gloriosum , quod esset tutissimum ; & antè conscientiæ quàm famæ consultum ; nec umquam consilia ducis judicio exercitûs , sed exercitus providentiâ ducis rectus est.

CXVI. Magna in bello Dalmatico experimenta virtutis in multos ac difficiles locos præmissus Germanicus dedit : celebri etiam operâ diligentique Vibius Postumus , vir consularis , præpositus Dalmatiæ , ornamenta meruit triumphalia ; quem honorem ante paucos annos Passienus & Cossus , viri quibusdam diversis virtutibus celebres , in Africa meruerant. Sed Cossus victoriæ testimonium etiam in cognomen filii contulit , adolescentis in omnium virtutum exempla geniti. At Postumi operum L. Apronius particeps , illâ quoque militiâ eos , quos mox consecutus est , honores excellenti virtute meruit. Utinam non majoribus experimentis testatum esset , quantum in omni re Fortuna posset ! sed in hoc quoque genere abundè agnosci vis ejus potest : nam & Junius Blæsus , vir antiquissimi moris , & priscam gravitatem semper humanitate temperans , in Germania , Illyricoque , & mox in Africa splendidissimis functus ministeriis , non merito , sed materiâ adipiscendi triumphalia defectus est. Et A. Licinius

Nerva Silianus , P. Sili filius , quem virum , ne qui intellexit quidem , abundè miratus est , ne nihil non optimo civi , simplicissimo duci perisset , præreptus immaturè , & fructu amplissimæ principis amicitiae , & consummatione evectæ in altissimum paternumque fastigium imaginis defectus est. Quorum virorum mentioni si quis quæsisse me dicet locum , fatentem arguet : neque enim iustus sine mendacio candor apud bonos crimini est.

CXVII. Tantum quod ultimam impulerat Pannonico ac Dalmatico bello Cæsar manum , quum , intra quinque consummati tanti operis dies , funestæ ex Germania epistolæ , cæsi Vari , trucidatarumque legionum trium , totidemque alarum , & sex cohortium : velut in hoc saltem tantummodo indulgente nobis Fortunâ , ne occupato duce. Et causa & persona moram exigit. Varus Quinctilius illustri magis quàm nobili ortus familiâ , vir ingenio mitis , moribus quietus , ut corpore & animo immobilior , otio magis castrorum quàm bellicæ assuetus militiæ ; pecuniæ verò quàm non contemptor , Syria cui præfuerat declaravit ; quam pauper divitem ingressus , dives pauperem reliquit. Is quum exercitui , qui erat in Germania , præesset , concepit esse homines qui nihil

præter vocem membraque haberent hominum ; quique gladiis domari non poterant , posse jure mulceri. Quo proposito mediam ingressus Germaniam , velut inter viros pacis gaudentes dulcedine , jurisdictionibus , agendoque pro tribunali ordine , trahebat æstiva.

CXVIII. At illi , quod nisi expertus vix credat , in summa feritate versutissimi , natumque mendacio genus , simulant fictas litium series , & nunc provocantes alter alterum injuriâ , nunc agentes gratias , quòd eas Romana justitia finiret , feritasque sua novitate incognitæ disciplinæ mitesceret , & solita armis discerni jure terminarentur , in summam discordiam perduxere Quinctilium , usque eò , ut se prætorem urbanum in foro jus dicere , non in mediis Germaniæ finibus exercitui præesse crederet. Tum juvenis genere nobilis , manu fortis , sensu celer , ultra barbarum promptus ingenio , nomine Arminius , Sigimeri principis gentis ejus filius , ardorem animi vultu oculisque præferens , assiduus militiæ nostræ prioris comes , etiam civitatis Romanæ jus equestremque consecutus gradum , segnitiâ ducis in occasionem sceleris usus est ; haud imprudenter speculatus , neminem celerius opprimi , quàm qui nihil timeret ;

& frequentissimum initium esse calamitatis , securitatem. Primò igitur paucos , mox plures in societatem consilii recipit ; opprimi posse Romanos & dicit & persuadet ; decretis facta jungit ; tempus insidiarum constituit. Id Varo per virum ejus gentis fidelem clarique nominis Segesten indicatur : sed prævalebant jam fata consiliis , omnemque animi ejus aciem præstrinxerant. Quippe ita se res habet , ut plerumque , qui fortunam mutaturus est , consilia corrumpat , efficiatque , quod miserrimum est , ut quod accidit , etiam meritò accidisse videatur , & casus in culpam transeat. Negat itaque Varus se credere , spemque in se benevolentiae ex merito aestimare profitetur : nec diutius , post primum indicem , secundo relictus locus.

CXIX. Ordinem atrocissimæ calamitatis , quâ nulla , post Crassi in Parthis damnum , in externis gentibus gravior Romanis fuit , justis voluminibus , ut alii , ita nos conabimur exponere : nunc summa deflenda est. Exercitus omnium fortissimus , disciplinâ , manu , experiëntiâque bellorum inter Romanos milites princeps , marcore ducis , perfidiâ hostis , iniquitate fortunæ circumventus (quum ne pugnandi quidem egregiè occasio , in

quantum voluerant, data esset immunis, castigatis etiam quibusdam gravi poenâ, quia Romanis & armis & animis usi fuissent) inclusus sylvis, paludibus, insidiis ab eo hoste ad internecionem trucidatus est, quem ita semper more pecudum trucidaverat, ut vitam aut mortem ejus nunc ira nunc venia temperaret. Duci plus ad moriendum quàm ad pugnandum animi fuit: quippe paterni avitque exempli successor, se ipse transfixit. At e præfectis castrorum duobus quàm clarum exemplum L. Eggius, tam turpe Ceïonius prodidit; qui, quum longè maximam partem absumpsisset acies, auctor deditiois, supplicio quàm prælio mori maluit. At Vala Numonius, legatus Vari, cetera quietus ac probus, diri auctor exempli, spoliatum equite peditem relinquens, fugâ cum alis Rhenum petere ingressus est: quod factum ejus fortuna ulta est; non enim desertis superfuït, sed desertor occidit. Vari corpus semiustum hostium laceraverat feritas; caput ejus abscissum latumque ad Marobodum, & ab eo missum ad Cæsarem, gentilitii tamen tumuli sepulturâ honoratum est.

CXX. His auditis, revolât ad patrem Cæsar: perpetuus patronus Romani imperii, assuetam sibi causam suscipit. Mit-

titur ad Germaniam, Gallias confirmat, disponit exercitus, præsidia munit, se magnitudine suâ, non fiduciâ hostium metiens, qui Cimbricam Teutonicamque militiam Italiæ minabantur; ultro Rhenum cum exercitu transgreditur. Arma infert quæ arcuisse pater & patria contenti erant; penetrat interiùs, aperit limites, vastat agros, urit domos, fundit obvios; maximaque cum gloria, incolumi omnium quos transduxerat numero, in hyberna revertitur. Reddatur verum L. Asprenati testimonium, qui legatus sub avunculo suo Varo militans, navâ virilique operâ duarum legionum, quibus præerat, exercitum immunem tantâ calamitate servavit; maturêque ad inferiora hyberna descendendo, vacillantes etiam cis Rhenum sitarum gentium animos confirmavit. Sunt tamen, qui, ut vivos ab eo vindicatos, ita jugulatorum sub Varo occupata crediderint patrimonia, hereditatemque excisi exercitus, in quantum voluerit, ab eo aditam. Lucii etiam Cæditii præfecti castrorum, eorumque, qui unâ circumdati Alifone immensis Germanorum copiis obsidebantur, laudanda virtus est; qui omnibus difficultatibus superatis, quas inopia rerum intolerabiles, vis hostium faciebat inexsuperabiles, nec temerario consilio,

nec segni providentiâ usi , speculatique opportunitatem , ferro sibi ad suos peperere reditum. Ex quo apparet Varum sanè gravem & bonæ voluntatis virum , magis imperatoris defectum consilio , quàm virtute destitutum militum , se , magnificentissimumque perdidisse exercitum. Quum in captivos sæviretur a Germanis , præclari facinoris auctor fuit Calvus Cœlius , vetustate familiæ suæ dignissimus ; qui complexus catenarum , quibus vinctus erat , seriem , ita illas illisit capiti suo , ut protinus pariter sanguinis cerebrique influvio exspiraret.

CXXI. Eadem & virtus & fortuna subsequenti tempore ingressa animum imperatoris Tiberii fuit , quæ initio fuerat ; qui concussis hostium viribus , classicis peditumque expeditionibus , quum res Galliarum maximæ molis , accensasque plebis Viennensium dissensiones , coercitione magis quàm pœnâ mollisset ; & senatus populusque Romanus (postulante patre ejus) ut æquum ei jus in omnibus provinciis exercitibusque esset , quàm erat ipsi , decreto complexus esset [etenim absurdum erat , non esse sub illo , quæ ab illo vindicabantur ; & qui ad opem ferendam primus erat , ad vindicandum honorem non judicari parem.] in Urbem

reversus, jampridem debitum, sed continuatione bellorum dilatum, ex Pannoniis Dalmatisque egit triumphum: cujus magnificentiam quis miretur in Cæsare? fortunæ verò quis non miretur indulgentiam? quippe omnes eminentissimos hostium duces non occisos fama narravit, sed victos triumphus ostendit: quem mihi, fratrique meo, inter præcipuos præcipuisque donis adornatos viros, comitari contigit.

CXXII. Quis non inter reliqua, quibus singularis moderatio Tib. Cæsaris elucet atque eminet, hoc quoque miretur, quod quum sine ulla dubitatione septem triumphos meruerit, tribus contentus fuerit? Quis enim dubitare potest, quin ex Armenia recepta, & ex rege ei præposito, cujus capiti insigne regium suâ manu imposuerat, ordinatisque rebus Orientis, ovans triumphare debuerit? & Vindelicorum Rhætorumque victor, curru Urbem ingredi? fractis deinde post adoptionem continuâ triennii militiâ Germaniæ viribus, idem illi honor & deferendus & recipiendus fuerit? & post cladem sub Varo acceptam, ociùs prospero rerum eventu eadem excisa Germania, triumphum summi ducis adornare debuerit? Sed in hoc viro nescias

utrum magis mireris, quòd laborum periculorumque semper excessit modum, an quòd honorum temperavit.

CXXIII. Venitur ad tempus, in quo fuit plurimum metûs: quippe Cæsar Augustus, quum Germanicum, nepotem suum, reliqua belli patraturum misisset in Germaniam, Tiberium autem filium missurus esset in Illyricum, ad formanda pace, quæ bello subegerat, prosequens eum, simulque interfuturus Athletarum certaminis ludicro, quod ejus honori sacrum a Neapolitanis est, processit in Campaniam: quamquam jam motus imbecillitatis inclinataeque in deterius principia valetudinis senferat, tamen obnitente vi animi, prosecutus filium, digressusque ab eo Beneventi, ipse Nolam petiit; & ingravescente in dies valetudine, quum sciret, quis volenti omnia post se salva remanere arcessendus foret, festinanter revocavit filium: ille ad patrem patriæ expectato revolavit maturius. Tum securum se Augustus prædicans, circumfusufque amplexibus Tiberii sui, commendans illi sua atque ipsius opera, nec quidquam jam de fine, si fata poscerent, recusans, subrefectus primo conspectu alloquioque carissimi sibi spiritûs, mox quum omnem curam fata vincerent, in sua resolutus

initia, Pompeio Apuleioque consulibus, septuagesimo sexto anno, animam cœlestem Cœlo reddidit.

CXXIV. Quid tunc homines timuerint, quæ senatûs trepidatio, quæ populi confusio, quis orbis metus, in quàm arcto salutis exitiique fuerimus confinio, neque mihi tam festinanti exprimere vacat, neque, cui vacat, potest. Id solùm voce publicâ dixisse habeo: cujus orbis ruinam timueramus, eum ne commotum quidem sensimus; tantaque unius viri majestas fuit, ut nec bonis, neque contra malos opus armis foret. Una tamen veluti luctatio civitatis fuit, pugnantis cum Cæsare senatûs populique Romani, ut stationi paternæ succederet; illius, ut potius æqualem civem, quàm eminentem liceret agere principem: tandem magis ratione quàm honore victus est, quum quidquid tuendum non suscepisset, perituum videret; solique huic contigit, pene diutius recusare principatum, quàm, ut occuparent eum, alii armis pugnaverant. Post redditum Cœlo patrem, & corpus ejus humanis honoribus, nomen divinis honoratum, primum principalium ejus operum fuit ordinatio comitiorum; quam manu suâ scriptam Divus Augustus reliquerat. Quo tempore mihi fratrique

meo , candidatis Cæsaris , proximè a nobilissimis ac sacerdotibus viris , destinari prætoribus contigit ; consecutis , ut neque post nos quemquam Divus Augustus , neque ante nos Cæsar commendaret Tiberius.

CXXV. Tulit protinùs voti & consilii sui pretium respublica ; neque diu latuit , aut quid non impetrando passuri fuisset , aut quid impetrando profecissemus. Quippe exercitus , qui in Germania militabat , præsentisque Germanici imperio regebatur , simulque legiones , quæ in Illyrico erant , rabie quâdam & profundâ confundendi omnia cupiditate , novum ducem , novum statum , novam quærebant rempublicam. Quin etiam ausi sunt minari , daturos senatui , daturos principi leges ; modum stipendii , finem militiæ sibi ipsi constituere conati sunt : processum etiam in arma , ferrumque strictum est ; & pene in ultimum gladiatorum erupit impunitas ; defuitque qui contra rempublicam duceret , non qui sequerentur. Sed hæc omnia veteris imperatoris maturitas , multa inhibentis , aliqua cum gravitate pollicentis , inter severam præcipuè nostrorum ultionem , mitis aliorum castigatio , brevi sopiit ac sustulit. Quo quidem tempore , ut pleraque ignavè Germani-

cus, ita Drusus, qui a patre in idipsum plurimo quidem igne emicans, incendium militaris tumultus missus erat, priscâ antiquâque severitate ausus ancipitia sibi tam re quàm exemplo perniciofa, & his ipsis militum gladiis, quibus obsessus erat, obsidentes coercuit; singulari adjutore in eo negotio usus Junio Blæso, viro nescias utiliore in castris, an meliore in toga: qui, post paucos annos proconsul in Africa, ornamenta triumphalia cum appellatione imperatoria meruit; ac Hispanias exercitumque virtutibus, celeberrimâque in Illyrico militiâ, ut prædiximus, quum imperio obtineret, in summa pace quiete continuavit; quum ei pietas rectissima sentiendi, & auctoritas quæ sentiebat obtinendi, superesset: cujus curam ac fidem Dolabella quoque, vir simplicitatis generosissimæ, in maxima parte Illyrici per omnia imitatus est.

CXXVI. Horum sexdecim annorum opera quis, quum inserta sint oculis, animisque omnium, in partibus eloquatur? Sacravit parentem suum Cæsar non imperio, sed religione: non appellavit eum, sed fecit Deum. Revocata in forum fides, summotæ foro seditio, ambitio campo, discordia curiâ; sepultæque ac situ obsitæ justitia, æquitas, industria civitati reddi-

tæ : accessit magistratibus auctoritas , senatui majestas , judiciis gravitas : compressa theatralis seditio : rectè faciendi omnibus aut incussa voluntas , aut imposita necessitas. Honorantur recta , prava puniuntur : suspicit potentem humilis , non timet ; antecedit , non contemnit humiliorem potens. Quando annona moderatior ? quando pax lætior ? Diffusa in Orientis Occidentisque tractus , & quidquid Meridiano aut Septentrione finitur , pax augusta , per omnes terrarum orbis angulos a latrociniorum metu servat immunes. Fortuita non civium tantummodo , sed urbium damna principis munificentia vindicat : restitutæ urbes Asiæ : vindicatæ ab injuriis magistratuum provinciae : honor dignis paratissimus ; poena in malos fera , sed aliqua. Superatur æquitate gratia , ambitio virtute : nam facere rectè cives suos princeps optimus faciendo docet ; quumque sit imperio maximus , exemplo major est.

CXXVII. Rarò eminentes viri non magnis adjutoribus ad gubernandam fortunam suam usi sunt ; ut duo Scipiones duobus Læliis , quos per omnia æquaverunt sibi ; ut Divus Augustus M. Agrippâ , & maximè ab eo , Statilio Tauro : quibus novitas familiæ haud obstitit , quo-

minus ad multiplices consulatus triumphosque & complura eniterentur sacerdotia. Etenim magna negotia magnis adiutoribus egent : neque in parvo paucitas ministeria deficit ; interestque reipublicæ , quod usu necessarium , & dignitate eminere , utilitatemque auctoritate muniri. Sub his exemplis Tiberius Cæsar Sejanum Ælium , principe equestris ordinis patre natum , materno verò genere clarissimas veteresque & insignes honoribus complexum familias , habentem consulares fratres , consobrinos , avunculum , ipsum verò laboris ac fidei capacissimum , sufficiente etiam vigori animi compage corporis , singularem principalium onerum adiutorem in omnia habuit , atque habet : virum severitatis lætissimæ , hilaritatis priscae , actu otiosis simillimum , nihil sibi vindicantem , eoque assequentem omnia , semper infra aliorum æstimationes semetientem , vultu vitæque tranquillum , animo exsomnialem.

CXXVIII. In hujus virtutum æstimatione jampridem judicia civitatis cum judiciis Principis certant , neque novus hic mos senatûs populique Romani est , putandi , quod optimum sit , esse nobilissimum. Nam & illi antiqui , ante primum bellum Punicum , abhinc annos trecentos ,

T. Coruncanium, hominem novum, quum aliis omnibus honoribus, tum pontificatu etiam maximo, ad principale extulere fastigium; & equestri loco natum Sp. Carvilius, & mox M. Catonem, novum etiam, Tusculo, Urbis inquilinum, Mummiūque Achaicum in consulatus, censuras, & triumphos provexere: &, qui C. Marius, ignotæ originis, usque ad sextum consulatum sine dubitatione Romani nominis habuere principem; &, qui M. Tullio tantum tribuere, ut pene assentatione suâ, quibus vellet, principatus conciliaret; quique nihil Asinio Pollioni negaverunt, quod nobilissimis summo cum sudore consequendum foret, profectò hoc senserunt, in cujuscumque animo virtus inesset, ei plurimum esse tribuendum. Hæc naturalis exempli imitatio ad experiendum Sejanum, Cæsarem; ad juvanda verò onera Principis, Sejanum protulit; senatumque & populum Romanum eò perduxit, ut, quod usu optimum intelligit, id in tutelam securitatis suæ libenter advocet.

CXXIX. Sed, propositâ quasi universâ principatûs Tiberii Cæsaris formâ, singula recenseamus. Quâ ille prudentiâ Rhascupolim, interemptorem fratris sui filii Cotyis, consortisque ejusdem imperii,

evocavit ? singulari in eo negotio usus
 operâ Flacci Pomponii , consularis viri ,
 nati ad omnia quæ rectè facienda sunt ,
 simpliciue virtute merentis semper , quàm
 captantis gloriam. Cum quanta gravitate
 ut senator & iudex , non ut princeps , &
 causas pressius audit ? quàm celeriter Li-
 bonem ingratum & nova molientem op-
 pressit ? Quibus præceptis instructum Ger-
 manicum suum , imbutumque rudimentis
 militiæ secum actæ , domitorem recepit
 Germaniæ ? quibus juventam ejus exagge-
 ravit honoribus , respondente cultu trium-
 phi rerum , quas gesserat , magnitudini ?
 Quoties populum cogiariis honoravit , se-
 natorumque censum , quum id senatu au-
 ctore facere potuit , quàm libenter exple-
 vit , ut neque luxuriam invitaret , neque
 honestam paupertatem pateretur dignitate
 destitui ? Quanto cum honore Germani-
 cum suum in transmarinas misit provin-
 cias ? Quâ vi consiliorum suorum , mi-
 nistro & adiutore usus Druso filio suo ,
 Maroboduum inhærentem occupati regni
 finibus (pace majestatis ejus dixerim)
 velut serpentem abstrusam terræ , salu-
 bribus consiliorum suorum medicamentis
 coëgit egredi ? quàm illum & honoratè ,
 nec securè continet ? quantæ molis bel-
 lum , principe Galliarum ciente Sacroviro ,

Eloroque Julio , mirâ celeritate ac virtute compressit ? ut antè populus Romanus vicisse se quàm bellare cognosceret ; nuntiosque periculi victoriæ præcederet nuntius. Magni etiam terroris bellum Africanum , & quotidiano auctu majus , auxiliis consiliisque ejus brevi sepultum est.

CXXX. Quanta suo suorumque nomine exstruxit opera ? Quàm piâ magnificentiâ superque humanam evectâ fidem templum patri molitur ? Quàm magnifico animi temperamento Cn. quoque Pompeii munera absumpta igni restituit ? qui , quidquid umquam claritudine eminuit , id veluti cognatum censet tuendum. Quâ liberalitate quum aliàs , tum proximè incenso monte Cœlio , omnis ordinis hominum jacturæ patrimonio succurrit suo ? Quanta cum quiete hominum , rem perpetui præcipuique timoris , supplementum , sine trepidatione delectûs , providet ? Si aut natura patitur , aut mediocritas recipit hominum , apud aures Deorum de his queri ; quid hic meruit ? primùm , ut scelerata Drusus Libo iniret consilia ; deinde , ut Silius & Piso ; quorum alterius dignitatem constituit , auxit alterius ? Ut ad majora transcendam , quamquam & hæc ille duxit maxima ; quid , ut juvenes amitteret filios ? quid , ut nepotem ex Druso

suo ? Dolenda adhuc retulimus , veniendum ad erubescenda est. Quantis hoc triennium , M. Vinici , doloribus laceravit animum ejus ? quamdiu abstruso , quod miserrimum est , pectus ejus flagravat incendio ? quòd ex nuru , quòd ex nepote dolere , indignari , erubescere coactus est. Cujus temporis ægritudinem auxit amissa mater eminentissima , & per omnia Deis quàm hominibus similior femina ; cujus potentiam nemo sensit , nisi aut levatione periculi , aut accessione dignitatis.

CXXXI. Voto finiendum volumen sit. *Jupiter Capitoline , & auctor ac stator Romani nominis , Gradive Mars , perpetuorumque custos Vesta ignium , & quidquid numinum hanc Romani imperii molem in amplissimum terrarum orbis fastigium extulit , vos publicâ voce obtestor atque precor , custodite , servate , protegite hunc statum , hanc pacem (hunc Principem) eique functo longissimâ statione mortali , destinate successores quàm serissimos , sed eos , quorum cervices tam fortiter sustinendo terrarum orbis imperio sufficiant , quàm hujus suffecisse sensimus ; consiliaque omnium civium aut pia [fovete , aut impia opprimate.] a*

^a Hanc lacunam his ultimis verbis supplevit Vossius.

L. ANNÆI FLORI

E P I T O M E

RERUM

ROMANARUM

LIBRI IV.

L. ANNÆI FLORI

E P I T O M E

R E R U M

ROMANARUM

LIBRI IV.



P A R I S I I S ;

Apud J. BARBOU, viâ Mathurinensium;

M. DCC. LXXVI.

DE FLORO

EX GERARDI JOANNIS VOSSII

LIB. I. DE HIST. LAT.

EX TREMIS Trajani temporibus floruit L. ANNÆUS FLORUS, qui rerum Romanarum quatuor perscripsit libros. De ætate, quod dixi, satis apparet ex Præfatione operis, quum ait : *A Cæsare Augusto in seculum nostrum sunt non multò minùs anni ducenti ; quibus inertia Cæsarum quasi consenuit atque decoxit , nisi quòd sub Trajano movet lacertos , & , præter spem omnium , senectus Imperii , quasi redditâ juventute , revirescit.* Viri eruditi quidam, eosque inter Jo. Camers, malunt *movet pro movet.* Nec diffiteor sic esse in quibusdam MSS. Sed rectum esse *movet*, ostendit, tum quod antecedit, *in seculum nostrum* ; tum quod sequitur, *revirescit.* Sed, inquiunt, Florus ab Augusto esse ad sua tempora ait annos propè ducentos. Ab Augusti autem principatu, usque ad Trajani imperium, sunt anni tantum centum viginti quatuor, sive, si putes usque ad excessum Trajani, anni erunt centum quadraginta tres. Sed jamdudum hæc mihi meditata. Verùm legendum puto apud Florum, anni centum quinquaginta. Nam quisquis MSS. Flori Codd. versavit, scit quantopere in annis variet prologus iste. Nec tamen solius Trajani ævo vixisse : sed etiam Adriani. Planè enim idem videtur, cujus hosce in Adrianum ver-

4 GERARDI J. VOSSII

siculos, & in quem versus Adriani Spartianus refert.

Julii Flori.

Ego nolo Cæsar esse :

Ambulare per Britannos :

Scythicas pati pruinas.

Respondet Adrian.

Ego nolo Florus esse :

Ambulare per tabernas :

Latitare per popinas :

Culices pati rotundos.

Quemque Annæum Florum Charisius vocat, & ex cujus ad Divum Adrianum epistola gemino in loco citat illa verba, *Poëmatis delectator*. Sanè quòd poëmatis delectari se ait, id non abhorret ab hujus compendii scriptore, quando stylus ejus in historia est declamatorius, ac poëtico propior, adeo ut etiam hemistichia Virgilii profundat. Et tamen ea potissima est Flori nostri laus, quòd scriptor est elegans, & disertus, &, si paucula exceperis, quæ frigidius dicta videntur, verè floridus. Sed latæ est culpæ reus, quòd in temporum ratione usque adeo negligens sit; ita ut non possit non sæpius allucinari, qui hunc ducem sequi velit. Valde autem falluntur, qui eum putant in historia sua epitomen nobis Livii dare voluisse. Siquidem crebrò a Livio recedit. Nec faciliè dixerim, idemne, an alius sit, qui singulorum ferè Livii librorum argumenta reliquit, quæ hodie exstant, etiam librorum, qui deperierunt. Sed, ecce, de nomine etiam scriptoris litem movent viri eruditi. Scrupulum iis injicit, quòd Lactantius lib. vii.

Institut. Divin. Senecam appellet. Siquidem , inquit , antiquiorem hoc historico habemus neminem , qui populum Romanum diviserit per quatuor ætates. At Senecam ejus rei auctorem laudat is , quem diximus , Lactantius , his verbis : *Non inscitè Seneca Romanæ urbis tempora distribuit in ætates. Primam enim dixit infantiam sub rege Romulo fuisse ; a quo & genita , & quasi educata sit Roma : deinde pueritiam sub ceteris regibus ; a quibus & aucta sit , & disciplinis pluribus , institutisque formata : at verò , Tarquinio regnante , quum jam quasi adulta esse cœpisset , servitium non tulisse ; & , rejecto superbæ dominationis jugo , maluisse legibus obtemperare , quàm regibus : quumque esset adolescentia ejus sine Punici belli terminata ; tum denique confirmatis viribus cœpisse juvenescere. Sublatâ etenim Carthagine , quæ tam diu æmula imperii Romani fuit , manus suas in totum orbem terrâ marique porrexerit : donec regibus cunctis , & nationibus subjugatis , quum jam bellorum materia deficeret , viribus suis malè uteretur , quibus se ipsa confecit. Hæc fuit prima ejus senectus : quum bellis lacerata civilibus , atque intestino malo pressa , rursus ad regimen singularis imperii recidit , quasi ad alteram infantiam revoluta. Amissâ enim libertate , quam , Bruto duce , & auctore , defenderat , ita consenuit , tamquam sustentare se ipsa non valeret , nisi adminiculo regentium sustentaretur. Hactenus Lactantius. Ea autem exscripsisse aiunt ex prologo Flori ; ubi hæc legas : Si quis ergo populum Romanum , quasi hominem consideret , totamque ejus ætatem percenseat , ut cœperit , utque adoleverit , ut quasi ad quemdam juventæ florem pervenerit , ut postea velut conse-*

nuerit ; quatuor gradus processusque ejus inveniet. Prima ætas sub regibus ducentos quinquaginta per annos , quibus circum ipsam matrem suam cum finitimis luctatus est. Hæc erit ejus infantia. Sequens a Bruto Collatinoque consulibus , in Appium Claudium Quinctumque Fulvium consules , ducentos annos patet , quibus Italiam subegit. Hoc fuit tempus viris , armisque incitatissimum : ideo quis adolescentiam dixerit. Dehinc ad Cæsarem Augustum ducenti quinquaginta anni , quibus totum orbem pacavit. Hic jam ipsa juvenia imperii , & quasi quædam robusta maturitas. A Cæsare Augusto , in seculum nostrum , sunt non multò minùs anni ducenti , quibus inertia Cæsarum quasi consenuit , atque decoxit , nisi quòd sub Trajano principe movet lacertos , & præter spem omnium , senectus imperii , quasi redditâ juventute , revirescit. Hæc Florus. Utrumque autem locum integrè adscripsimus , ut omnes videant , quàm infirmo tibicine nitantur , qui ex Lactantio colligunt , scriptorem compendii illius , non Florum , sed Senecam , dici oportere. Aiunt , divisionem eam , cujus Lactantius Senecam laudat auctorem , apud Florum in prologo legi. In quo manifestus eorum est error. Nam Seneca adolescentiam extendit usque ad finem ultimi belli Punici : Florus duntaxat ad primum bellum punicum. Ad hæc Seneca incipit senectam a bello civili Pompeiano : Florus autem a principatu Augusti. Unde colligo , Florum quidem imitatum fuisse Senecam : at aliter tamen , quàm Senecam , divisisse. Atque eò magis arrisit Floro similitudo ea , quia non totam alteri deberet ; sed esset , quod sibi vindicaret. Sanè toto ad eam

opere respicit. Nempe suum cuique pulchrum, quod dici solet. Nec propterea negâro, Florum hunc fuisse ex Senecarum familia. Seneca enim vocatur in plerisque veteribus libris. Ad hæc Senecæ sunt ex Annæa gente. At Florus, uti in plerisque libris Julius, ita Annæus in veteribus vocatur libris, etiam antiquâ ac principe, quam habeo, editione. Adhæc Hispanum fuisse, unde Senecæ domo erant, verisimile facit luculenta ejus terræ laudatio, quæ est lib. II. cap. XVII. & lib. III. cap. XXII. Dictio quoque hanc domum sapit. Nam ea eloquentiæ, & poësis laude inclyta. At dictio historici hujus, uti antè dictum, est disertâ, & poëticiæ propior. Immo opus ipsum vix aliud, quàm declamatio est. Fortasse igitur Senecæ etiam nomen fuit. Sed, ut hoc demus, non eò consequitur, haud aliter quàm Senecam, vocari oportere. Nec enim facile adeo fides est deroganda multò maximæ parti librorum, & quidem melioris notæ, ubi Florus vocatur. Et quid prohibet, quominus, ut L. Annæi Senecæ philosophi frater, non tantùm L. Annæus Novatus dicebatur: sed etiam Junius Gallio (quod nomen habuit, postquam a Junio Gallione erat adoptatus) ita historicum hunc credamus adoptione nomen mutasse; atque inde esse, quod idem dictus sit L. Annæus Seneca, & L. Annæus Florus: vel ut in nonnullis libris legere est, Julius Florus?

Alius verò ab hoc est Julius Florus, vir itidem disertus, qui sub Tiberio vixit. De hoc ita M. Seneca Controvers. XXV. *ipse audiui Florum quemdam, auditorem Latronis, dicentem non apud*

8 GER. J. VOSSII DE FLORO.

Latronem ; neque enim illi mos erat , quemcumque audire declamantem. Declamabat ipse tantum ; & aiebat , se non esse magistrum , sed exemplum. Nec ulli alii contigisse scio , quàm apud Græcos , Nicetæ ; apud Romanos , Latroni ; ut discipuli non audiri desiderarent ; sed contenti essent audire. Paulò post excerptum ex Flori declamatione ponit. De eodem , ut puto , simulque fratris filio , sic Fab. lib. x. cap. 3. Qua de re memini narrasse mihi Julium Secundum , illum æqualem meum , atque , ut notum est , familiariter amatum , miræ facundiæ virum , infinitæ tamen curæ , quid esset sibi a patruo dictum. Is fuit Julius Florus , in eloquentia Galliarum (quoniam ibi demum exercuit eam) princeps , alioqui inter paucos disertus , & dignus illâ propinquitate. Is , quum Secundum , scholæ adhuc operam dantem , tristem fortè vidisset , interrogavit ; quæ causa frontis tam adductæ ? Nec dissimulavit adolescens , tertium jam diem esse , ex quo omni labore materiæ ad scribendum destinatæ non inveniret exordium : quo sibi non præsens tantum dolor , sed etiam desperatio in posterum fieret. Tum Florus aridens : Numquid tu , inquit , meliùs dicere vis , quàm potes ? &c. Nec absurda sit conjectura , si quis opinetur , historicum eum , de quo fusè diximus (modò is Julius Florus rectè in libris quibusdam vocatur) ex eadem stirpe , immo fortasse filium fuisse , aut nepotem Julii Flori , viri hujus disertus ; de quo M. Seneca , & Quinctilianus loquuntur. Sed hæc , & alia , quæ antea de Senecæ cognomento diximus , velut incerta , in medio relinquamus.





L. ANNÆI FLORI
EPITOME
R E R U M
R O M A N A R U M
LIBRI IV.

P R O E M I U M.

POPULUS Romanus a rege Romulo in
Cæsarem Augustum, septingentos per an-
nos, tantum operum pace belloque ges-
sit, ut, si quis magnitudinem imperii cum

annis conferat, ætatem ultra putet. Ita latè per orbem terrarum arma circumtulit, ut qui res ejus legunt, non unius populi, sed generis humani fata discant. Nam tot laboribus periculisque jactatus est, ut ad constituendum ejus imperium contendisse Virtus & Fortuna videantur. Quare quum præcipua quæque operæ pretium sit cognoscere sigillatim: tamen quia ipsa sibi obstat magnitudo, rerumque diversitas aciem intentionis abrumpit, faciam quod solent qui terrarum situs pingunt: in brevī quasi tabella totam ejus imaginem amplectar, nonnihil, ut spero, ad admirationem principis populi collaturus, si pariter atque in simul universam magnitudinem ejus ostendero. Si quis ergo populum Romanum quasi hominem consideret, totamque ejus ætatem percenseat, ut cœperit, utque adoleverit, ut quasi ad quemdam juventæ florem pervenerit, ut postea velut consenuerit; quatuor gradus processusque ejus inveniet. Prima ætas sub regibus fuit propè ducentos quinquaginta per annos, quibus circum ipsam matrem suam cum finitimis luctatus est. Hæc erit ejus Infantia. Sequens a Bruto Collatinoque consulibus, in Appium Claudium, Quinctum Fulvium consules, ducentos quinquaginta annos patet, quibus Italiam subegit. Hoc

fuit tempus viris armisque incitatissimum: ideo quis Adolescentiam dixerit. Dehinc ad Cæsarem Augustum ducenti anni, quibus totum orbem pacavit. Hæc jam ipsa Juventa imperii, & quasi quædam robusta maturitas. A Cæsare Augusto in seculum nostrum haud multò minùs anni ducenti: quibus inertia Cæsarum quasi consenuit atque decoxit: nisi quòd sub Trajano principe movet lacertos, &, præter spem omnium, senectus imperii, quasi redditâ juventute, revirescit.





LIBER PRIMUS.

CAPUT I.

DE ROMULO.

PRIMUS ille, & Urbis, & Imperii conditor, Romulus fuit, Marte genitus, & Rheâ Sylviâ. Hoc de se sacerdos gravida confessa est: nec mox fama dubitavit, quum Amulii imperio abjectus in profluentem cum Remo fratre, non potuit extinguere. Siquidem & Tiberinus amnem repressit; & relictis catulis lupa sequuta vagitum uber admovit infantibus, matremque se gessit. Sic repertos apud arborem, regis pastor tulit in casam, atque educavit. Alba tunc erat Latio caput, Iulii opus: nam Lavinium patris Æneæ contempserat. Ab his Amulius jam bis septima soboles regnabat, fratre pulso Numitore, cujus ex filia Romulus. Igitur statim primâ juventæ face, patrum Amulium ab arce deturbat, avum reponit: ipse fluminis amator, & montium, apud quos erat

educatus, mœnia novæ urbis agitabat. Gemini erant : uter auspicaretur , & regeret , adhibere placuit Deos. Remus montem Aventinum , hic Palatinum occupat. Prior ille sex vultures , hic postea , sed duodecim videt. Sic victor augurio urbem excitat , plenus spei , bellatricem fore. Ita illi assuetæ sanguine & prædâ aves pollicebantur. Ad tutelam novæ urbis sufficere vallum videbatur : cujus dum irridet angustias Remus , idque increpat saltu , dubium an jussu fratris , occisus est. Prima certè victima fuit , munitionemque urbis novæ sanguine suo consecravit. Imaginem urbis magis quàm urbem fecerat : incolæ deerant. Erat in proximo lucus : hunc Asylum facit , & statim mira vis hominum , Latini , Tusci que pastores : quidam etiam transmarini ; Phryges qui sub Ænea , Arcades qui sub Evandro duce influxerant. Ita ex variis quasi elementis congregavit corpus unum ; populumque Romanum ipse fecit. Res erat unius ætatis , populus virorum. Itaque matrimonia a finitimis petita ; quia non impetrabantur , manu capta sunt. Simulatis quippe ludis equestribus , virgines , quæ ad spectaculum venerant , præda fuere. Et hæc statim causa bellorum. Pulsi fugatique Veientes : Cæninensium captum ac dirutum est oppidum.

Spolia insuper opima de rege, Feretrio Jovi manibus suis rex reportavit. Sabinis proditæ portæ per virginem: nec dolo, sed puella pretium rei, quàm gerebant in sinistris, petierat: dubium clypeos, an armillas. Illi ut & fidem solverent, & ulciscerentur, clypeis obruere. Ita admissis intra mœnia hostibus, atrox in ipso foro pugna, adeo ut Romulus Jovem oraret, ut fœdam suorum fugam sisteret. Hinc templum & Stator Jupiter. Tandem sævientibus intervenire raptæ laceris comis. Sic pax facta cum Tatio, fœdusque percussum: secutaque res mira dictu, ut relictis sedibus suis novam in urbem hostes demigrarent, & cum generis suis avitas opes pro dote sociarent. Auctis brevi viribus, hunc rex sapientissimus statum reipublicæ imposuit: juvenus divisa per tribus, in equis & armis, ut ad subita belli excubaret: consilium reipublicæ penes senes esset, qui ex auctoritate *Patres*, ob ætatem *Senatus* vocabantur. His ita ordinatis, repentè, quum concionem haberet ante urbem apud Capreæ paludem, e conspectu ablatus est. Discerptum aliqui a senatu putant ob asperius ingenium: sed oborta tempestas solisque defectio consecrationis speciem præbuere: cui mox Julius Proculus fidem fecit, visum a se

Romulum affirmans , augustiore formâ quàm fuisset : mandare præterea , ut se pro numine acciperent : *Quirinum* in cœlo vocari placitum diis. Ita gentium Roma potiretur.

CAPUT II.

DE NUMA POMPILIO.

SUCCEDIT Romulo Numa Pompilius : quem Curibus Sabinis agentem , ultro petivere , ob inclytam viri religionem. Ille sacra , & cæremonias , omnemque cultum deorum immortalium docuit : ille Pontifices , Augures , Salios , ceteraque populi Romani sacerdotia ; annum quoque in duodecim menses , fastos dies nefastosque descripsit. Ille Ancilia atque Palladium , secreta quædam imperii pignora ; Janumque geminum , fidem pacis ac belli ; in primis focum Vestæ virginibus colendum dedit ; ut ad simulacrum cœlestium siderum custos imperii flamma vigilaret. Hæc omnia quasi monitu deæ Egeriæ , quò magis Barbari acciperent. Eò denique ferocem populum redegit , ut quod vi & injuriâ occupaverat imperium , religione atque justitiâ gubernaret.



CAPUT III.

DE TULLO HOSTILIO.

EXCIPIT Pompilium Numam Tullus Hostilius : cui in honorem virtutis regnum ultro datum. Hic omnem militarem disciplinam , artemque bellandi condidit. Itaque mirum in modum exercitâ juventute , provocare ausus Albanos , gravem & diu principem populum. Sed quum pari robore frequentibus præliis utrique comminuerentur , misso in compendium bello , Horatiis Curiatiisque , trigeminis hinc atque inde fratribus , utriusque populi fata permixta sunt. Anceps & pulchra contentio , exituque ipso mirabilis. Tribus quippe illinc vulneratis ; hinc duobus occisis , qui supererat Horatius , addito ad virtutem dolo , ut distraheret hostem , simulat fugam , singulosque , prout sequi poterant , adortus exsuperat. Sic (rarum aliàs decus) unius manu parta victoria est : quam ille mox parricidio fœdavit. Flentem circa se spolia sponsi quidem , sed hostis , sororem viderat. Hunc tam immaturum virginis amorem ultus est ferro. Citavere leges nefas : sed abstulit virtus parricidam :

& facinus intra gloriam fuit. Nec diu in fide Albanus. Nam Fidenate bello missi in auxilium ex fœdere, mediis inter duos expectavere fortunam. Sed rex callidus, ubi inclinare socios ad hostem videt, tollit animos, quasi ipse mandâisset. Spes inde nostris, metus hostibus. Sic fraus proditorum irrita fuit. Itaque hoste victo, ruptorem fœderis Metium Fufetium, religatum inter duos currus, pernicibus equis distrahit; Albamque ipsam quamvis parentem, æmulam tamen, diruit, quum prius omnes opes urbis, ipsumque populum Romam transtulisset: prorsus ut confanguinea civitas non periisse, sed in suum corpus rediisse rursus videretur.

CAPUT IV.

DE ANCO MARCIO.

ANCUS deinde Marcius, nepos Pompili ex filia, pari ingenio. Hic igitur & mœnia muro amplexus est, & interfluentem Urbi Tiberinum ponte commisit, Ostiamque in ipso maris fluminisque confinio coloniam posuit: jam tum videlicet præfagiens animo, futurum, ut totius mundi opes & commeatus illo veluti maritimo Urbis hospitio reciperentur.

CAPUT V.*DE TARQUINIO PRISCO.*


TARQUINIUS postea Priscus, quamvis transmarinæ originis, regnum ultro petens accipit ob industriam atque elegantiam: quippe qui oriundus Corintho, Græcum ingenium Italicis artibus miscuisset. Hic & senatûs majestatem numero ampliavit, & centuriis tribus auxit, quatenus Attius Navius numerum augeri prohibebat, vir summus augurio. Quem rex in experimentum rogavit, fierine posset quod ipse mente conceperat? Ille rem expertus augurio, posse respondit. Atqui hoc, inquit, agitabam, an cotem illam secare novaculâ possem? Augur, Potes, ergo, inquit, & secuit. Inde Romanis sacer auguratus. Neque pace Tarquinius quàm bello promptior. Duodecim namque Tusciæ populos frequentibus armis subegit. Inde fasces, trabeæ, curules, annuli, phaleræ, paludamenta, prætexta; inde, quòd aureo curru quatuor equis triumphatur; togæ pictæ, tunicæque palmatæ, omnia denique decora & insignia, quibus imperii dignitas eminet.

CAPUT VI.

DE SERVIO TULLIO.

SERVIVS Tullius deinceps gubernacula Urbis invadit : nec obscuritas inibuit , quamvis matre servâ creatum. Nam eximiam indolem uxor Tarquinii Tanaquil liberaliter educaverat : & clarum fore visa circa caput flamma promiserat. Ergo inter Tarquinii mortem , annitente reginâ , substitutus in locum regis , quasi ad tempus , regnum dolo partum sic egit industriè , ut jure adeptus videretur. Ab hoc populus Romanus relatus in censum , digestus in classes , curiis atque collegiis distributus : summâque regis solertiâ ita est ordinata respublica , ut omnia patrimonii , dignitatis , ætatis , artium , officiorumque discrimina in tabulas referrentur ; ac sic maxima civitas minimæ domûs diligentiâ contineretur.





CAPUT VII.

DE TARQUINIO SUPERBO.

POSTREMUS omnium fuit regum Tarquinius , cui cognomen *Superbo* ex moribus datum. Hic regnum avitum , quod a Servio tenebatur , rapere maluit , quàm exspectare ; immissisque in eum percussoribus , scelere partam potestatem non meliùs egit , quàm acquisierat. Nec abhorrebat moribus uxor Tullia , quæ , ut virum regem salutaret , super cruentum patrem , vecta carpento , consternatos equos egit. Sed ipse in senatum cædibus , in omnes superbiâ , quæ crudelitate gravior est bonis , grassatus , quum sævitiam jam domi fatigâisset , tandem in hostes conversus est. Sic valida oppida in Latio capta sunt , Ardea , Otricoli , Gabii , Sueffa Pometia. Tum quoque cruentus in suos. Neque enim filium verberare dubitavit , ut simulanti transfugam apud hostes hinc fides esset. Cui a Gabiis , ut voluerat , recepto , atque per nuntios consulenti quid fieri vellet , eminentia fortè papaverum capita virgulâ excutens , quum per hoc interficiendos esse principes intelligi vellet ,

(quæ superbia!) sic respondit. Tamen de manubiis captarum urbium templum erexit: quod quum inauguraretur, cedentibus ceteris deis (mira res dictu) restitere Juventas, & Terminus. Placuit vatibus contumacia numinum, siquidem firma omnia & æterna pollicebantur. Sed illud horrendum, quod molientibus ædem in fundamentis humanum repertum est caput: nec dubitavere cuncti, monstrum pulcherrimum imperii sedem, caputque terrarum promittere. Tamdiu superbiam regis populus Romanus perpeßus est, donec aberat libido. Hanc ex liberis ejus importunitatem tolerare non potuit. Quorum quum alter ornatissimæ feminae Lucretiæ stuprum intulisset, matrona dedecus ferro expiavit. Imperium tum regibus abrogatum.




CAPUT VIII.

ANACEPHALÆOSIS DE SEPTEM REGIBUS.

HÆC est prima ætas populi Romani, & quasi infantia, quam habuit sub regibus septem, quâdam fatorum industriâ, tam variis ingenio, ut reipublicæ ratio

& utilitas postulabat. Nam quid Romulo ardentius ? tali opus fuit , ut invaderet regnum. Quid Numâ religiosius ? ita res poposcit , ut ferox populus deorum metu mitigaretur. Quid ille militiæ artifex Tullus ? bellatoribus viris quàm necessarius ? ut acueret ratione virtutem. Quid ædificator Ancus ? ut Urbem coloniâ extenderet , ponte jungeret , muro tueretur. Jam verò Tarquinii ornamenta & insignia quantam principi populo addiderunt ex ipso habitu dignitatem ? Actus a Servio census quid effecit , nisi ut ipsa se nosset Respublica ? Postreino Superbi illius importuna dominatio nonnihil , immo vel plurimum profuit. Sic enim effectum est , ut agitatus injuriis populus cupiditate libertatis incenderetur.




CAPUT IX.

DE MUTATIONE REIPUBLICÆ.

IGITUR Bruto Collatinoque ducibus & auctoribus , quibus ultionem sui moriens matrona mandaverat , populus Romanus ad vindicandum libertatis ac pudicitiae decus , quodam quasi instinctu deorum concitatus , regem repente destituit , bona

diripit, agrum Marti suo consecrat, imperium in eosdem libertatis suæ vindices transfert, mutato tamen nomine & jure. Quippe ex perpetuo annum placuit, ex singulari duplex, ne potestas solitudine, vel morâ corrumpereetur; consulesque appellavit pro regibus, ut consulere se civibus suis debere meminissent. Tantumque libertatis novæ gaudium incesserat, ut vix mutati statûs fidem caperent; alterumque ex consulibus, tantum ob nomen & genus regium, fascibus abrogatis, Urbe dimitterent. Itaque substitutus Valerius Publicola, ex summo studio annixus est ad augendam liberi populi majestatem. Nam & fasces ei pro concione submisit, & jus provocationis adversus ipsos dedit: & ne specie arcis offenderet, eminentes ædes suas in plana submisit. Brutus verò favori civium etiam domûs suæ clade & parricidio velificatus est. Quippe quum studere revocandis in Urbem regibus liberos suos comperisset, protraxit in forum, & concione mediâ virgis cecidit, & securi percussit: ut planè publicus parens in locum liberorum adoptâsse sibi populum videretur. Liber jam hinc populus Romanus prima adversus externos arma pro libertate corripuit; mox pro finibus; deinde pro fociis; tum pro gloria, & imperio;

laceſſentibus aſſiduè uſquequaque finitimis : quippe cui patrii ſoli gleba nulla , ſed ſtatim hoſtile pomœrium , mediuſque inter Latium & Tuſcos , quaſi in quodam bivio collocatus , omnibus portis in hoſtem incurreret : donec quaſi contagione quâdam per ſingulos itum eſt ; & proximis quibuſque correptis , totam Italiam ſub ſe redegerunt.



CAPUT X.

*BELLUM ETRUSCUM CUM REGE
PORSENA.*

PULSIS ex Urbe regibus , prima pro libertate arma corripuit. Nam Porſena rex Etruſcorum ingentibus copiis aderat , & Tarquinius manu reducebat. Hunc tamen , quamvis & armis , & fame urgeret , occupatoque Janiculo ipsis Urbis faucibus incubaret , ſuſtinuit , repulit ; noviffimè etiam tantâ admiratione perculit , ut ſuperior , ultro cum pene victis amicitiaë fœdera feriret. Tunc illa Romana prodigia atque miracula , Horatius , Mucius , Clœlia : qui niſi in annalibus forent , hodie fabulæ viderentur. Quippe Horatius Cocles , poſtquam hoſtes undique inſtantes ſolus

solus submovere non poterat, ponte reciso transnatat Tiberim, nec arma dimittit. Mucius Scævola regem per insidias in castris ipsius aggreditur: sed ubi frustrato circa purpuratum ejus ictu tenetur, ardentibus focis injicit manum, terroremque geminat dolo. *Ut scias*, inquit, *quem virum effugeris*, *idem trecenti juravimus*: quum interim (immane dictu!) hic interritus, ille trepidaret, tamquam manus regis arderet. Sic quidem viri: sed ne quis sexus a laude cessaret, ecce & virginum virtus. Una ex obsidibus regi data, elapsa custodiam, Clœlia, per patrium flumen equitabat. Et rex quidem tot tantisque virtutum territus monstris valere, liberosque esse jussit. Tarquinii tamdiu dimicaverunt, donec Aruntem filium regis manu suâ Brutus occidit, superque ipsum multo vulnere exspiravit; planè quasi adulterum ad inferos usque sequeretur.

CAPUT XI.

BELLUM LATINUM.

LATINI quoque Tarquinius afferebant æmulatione, & invidiâ; ut populus, qui foris dominabatur, saltem domi serviret.

Igitur omne Latium, Mamilio Tusculano duce, quasi in regis ultionem, tollit animos. Apud Regilli lacum dimicatur diu Marte vario, donec Posthumius ipse dictator signum in hostes jaculatus est (novum & insigne commentum) uti peteretur cursu. Cossus equitum magister exuere frenos imperavit (& hoc novum) quò acriùs incurrerent. Ea denique atrocitas fuit prælii, ut interfuisse spectaculo deos fama tradiderit: duos in candidis equis, Castorem atque Pollucem nemo dubitavit. Itaque & imperator veneratus est, pactusque victoriam templa promisit; & reddidit, planè quasi stipendium commilitonibus deis. Hactenus pro libertate: mox de finibus cum eisdem Latinis assidue & sine intermissione pugnatum est. Sora (quis credat?) & Algidum terrori fuerunt; Satricum atque Corniculum provinciae. De Verulis & Bovillis pudet; sed triumphavimus. Tibur nunc suburbanum, & æstivæ Præneste deliciae, nuncupatis in Capitolio votis petebantur. Idem tunc Fæsulæ, quod Carræ nuper: idem nemus Aricinum, quod Hercynius saltus: Fregellæ, quod Geforiacum: Tiberis, quod Euphrates. Coriolos quoque, pro pudor! victos, adeo gloriæ fuisse, ut captum oppidum Caius Marcius Coriola-

nus, quasi Numantiam aut Africam, nō-
mini induerit. Exstant & parta de Antio-
spolia, quæ Mænius in suggestu fori,
captâ hostium classe, suffixit; si tamen
illa classis: nam sex fuere rostratæ. Sed
hic numerus illis initiis navale bellum fuit.
Pervicacissimi tamen Latinorum Æqui &
Volsci fuere, & quotidiani, ut ita dixe-
rim, hostes. Sed hos præcipuè Lucius
Quinctius domuit, ille dictator ab aratro:
qui obsessa ac pene jam capta Marci Mi-
nucii consulis castra egregiâ virtute ser-
vavit. Medium erat fortè tempus semen-
tis, quum patricium virum innixum ara-
tro suo licitor in ipso opere deprehendit.
Inde in aciem profectus, ne quid a rustici
operis imitatione cessaret, victos more
pecudum sub jugum misit. Sic expeditio-
ne finitâ, rediit ad boves rursus trium-
phalis agricola. Fidem numinum! quâ
velocitate? intra quindecim dies coeptum,
peractumque bellum: prorsus ut festinâsse
dictator ad relictum opus videretur.



CAPUT XII.

*BELLUM CUM ETRUSCIS, FALISCIS,
ET FIDENATIBUS.*

ASSIDUI verò & anniversarii hostes ab Etruria fuere Veientes ; adeo ut extraordinariam manum adversus eos promiserit , privatumque gesserit bellum gens una Fabiorum. Satis superque idonea clades , cæsi apud Cremeram trecenti , patricius exercitus ; & scelerato signata nomine , quæ proficiscentes in prælium porta dimisit. Sed ea clades ingentibus expiata victoriis , postquam per alios atque alios duces robustissima capta sunt oppida ; vario quidem eventu. Falisci se sponte dediderunt. Crémati suo igne Fidenates. Rapti funditus deletique Veientes. Falisci quum obsiderentur , mira visa est fides imperatoris , nec immeritò ; quòd ludimagistrum , urbis proditorem , cum iis quos adduxerat pueris , vinctum sibi ultro remisisset. Eam namque vir sanctus , & sapiens , veram sciebat victoriam , quæ salvâ fide , & integrâ dignitate pararetur. Fidenæ , quia pares non erant ferro , ad terrorem movendum facibus armatæ , &

discoloribus, serpentum in modum, vittis, furiali more processerant : sed habitus ille feralis eversionis omen fuit. Veientium quanta res fuerit, indicat decennis obsidio. Tunc primùm hyematum sub pelli- bus, taxata stipendio hyberna : adactus miles suâ sponte jurejurando, nisi captâ urbe non remeare. Spolia de Larte Tolumnio rege ad Feretrium reportata. Denique non scalis, nec irruptione, sed cuniculo, & subterraneis dolis peractum urbis excidium. Ea denique visa est prædæ magnitudo, cujus decimæ Apollini Pythio mitterentur; universusque populus Romanus ad direptionem urbis vocaretur. Hoc tunc Veii fuere : nunc fuisse quis meminit? quæ reliquiæ? quod vestigium? Laborat annalium fides, ut Veios fuisse credamus.

CAPUT XIII.

BELLUM GALLICUM.

HIC sive invidiâ deûm, sive fato, rapidissimus procurrentis imperii cursus parumper Gallorum Senonum incursione supprimitur. Quod tempus populo Romano nescio utrum clade funestius fuerit, an


virtutum experimentis speciosius. Ea certè fuit vis calamitatis , ut in experimentum illatam putem divinitus , scire volentibus immortalibus diis , an Romana virtus imperium orbis mereretur. Galli Senones , gens naturâ ferox , moribus incondita , ad hoc ipsâ corporum mole , perinde armis ingentibus , adeo omni genere terribilis fuit , ut planè nata ad hominum interitum , urbium stragem , videretur. Hi quondam ab ultimis terrarum oris , & cingente omnia Oceano , ingenti agmine profecti , quum jam media vastâssent , positis inter Alpes & Padum sedibus , ne his quidem contenti , per Italiam vagabantur. Tum Clusium obsidebant. Pro sociis ac fœderatis populus Romanus intervenit. Missi ex more legati. Sed quod jus apud Barbaros ? ferociùs agunt : movent , & inde certamen. Conversis igitur a Clusio , Romanque venientibus , ad Alliam flumen cum exercitu Fabius consul occurrat. Non temere fœdior clades. Itaque hunc diem fastis Roma damnavit. Fuso exercitu jam mœnibus Urbis appropinquabant. Erant nulla præsidia. Tum igitur , aut numquam aliàs , apparuit vera illa Romana virtus. Jam primùm majores natu amplissimis usi honoribus , in forum coeunt. Ibi devovente pontifice , diis se Manibus

consecrant ; statimque in suas quisque ædes regressi , sicut in trabeis erant , & amplissimo cultu , in curulibus sellis sese posuerunt ; ut , quum venisset hostis , in sua dignitate morerentur. Pontifices , & Flamines , quidquid religiosissimi in templis erat , partim in doliis defossa terræ recondunt , partim imposita plaustris secum avehunt. Virgines simul ex sacerdotio Vestæ nudo pede fugientia sacra comitantur. Tamen excepisse fugientes unus e plebe fertur Lucius Albinus , qui , depositis uxore & liberis , virgines in plaustrum recepit ; adeo tum quoque in ultimis religio publica privatis affectibus antecellebat. Juventus verò , quam satis constat vix mille hominum fuisse , duce Manlio , arcem Capitolini montis insedit , obtestata ipsum quasi præsentem Jovem , ut , quemadmodum ipsi ad defendendum templum ejus concurrissent , ita ille virtutem eorum numine suo tueretur. Aderant interim Galli , apertamque Urbem primò trepidi , ne quis subesset dolus , mox ubi solitudinem vident , pari clamore & impetu invadunt. Patentes passim domos adeunt : ubi sedentes in curulibus suis prætextatos senes , velut Deos Geniosque venerati , mox eosdem , postquam esse homines liquebat , alioqui nihil respon-

dere dignantes , pari vecordiâ mactant , facesque tectis injiciunt ; & totam Urbem igne , ferro , manibus solo exæquant. Sex mensibus Barbari (quis crederet ?) circa montem unum pependerunt , nec diebus modò , sed noctibus quoque omnia experti : quum tandem Manlius nocte subeuntes , clangore anseris excitatus , a summa rupe dejecit ; & ut spem hostibus demeret , quamquam in summa fame , tamen ad speciem fiduciæ , panes ab arce jaculatus est. Et statò quodam die per medias hostium custodias Fabium pontificem ab arce demisit , qui solenne sacrum in Quirinali monte conficeret. Atque ille per media hostium tela incolumis religionis auxilio rediit , propitiosque deos renuntiavit. Novissimè quum jam obsidio sua Barbaros fatigâisset , mille pondo auri recessum suum venditantes , idque ipsum per insolentiam , quum ad iniqua pondera addito adhuc gladio , superbè *Væ victis* increparent , subitò aggressus a tergo Camillus adeo cecidit , ut omnia incendiorum vestigia Gallici sanguinis inundatione deleteret. Agere gratias diis immortalibus ipso tantæ cladis nomine libet. Pastorum casas ignis ille , & flamma paupertatem Romuli abscondit. Incendium illud quid egit aliud , nisi ut destinata hominum ac deorum do-

micilio civitas , non deleta , non obruta , sed expiata potius & lustrata videatur ? Igitur post assertam a Manlio , restitutam a Camillo Urbem , acrius etiam vehementiusque in finitimos resurrexit. Ac primum omnium illam ipsam Gallicam gentem non contentus mœnibus expulisse , quum per Italiam naufragia sua latius traheret , sic persequutus est duce Camillo , ut hodie nulla Senonum vestigia supersint. Semel apud Anienem trucidati , quum singulari certamine Manlius aureum torquem Barbaro inter spolia detraxit : inde Torquati. Iterum Promptino agro , quum in simili pugna Lucius Valerius , insidente galeæ sacrâ alite adjutus , retulit spolia : & inde Corvini. Tandem post aliquot annos , omnes reliquias eorum in Etruria ad lacum Vadimonis Dolabella delevit : ne quis exstaret in ea gente , quæ incensam a se Romam urbem gloriaretur.





CAPUT XIV.

BELLUM LATINUM.

CONVERSUS a Gallis in Latinos ; Manlio Torquato, Decio mure consulibus, semper quidem æmulatione imperii infestos, tum verò contemptu Urbis incensæ ; quum jus civitatis, partem imperii ac magistratuum poscerent, atque jam ampliùs quàm congredi auderent. Quo tempore quis cessisse hostem mirabitur ? quum alter consulum filium suum, quia contra imperium pugnaverat, quamvis victorem occiderit, quasi plus in imperio esset, quàm in victoria : alter quasi monitu deorum, capite velato, primam ante aciem diis Manibus se devoverit, ut in confertissima se hostium tela jaculatus, novum ad victoriam iter sanguinis sui semitâ aperiret.



CAPUT XV.

BELLUM SABINUM.

ALATINIS aggressus est gentem Sabinorum, qui immemores factæ sub Tito Tatio affinitatis, quodam contagio belli se Latinis adjunxerant. Sed Curio Dentato consule, omnem eum tractum, quæ Nar, Anio, fontesque Velini, Adriatico tenus mari, igne ferroque vastavit. Quâ victoriâ tantum hominum, tantum agrorum redactum in potestatem, ut in utro plus esset, nec ipse posset æstimare, qui vicerat.

CAPUT XVI.

BELLUM SAMNITICUM.

PRECIBUS deinde Campaniæ motus, non pro se, sed, quod est speciosius, pro sociis, Samnitas invadit. Erat foedus cum utrisque percussum: sed hoc Campani sanctius, & prius, omnium suorum deditione fecerant. Sic ergo Romanus bellum Samniticum tamquam sibi gessit. Omnium non modò Italiâ, sed toto orbe terrarum, pulcherrima Campaniæ plaga

est. Nihil mollius cœlo : denique bis floribus vernal. Nihil uberius solo : ideo Liberi Cererisque certamen dicitur. Nihil hospitalius mari : hîc illi nobiles portus, Caieta, Misenus, & tepentes fontibus Baiæ : Lucrinus & Avernus, quædam maris otia. Hîc amicti vitibus montes, Gaurus, Falernus, Massicus, & pulcherrimus omnium Vesuvius, Ætnæi ignis imitator. Urbes ad mare, Formiæ, Cumæ, Puteoli, Neapolis, Herculaneum, Pompeii, & ipsa caput urbium Capua, quondam inter tres maximas, Romam, Carthaginemque numerata. Pro hac urbe, his regionibus populus Romanus Samnitas invasit, gentem, si opulentiam quæris, aureis & argenteis armis, discolori veste, usque ad ambitum armatam : si fallaciam, saltibus ferè & montium fraude grassantem : si rabiem ac furorem, sacratis legibus, humanisque hostiis in exitium Urbis agitatam : si pertinaciam, sexies rupto fœdere, cladibusque ipsis animosiores. Hos tamen quinquaginta annis per Fabios & Papirios patres, eorumque liberos ita subegit ac domuit, ita ruinas ipsas urbium diruit, ut hodie Samnium in ipso Samnio requiratur ; nec facîle appareat materia quatuor & viginti triumphorum. Maximè tamen nota & illustris ex hac gente clades

apud Caudinas furculas Veturio Posthumioque consulibus accepta est. Clauso per insidias intra eum saltum exercitu, unde non posset evadere, stupens occasione tantâ dux hostium Pontius, Herennium patrem consuluit; & ille, *mitteret omnes, vel occideret*, sapienter, ut senior, suaserat. Hic armis exutos mittere sub jugum maluit; ut nec amici forent beneficio, & post flagitium hostes magis. Itaque & consules statim magnificè voluntariâ deditioe turpitudinem fœderis dirimunt, & ultionem flagitans miles, Papirio duce (horribile dictu) strictis ensibus per ipsam viam ante pugnam furit; & in congressu arsisse omnium oculos, hostis auctor fuit. Nec prius finis cædibus datus, quàm jugum & hostibus & duci capto reposuerunt.

CAPUT XVII.

BELLUM ETRUSCUM ET SAMNITICUM.

HACTENUS populo Romano bellum cum singulis gentium, mox acervatim: tamen sic quoque par omnibus fuit. Etruscorum duodecim populi, Umbri in id tempus intacti, antiquissimus Italiæ po-

pulus , Samnitum reliqui , in excidium Romani nominis repente conjurant. Erat terror ingens tot simul tantorumque populorum. Latè per Etruriam infesta quatuor agminum signa volitabant. Ciminus interim saltus in medio , antè invius , planè quasi Calidonus , vel Hercynius , adeo tunc terrori erat , ut senatus consuli denuntiaret , ne tantum periculi ingredi auderet. Sed nihil horum terruit ducem. Quin fratre præmisso explorat accessus. Ille per noctem pastorio habitu speculatus omnia , refert tutum iter. Sic Fabius Maximus periculosissimum bellum sine periculo explicavit. Nam subito inconditos atque palantes aggressus est ; captisque superioribus jugis , in subjectos suo jure detonuit. Ea namque species fuit illius belli , quasi in terrigenas e cœlo ac nubi- bus tela mitterentur. Nec incruenta tamen illa victoria : nam oppressus in sinu vallis alter consul Decius , more patrio devotum diis Manibus obtulit caput ; solennemque familiæ suæ consecrationem in victoriæ pretium redegit.



CAPUT XVIII.

*BELLUM TARENTINUM,
ET CUM PYRRHO REGE.*

SEQUITUR bellum Tarentinum, unum quidem titulo & nomine, sed victoriâ multiplex. Hoc enim Campanos, Apulos, atque Lucanos, & caput belli Tarentinos, id est, totam Italiam, & cum istis omnibus Pyrrhum, clarissimum Græciæ regem, unâ veluti ruinâ pariter involvit: ut eodem tempore & Italiam consummaret, & transmarinos triumphos auspicaretur. Tarentus, Lacedæmoniorum opus, Calabriae quondam, & Apuliae, totiusque Lucaniae caput, quum magnitudine & muris portuque nobilis, tum mirabilis situ: quippe in ipsis Adriatici maris faucibus posita, in omnes terras, Istriam, Illyricum, Epirum, Achaiam, Africam, Siciliam, vela dimittit. Imminet portui ad prospectum maris positum majus theatrum; quod quidem causa miseræ civitati fuit omnium calamitatum. Ludos fortè celebrabant, quum adremigantem littori Romanam classem inde vident; atque hostem rati, emicant, sine discrimine in-

sultant : *qui enim , aut unde Romani ?* Nec fatis. Aderat sine mora querelam ferens legatio. Hanc quoque fœdè per obscœnam turpemque dictu contumeliam violant. Et hinc bellum. Sed apparatus horribilis , quum tot simul populi pro Tarentinis confurgerent , omnibusque vehementior Pyrrhus ; qui semigræcam ex Lacedæmoniis conditoribus civitatem vindicaturus , cum totius viribus Epiri , Thessaliæ , Macedoniæ , incognitisque in id tempus elephantis , mârî , terrâ , viris , equis , armis , addito insuper ferarum terrore , veniebat. Apud Heracleam , & Campaniæ fluvium Lirim , Levino consule , prima pugna ; quæ tam atrox fuit , ut Ferentanæ turmæ præfectus Obsidius , in vectus in regem , turbaverit , coëgeritque projectis insignibus prælio excedere. Actum erat , nisi elephantis , converso in spectaculum bello , procurrissent : quorum quum magnitudine , tum deformitate , & novo odore simul ac stridore consternati equi , quum incognitas sibi belluas amplius quàm erant suspicarentur , fugam stragemque latè dederunt. In Apulia deinde apud Asculum meliùs dimicatum est , Curio Fabricioque consulibus. Jam quippe belluarum terror exoleverat , & Caius Minucius quartæ legionis hastatus , unius

proboscide abscissâ , mori posse belluas ostenderat. Itaque & in ipsas pila congesta sunt , & in turres vibratæ faces , tota hostium agmina ardentibus ruinis operuerre : nec antè cladi finis fuit , quàm nox dirimeret ; postremusque fugientium ipse rex a satellitibus humero faucius in armis suis referretur. Lucaniæ suprema pugna sub Arusinis , quos vocant , campis , ducibus iisdem qui superiùs : sed tunc ad totam victoriam exitum , quem datura virtus fuit , casus dedit. Nam productis in primam aciem rursus elephantis , unum ex his pullum adaçti in caput teli gravis ictus avertit : qui quum per stragem suorum percurrens stridore quereretur , mater agnovit , & , quasi vindicaret , exsiluit : tum omnia circa quasi hostilia gravi timore permiscuit. Ac sic eadem feræ , quæ primam victoriam abstulerant , secundam parem fecerant , tertiam sine controversia tradidere. Nec verò tantùm armis , & in campis , sed consiliis quoque & domi intra Urbem cum rege Pyrrho dimicatum est. Quippe post primam victoriam rex callidus , intellectâ virtute Romanâ , statim desperavit armis , seque ad dolos contulit. Nam interemptos cremavit ; captivosque indulgenter habuit , & sine pretio restituit. Missisque deinde

legatis in Urbem, omni modo annisus est, ut facto fœdere in amicitiam reciperetur. Sed bello & pace, foris & domi, omnem in partem Romana virtus tum se approbavit: nec alia magis, quàm Tarentina victoria, ostendit populi Romani fortitudinem, senatûs sapientiam, ducum magnanimitatem. Quinam illi fuerunt viri, quos ab elephantis primo prælio obtritos accepimus? omnium vulnera in pectore: quidam hostibus suis immortui: omnium in manibus enses, & relictæ in vultibus minæ, & in ipsa morte ira vivebat. Quod adeo Pyrrhus miratus est, ut diceret: *O quàm facilè erat orbis imperium oecupare, aut mihi Romanis militibus, aut me rege Romanis.* Quæ autem eorum, qui superfuerunt, in reparando exercitu festinatio? quum Pyrrhus, *Video me, inquit, planè Herculis sidere procreatum, cui quasi ab angue Lernæo, tot cæsa hostium capita de sanguine suo renascuntur.* Qui autem ille senatus fuit? quum, perorante Appio Cæco, pulsus cum muneribus suis ab Urbe legati, interroganti regi suo, quid de hostium sede sentirent. *Urbem templum sibi visam, senatum regum confessum esse, confiterentur.* Qui porro ipsi duces? vel in castris? quum medicum venale regis Pyrrhi caput offerentem Curius remisit:

Fabricius oblatam sibi a rege imperii partem repudiavit. Vel in pace ? quum Curius fictilia sua Samnitico præferret auro ; Fabricius decem pondo argenti circa Rufinum consularem virum quasi luxuriam censoriâ gravitate damnaret. Quis ergo miretur his moribus , hac virtute militum ; victorem populum Romanum fuisse ? unoque bello Tarentino intra quadriennium maximam partem Italiæ , fortissimas gentes , opulentissimas urbes , uberrimasque regiones in ditionem rede gisse ? Aut quid adeo fidem superet , quàm si principia belli cum exitu conferantur ? Victor primo prælio Pyrrhus , totâ tremente Italiâ , Campaniam , Lirim , Fregellasque populatus , propè captam Urbem a Prænestina arce prospexit ; & a vigesimo lapide oculos trepidæ civitatis fumo ac pulvere implevit. Eodem postea his exuto castris , his faucio , & in Græciam suam trans mare ac terras fugato , pax & quies ; & tanta de opulentissimis tot gentibus spolia , ut victoriam suam Roma non caperet. Nec enim temere ullus pulchrior in Urbem aut speciosior triumphus intravit. Ante hunc diem nihil , nisi pecora Volscorum , greges Sabinorum , carpenta Gallorum , fracta Samnitum arma vidisses : tum si captivos aspiceres , Molossi , Thessali , Macedones ,

Bruttius, Apulus, atque Lucanus: si pompas, aurum, purpura, signa, tabulæ, Tarentinæque deliciæ. Sed nihil libentiùs populus Romanus aspexit, quam illas, quas timuerat, cum turribus suis belluas: quæ non sine sensu captivitatis, summissis cervicibus, victores equos sequebantur.

CAPUT XIX.

BELLUM PICENS.

OMNIS mox Italia pacem habuit. Qui enim post Tarentum auderent? nisi quod ultro persequi socios hostium placuit. Domiti ergo Picentes, & caput gentis Asculum, Sempronio duce: qui, tremente inter prælium campo, Tellurem deam, promissâ æde, placavit.

CAPUT XX.

BELLUM SALLENTINUM.

SALLENTINI Picentibus additi, caputque regionis Brundisium cum inclyto portu, Marco Atilio duce. Et in hoc certamine, victoriæ pretium templum sibi pastoria Pales ultro poposcit.

CAPUT XXI.

BELLUM VOLSINIENSE.

POSTREMI Italicorum in fidem venere Volsinii, opulentissimi Etruscorum, implorantes opem adversus servos quondam suos, qui libertatem a dominis datam, in ipsos erexerant; translatâque in se republicâ, dominabantur. Sed hi quoque, duce Fabio Gurgite, pœnas dederunt.

CAPUT XXII.

DE SEDITIONIBUS.

HÆC est secunda ætas populi Romani, & quasi Adolescentia; quâ maxime viruit, & quodam flore virtutis exarsit, ac ferebuit. Ita quæ inerat quædam adhuc ex pastoribus feritas, quiddam spirabat indomitum. Inde est, quòd exercitus Posthumium imperatorem, inficiantem quas promiserat prædas, factâ in castris seditione, lapidavit: quòd sub Appio Claudio noluit vincere hostem, quum posset; quòd, duce Volerone, detrectantibus plerisque militiam, fracti consulis fasces; inde, quòd

clarissimos principes , quum adversarentur voluntati suæ , exsultatione multavit : ut Coriolanum colere agros jubentem ; nec minùs ille ferociter injuriam armis vindicâisset , nisi quòd jam inferentem signa filium mater Veturia lacrymis suis exarmavit : ut ipsum Camillum , quòd iniquè inter plebem & exercitum divisisse Veientem prædam videretur. Sed hic melior , in capta urbe consenuit ; & mox supplices de hoste Gallo vindicavit. Cum senatu quoque vehementiùs æquo bonoque certatum est ; adeo ut , relictis sedibus , solitudinem & interitum patriæ suæ minaretur.



CAPUT XXIII.

PRIMA discordia ob impotentiam fœneratorum : quibus in terga quoque serviliter fœvientibus , in Sacrum montem plebs armata secessit ; ægréque , nec nisi Tribunos impetrasset , Menenii Agrippæ facundi & sapientis viri auctoritate , revocata est. Exstat orationis antiquæ satis efficax ad concordiam fabula , quâ *disse-*
disse inter se quondam humanos dixit artus ,
quòd omnibus opere fungentibus , solus ven-
ter immunis ageret : deinde moribundos a

sejunctione rediisse in gratiam , quando sensissent , quòd ejus operâ redactis in sanguinem cibus irrigarentur.

CAPUT XXIV.

SECUNDAM in Urbe media decemviratûs libido conflavit. Allatas a Græcia leges decem principes lecti jubente populo conscripserant ; ordinataque erat in duodecim tabulis tota justitia ; quum tamen traditos fasces regio quodam furore retinebant. Ante ceteros Appius eò insolentiæ elatus est , ut ingenuam virginem stupro destinaret , oblitus & Lucretiæ , & regum , & juris , quod ipse composuerat. Itaque quum oppressam judicio filiam trahi in servitutem videret Virginius pater , nihil cunctatus , in medio foro manu suâ interfecit ; admotisque signis commilitonum , totam eam dominationem obsessam armis , in carcerem & catenas ab Aventino monte detraxit.



CAPUT XXV.

TERTIAM seditionem excitavit matrimoniorum dignitas ; ut plebei cum patriciis jungerentur : qui tumultus in monte Janiculo , duce Canuleio Tribuno plebis , exarsit.

CAPUT XXVI.

QUARTAM honorum cupido , ut plebei quoque magistratus crearentur. Fabius Ambustus duarum pater , alteram Sulpicio patricii sanguinis dederat , alteram plebeio Stoloni : qui , quum uxor ejus , quod ad licitoriae virgæ sonum ignotum penatibus suis expaverat , a sorore satis insolenter irrita esset , injuriam non tulit. Itaque nactus tribunatum , honorum & magistratuum consortium , quamvis invito senatu , extorsit. Verum in his ipsis seditionibus , principem populum non immeritò suspexeris. Siquidem nunc libertatem , nunc pudicitiam , tum natalium dignitatem , honorum decora & insignia vindicavit ; interque hæc omnia , nullius acrior custos , quam libertatis fuit ; nullâque in pretium ejus potuit

potuit largitione corrumpi ; quum ut in magno , & in dies majore populo , interim perniciosi cives exsisterent. Spurium Cassium agrariâ lege , Mælium largitione suspectum regiæ dominationis , præsentî morte multavit. Ac de Spurio quidem supplicium pater ipsius sumpsit : hunc Quinctii dictatoris imperio , in medio foro magister equitum Servilius Ahala confodit. Manlium verò Capitolii vindicem , quia plerosque debitorum liberaverat , altius se & incivilius efferentem , ab illa , quam defenderat , arce dejecit. Talis domi ac foris ; talis pace belloque populus Romanus fretum illud Adoleſcentiæ , id est , secundam imperii ætatem habuit ; in quâ totam inter Alpes fretumque Italiam armis subegit.





LIBER SECUNDUS.

CAPUT I.

P R O E M I U M.

DOMITA subactâque Italiâ , populus Romanus propè quingentesimum annum agens , quum bonâ fide adolevisset ; si quod est robur , si qua juvenas ; tum ille verè robustus , & juvenis , & par orbi terrarum esse cœpit. Ita (mirum , & incredibile dictu) qui propè quingentis annis domi luctatus est (adeo difficile fuerat dare Italiæ caput) his ducentis annis , qui sequuntur , Africam , Europam , Asiam , totum denique orbem terrarum bellis victoriisq̃ue peragravit.



CAPUT II.

PRIMUM BELLUM PUNICUM.

IGITUR victor Italiæ populus, quum a terra fretum usque venisset, more ignis, qui obvias populatus incendio sylvas, interveniente flumine abrumpitur, paulisper substitit. Mox quum videret opulentissimam in proximo prædam, quodammodo Italiæ suæ abscissam, & quasi revulsam; adeo cupiditate ejus exarsit, ut quatenus nec mole jungi, nec pontibus posset, armis belloque jungenda, & ad continentem suum revocanda bello videretur. Sed ecce, ultro ipsis viam pendentibus fatis, nec occasio defuit; quum de Pœnorum impotentia fœderata Siciliæ civitas Messana quereretur. Affectabat autem ut Romanus, ita Pœnus Siciliam; & eodem tempore, paribus uterque votis ac viribus imperium orbis agitabat. Igitur specie quidem socios juvandi, re autem sollicitante prædâ; quamquam territaret novitas rei (tanta tamen in virtute fiducia est) ille rudis, ille pastorius populus; veréque terrester, ostendit nihil interesse virtutis, equis an navibus, terrâ an mari

dimicaretur. Appio Claudio consule primum fretum ingressus est fabulosis infame monstris, æstuque violentum : sed adeo non est exterritus, ut illam ipsam ferventis æstûs violentiam pro munere amplecteretur : statimque ac sine mora Hieronem Syracusanum regem tantâ celeritate vicit, ut ille ipse se prius victum, quàm hostem videret, fateretur. Duillio Cornelioque consulibus etiam mari congredi ausus est, quum quidem ipsa velocitas classis comparatæ victoriæ auspiciûm fuit. Intra enim sexagesimum diem, quàm cæsa sylva fuerat, centum sexaginta navium classis in anchoris stetit ; ut non arte factæ, sed quodam munere deorum conversæ in naves atque mutatæ arbores viderentur. Prælii verò forma mirabilis ; quum illas celeres volucresque hostium naves hæ graves tardæque comprehenderent. Longè illis nauticæ artes, detergere remos, & ludificari fugâ rostra. Injectæ enim ferreæ manus, machinæque aliæ, ante certamen multum ab hoste derisæ ; coactique hostes quasi in solido decernere. Victor ergo apud Liparas, mersâ & fugatâ hostium classe, primum illum maritimum egit triumphum. Cujus quod gaudium fuit ? quum Duillius imperator, non contentus unius diei triumpho, per vitam omnem, ubi a cœna re-

diret, prælucere funalia, præcinere sibi tibias jussit, quasi quotidie triumpharet. Præ tanta victoria leve hujus prælii damnum fuit. Alter consulum interceptus Asina Cornelius: qui simulato colloquio evocatus, atque ita oppressus fuit; perfidiæ Punicæ documentum. Calatino dictatore, ferè omnia præsidia Pœnorum, Agrigento, Drepanis, Panormo, Eryce, Lilybæo, detraxit. Trepidatum est semel circa Camerinensium saltum: sed eximiâ virtute Calpurnii Flammæ tribuni militum evasimus, qui lectâ trecentorum manu, infestum & infessum ab hostibus tumulum occupavit, adeoque moratus hostem, dum exercitus omnis evaderet: ac sic pulcherrimo exitu Thermopylarum & Leonidæ famam adæquavit: hoc illustrior noster, quod expeditioni tantæ superfuit & supervixit, licet nihil scripserit sanguine. Lucio Cornelio Scipione, quum jam Sicilia suburbana esset populi Romani provincia; serpente latius bello, Sardiniam annexamque ei Corsicam transit: ibi Olbiæ, & hîc Aleriæ urbis excidio incolas terruit, adeoque omnes terrâ marique Pœnos expugnavit, ut jam victoriæ nihil nisi Africa ipsa restaret. Marco Atilio Regulo duce jam in Africam navigabat bellum. Nec deerant, qui ipso Punici

maris nomine ac terrore deficerent, augente insuper Tribuno Mannio metum, in quem, nisi paruisset, securi districtâ, imperator metu mortis navigandi fecit audaciam. Mox ventis remisque properatum est; tantusque terror hostici adventûs Pœnis fuit, ut apertis pene portis Carthago caperetur. Prima belli præmium fuit civitas Clypea: prima enim a Punico litore quasi arx & specula procurrat. Et hæc, & trecenta amplius castella vastata sunt. Nec cum hominibus, sed cum monstribus quoque dimicatum est; quum quasi in vindictam Africæ nata miræ magnitudinis serpens posita apud Bagradam castra vexaret. Sed omnium victor Regulus, quum terrorem nominis sui latè circumtulisset; quumque magnam vim juventutis, ducesque ipsos, aut cecidisset, aut haberet in vinculis; classemque ingenti prædâ onustam, & triumpho gravem, in Urbem præmisisset; etiam ipsam belli caput Carthaginem urgebat obsidio, ipsisque portis inhærebat. Hic paululum circumacta fortuna est; tantum ut plura essent Romanæ virtutis insignia; cujus ferè magnitudo calamitatibus approbatur. Nam conversis ad externa auxilia hostibus, quum Xantippum illis ducem Lacedæmon misisset, a viro militiæ peritissimo vincimur. Tum fœdâ

clade Romanisque usu incognitâ , vivus in manus hostium venit fortissimus imperator. Sed ille quidem par tantæ calamitati fuit. Nam nec punico carcere infractus est , nec legatione susceptâ. Quippe diversa , quàm hostes mandaverant , censuit ; ne pax fieret , nec commutatione captivorum reciperetur. Sed nec illo voluntario ad hostes suos reditu , nec ultimo sive carceris , sive crucis supplicio deformata majestas ; immo his omnibus admirabilior , quid aliud quàm victus de victoribus , atque etiam , quia Carthago non cesserat , de fortuna triumphavit ? Populus autem Romanus multò acrior infestiorque pro ultione Reguli , quàm pro victoria fuit. Metello igitur consule spirantibus altiùs Pœnis , & reverso in Siciliam bello , apud Panormum sic hostes cecidit , ut ne ampliùs eam insulam cogitarent. Argumentum ingentis victoriæ , centum circiter elephantorum captivitas ; sic quoque magna præda , si gregem illum non bello , sed venatione cepisset. Appio Claudio consule , non ab hostibus , sed a diis ipsis superatus est , quorum auspicia contempserat ; ibi statim classe demersâ , ubi ille præcipitari pullos jusserat , quòd pugnare ab his vetaretur. Marco Fabio Buttone consule , classem hostium in Africo

mari apud Æginurum , jam in Italiam ultro navigantem cecidit. Quantus ô tunc triumphus tempestate intercidit , quum opulenta prædâ classis , adversis acta ventis , naufragio suo Africam & Syrtes , & omnium ripas gentium , & insularum littora , implevit ! Magna clades , sed non sine aliqua principis populi dignitate ; interceptam tempestate victoriam , & triumphum periisse naufragio ; & tamen , quum Punicæ prædæ omnibus promontoriis insulisque frustarentur & fluitarent , populus Romanus & sic triumphavit. Lutatio Catulo consule tandem bello finis impositus apud insulas , quibus nomen Ægates. Nec major aliàs in mari pugna ; quippe com meatibus , exercitu , propugnaculis , armis gravis hostium classis , & in ea quasi tota Carthago ; quod ipsum exitio fuit. Romana classis prompta , levis , expedita , & quodam genere castrensis ; ad similitudinem pugnae equestris , sic remis , quasi habenis agebatur ; & in hos , vel in illos mobilia rostra speciem viventium præferebant. Itaque momento temporis laceratæ hostium rates , totum inter Siciliam Sardiniamque pelagus naufragio suo operuerunt. Tanta denique fuit illa victoria , ut de excindendis hostium mœnibus non quæreretur. Supervacuum visum est

in arcem murosque sævire, quum jam in mari esset deleta Carthago.

CAPUT III.

BELLUM LIGUSTICUM.

PERACTO Punico bello, sequuta est brevis sanè, & quasi ad recipiendum spiritum, requies, argumentumque pacis, & bonâ fide cessantium armorum, tunc primùm post Numam clausa porta Jani fuit: sed statim ac sine mora patuit. Quippe jam Ligures, jam Insubres Galli, nec non & Illyrii laceſſebant: sic deſub Alpibus, id eſt, deſub ipsis Italiæ faucibus, gentes deo quodam aſſiduè incitante, ne rubiginem ſcilicet ac ſitum arma ſentirent. Denique utrique quotidiani, & quaſi domeſtici hoſtes tirocinia militum imbuebant, nec aliter utrâque gente, quàm quaſi cote quadam, populus Romanus ferrum ſuæ acuebat virtutis. Ligures imis Alpium jugis adhærentes inter Vârum & Macram flumen, implicitosque dumis ſylveſtribus, major aliquantò labor erat invenire, quàm vincere. Tuti locis & fugâ, durum atque velox genus, ex occasione magis latrocinia, quàm bella

faciebat. Itaque quum diu multumque eluderent Salyi, Deceates, Oxybii, Euburates, Ingauni; tandem Fulvius latebras eorum ignibus sepsit: Bæbius in plana deduxit: Posthumius ita exarmavit, ut vix reliquerit ferrum, quo terra coleretur.



CAPUT IV.

BELLUM GALLICUM.

GALLIS Insubribus, & his accolis Alpium, animi ferarum, corpora plusquam humana erant: sed experimento deprehensum est (quippe sicut primus impetus eis major quàm virorum est, ita sequens minor quàm feminarum) Alpina corpora humenti cœlo educata habere quiddam simile nivibus suis: quæ mox ut caluere pugnâ, statim in sudorem eunt; & levi motu, quasi sole, laxantur. Hi sæpe & aliàs, sed Britomaro duce, non prius soluturos se baltea, quàm Capitolium ascendissent, juraverant. Factum est. Victos enim Æmilius in Capitolio discinxit. Mox, Ariovisto duce, vovere de nostrorum militum præda Marti suo torquem. Intercepit Jupiter votum. Nam de torquibus eorum aureum tropæum Jovi


Flaminius erexit. Viridomaro rege Romana arma Vulcano promiserant. Aliorum vota ceciderunt. Occiso enim rege, Marcellus tertio post Romulum patrem Feretrio Jovi arma suspendit.



CAPUT V.

BELLUM ILLYRICUM.

ILLYRII, seu Liburni, sub extremis Alpium radicibus agunt inter Arsiam, Tiumque flumen, longissimè per totum Adriani maris littus effusi. Hi regnantè Teutanâ muliere, populationibus non contenti, licentiæ scelus addiderunt. Legatos quippe nostros, ob ea quæ deliquerant, jure agentes, nec gladio quidem, sed ut victimas, securi percutiunt: præfectos navium igni comburunt; idque quò indignius foret, mulier imperabat. Itaque, Cnæo Fulvio Centumalo duce, latè domantur. Strictæ in principum colla secures, legatorum Manibus litavere.



CAPUT VI.

BELLUM PUNICUM SECUNDUM.

POST primum Punicum bellum, vix quadriennii requies: ecce alterum bellum; minus quidem spatio (nec enim ampliùs quàm decem & octo annos patet) sed adeo cladium atrocitate terribilius, ut, si quis conferat damna utriusque populi, similior victo sit populus, qui vicit. Urebat nobilem populum ablatum mare, raptæ insulæ, dare tributa, quæ jubere consueverat. Hinc ultionem puer Annibal ad aram patri juraverat: nec morabatur. Igitur in causam belli Saguntus delecta est, vetus Hispaniæ civitas & opulenta, fideique erga Romanos magnum quidem, sed triste monumentum: quam in libertatem communi fœdere exceptam Annibal, causas novorum motuum quærens, & suis & ipsorum manibus evertit, ut Italiam sibi rupto fœdere aperiret. Summa fœderum Romanis religio est: itaque ad auditum sociæ civitatis obsidium, memores icti cum Pœnis quoque fœderis, non statim ad arma procurrunt, dum priùs more legitimo queri malunt. Interim jam novem mensibus fessi

fame , machinis , ferro , versâ denique in rabiem fide , immanem in foro excitant rogam : tum desuper se suosque cum omnibus opibus suis ferro & igni corrumpunt. Hujus tantæ cladis auctor Annibal poscitur. Tergiversantibus Pœnis , dux legationis , *Quæ* , inquit , *mora est ?* Fabius. *In hoc ego sinu bellum pacemque porto : utrum eligitis ?* Succlamantibus ; *Bellum.* *Bellum igitur* , inquit , *accipite :* & excusso , in media curia togæ gremio , non sine horrore , quasi planè sinu ferret , bellum effudit. Similis exitus belli initio fuit. Nam quasi has inferias sibi Saguntinorum ultimæ diræ in illo publico parricidio incendioque mandassent ; ita Manibus eorum , vastatione Italiæ , captivitate Africæ , ducum & regum , qui id gessere bellum , exitio parentatum est. Igitur ubi semel in Hispania movit illa gravis & luctuosa Punici belli vis atque tempestas ; destinatumque Romanis jam diu fulmen Saguntino igne conflavit ; statim quodam impetu rapta medias perfregit Alpes ; & in Italiam ab illis fabulosæ altitudinis nivibus , velut cœlo missa , descendit. Ac primi quidem impetûs turbo inter Padum & Ticinum valido statim fragore detonuit. Tunc Scipione duce fusus exercitus. Saucius etiam ipse venisset in manus

hostium imperator, nisi protectum patrem prætextatus admodum filius ab ipsa morte rapuisset. Hic erat Scipio, qui in exitum Africæ crescit, nomen ex malis ejus habiturus. Ticino Trebia succedit. Hic secunda belli Punici procella desævit, Sempronio consule. Tunc callidissimi hostes frigidum & nivalem nacti diem, quum se ignibus prius, oleoque fovissent (horribile dictu) homines a meridie & sole venientes nostrâ nos hyeme vicerunt. Thrasimenus lacus tertium fulmen Annibalis, imperatore Flaminio. Ibi quoque ars nova Punicæ fraudis: quippe nebulâ lacûs, palustribusque virgultis tectus eques, terga subitò pugnantium invasit. Nec de diis possumus queri: imminentem quippe temerario duci cladem prædixerant insidentia signis examina, & aquilæ prodire nolentes, & commissam aciem sequutus ingens terræ tremor: nisi illum horrorem soli, equitum virorumque discursus, & mota vehementius arma fecerunt. Quartum, id est, pene ultimum vulnus imperii Cannæ, ignobilis Apuliæ vicus: sed magnitudine cladis emersit; & quadraginta millium cæde parta nobilitas. Ibi in exitum infelicis exercitûs, dux, terra, cælum, dies, tota denique rerum natura consensit. Siquidem non contentus simu-

latis transfugis Annibal , qui mox terga pugnantium ceciderunt , insuper callidissimus imperator , patentibus in campis , observato loci ingenio , quòd & sol ibi acerrimus , & plurimus pulvis , & Eurus ab Oriente semper quasi ad constitutum , ita instruxit aciem , ut Romanis adversus hæc omnia adversis , quasi secundum cœlum tenens , vento , pulvere , sole pugnaret. Itaque duo maximi exercitus cæsi ad hostium satietatem , donec Annibal diceret militi suo , *Parce ferro*. Ducum effugit alter , alter occisus est : dubium uter major animo. Paullum puduit , Varro non desperavit. Documenta cladis cruentus aliquamdiu Aufidus , pons de cadaveribus jussu ducis factus in torrente Vergelli ; modii duo annulorum Carthaginem missi , dignitasque equestris taxata mensurâ. Dubium deinde non erat , quin ultimum illum diem habitura fuerit Roma , quin tumque intra diem epulari Annibal in Capitolio potuerit , si (quod Pœnum illum dixisse Maharbalem Himilconis ferunt) *Annibal quemadmodum sciret vincere , sic uti victoria scisset*. Tum quidem illum , ut dici vulgò solet , aut fatum urbis imperaturæ , aut ipsius mens mala , & aversi a Carthagine dii , in diversum abstulerunt. Quum victoriâ posset uti , frui maluit ,

relictâque Româ, Campaniam Tarentumque peragrarè : ubi mox & ipse, & exercitûs ardor elanguit; adeò ut verè dictum sit : *Capuam Annibali Cannas fuisse*. Siquidem invictum Alpibus, indomitum armis, Campaniæ (quis crederet?) soles, & tepentes fontibus Baiæ subegerunt. Interim respirare Romanus, & quasi ab inferis emergere. Arma non erant: detracta sunt templis. Deerat juvenus: in sacramentum militiæ liberata servitia. Egebat ærarium: opes suas libens senatus in medium protulit; nec præter quod in bullis, singulisque annulis erat, quidquam sibi auri reliquere. Eques sequutus exemplum, imitatæque equitem tribus. Denique vix sufficere tabulæ, vix scribarum manus, Lævino Marcelloque consulibus, quum privatæ opes in publicum deferrentur. Quid autem in deligendis magistratibus, quæ centuriarum sapientia, quum juniores a senioribus consilium de creandis consulibus petivere? Quippe adversus hostem toties victorem, tam callidum, non virtute tantum, sed suis etiam pugnare consiliis oportebat. Prima redeuntis, &, ut sic dixerim, reviviscentis imperii spes Fabius fuit; qui novam de Annibale victoriam commentus est, non pugnare. Hinc illi cognomen novum, & reipublicæ salu-

tare, *Cunctator*. Hinc illud ex populo, ut *Imperii scutum* vocaretur. Itaque per Samnium totum, per Falernos Gauranosque saltus sic maceravit Annibalem, ut qui frangi virtute non poterat, morâ comminueretur. Inde Claudio Marcello duce etiam congredi ausus est. Cominus venit, & pepulit in Campania sua, & ab obsidione Nolæ urbis excussit. Ausus & Sempronio Graccho duce per Lucaniam sequi, & premere terga cedentis; quamvis tunc (ô pudor!) manu servili pugnaret. Nam huc usque tot mala compulerant; sed libertate donati, fecerant de servitute Romanos. O horribilem in tot adversis fiduciam! ô singularem animum ac spiritum populi Romani! tam arctis afflictisque rebus, quum de Italia sua dubitaret, ausus est tamen in diversa respicere; quumque hostes in jugulo per Campaniam Apuliamque volitarent, mediamque de Italia Africam facerent, eodem tempore & hunc sustinebat, & in Siciliam, Sardiniam, Hispaniam, divisa per terrarum orbem arma mittebat. Sicilia mandata Marcello, nec diu restitit. Tota enim insula in una urbe superata est. Grande illud, & ante id tempus invictum caput Syracusæ, quamvis Archimedis ingenio defenderentur, aliquando cesserunt.

Longè illi triplex murus , totidemque arces , portus ille marmoreus , & fons celebratus Arethusæ ; nisi quòd hætenus profuere , ut pulchritudini victæ urbis parceretur. Sardiniam Gracchus arripuit. Nihil illi gentium feritas , Insanorumque (nam sic vocantur) immanitas montium profuere. Sævitur in urbes , urbemque urbium Caralim , ut gens contumax , virisque morti , saltem desiderio patrii soli domaretur. In Hispaniam missi Cnæus & Publius Scipiones , pene totam Pœnis eripuerant : sed insidiis Punicæ fraudis oppressi rursus amiserunt , magnis quidem illi præliis quum punicas opes cecidissent : sed Punicæ insidiæ alterum ferro castra metantem , alterum , quum evasisset in turrim , cinctum facibus oppresserunt. Igitur in ultionem patris ac patrui missus cum exercitu Scipio , cui tam grande de Africa nomen fata decreverant , bellatricem illam , viris armisque nobilem Hispaniam , illam seminarium hostilis exercitûs , illam Annibalis eruditricem (incredibile dictu) totam a Pyrenæis montibus in Herculis columnas & Oceanum recuperavit , nescias citiùs , an feliciùs. Quàm velociter , quatuor anni fatentur : quàm facilè , vel una civitas probat. Eodem quippe , quo obfessa est die , capta est ; omenque Africanæ

viſtoriae fuit , quòd tam facile victa eſt Hiſpana Carthago. Certum eſt tamen ad proſtigandam provinciam maximè profeciſſe ſingularem ducis ſanctitatem ; quippe qui captivos pueros puellasque præcipuæ pulchritudinis Barbaris reſtituerit , ne in conſpectum quidem ſuum paſſus adduci , ne quid de virginitatis integritate delibaſſe ſaltem oculis videretur. Hæc inter diverſa terrarum populus Romanus : nec ideo tamen Italiae viſceribus inhærentem ſummove- vere poterat Annibalem. Pleraque ad hoſtem defecerant ; & dux acerrimus contra Romanos Italicis quoque viribus utebatur. Jam tamen eum pleriſque oppidis & regionibus excuſſeramus. Tarentus ad nos redierat : jam & Capua , ſedes & domus , & patria altera Annibalis , tenebatur : cujus amiſſio tantum Pœno duci dolorem dedit , ut inde totis viribus Romam convertereretur. O populum dignum orbis imperio ! dignum omnium favore , & admiratione hominum ac deorum ! Compulſus ad ultimos metus ab incepto non deſtitit ; & de ſua Urbe ſollicitus Capuam tamen non omiſit : ſed parte exercitûs ſub Appio conſule relictâ , parte Flaccum in urbem ſequutâ , abſens ſimul , præſenſque pugnabat. Quid ergo miramur moventi caſtra a tertio lapide Annibali ite-

rum ipsos deos, deos, inquam (nec fateri pudebit) restitisse? Tanta enim ad singulos illius motus vis imbrium effusa, tanta ventorum violentia coorta est, ut divinitus hostem summoveri, neque cœlo, sed ab Urbis ipsius mœnibus, & Capitolio ferri videretur. Itaque fugit, & cessit, & in ultimum se Italiæ recepit sinum, quum Urbem tantum non adoratam reliquisset. Parva res dictu, sed ad magnanimitatem populi Romani probandam satis efficax; quod illis ipsis, quibus obsidebatur diebus, ager, quem Annibal castris infederat, venalis Romæ fuit, hastæque subjectus invenit emptorem. Voluit Annibal contrâ fiduciam imitari; subjecitque argentarias Urbis tabernas: nec sector inventus est: ut scias, etiam præsagia fati fuisse. Nihil actum erat tantâ virtute, tanto favore etiam deorum: siquidem Asdrubal frater Annibalis cum exercitu novo, novis viribus, novâ belli mole veniebat. Actum erat procul dubio, si vir ille se cum fratre junxisset. Sed hunc quoque castra metantem Claudius Nero cum Livio Salinatore debellat. Nero in ultimo Italiæ angulo summovebat Annibalem. Livius in diversissimam partem, id est, in ipsas nascentis Italiæ fauces, signa converterat. Tanto, id est, omni, quâ longissima Italia, solo

interjacente, quo consilio, quâ celeritate, consules castra conjunxerint, inopinanterque hostem collatis signis compresserint, neque id fieri Annibal senserit, difficile dictu est. Certè Annibal, re cognitâ, quum projectum fratris caput ad sua castra vidisset, *agnosco*, inquit, *infelicitatem Carthagini*. Hæc fuit illius viri, non sine præfagio quodam fati imminentis, prima confessio. Jam certum erat Annibalem etiam ipsius confessione posse vinci : sed tot rerum prosperarum fiduciâ plenus populus Romanus magni æstimabat asperri- mum hostem in sua Africa debellare. Duce igitur Scipione, in ipsam Africam totâ mole conversus, imitari cœpit Annibalem, & Italiæ suæ clades in Africa vindicare. Quas ille (dii boni!) Asdrubalis copias, quos Syphacis exercitus fudit ? quæ quan- taque utriusque castra facibus illatis unâ nocte delevit ? denique jam non a tertio lapide, sed ipsas Carthagini portas obsi- dione quatiebat. Sic factum est, ut inhæ- rentem atque incubantem Italiæ extor- queret Annibalem. Non fuit major sub imperio Romano dies, quàm ille, quum duo omnium & antea & postea ducum maximi, ille Italiæ, hic Hispaniæ victor, collatis cominus signis direxere aciem. Sed & colloquium fuit inter ipsos de le-

gibus pacis. Steterunt diu mutuâ admiratione defixi. Ubi de pace non convenit, signa cecinere. Constat utriusque confessione, nec meliùs instrui aciem, nec acriùs potuisse pugnari. Hoc Scipio de Annibalis, Annibal de Scipionis exercitu prædicaverunt. Sed tamen Annibal cessit; præmiumque victoriæ Africa fuit, & sequutus Africam statim terrarum orbis.




CAPUT VII.

BELLUM MACEDONICUM PRIMUM.

POST Carthaginem vinci neminem pudit. Sequutæ sunt statim Africam gentes, Macedonia, Græcia, Syria, ceteraque omnia, quodam quasi æstu & torrente fortunæ: sed primi omnium Macedones, affectator quondam imperii populus. Itaque, quamvis tunc Philippus regno præsideret, Romani tamen dimicare sibi cum rege Alexandro videbantur. Macedonicum bellum nomine amplius, quàm spectatione gentis fuit. Causa cœpit a fœdere Philippi, quo rex jam pridem dominantem in Italia Annibalem sibi sociaverat: postea crevit, implorantibus Athenis auxilium contra regis injurias, quum

ille ultra jus victoriæ in templa, aras, & sepulcra ipsa sæviret. Placuit senatui opem tantis ferre supplicibus. Quippe jam gentium reges, duces, populi, nationes, præsidia sibi ab hac urbe petebant. Primò igitur, Lævino consule, populus Romanus, Ionium mare ingressus, tota Græciæ littora veluti triumphanti classe peragravit. Spolia quippe Siciliæ, Sardinia, Hispaniæ, Africæ præferebat; & manifestam victoriam nata in prætoria puppe laurus pollicebatur. Aderat sponte in auxilium Attalus rex Pergamenorum: aderant Rhodii, nauticus populus: quibus a mari, consule a terris, omnia equis virisque quatiante; bis victus rex, bis fugatus, bis exutus castris: quum tamen nihil terribilius Macedonibus fuit ipso vulnerum aspectu; quæ non spiculis, non sagittis, nec ullo Græculo ferro, sed ingentibus pilis, nec minoribus adaucta gladiis, ultra mortem patebant. Enimvero Flaminio duce invios antea Chaonum montes, Aoumque amnem per abrupta vagantem, id est, ipsa Macedonia claustra penetra-
vimus. Introisse victoria fuit. Nam numquam postea ausus congredi rex, ad tumulos, quos Cynoscephalas vocant, uno, ac ne hoc quidem iusto prælio opprimitur. Et illi quidem consul pacem dedit,

regnumque concessit : mox , ne quid esset hostile , Thebas , & Eubœam , & grassantem sub Nabide suo Lacedæmona compefcuit. Græciæ verò veterem statum reddidit , ut legibus viveret suis , & avitâ libertate frueretur. Quæ gaudia , quæ vociferationes fuerunt , quum hoc fortè Nemeæ in theatro quinquennialibus ludis a præcone caneretur ? quo certavere plausu ? quid florum in consulem profuderunt ? Et iterum iterumque præconem repetere illam vocem jubebant , quâ libertas Achaïæ pronuntiabatur ; nec aliter illâ consulari sententiâ , quàm modulatissimo aliquo tibiarum , aut fidium cantu fruebantur.



CAPUT VIII.

BELLUM SYRIACUM REGIS ANTIOCHI.

MACEDONIAM statim , & regem Philippum Antiochus excepit , quodam casu , quasi industriâ , sic adgubernante fortunâ , ut quemadmodum ab Africa in Europam , sic ab Europa in Asiam , ultro se fuggerentibus causis , imperium procederet ; & cum terrarum orbis situ ipse ordo victoriarum navigaret. Non aliud formidolosius famâ bellum fuit ; quippe quum Persas
&

& Orientem, Xerxem atque Darium cogitarent; quando perfossi invii montes, quando velis opertum mare nunciaretur. Ad hoc cœlestes minæ territabant, quum humore continuo Cumanus Apollo sudaret. Sed hic faventis Asiæ suæ numinis timor erat. Nec sane viris, opibus, armis, quidquam copiosius Syriâ: sed in manus tam ignavi regis inciderat, ut nihil fuerit in Antiocho speciosius, quàm quòd a Romanis victus est. Impulere regem in id bellum, illinc Thoas Ætoliæ princeps, inhonoratam apud Romanos querens adversus Macedonas militiæ suæ societatem; hinc Annibal, qui in Africa victus, profugus, & pacis impatiens, hostem populo Romano toto orbe quærebat. Et quod illud fuisset periculum, si se consiliis ejus rex tradidisset, id est, si Asiæ viribus usus fuisset miser Annibal? Sed rex suis opibus, & nomine regio fretus, satis habuit bellum movere. Europa jam, dubio procul, jure ad Romanos pertinebat. Hic Lysimachiam urbem, in littore Thracio positam a majoribus suis, Antiochus ut hereditario jure reposcebat. Hoc velut sidere Asiatici belli mota tempestas. Et maximus regum contentus fortiter indixisse bellum, quum ingenti strepitu ac tumultu movisset ex Asia, occupatis statim insu-

lis, Græciæque littoribus, otia & luxus tamquam victor agitabat. Eubœam insulam continenti adhærentem tenui freto reciprocantibus aquis Euripus abscidit. Hic ille positis aureis sericisque tentoriis, sub ipso freti murmure, quum inter fluentia tibiis fidibusque concineret, collatis undique, quamvis per hyemem, rosis, ne non aliquo ducem genere agere videretur, virginum puerorumque delectus habebat. Talem ergo regem jam suâ luxuriâ debellatum populus Romanus, Acilio Glabrione consule, in insula aggressus, ipso statim adventûs sui nuntio coëgit ab insula fugere. Tum præcipitem apud Thermopylas assequutus, locum trecentorum Laconum speciosâ cæde memorandum, ne ibi quidem fiduciâ loci resistentem, mari ac terrâ cedere coëgit. Statim & e vestigio itur in Syriam. Classis regia Polyxenidæ Annibalique commissa: nam rex prælium nec spectare poterat. Igitur, duce Æmilio Regillo, adremigantibus Rhodiis, tota laceratur. Ne sibi placeant Athenæ: in Antiocho vicinus Xerxem; in Æmilio Themistoclem æquavimus; Ephesiis Salamina pensavimus. Tum consule Scipione, cui frater, ille modò victor Carthaginis Africanus, voluntariâ legatione aderat, debellari regem placet: & jam toto cesserat

mari ; sed nos imus ulteriùs. Mæandrum ad amnem montemque Sipylum castra ponuntur. Hic rex , incredibile dictu , quibus auxiliis , quibus copiis confederat. Trecenta millia peditum ; equitum , falcatorumque curruum non minor numerus. Elephantis ad hoc immensæ magnitudinis , auro , purpurâ , argento , & suo ebore fulgentibus , aciem utrimque vallaverat. Sed hæc omnia præpedita magnitudine suâ ; ad hoc imbre , qui subito superfusus , mirâ felicitate Persicos arcus corruerat : primùm trepidatio , mox fuga , dehinc triumphus fuerunt. Victo & supplici pacem atque partem regni dari placuit , eò libentiùs , quòd tam facile cessisset.




CAPUT IX.

BELLUM ÆTOLICUM.

SYRIATICO bello successit , ut debebat , Ætolicum. Victo quippe Antiocho , Romanus faces Asiatici belli persequabatur. Ergo Fulvio Nobiliori mandata ultio est. Hic protinus caput gentis Ambraciam , regiam Pyrrhi , machinis quatit. Sequuta deditio est. Aderant Ætolorum precibus

Attici , Rhodii : & memineramus auxilii. Sic placuit ignoscere. Serpsit tamen latius in proximos bellum , omnemque latè Cephaleniam , Zacynthon , & quidquid insularum in eo mari inter Ceraunios montes jugumque Maleum , Ætolici belli accessio fuerunt.



CAPUT X.

BELLUM ISTRICUM.

ISTRI sequuntur Ætolos : quippe bel-
lantes eos nuper adjuverant. Et initia
pugnæ prospera hosti fuerunt , eademque
exitii causa. Nam quum Cnæi Manlii castra
cepissent , opimæque prædæ incubarent ,
epulantes , ac ludibundos plerosque , atque
ubi essent præ poculis nescientes , Appius
Pulcher invadit. Sic cum sanguine & spi-
ritu malè partam revomuere victoriam.
Ipse rex Apulo equo impositus , quum
subinde crapulâ & capitis errore lapsaret ,
captum sese vix & ægre , postquam ex-
perrectus est , didicit.



CAPUT XI.

BELLUM GALLOGRÆCUM.

GALLOGRÆCIAM quoque Syriatici belli ruina convolvit. Fuerint inter auxilia regis Antiochi, an fuisse, ac cupidus triumphi Manlius eos visos simulaverit, dubium est. Certè negatus est victori triumphus; quia causam belli non approbavit. Ceterum gens Gallo-græcorum, sicut ipsum nomen indicio est, mixta & adulterata, reliquiae Gallorum, qui Brenno duce vastaverant Græciam: mox Orientem sequuti, in media Asiæ parte federunt. Itaque ut frugum semina mutato solo degenerant, sic illa genuina feritas eorum, Asiaticâ amœnitate mollita est. Duobus, itaque præliis fusi fugatique sunt, quamvis sub adventu hostis relictis sedibus, in altissimos se montes recepissent, quos Tolostobogi, Tectosagique jam infederant. Utrique fundis sagittisque acti, in perpetuam se pacem dediderunt. Sed alligati miraculo quodam fuere, quum catenas morsibus & ore tentassent, quum offocandas invicem fauces præbuisent. Nam Orgiagontis regis uxor a centurione stuprum passa,

memorabili exemplo custodiam evasit ,
revulsumque militis caput ad maritum suum
retulit.



CAPUT XII.

BELLUM MACEDONICUM SECUNDUM.

DUM aliæ aliæque gentes Syriatici belli
sequuntur ruinam , Macedonia se rursus
erexit. Fortissimum populum memoria &
recordatio suæ nobilitatis agitabat : & suc-
cesserat Philippo filius Perses ; qui semel
in perpetuum victam esse Macedoniam ,
non putabat ex gentis dignitate. Multò
vehementiùs sub hoc Macedones , quàm
sub patre consurgunt : quippe Thracas in
vires suas traxerant ; atque ita industriam
Macedonum viribus Thracum , ferociam
Thracum disciplinâ Macedonum , tempe-
raverunt. Accessit his consilium ducis ,
qui situm regionum suarum summo spe-
culatus Hæmo , positis per abrupta castris ,
ita Macedoniam suam armis ferroque val-
laverat , ut non reliquisset aditum , nisi a
cœlo venturis hostibus , videretur. Tamen
Marcio Philippo consule eam provinciam
ingressus populus Romanus , exploratis
diligenter accessibus , propter Ascurida

paludem, per aversos deviosque tumulos, illa quæ volucris quoque videbantur inaccessa, regem securum, & nihil tale metuentem, subitâ belli irruptione terruit. Cujus tanta trepidatio fuit, ut pecuniam omnem in mare jusserit mergi, ne periret; classem cremari, ne incenderetur. Paulo consulê quum majora & crebra essent imposita præsidia, per alias vias Macedonia deprensa est, summâ quidem arte & industriâ ducis, quum aliâ minatus, aliâ irrepsisset. Cujus adventus ipse adeo terribilis regi fuit, ut interesse non auderet, sed gerenda ducibus bella mandaverit. Absens ergo victus fugit in maria, insulamque Samothracen, fretus celebri religione, quasi templa & aræ possent defendere, quem nec montes sui, nec arma potuissent. Nemo regum diutius amissæ fortunæ conscientiam retinuit. Supplex quum scriberet ad imperatorem ab illo, quo confugerat, templo, nomenque epistolæ notaret suum, *regem* addidit. Sed nec reverentior captæ majestatis alius Paulo fuit. Quum in conspectum venisset hostis, in templum recepit, & conviviiis adhibuit, liberosque admonuit suos, ut fortunam, cui tantum liceret, revererentur. Inter pulcherrimos hunc quoque populus Romanus de Macedonia duxit atque

vidit triumphum ; quippe cuius spectaculo triduum impleverit. Primus dies signa tabulasque : sequens arma pecuniasque transvexit : tertius captivos , ipsumque regem , attonitum adhuc , tamquam subito malo stupentem. Sed multò priùs gaudium victoriæ populus Romanus , quàm epistolis victoris , præceperat : quippe eodem die , quo victus Perses in Macedonia , Romæ cognitum est. Duo juvenes candidis equis apud Juturnæ lacum pulverem & cruorem abluebant. Hi nuntiavere. Castorem & Pollucem fuisse creditum vulgò , quòd gemini fuissent ; interfuisse bello , quòd sanguine maderent ; a Macedonia venire , quòd adhuc anhelarent.

CAPUT XIII.

BELLUM ILLYRICUM.


MACEDONICI belli contagio traxit Illyrios. Ipsi quidem , ut Romanum a tergo distringerent , a Perse rege conducti pecuniâ militavere. Sine mora ab Anicio prætore subiguntur. Scordam caput gentis delesse suffecit : statim sequuta deditio est. Denique hoc bellum antè finitum est , quàm geri Romæ nuntiaretur.

CAPUT XIV.

BELLUM MACEDONICUM TERTIUM.

QUODAM fato , quasi ita convenisset inter Pœnos & Macedonas , ut tertio quoque vincerentur , eodem tempore utrique arma moverunt : sed prior jugum excutit Macedo , aliquantò , quàm antè , gravior , dum contemnitur. Causa Belli propè erubescenda : quippe regnum pariter & bellum vir ultimæ sortis Andriscus invaserat ; dubium liber an servus , mercenarius certè : sed quia vulgò ex similitudine Philippi *Pseudophilippus* vocabatur , regiam formam , regium nomen , animo quoque regio implevit. Igitur dum hæc ipsa contemnit populus Romanus , Juventio prætore contentus , virum non Macedonicis modò , sed Thraciæ quoque auxiliis ingentibus validum temere tentavit ; invictusque a veris regibus , ab illo imaginario & scenico rege superatur. Sed consule Metello amissum cum legione prætorem plenissimè ultus est. Nam & Macedoniam servitute multavit ; & ducem belli deditum ab eo , ad quem confugerat , Thraciæ regulo , in Urbem in catenis reduxit ; hoc

quoque illi in malis indulgente fortunâ ,
ut de eo populus Romanus , quasi de
vero rege , triumpharet.



CAPUT XV.


BELLUM PUNICUM TERTIUM.

TERTIUM cum Africa bellum , & tem-
pore exiguum (nam quadriennio patra-
tum est) & in comparatione priorum ,
minimum labore (non enim tam cum vi-
ris , quàm cum ipsa urbe pugnatum est)
sed planè maximum eventu : quippe eo
tandem Carthago finita est. Atque si quis
trium temporum momenta consideret ,
primo commissum bellum , profligatum
secundo , tertio verò confectum est. Sed
hujus causa belli , quòd contra foederis
legem adversùs Numidas quidem semel
parasset classem & exercitum : frequens
autem Masinissæ fines territabat. Sed huic
bono socioque regi favebatur. Quum bel-
lum federet , de belli fine tractatum est.
Cato inexpiabili odio delendam esse Car-
thaginem , & quum de alio consuleretur ,
pronuntiabat : Scipio Nasica servandam ,
ne , metu ablato æmulæ urbis , luxu-
riari felicitas inciperet. Medium senatus

elegit , ut urbs tantum loco moveretur. Nihil enim speciosius videbatur , quàm esse Carthaginem , quæ non timeretur. Igitur Manilio Censorinoque consulibus , populus Romanus aggressus Carthaginem , spe pacis injectâ , traditam a volentibus classem sub ipso ore urbis incendit. Tum evocatis principibus , si salvi esse vellent , ut migrarent finibus , imperatum. Quod pro rei atrocitate adeo movit iras , ut extrema mallent. Comploratum igitur publicè statim , & pari voce clamatum est , Ad arma : seditque sententia , quoquo modo rebellandum , non quia spes ulla jam superesset , sed quia patriam suam mallent hostium , quam suis , manibus everti. Qui rebellantium fuerit furor , vel hinc intelligi potest , quòd in usum novæ classis tecta domusque resciderunt ; in armorum officinis aurum & argentum pro ære ferroque conflatum est ; in tormentorum vincula matronæ crines suos contulerunt. Mancino deinde consule , terrâ marique fervebat obsidio. Operis portus nudatus ; & primus , & sequens , jam & tertius murus : quum tamen Byrsa , quod nomen arci fuit , quasi altera civitas resistebat. Quamvis profligato urbis excidio , tamen fatale Africæ nomen Scipionum videbatur. Igitur in alium Scipionem conversa

respublica, finem belli reposcebat. Hunc Paullo Macedonico procreatum Africani illius magni filius in decus gentis assumpserat, hoc scilicet fato, ut, quam urbem concusserat avus, nepos ejus everteret. Sed ut quàm maximè mortiferi esse morsus solent morientium bestiarum; sic plus negotii fuit cum semiruta Carthagine, quàm integrâ. Compulsis in unam arcem hostibus, portum quoque maris Romanus obsederat. Illi alterum ibi portum ab alia urbis parte foderunt: nec ut fugerent, sed quia nemo illos hâc evadere posse credebat. Inde quasi enata subitò classis erupit: quum interim jam diebus, jam noctibus, nova aliqua moles, nova machina, nova perditorum hominum manus, quasi ex obruto incendio subita de cineribus flamma, prodibat. Deploratis novissimè rebus, quadraginta se millia virorum dediderunt, quod minùs credas, duce Asdrubale. Quantò fortius femina, & uxor ducis? quæ comprehensis duobus liberis, a culmine se domûs in medium misit incendium, imitata reginam, quæ Carthaginem condidit. Quanta urbs deleta sit, ut de ceteris taceam, vel ignium morâ probari potest: quippe per continuos decem & septem dies vix potuit incendium exstingui, quod domibus ac

templis suis sponte hostes immiserant ;
ut , quatenus urbs eripi Romanis non poterat , triumphus arderet.



CAPUT XVI.

BELLUM ACHAICUM.

QUASI seculum illud eversionibus urbium curreret , ita Carthaginis ruinam statim Corinthus excepit , Achaiae caput , Graeciae decus , inter duo maria , Ionium & Aegaeum , quasi spectaculo exposita. Hæc (facinus indignum !) antè oppressa est , quàm in numerum certorum hostium referretur. Critolaus causa belli ; qui libertate a Romanis datâ adversus ipsos usus est ; legatosque Romanos , dubium an & manu , certè oratione violavit. Igitur Metello ordinanti quum maximè Macedoniam mandata est ultio : & hinc Achaicum bellum. Ac primam Critolai manum Metellus consul per patentes Elidis campos toto cecidit Alpheo. Et uno prælio peractum erat bellum : jam & urbem ipsam terrebat obsidio : sed (fata rerum !) quum Metellus dimicasset , ad victoriam Mummius venit. Hic alterius ducis Diæi latè exercitum sub ipsis Isthmi faucibus

fudit, geminosque portus sanguine infecit. Tandem ab incolis deserta civitas, direpta primùm, deinde, tubâ præcinnente, deleta est. Quid signorum, quid vestium, quidve tabularum raptum, incensum atque projectum est! Quantas opes & abstulerit & cremaverit, hinc scias, quòd quidquid Corinthii æris toto orbe laudatur, incendio superfuisse comperimus. Nam & æris notam pretiosiore ipsa opulentissimæ urbis fecit injuria; quia incendio permistis plurimis statuis atque simulacris, æris, auri, argentique venæ in commune fluxere.



CAPUT XVII.

RES IN HISPANIA GESTÆ.

UT Carthaginem Corinthus, ita Corinthum Numantia sequuta est. Nec deinde toto orbe quidquam intactum armis fuit. Post illa duo clarissima urbium incendia, latè atque passim, nec per vices, sed simul pariter quasi unum undique bellum fuit; prorsus ut illæ urbes, quasi agitantibus ventis, diffudisse quædam belli incendia toto orbe viderentur. Hispaniæ numquam animus fuit adversus nos uni-

versæ confurgere : numquam conferre vires suas libuit , neque aut imperium experiri , aut libertatem tueri suam publicè. Alioquin ita undique mari Pyrenæoque vallata est , ut ingenio sitûs ne adiri quidem potuerit. Sed antè a Romanis obsessa est , quam se ipsa cognosceret ; & sola omnium provinciarum vires suas , postquam victa est , intellexit. In hac propè ducentos per annos dimicatum est , a primis Scipionibus in Cæsarem Augustum , non continuè nec cohærenter , sed prout causæ lacesierant : nec cum Hispanis initio , sed cum Pœnis in Hispania : inde contagio & series causæque bellorum. Prima per Pyrenæum jugum signa Romana Publius & Cnæus Scipiones intulerunt , præliisque ingentibus Hannonem , & Asdrubalem fratrem Annibalis ceciderunt , raptaque erat impetu Hispania , nisi fortissimi viri in ipsa sua victoria oppressi Punicâ fraude cecidissent , terrâ marique victores. Igitur quasi novam integramque provinciam ultor patris & patruï Scipio ille , mox Africanus , invasit ; isque statim captâ Carthagine , & aliis urbibus , non contentus Pœnos expulisse , stipendiariam nobis provinciam fecit : omnem citra ultraque Iberum subjecit imperio : primusque Romanorum ducum victor ad

Gades & Oceani ora pervenit. Plus est provinciam retinere, quàm facere. Itaque per partes jam huc, jam illuc missi duces, qui ferocissimas, & ad id temporis liberas gentes, ideo impatientes jugi, multo labore, nec incruentis certaminibus servire docuerunt. Cato ille censorius Celtiberos, id est, robur Hispaniæ, aliquot præliis fregit. Gracchus, pater ille Gracchorum, eosdem centum & quinquaginta urbium eversione multavit. Metellus ille, qui ex Macedonia cognomen (meruerat & Celtibericus fieri) quum Contrebiæ memorabili cepisset exemplo & Nertobriges, majori gloriâ pepercit. Lucullus Turdulos atque Vaccæos; de quibus Scipio ille posterior, singulari certamine, quum rex fuisset provocator, opima retulerat. Decimus Brutus aliquantò latiùs Celticis Lusitanosque, & omnes Gallæciæ populos, formidatumque militibus flumen Oblivionis; peragratoque victor Oceani littore, non priùs signa convertit, quàm cadentem in maria solem, obrutumque aquis ignem, non sine quodam sacrilegii metu & horrore deprehendit. Sed tota certaminum moles cum Lusitanis fuit, & Numantinis; nec immeritò: quippe solis gentium Hispaniæ duces contigerunt. Fuiſſet & cum omnibus Cel-

tiberis , nisi dux illius motûs initio belli oppressus esset , summus vir astu & audaciâ , si res cessisset , Salondicus , qui hastam argenteam quatiens , velut cœlo missam , vaticinanti similis , omnium in se mentes converterat. Sed quum pari temeritate sub nocte castra consulis adiisset , juxta tentorium ipsum pilo vigilis exceptus est. Ceterum Lusitanos Viriathus erexit , vir calliditatis acerrimæ ; qui ex venatore latro , ex latrone subito dux atque imperator , & , si fortuna cessisset , Hispaniæ Romulus , non contentus libertatem suorum defendere , per quatuordecim annos omnia citra ultraque Iberum & Tagum igni ferroque populatus ; castra etiam prætorum & præsidum aggressus , Claudium Unimanum penè ad internecionem exercitûs cecidit , & insignia trabeis & fascibus nostris , quæ ceperat , in montibus suis tropæa fixit : tandem etiam Fabius Maximus consul oppresserat : sed a successore Pompilio violata victoria est : quippe qui conficiendæ rei cupidus , fractum ducem , & extrema deditionis agitantem , per fraudem , & insidias , & domesticos percussores aggressus , hanc hosti gloriam dedit , ut videretur aliter vinci non potuisse.

CAPUT XVIII.

BELLUM NUMANTINUM.

NUMANTIA, quantum Carthaginis, Capuæ, Corinthi, opibus inferior, ita virtutis nomine & honore par omnibus, summumque, si viros æstimes, Hispaniæ decus: quippe quæ sine muro, sine turribus, modicè edito in tumulo apud flumen Durium sita, quatuor millibus Celtiberorum quadraginta millium exercitum per annos quatuordecim sola sustinuit; nec sustinuit modò, sed sæviùs aliquantò perculit, pudendisq; fœderibus affecit. Novissimè quum invictam esse constaret, opus quoque eo fuit, qui Carthaginem everterat. Non temere, si fateri licet, ullius causa belli injustior. Segidenses, focios & consanguineos, Romanorum manibus elapsos exceperant. Habita pro eis deprecatio nihil valuit. Quum se ab omni bellorum contagione removerent, in legitimi fœderis pretium jussi arma deponere. Hoc sic a Barbaris acceptum, quasi manus abscinderentur. Itaque statim, Megarâ viro fortissimo duce, ad arma conversi, Pompeium prælio aggressi. Fœdus

tamen maluerunt, quum debellare potuissent. Hostilium deinde Mancinum. Hunc quoque assiduis cædibus ita subegerunt, ut ne oculos quidem aut vocem Numantini viri quisquam sustineret. Tamen cum hoc quoque fœdus maluere, contenti armorum manubiis, quum ad internecionem sævire potuissent. Sed non minùs Numantini, quàm Caudini illius fœderis flagrans ignominiâ ac pudore populus Romanus, dedecus quidem præsentis flagitii deditio-
ne Mancini expiavit; ceterùm duce Scipione, Carthaginis incendiis ad excidia urbium imbuto, tandem etiam in ultionem excanduit. Sed tunc acriùs in castris, quàm in campo, nostro cum milite, quàm cum Numantino, præliandum fuit. Quippe assiduis & injustis & servilibus maxime operibus attriti, ferre plenius vallum, qui arma nescirent; luto inquinari, qui sanguine nollent, jubebantur. Ad hoc scorta, calones, sarcinæ nisi ad usum necessariæ, amputantur. Tanti esse exercitum, quanti imperatorem, verè proditum est. Sic redactò in disciplinam milite, commissa acies; quodque nemo visurum se umquam speraverat, factum est, ut fugientes Numantinos quisquam videret. Dedere etiam sese volebant, si toleranda viris imperarentur. Sed quum Scipio ve-


ram vellet & sine exceptione victoriam ;
eò necessitatum compulsi , primùm , ut
destinatâ morte in prælium ruerent , quum
sefe priùs epulis , quasi inferiis , imple-
vissent , carnis semicrudæ , & celiæ : sic
vocant indigenam ex frumento potionem.
Intellectum ab imperatore consilium : ita-
que non est permissa pugna morituris.
Quum fossâ , atque loricâ , quatuorque
castris circumdatos fames premeret , ab
duce orantes prælium , ut tamquam viros
occideret , ubi non impetrabant , placuit
eruptio. Sic confertâ manu plurimi occisi :
& quum urgeret fames , aliquantisper inde
vixere. Novissimè consilium fugæ se-
dit : sed hoc quoque , ruptis equorum
cingulis , uxores ademere , summo scele-
re , per amorem. Itaque deplorato exitu ,
in ultimam rabiem furoremque conversi ,
postremò mori hoc genere destinârunt.
Duces suos , seque , patriamque , ferro
& veneno , subjectoque undique igne
peremerunt. Maeste fortissimam , & meo
judicio beatissimam in ipsis malis civita-
tem ! asseruit cum fide socios , populum
orbis terrarum viribus fultum suâ ma-
nu , ætate tam longâ sustinuit. Novissimè
maximo duce oppressa civitas , nullum
de se gaudium hosti reliquit. Unus enim
vir Numantinus non fuit , qui in catenis

duceretur. Præda , ut de pauperibus , nulla : arma ipsi cremaverant. Triumphus fuit tantum de nomine.

CAPUT XIX.

HA CTENUS populus Romanus pulcher , egregius , pius , sanctus , atque magnificus : reliqua seculi , ut grandia æquè , ita vel magis turbida & fœda , crescentibus cum ipsa magnitudine imperii vitiis : adeo ut si quis hanc tertiam ejus ætatem transmarinam , quam ducentorum annorum fecimus , dividat , centum hos priores , quibus Africam , Macedoniam , Siciliam , Hispaniam domuit , *aureos* (sicut poëtæ canunt) jure meritóque fateatur ; centum sequentes *ferreos* planè & cruentos , & si quid immanius : quippè qui Jugurthinis , Cimbricis , Mithridaticis , Parthicis bellis , Gallicis atque Germanicis , quibus cœlum ipsum gloria ascendit , Gracchanas , Drusianasque cædes , ad hoc Servilia bella miscuerunt ; & ne quid turpitudini desit , Gladiatoria. Denique in se ipse conversus Marianis , atque Sullanis , novissimè Pompeii , & Cæsaris manibus , quasi per rabiem , & furorem , & nefas , semet ipse laceravit. Quæ etsi juncta inter

se sunt omnia atque confusa, tamen quò meliùs appareant, simul & ne scelera virtutibus obstrepant, separatim proferentur; priùsque, ut cœpimus, iusta illa & pia cum exteris gentibus bella memorabimus, ut magnitudo crescentis in dies imperii appareat. Tum ad illa civium scelera, turpesque & impias pugnas revertemur.



CAPUT XX.

BELLUM ASIATICUM.

VICTA ad occasum Hispaniâ, populus Romanus ad Orientem pacem agebat; nec pacem modò, sed inusitatâ & incognitâ quadam felicitate, relictæ regis hereditatibus opes; & tota insimul regna veniebant. Attalus rex Pergamenorum, regis Eumenis filius, socii quondam commilitonisque nostri, testamentum reliquit: *Populus Romanus bonorum meorum heres esto.* In bonis regis hæc fuerant. Aditâ igitur hereditate, provinciam populus Romanus, non quidem bello, nec armis; sed quod est æquius, testamenti jure retinebat. Sed hanc, difficile dictu est, utrum faciliùs amiserit, an recuperaverit. Aristonicus regii sanguinis ferox juvenis,

urbes regibus parere consuetas partim facile sollicitat : paucas resistentes , Myndum , Samon , Colophonem , vi recepit. Crassi quoque prætoris cecidit exercitum , ipsumque cepit. Sed ille memor & familiæ , & Romani nominis , custodem suum Barbarum virgulâ excæcat : in exitium sui , quod volebat , ita concitat. Mox a Perperna domitus , & captus , & per deditiōnem in vinculis habitus. Aquilius Asiatici belli reliquias confecit , mixtis (nefas !) veneno fontibus ad deditiōnem quarundam urbium. Quæ res ut maturam , ita infamem fecit victoriā : quippe quum contra fas deūm , moresque majorum , medicaminibus impuris , in id tempus sacrosancta Romana arma violâset.





LIBER TERTIUS.

CAPUT I.


BELLUM JUGURTHINUM.

HÆC ad Orientem. Sed non ad Meridianam plagam eadem quies. Quis speraret post Carthaginem aliquod in Africa bellum ? Atqui non leviter se Numidia concussit ; & fuit in Jugurtha , quod post Annibalem timeretur. Quippe rex callidissimus populum Romanum , armis inclytum & invictum , opibus aggressus est ; & citra spem omnium fortuna cessit , ut rex fraude præcipuus , fraude caperetur. Hic , avo Masinissâ , & Micipsâ patre per adoptionem , quum interficere fratres statuisset , agitatus regni cupiditate , nec illos magis , quàm senatum populumque Romanum , quorum in fide & clientela regnum erat , metueret ; primum scelus mandat insidiis ; potitusque Hiempsalis capite , quum se in Adherbalem convertisset , isque Romam profugisset , missâ per legatos pecuniâ

pecuniâ , traxit in sententiam suam senatum. Et hæc fuit de nobis ejus prima victoriâ. Missos deinde , qui regnum inter illum Adherbalemque dividerent , similiter aggressus , quum in Scauro ipsos Romani imperii mores expugnâisset , inchoatum nefas perfecit audaciùs. Sed diu non latent scelera. Corruptæ nefas legationis erupit ; placuitque bello persequi parricidam. Primus in Numidiam Calpurnius Bestia consul immittitur : sed rex , peritus fortius adversùs Romanos aurum esse quàm ferrum , pacem emit. Cujus flagitii reus quum interveniente publicâ fide a senatu arcefferetur , pari audaciâ & venit , & competitorem imperii Masinissæ Massivam immisso percussore confecit. Hæc altera contra regem fuit causa bellandi. Igitur sequens ultio mandatur Albino. Sed hujus quoque (pro dedecus !) ita corripit exercitum , ut voluntariâ nostrorum fugâ vinceret Numida , castrisque potiretur : addito etiam turpi fœdere in pretium salutis , quem priùs emerat , exercitum dimisit. Eodem tempore in ultionem non tam imperii Romani , quàm pudoris , Metellus assurgit : qui callidissimè hostem nunc precibus , nunc minis , jam simulatâ , jam quasi verâ fugâ eludentem , artibus suis aggressus est. Agro-

rum atque vicorum populatione non contentus, in ipsa Numidiæ capita impetum fecit, & Zamam quidem frustra diu voluit; ceterum Thalam, gravem armis, thesauroque regis, diripuit. Tunc urbibus exutum regem, & jam finium suorum regnique fugitivum, per Mauros atque Getuliam sequebatur. Postremò Marius, auctis admodum copiis, quum pro obscuritate generis sui capite censos sacramento adegisset, jam fustum & faucium regem adortus, non faciliùs tamen vicit, quàm si integrum & recentem. Hic & urbem Herculi conditam Capsam in media Africa, anguibz arenisque vallatam, mirâ quâdam felicitate superavit; & saxeo inditam monti Mulucham urbem, per Ligurem, aditu arduo inaccessoque, penetravit. Mox non ipsum modò, sed Bocchum quoque Mauritaniae regem, jure sanguinis Numidam vindicantem, apud oppidum Cirtam graviter cecidit. Qui ubi, diffusus rebus suis, alienæ cladis accessio fieri timet, pretium foederis atque amicitiae regem facit. Sic fraudulentissimus regum fraude foci sui in insidias deductus est, & Sullæ in manum traditus; tandemque opertum catenis Jugurtham in triumpho populus Romanus aspexit. Sed ille quoque, quamvis victus,

& vinctus , vidit Urbem , quam venalem , & quandoque perituram , si habuisset emptorem , frustra cecinerat. Jam ut venalis fuisset , habuit emptorem : & quum ille non evaserit , certum erit , eam non esse perituram.




CAPUT II.

BELLUM ALLOBROGICUM.

SIC ad meridiem populus Romanus. Multò atrocius , & multipliciter magis , ut a Septemtrione , sævitum. Nihil hac plagâ infestius. Atrox cœlum , perinde ingenia. Omni igitur tractu violentus hostis , a dextris atque lævis , & medio Septemtrionis , erupit. Prima trans Alpes arma nostra sensere Salyi , quum de incursionibus eorum fidissima atque amicissima civitas Massilia quereretur. Allobroges deinde , & Arverni , quum adversus eos similes Æduorum querelæ opem & auxilium nostrum flagitarent : Varusque victoriæ testis , Isaraque , & Vindelicus amnes , & impiger fluminum Rhodanus. Maximus barbaris terror elephanti fuere , immanitati gentium pares. Nil tam conspicuum in triumpho , quàm rex ipse Bi-

tuitus, discoloribus in armis, argenteoque carpento, qualis pugnaverat. Utriusque victoriæ quod quantumque gaudium fuerit, vel hinc existimari potest, quod & Domitius Ænobarbus, & Fabius Maximus, ipsis quibus dimicaverant in locis, faxeas erexere turres, & desuper exornata armis hostilibus tropæa fixere, quum hic mos inusitatus fuerit nostris. Numquam enim populus Romanus hostibus domitis victoriam suam exprobravit.



CAPUT III.

BELLUM CIMBRICUM, THEUTONICUM, AC TIGURINUM.

CIMBRI, Theutoni, atque Tigurini, ab extremis Galliæ profugi, quum terras eorum inundasset Oceanus, novas sedes toto orbe quærebant; exclusique Galliâ & Hispaniâ, quum in Italiam remigrarent, misere legatos in castra Silani, inde ad senatum, petentes, ut Martius populus aliquid sibi terræ daret quasi stipendium: ceterum, ut vellet, manibus atque armis suis uteretur. Sed quas daret terras populus Romanus, agrariis legibus intra se dimicaturus? Repulsi igitur,

quod nequiverant precibus, armis petere constituunt. Sed nec primum quidem impetum barbarorum Silanus, nec secundum Manlius, nec tertium Cæpio sustinere potuerunt. Omnes fugati, exuti castris. Actum erat, nisi Marius illi seculo contigisset. Ille quoque non ausus congregi statim, militem tenuit in castris, donec invicta illa rabies & impetus, quem pro virtute barbari habent, confesceret. Recessere igitur increpantes, & (tanta erat capiendæ Urbis fiducia) consulentes, si quid ad uxores suas mandarent. Nec segnius, quàm minati fuerant, tripartito agmine per Alpes, id est claustra Italiæ, ferebantur. Marius, mirâ statim velocitate occupatis compendiis, prævenit hostem; prioresque Theutonos sub ipsis Alpium radicibus assequutus, in loco, quem Aquas Sextias vocant, quo (fidem numinum!) prælio oppressit? Vallem fluviumque medium hostes tenebant. Nostri aquarum nulla copia. Consultione id egerit imperator, an errorem in consilium verterit, dubium. Certè necessitate aucta virtus causa victoriæ fuit. Nam flagitante aquam exercitu: *Viri, inquit, estis, en illic habetis.* Itaque tanto ardore pugnatum est, eaque cædes hostium fuit, ut victor Romanus de cruento flumine

non plus aquæ biberit , quàm sanguinis barbarorum. Certè rex ipse Theutobochus , quaternos senosque equos transilire solitus , vix unum , quum fugeret , ascendit ; proximoque in saltu comprehensus , insigne spectaculum triumphi fuit : quippe vir proceritatis eximiæ super tro-pæa ipsa eminebat. Sublatis funditus Theutonibus , in Cimbros convertitur. Hi jam (quis crederet ?) per hyemem , quæ altius Alpes levat , Tridentinis jugis in Italiam provoluti ruinâ descenderant. Athesim flumen non ponte , nec navibus , sed quâdam stoliditate barbaricâ primùm corporibus aggressi , postquam retinere amnem manibus & clipeis frustra tentaverant , ingestâ obrutum sylvâ transiluere ; & , si statim infesto agmine Urbem petiissent , grande discrimen esset : sed in Venetia , quo fere tractu Italia mollissima est , ipsâ soli cœlique clementiâ robur elanguit. Adhoc panis usu , carnisque coctæ , & dulcedine vini mitigatos Marius in tempore aggressus est. Jam diem pug-næ a nostro imperatore petierunt , & sic proximum dedit. In patentissimo , quem Raudium vocant , campo procurrere. Millia inde ad sexaginta ceciderunt ; hinc trecentis minùs : per omnem diem conciditur barbarus. Istic quoque imperator

addiderat virtuti dolum, sequutus Annibalem, artemque Cannarum: primum, nebulosum nactus diem, ut hosti inopinatus occurreret; tum ventosum quoque, ut pulvis in oculos & ora ferretur; tum acie conversâ in Orientem, ut, quod ex captivis mox cognitum est, ex splendore galearum, ac percussu, quasi ardere cœlum videretur. Nec minor cum uxoribus eorum pugna, quàm cum ipsis fuit; quum objectis undique plaustris atque carpentis, altæ desuper quasi e turribus, lanceis contisque pugnarent. Perinde speciosa mors earum fuit, quàm pugna. Nam quum missâ ad Marium legatione, libertatem ac sacerdotium non impetrâssent (nec fas erat) suffocatis elisisque passim infantibus suis, aut mutuis concidere vulneribus, aut vinculo e crinibus suis facto, ab arboribus jugisque plaustrorum pependerunt. Boiorix rex in acie dimicans impigre nec inultus occubuit. Tertia Tigurinorum manus, quæ quasi subsidio Noricos infederat Alpium tumulos, in diversa lapsi, fugâ ignobili & latrociniis evanuit. Hunc tam lætum, tamque felicem liberatæ Italiæ assertique imperii nuntium non per homines, ut solebat, populus Romanus accepit, sed per ipsos, si credere fas est, deos. Quippe

eodem die , quo gesta res est , visi pro æde Castoris & Pollucis juvenes laureati prætori litteras tradere ; frequensque in spectaculo rumor , *Victoriæ Cimbricæ feliciter* , dixit. Quò quid admirabilius , quid insignius fieri potest ? Quippe velut elata montibus suis Roma spectaculo belli interesset , quod in gladiatorio munere fieri solet , uno eodemque momento , quum in acie Cimbri occumberent , populus in urbe plaudebat.



CAPUT IV.

BELLUM THRACIUM.

POST Macedonas , si diis placet , Thracæ rebellabant , ipsi quondam tributarii Macedonum ; nec in proximas modò provincias contenti incurrere , Thessaliam , atque Dalmatiam ; in Adriaticum mare usque venerunt : eoque fine contenti , quasi interveniente naturâ , contorta in ipsas aquas tela miserunt. Nihil interim per id omne tempus residuum crudelitatis fuit in captivos sævientibus : litare diis sanguine humano : bibere in ossibus capitum , & cujusquemodi ludibrio fœdare mortem tam igni quàm fumo : par-

tus quoque gravidarum extorquere tormentis. Sævissimi omnium Thracum Scordisci fuere : sed calliditas quoque ad robur accesserat. Sylvarum & montium situs cum ingenio consentiebant. Itaque non fusus modò ab his , aut fugatus , sed (simile prodigio !) omnino totus interceptus exercitus , quem duxerat Cato. Didius vagos , & liberâ populatione diffusos intra suam repulit Thraciam. Drusus ulteriùs egit , & vetuit transire Danubium. Minucius toto vastavit Hebro , multis quidem amissis , dum per perfidum glacie flumen equitatur. Piso Rhodopen Caucasumque penetravit. Curio Daciâ tenus venit : sed tenebras saltuum expavit. Appius in Sarmatas usque pervenit ; Lucullus ad terminum gentium Tanaïn , lacumque Mæotin. Nec aliter cruentissimi hostium quàm suis moribus domiti ; quippe in captivos igne ferroque sævitum est. Sed nihil barbaris atrocius visum est , quàm quòd abscissis manibus relictì , vivere superstites pœnæ suæ jubebantur.



CAPUT V.

BELLUM MITHRIDATICUM.

PONTICÆ gentes ad Septemtrionem in mare sinistrum jacent, a Pontico cognominatæ mari. Harum gentium atque regionum rex antiquissimus Ætas : pòst Artabazes, a septem Persis oriundus : inde Mithridates omnium longè maximus ; quippe quum quatuor Pyrrho, decem & septem anni Annibali suffecerint, ille per quadraginta annos restitit, donec tribus ingentibus bellis subactus, felicitate Sullæ, virtute Luculli, magnitudine Pompeii consumeretur. Causam quidem illius belli prætenderat apud Cassium legatum, attrectari terminos suos a Nicomede Bithynico : ceterum elatus animis ingentibus, Asiæ totius, &, si posset, Europæ cupiditate flagrabat. Spem ac fiduciam dabant nostra vitia. Quippe quum civilibus bellis disjungeremur, invitabat occasio ; nudumque imperii latus ostendebant procul Marius, Sulla, Sertorius. Inter hæc reipublicæ vulnera, & hos tumultus, repente, quasi captato tempore, in lassos simul atque districtos subitus


turbo Pontici belli ab ultima veluti specula Septemtrionis erupit. Primus statim impetus belli Bythyniam rapuit. Asia deinde pari terrore correpta est. Nec cunctanter ad regem ab urbibus nostris populisque descitum est. Aderat, instabat, sævitiâ quasi virtute utebatur. Nam quid atrocius uno ejus edicto, quum omnes, qui in Asia forent, Romanæ civitatis homines interfici jussit? Tum quidem domus, templa, & aræ, humana omnia atque divina jura violata sunt. Sed hic terror Asiæ Europam quoque regi aperiebat. Itaque missis Archelao Neoptolemoque præfectis, exceptâ Rhodo, quæ pro nobis stetit, ceterum Cyclades, Delos, Eubœa, & ipsum Græciæ decus, Athenæ, tenebantur. Italiam jam, ipsamque urbem Romam regius terror afflabat. Itaque Lucius Sulla festinat, vir armis optimus; parique violentiâ ruentem ulterius hostem quâdam quasi manu repulit; primumque Athenas urbem (quis crederet?) frugum parentem, obsidione ac fame ad humanos cibos compulit. Mox subruto Piræei portu, sex quoque & amplius muris, postquam domuerat ingrattissimos, ut ipse dixit, hominum, in honorem tamen mortuorum, sacris suis famæque donavit. Mox quum Eubœâ atque

Bœotiâ præsidia regis depulisset, omnes copias uno apud Chæroneam, apud Orchomenon altero, bello dissipavit; statimque in Asiam transgressus, ipsum opprimit. Et debellatum foret, nisi de Mithridate triumphare citò, quàm verè maluisset. Ac tunc quidem hunc Asiæ statum Sulla dederat. Idem cum Ponticis fœdus. Recepit Bithyniam a rege Nicomede, ab Ariobarzane Cappadociam; ac sic erat Asia rursus nostra, ut cœperat; Mithridates tantum repulsus. Itaque non fregit ea res Ponticos, sed incendit. Quippe rex Asiâ & Europâ quodammodo inescatus, non jam quasi alienam, sed, quia amiserat, quasi raptam belli jure repetebat. Igitur ut extincta parum fideliter incendia majore flammâ reviviscunt; ita ille de integro, auctis majorem in modum copiis, totâ denique regni sui mole, in Asiam rursus mari, terrâ, fluminibusque veniebat. Cyzicum nobilis civitas, arce, mœnibus, portu, turribusque marmoreis, Asiaticæ plagæ littora illustrat. Hanc ille quasi alteram Romam toto invaserat bello: sed fiduciam oppidanis resistendi nuntius fecit, docens adventare Lucillum; qui [horribile dictu!] per medias hostium naves utre suspensus, & pedibus iter adguberet.

nans, videntibus procul quasi marina pistrinx evaserat. Mox clade conversâ, quum ex mora obsidentem regem fames, & ex fame pestilentia urgeret, recedentem Lucullus assequitur, adeoque cecidit, ut Granicus & Æsopus amnes cruenti redderentur. Rex callidus, Romanæque avaritiæ peritus, spargi a fugientibus farcinas & pecuniam jussit, quâ sequentes moraretur. Nec felicius in mari, quàm in terra, fuga. Quippe centum amplius navium classem, apparatuque belli gravem, in Pontico mari aggressa tempestas, tam foedâ strage laceravit, ut navalis belli instar efficeret; planè quasi Lucullus, quodam cum fluctibus procellisque commercio, debellandum tradidisse regem ventis videretur. Attritæ jam omnes validissimi regni vires erant; sed animus malis augebatur. Itaque conversus ad proximas gentes, totum pene Orientem ac Septemtrionem ruinâ suâ involvit. Iberi, Caspii, Albani, & utræque sollicitabantur Armeniæ; perque omnia & decus, & nomen, & titulos Pompeio suo fortuna quærebat. Qui ubi novis motibus ardere Asiam videt, aliosque ex aliis prodire reges; nihil cunctandum ratus, priusquam inter se gentium robora coirent, statim ponte

navibus facto, omnium ante se primus transit Euphratem; regemque fugientem mediâ nactus Armeniâ [quanta felicitas viri!] uno prælio confecit. Nocturna ea dimicatio fuit, & luna in partibus: quippe quasi commilitans, quum a tergo se hostibus, a facie Romanis, præbuisset, Pontici per errorem longiùs cadentes umbras suas quasi hostium corpora petebant. Et Mithridates quidem nocte illâ debellatus est: nihil enim postea valuit, quamquam omnia expertus, more anguium, qui, obtrito capite, postremum caudâ minantur. Quippe quum effugisset hostem, per Colchos, Scythiæ quoque littora, & claustra nostra subito adventu terrere voluit: Colchis tenus jungere Bosporon; inde per Thraciam, Macedoniam, & Græciam transilire; sic Italiam nec opinatus invadere tantum cogitavit. Nam per defectionem civium, Pharnacisque filii scelere præventus, malè tentatum veneno spiritum ferro expulit. Cnæus interim Magnus rebelles Asiæ reliquias sequens, per diversa gentium terrarumque volitabat. Nam sub Orientem sequutus Armenios, captis ipso capite gentis Artaxatis, supplicem jussit regnare Tigranem. At in Septemtrionem Scythicum iter, tamquam in mari, stellis secutus, Colchos

cecîdit : ignovit Iberiæ : pepercit Albanis : regemque horum Orodem , positis sub ipso Caucaſo caſtris , jussit in plana descendere : Arthocen , qui Iberis imperabat , & obsides liberos dare. Orodem etiam remuneratus est , ultro ab Albania sua lectulum aureum , & alia dona mittentem. Nec non & in meridiem verso agmine , Libanum Syriæ Damascumque transgressus , per nemora illa odorata , per thuris & balsami sylvas Romana circumtulit signa. Arabes , si quid imperaret , præstò fuere. Hierosolymam defendere tentavere Judæi : verùm hanc quoque intravit ; & vidit illud grande impiæ gentis arcanum patens , sub aureo utique velo : dissidentibusque de regno fratribus arbiter factus , regnare jussit Hyrcanum : Aristobulo , quia renovabat eam rem , catenas dedit. Sic Pompeio duce populus Romanus totam , quâ latissima est , Asiam pervagatus , quam extremam habebat imperii provinciam , mediam fecit. Exceptis quippe Parthis , qui fœdus maluerunt , & Indis , qui adhuc nos non noverant ; omnis Asia inter Rubrum mare , & Caspium , & Oceanum , Pompeianis domita vel oppressa signis , tenebatur.



CAPUT VI.


BELLUM PIRATICUM.

INTERIM dum populus Romanus per diversa terrarum distractus est, Cilices invaferant maria; sublatisque commerciiis, rupto fœdere generis humani, sic maria bello, quasi tempestate, præcluserant. Audaciam perditis furiosisque latronibus dabat inquieta Mithridaticis præliis Asia; dum sub alieni belli tumultu, exterique regis invidia, impunè grassantur. Ac primum duce Isidoro non contenti proximo mari, Cretam inter atque Cyrenas, & Achaiam, sinumque Maleum, quod a spoliis *Aureum* ipsi vocavere, latrocinebantur: missusque in eos Publius Servilius, quamvis leves & fugaces myoparonas gravi & Martiâ classe turbaret, non incruentâ victoriâ superat. Sed nec mari submovisse contentus, validissimas urbes eorum, & diutinâ prædâ abundantes, Phaselin & Olympon evertit, Isauronque ipsam arcem Ciliciæ; unde confcius sibi magni laboris, *Isaurici* cognomen adamavit. Non ideo tamen tot claudibus domiti, terrâ se continere potue-

runt : sed ut quædam animalia , quibus
 aquam terramque colendi gemina natura
 est , sub ipso hostis recessu impatientes
 soli , in aquas suas resiluerunt ; & ali-
 quantò latius , quàm prius. Sic ille antè
 felix Pompeius , nunc quoque dignus vic-
 toriâ visus est ; & pirata Mithridaticæ
 provinciæ factus accessio. Ille dispersam
 toto mari pestem semel & in perpetuum
 volens extinguere , divino quodam appa-
 ratu aggressus est. Quippe quum classibus
 suis , & socialibus Rhodiorum abundaret ,
 pluribus legatis atque præfectis utraque
 Ponti & Oceani ora complexus est. Gel-
 lius Tusco mari impositus , Plotius Siculo.
 Gratilius Ligusticum sinum , Pompeius
 Gallicum obsedit , Torquatus Balearicum ,
 Tiberius Nero Gaditanum fretum , quâ
 primum maris nostri limen aperitur : Len-
 tulus Libycum ; Marcellinus Ægyptium ;
 Pompeii juvenes Adriaticum ; Varro Te-
 rentius Ægæum & Ponticum ; Pamphy-
 lium Metellus ; Asiaticum Cæpio : ipsas
 Propontidis fauces Porcius Cato sic ob-
 ditis navibus quasi portam obseravit. Sic
 per omnes æquoris portus , sinus , late-
 bras , recessus , promontoria , freta , pe-
 ninsulas , quidquid piratarum fuit , quâ-
 dam indagine inclusum & oppressum est.
 Ipse Pompeius in originem fontemque

belli Ciliciam versus est : nec hostes detrectavere certamen , non ex fiducia , sed quia oppressi erant , ausi videbantur : sed nihil tamen amplius , quàm ut ad primum ictum concurrerent. Mox ubi circumfusa undique rostra viderunt , abjectis statim telis remisque , plausu undique pari , quod supplicantium signum fuit , vitam petiverunt. Non aliàs tam incruentâ victoriâ usi umquam sumus : sed nec fidelior in posterum reperta gens ulla est. Idque prospectum singulari consilio ducis , qui maritimum genus a conspectu longè removit maris , & mediterraneis agris quasi obligavit : eodemque tempore & usum maris navibus recuperavit , & terræ homines suos reddidit. Quid priùs in hac mirere victoria ? velocitatem , quòd quadragesimo die parta est ? an felicitatem , quòd ne una quidem navis amissa est ? an verò perpetuitatem , quòd amplius piratæ non fuerunt ?






CAPUT VII.

BELLUM CRETICUM.

CRETICUM bellum, si vera volumus noscere, nos fecimus solâ vincendi nobilem insulam cupiditate. Favisse Mithridati videbatur. Hoc placuit armis vindicare. Primus invasit insulam Marcus Antonius, cum ingenti quidem victoriæ spe atque fiducia, adeo, ut plures catenas in navibus, quàm arma, portaret. Dedit itaque pœnas vecordiæ. Nam plerasque naves intercepere hostes; captivæque corpora religata velis ac funibus pependere: ac sic velificantes triumphantium in modum Creteportubus suis adremigaverunt. Metellus deinde totam insulam igni ferroque populatus, intra castella & urbes redegit, & Cnossum, & Erythræam, &, ut Græci dicere solent, *urbium matrem* Cydonæam: adeoque sævè in captivos consulebatur, ut veneno se plerique conficerent, alii deditionem suam ad Pompeium absentem mitterent. Et quum ille res in Asia gerens, eò quoque præfectum misisset Antonium, in aliena provincia incluy-

tus fuit : eoque infestior Metellus in hostes jus victoris exercuit ; victisque Lathene & Panare , Cydoneæ ducibus , victor rediit. Nec quidquam amplius tamen de tam famosa victoria , quàm cognomen *Creticum* , reportavit.



CAPUT VIII.

BELLUM BALEARICUM.


QUATENUS Metelli Macedonici domus bellicis nominibus assueverat , altero ex liberis ejus *Cretico* facto , mora non fuit , quin alter quoque *Balearicus* vocaretur. Baleares per idem tempus insulæ piraticâ rabie corruperant maria. Homines feros atque sylvestres mireris ausos a scopulis suis saltem maria prospicere. Ascendere etiam inconditas rates , & prænavigantes subinde inopinato impetu terruere. Sed quum venientem ab alto Romanam classem prospexissent , prædam putantes , ausi etiam occurrere ; & primo impetu , ingenti lapidum saxorumque nimbo classem operuerunt. Tribus quisque fundis præliatur. Certos esse quia miretur ictus , quum hæc sola genti arma sint , id unum ab infantia studium ? Ci-

bum puer a matre non accipit, nisi quem ipsa monstrante percussit. Sed non diu lapidatione terruere Romanos. Postquam cominus ventum est, expertique rostra, & pila venientia, pecudum in morem clamore sublato, petierunt fugâ littora. Dilapsi in proximos tumulos, quærendi fuerunt, ut vincerentur.

CAPUT IX.

EXPEDITIO IN CYPRON.

ADERAT fatum insularum. Igitur & Cypros recepta sine bello. Insulam veteribus divitiis abundantem, & adhuc Veneri sacram, Ptolomæus regebat. Sed divitiarum tanta erat fama, nec falsò, ut victor gentium populus, & donare regna consuetus, Publio Clodio Tribuno duce, focii vivique regis confiscationem mandaverit. Et ille quidem ad rei famam veneno fata præcepit. Ceterum Porcius Cato Cyprias opes liburnis per Tiberinum ostium invexit: quæ res latius ærarium populi Romani, quàm ullus triumphus, implevit.



CAPUT X.

BELLUM GALLICUM.

ASIA Pompeii manibus subacta : reliqua , quæ restabant in Europa , fortuna in Cæsarem transtulit. Restabant autem immanissimi gentium Galli , atque Germani : & quamvis toto orbe divisa , tamen qui vinceret , habuit Britannia. Primus Galliae motus ab Helvetiis cœpit ; qui Rhodanum inter & Rhenum siti , non sufficientibus terris , venere sedes petiturum , incensis mœnibus suis. Hoc sacramentum fuit , ne redirent. Sed petito tempore ad deliberandum , quum inter moras Cæsar , Rhodani ponte rescisso , abstulisset fugam ; statim bellicosissimam gentem sic in sedes suas , quasi greges in stabula pastor , deduxit. Sequens longè cruentior pugna Belgarum , quippe pro libertate pugnantium. Hic quum multa Romanorum militum insignia , tum illud egregium ipsius ducis , quòd , nutante in fugam exercitu , rapto fugientis e manu scuto , in primam volitans aciem , manu prœlium restituit. Inde cum Venetis etiam navale bellum : sed major cum Oceano ,

quàm cum ipsis navibus rixa : quippe illæ rudes & informes & statim naufragæ, quum rostra sensissent ; sed hærebat in vadis pugna , quum æstibus solitis cum ipso certamine subductus Oceanus intercedere bello videretur. Illæ quoque accessere diversitates pro gentium locorumque natura. Aquitani , callidum genus , in speluncas se recipiebant : jussit includi. Morini dilabebantur in sylvas : jussit incendi. Nemo tantum feroces dixerit Gallos : fraudibus agunt. Inducio-marus Treviros , Ambiorix convocavit Eburones. Utrique , absente Cæsare conjunctione factâ, invenere legatos. Sed ille fortiter a Dolabella summotus est , relatumque regis caput : hic , insidiis in valle dispositis , dolo perculit. Itaque & castra direpta sunt , & aurum ablatum. Cottam cum Titurio Sabino legatos ibi amisimus. Nec ulla de rege mox ultio ; quippe perpetuâ trans Rhenum fugâ latuit. Nec Rhenus ergo immunis , nec enim fas erat , ut liber esset receptator hostium atque defensor. Sed prima contra Germanos illius pugna , justissimis quidem ex causis. Ædui enim de incursionibus eorum querebantur. Quæ Ariovisti superbia ? Quum legati dicerent , *Veni ad Cæsarem. Quis est autem Cæsar ? & , Si vult , veniat ,*

inquit, & *Quid ad illum, quid agat nostra Germania? num ego me interpono Romanis?* Itaque tantus gentis novæ terror in castris, ut testamenta passim etiam in principiis scriberentur. Sed illa immania corpora, quò erant majora, eò magis gladiis ferroque patuerunt. Qui calor in præliando militum fuerit, nullo magis exprimi potest, quàm quòd, elatis super caput scutis quum se testudine barbarus tegeret, super ipsa Romani scuta salierunt; & inde in jugulos gladiis descenderant. Iterum de Germano Tencteri querebantur. Hic verò jam Cæsar ultro Mosulam navali ponte transgreditur, ipsumque Rhenum; & Hercyniis hostem quærit in sylvis: sed in saltus & paludes genus omne diffugerat. Tantum pavoris incussit intra ripam subito Romana vis. Nec semel Rhenus, sed iterum quoque, & quidem ponte factò, penetratus est. Sed major aliquantò trepidatio: quippe quum Rhenum suum sic ponte, quasi jugo captum viderent, fuga rursus in sylvas ac paludes; &, quod acerbissimum Cæsari fuit, non fuere qui vincerentur. Omnibus terrâ marique captis, respexit Oceanum; & quasi hic Romanus orbis non sufficeret, alterum cogitavit. Classe igitur comparatâ Britanniam petit. Transit mirâ celeritate;

celeritate ; quippe qui tertiâ vigiliâ Morino solvisset a portu, minus quàm medio die insulam ingressus est. Plena erant tumultu hostico littora, & trepidantia ad conspectum rei novæ carpenta volitabant. Itaque trepidatio pro victoria fuit. Arma, & obsides accepit a trepidis, & ulterius iisset, nisi improbam classē naufragio castigasset Oceanus. Reversus igitur in Galliam, classe majore, auctisque copiis, in eundem rursus Oceanum, eosdemque rursus Britannos, Calidonas sequutus in sylvas, unum quoque e regibus Cavelianis in vincula dedit. Contentus his (non enim provinciæ, sed nomini studebatur) cum majore, quàm prius, prædâ revectus est ; ipso quoque Oceano tranquillo magis, & propitio, quasi imparem se fateretur. Sed maxima omnium eademque novissima conjuratio fuit Galliarum, quum omnes pariter Arvernos atque Biturigas, Carnutas simul Sequanosque contraxit ille corpore, armis spirituque terribilis, nomine etiam quasi terrore composito, Vercingentorix. Ille festis diebus, & conciliabulis, quum frequentissimos in lucis haberet, ferocibus dictis ad jus pristinum libertatis erexit. Aberat tunc Cæsar, Ravennæ delectum agens : & hyeme creverant Alpes : sic interclusum putabant

iter. Sed ille qualis erat ad nuntium (rem felicissimæ temeritatis !) per invios ad id tempus montium tumulos , per intactas vias & nives , expeditâ manu emer- sus occupat Galliam , & ex distantibus hybernis castra contraxit ; & antè in média Gallia fuit , quàm ab ultima timeretur. Tum ipsa capita belli aggressus , urbes ; Avaricum cum quadraginta millibus propugnantium sustulit : Alexiam ducentorum quinquaginta millium juventute subnixam flammis adæquavit. Circa Gergoviam Arvernorum tota belli moles fuit : quippe quum octoginta millia muro , & arce , & abruptis defenderent , maximam civitatem vallo , sudibus , & fossâ , inductoque fossæ flumine , ad hoc decem & octo castellis , ingentique loricâ circumdatam , primùm fame domuit ; mox audentem eruptiones , in vallo gladiis sudibusque concidit : novissimè in deditionem redegit. Ipse ille rex , maximum victoriæ decus , supplex quum in castra venisset , tum & phaleras & sua arma ante Cæsaris genua projecit : *Habes , inquit. Fortem virum , vir fortissime , vicisti.*

CAPUT XI.

BELLUM PARTHICUM.

DUM Gallos per Cæsarem in Septemtrione debellat, interim ad Orientem grave vulnus a Parthis populus Romanus accepit. Nec de fortuna queri possumus: caret solatio clades. Adversis & diis & hominibus, cupiditas consulis Crassi, dum Parthico inhiat auro, undecim strage legionum, & ipsius capite multata est. Et tribunus plebis Metellus exeuntem ducem hostilibus diris devoverat: & quum Zeugma transisset exercitus, rapta subitis signa turbinibus hausit Euphrates: & quum apud Nicephorium castra posuisset, missi ab Orode rege legati denuntiavere, percussorum cum Pompeio foederum Sullaque meminisset. Regis inhians ille thesauris, nihil, ne imaginario quidem jure, sed Seleuciæ se responsurum esse respondit. Itaque dii foederum ultores, nec insidiis, nec virtuti hostium defuerunt. Jam primùm, qui solus & subvehere commeatus, & munire poterat a tergo, relictus Euphrates. Tum simulato transfugæ cuidam Mazaræ Syro

creditur , dum in mediam camporum vastitatem eodem duce ductus exercitus , ut undique hosti exponeretur. Itaque vixdum venerat Carras , quum undique præfecti regis , Sillaces & Surenas , ostendere signa auro sericeisque vexillis vibrantia. Tum sine mora circumfusi undique equitatus , in modum grandinis atque nimborum densa pariter tela fuderunt. Sic miserabili strage deletus exercitus. Ipse in colloquium sollicitatus , signo dato , vivus in hostium manus incidisset , nisi , tribunis reluctantibus , fugam ducis barbari ferro occupassent. Sic quoque relatum caput ludibrio hosti fuit. Filium ducis pene in conspectu patris eisdem telis operuere. Reliquiæ infelicitis exercitûs , quò quemque rapuit fuga , in Armeniam , Cili-
ciam , Syriamque distractæ , vix nuntium cladis retulerunt. Caput ejus recisum cum dextera manu ad regem deportatum ludibrio fuit , nec indigno. Aurum enim liquidum in rictum oris infusum est ; ut ,
cujus animus arserat auri cupiditate , ejus etiam mortuum & exsangue corpus auro ureretur.



CAPUT XII.

ANACEPHALÆOSIS.

HÆC est illa tertia ætas populi Romani transmarina, quâ, Italiâ progredi ausus, orbe toto arma circumtulit. Cujus ætatis superiores centum anni sancti, pii, &, ut diximus, aurei, sine flagitio, sine scelere, dum sincera adhuc & innoxia pastoris illius sectæ integritas, dumque Pœnorum hostium imminens metus disciplinam veterem continebat. Postremi centum, quos a Carthaginis, Corinthi, Numantiæque excidiis, & Attali regis Asiaticâ hereditate deduximus in Cæsarem & Pompeium, sequutumque hos, de quo dicemus, Augustum, ut claritate rerum bellicarum magnifici, ita domesticis cladibus miseri & erubescendi. Quippe sicut Galliam, Thraciam, Ciliciam, Capadociam, uberrimas validissimasque provincias, Armenios etiam, & Britannos, ut non in usum, ita ad imperii speciem magna nomina acquisiisse, pulchrum atque decorum; ita eodem tempore dimicasse domi cum civibus, sociis, mancipiis, gladiatoribus, totoque inter se se-

natu, turpe atque miserandum. Ac nescio an satius fuerit populo Romano, Siciliâ & Africâ contento fuisse, aut his etiam ipsis carere, dominanti in Italia sua, quàm eò magnitudinis crescere, ut viribus suis conficeretur. Quæ enim res alia furores civiles peperit, quàm nimia felicitas? Syria prima nos victa corripit: mox Asiatica Pergameni regis hereditas. Illæ opes atque divitiæ affligere seculi mores; mersamque vitiis suis, quasi sentinâ, rempublicam pessum dedere. Unde enim populus Romanus a tribunis agros & cibaria flagitaret, nisi per famem, quam luxus fecerat? Hinc ergo Gracchana & prima & secunda, & illa tertia Apuleiana seditio. Unde regnaret judiciariis legibus divulsus a senatu eques, nisi ex avaritia, ut vectigalia reipublicæ, atque ipsa judicia in quæstu haberentur? Hinc rursus & promissa civitas Latio, & per hoc arma sociorum. Quid autem bella servilia? unde nobis, nisi ex abundantia familiarum? Unde gladiatorii adversus dominos suos exercitus, nisi ad conciliandum plebis favorem effusa largitio, quum spectaculis indulget, supplicia quondam hostium artem facit? Jam ut speciosiora vitia tangamus, nonne ambitus honorum ab iisdem divitiis incita-


tus ? Atqui inde Mariana , inde Sullana tempestas. Aut magnificus apparatus conviviorum , & sumptuosa largitio , nonne ab opulentia paritura mox egestatem ? Hæc Catilinam patriæ suæ impegit. Denique illa ipsa principatûs & dominandi cupido , unde , nisi ex nimis opibus , venit ? Atqui hæc Cæsarem , atque Pompeium , furialibus in exitium reipublicæ facibus armavit. Hos igitur populi Romani omnes domesticos motus , separatos ab externis justisque bellis , ex ordine prosequemur.

CAPUT XIII.

CAUSA SEDITIONUM TRIBUNITIA POTESTAS.

SEDITIONUM omnium causas Tribunitia potestas excitavit : quæ specie quidem plebis tuendæ , cujus in auxilium comparata est , re autem dominationem sibi acquirens , studium populi ac favorem agrariis , frumentariis , judiciariis legibus aucupabatur. Inerat omnibus species æquitatis. Quid enim tam justum , quàm recipere plebem rus suis possessum a patribus ? ne populus gentium victor ,

orbisque possessor, extorris agris ac focis ageret. Quid tam æquum, quàm inopem populum vivere ex ærario suo? Quid ad jus libertatis æquandæ magis efficacax, quàm ut, senatu regente provincias, ordinis equestris auctoritas saltem judiciorum regno niteretur? Sed hæc ipsa in perniciem redibant; & misera respublica in exitium suum sui merces erat. Nam & a senatu in equitem translata judiciorum potestas vectigalia, id est, imperii patrimonium, supprimebat; & emptio frumenti, ipsos reipublicæ nervos, exhauriebat ærarium. Reduci plebs in agros unde poterat sine possidentium eversione, qui ipsi pars populi erant? & tamen relictas sibi a majoribus sedes ætate, quasi jure hereditario, possidebant.




CAPUT XIV.

SEDITION TIBERII GRACCHI.

PPRIMAM certaminum facem Tiberius Gracchus accendit, genere, formâ, eloquentiâ facilè princeps. Sed hic, sive Mancinianæ deditionis, quia sponsor fœderis fuerat, contagium timens, & inde

popularis ; sive æquo & bono ductus , quia depulsam agris suis plebem miseratus est , ne populus gentium victor , orbisque possessor , Laribus ac focus suis exfularet , quacumque mente , rem ausus ingentem. Postquam rogationis dies aderat , ingenti stipatus agmine Rostra conscendit ; nec deerat obviâ manu tota inde nobilitas , & tribuni in partibus. Sed ubi intercedentem legibus suis Cnæum Octavium videt Gracchus , contra fas collegii , jus potestatis , injectâ manu , depulit Rostris ; adeoque præsentis metu mortis exterruit , ut abdicare se magistratu cogeretur. Sic triumvir creatus dividendis agris. Quum ad perpetranda cœpta die comitiorum prorogari sibi vellet imperium , obviâ nobilium manu , eorumque , quos agris moverat , cædes a foro cœpit. Inde quum in Capitolium profugisset , plebemque ad defensionem salutis suæ , manu caput tangens , hortaretur , præbuit speciem regnum sibi & diadema poscentis ; atque ita , duce Scipione Nasicâ , concitato in arma populo , quasi jure oppressus est.



CAPUT XV.

SEDITION CAII GRACCHI.

STATIM & mortis & legum fratris sui vindex non minore impetu incaluit Caius Gracchus : qui quum pari tumultu atque terrore plebem in avitos agros accesseretur ; & recentem Attali hereditatem in alimenta populo polliceretur ; jamque nimius & impotens altero tribunatu , secundâ plebe volitaret : obrogare auso legibus suis Minucio tribuno , fretus comitum manu , fatale familiæ suæ Capitolium invasit. Inde proximorum cæde pulsus , quum se in Aventinum recepisset ; inde quoque obviâ senatûs manu , ab Opimio consule oppressus est. Insultatum quoque mortis reliquiis ; & illud sacrosanctum caput tribuni plebis percussoribus auro pensatum est.



CAPUT XVI.

SEDITIO APULEIANA.

NIHILOMINUS Apuleius Saturninus Gracchanas asserere leges non destitit ; qui (tantum animorum viro Marius dabat , qui nobilitati semper inimicus , consulatu suo præterea confusus) occiso palam comitiis Annio competitore tribunatus , subrogare conatus est in ejus locum Caium Gracchum , hominem sine tribu , sine nomine : sed subdito titulo , in familiam ipse se adoptabat. Quum tot tantisque ludibriis exsultaret impunè , rogandis Gracchorum legibus ita vehementer incubuit , ut senatum quoque cogeret in verba jurare ; quum abnuentibus aquâ & igni interdicturum se minaretur. Unus tamen exstitit , qui mallet exsilium. Igitur post Metelli fugam omni nobilitate perculsâ , quum jam tertium annum dominaretur , eò vesaniæ progressus est , ut consularia quoque comitia novâ cæde turbaret. Quippe ut satellitem furoris sui Glauciam , consulem faceret , Caium Memmium competitorem interfici jussit , & in eo tumultu regem ex satellitibus

fuis se appellatum lætus accepit. Tum verò jam conspiratione senatûs, ipso quoque jam Mario consule, quia tueri non poterat, aduerso, directæ in foro acies: expulsus inde Capitolium invasit. Sed quum abruptis fistulis obsideretur, senatuique per legatos pœnitentiæ fidem faceret, ab arce degressus, cum ducibus factionis receptus in curiam est. Ibi eum, factâ irruptione, populus fustibus saxisque coopertum in ipsa quoque morte laceravit.


CAPUT XVII.

DRUSIANA SEDITIO.

POSTREMO Livius Drusus non tribunatûs modò viribus, sed ipsius etiam senatûs auctoritate, totiusque Italiæ consensu, easdem leges asserere conatus, dum aliud captat ex alio, tantum conflavit incendium, ut ne prima illius flamma posset sustineri; & subitâ morte correptus, hereditarium in posteros suos bellum propagaret. Judiciariâ lege Gracchi diviserant populum Romanum, & bicipitem ex una fecerant civitatem. Equites Romani tantâ potestate subnixi, ut

qui fata fortunæque principum haberent in manu , interceptis vectigalibus , peculabantur suo jure rempublicam. Senatus exsilio Metelli , damnatione Rutilii debilitatus , omne decus majestatis amiserat. In hoc statu rerum pares opibus , animis , dignitate (unde & nata Livio Druso æmulatio) equitem Servilius Cæpio , senatum Livius Drusus asserere. Signa , & aquilæ , & vexilla aderant : ceterum sic urbe in una , quasi in binis castris dissidebatur. Prior Cæpio in senatum impetu facto , reos ambitus Scaurum & Philippum , principes nobilitatis , elegit. His motibus ut resisteret Drusus , plebem ad se Gracchanis legibus , eisdem socios ad plebem spe civitatis erexit. Exstat vox ipsius, *Nihil se ad largitionem ulli reliquisse, nisi si quis aut cænum dividere vellet, aut cælum.* Aderat promulgandi dies ; quum subito tanta vis hominum undique apparuit , ut hostium adventu obsessa civitas videretur. Ausus tamen obrogare legibus consul Philippus : sed apprehensum faucibus viator non antè dimisit , quàm sanguis in ora & oculos redundaret. Sic per vim latæ , jussæque leges : sed pretium rogationis statim socii flagitare ; quum interim imparem Drusum , ægrumque rerum temere motarum , matura , ut in tali

discrimine, mors abstulit. Nec ideo minùs focii promissa Drusi a populo Romano reposcere armis desierunt.



CAPUT XVIII.

BELLUM SOCIALE.

SOCIALE bellum vocetur licet, ut extenuemus invidiam : si verum tamen volumus, illud civile bellum fuit : quippe quum populus Romanus Etruscos, Latinos, Sabinosque miscuerit, & unum ex omnibus sanguinem ducat, corpus fecit ex membris, & ex omnibus unus est : nec minore flagitio focii intra Italiam, quàm intra urbem cives, rebellabant. Itaque quum jus civitatis, quam viribus auxerant, focii justissimè postularent, ad quam spem eos cupidine dominationis Drusus erexerat ; postquam ille domestico scelere oppressus est, eadem fax, quæ illum cremavit, socios in arma & oppugnationem Urbis accendit. Quid hac clade tristius ? quid calamitosius ? quum omne Latium, atque Picenum, Etruria omnis, atque Campania, postremò Italia contra matrem ac parentem suam Urbem consurgerent : quum omne robur

fortissimorum fidelissimorumque socio-
rum sub suis quosque signis haberent
municipalia illa prodigia, Popedius Mar-
sos & Latinos, Afranius Umbros, Ma-
rius Gratidius Samnium, Lucaniam Te-
lesinus : ut, quum regum & gentium ar-
biter populus ipsum se regere non posset,
victrix Asiæ Europæque a Corfinio Ro-
ma peteretur. Primum fuit belli in Al-
bano monte consilium, ut festo die La-
tinarum Julius Cæsar & Marius Philip-
pus consules inter sacra & aras immola-
rentur. Postquam id nefas proditione dis-
cussum est, Asculo furor omnis erupit,
in ipsa quidem ludorum frequentia truci-
datis, qui tum aderant ab Urbe, legatis.
Hoc fuit impii belli sacramentum. Inde
jam passim ab omni parte Italiæ, duce
& auctore belli discursante Popedio, di-
versa per populos & urbes signa cecinere.
Nec Annibalis, nec Pyrrhi fuit tanta vas-
tatio. Ecce Ocriculum, ecce Grumen-
tum, ecce Fesulæ, ecce Carseoli, Reate,
Nuceria, Picentia cædibus, ferro, &
igne vastantur. Fusæ Rutilii copiæ, fusæ
Cæpionis. Nam ipse Julius Cæsar exer-
citu amisso, quum in urbem cruentus
referretur, miserabili funere per mediam
etiam urbem, viam fecit. Sed magna po-
puli Romani fortuna, & semper in ma-

lis major, totis denuo viribus insurrexit: aggressique singuli populos, Cato discutit Etruscos; Gabinius Marfos; Carbo Lucanos; Sulla Samnites. Strabo verò Pompeius omnia flammis ferroque populus, non prius finem cædium fecit, quam Asculi eversione, Manibus tot exercituum, consulum, direptarumque urbium diis litaretur.



CAPUT XIX.

BELLUM SERVILE.

UT CUMQUE, etsi cum fociis (nefas!) cum liberis tamen & ingenuis, dimicatum est. Quis æquo animo ferat in principe gentium populo bella servorum? Primum Servile bellum inter initia Urbis, Herdonio Sabino duce, in ipsa Urbe tentatum est; quum, occupatâ tribunitiis seditionibus civitate, Capitolium obsessum est, & a consule captum: sed hic tumultus magis fuit quàm bellum. Mox, imperio per diversa terrarum occupato, quis crederet Siciliam multò cruentius servili, quàm Punico bello esse vastatam? Terra frugum ferax, & quodammodo suburbana provincia, latifun-

diis civium Romanorum tenebatur. Hic ad cultum agri frequentia ergastula, catenatique cultores, materiam bello præbuere. Syrus quidam nomine Eunus (magnitudo cladium facit, ut meminerimus) fanatico furore simulato, dum Syriæ deæ comas jactat, ad libertatem & arma servos, quasi numinum imperio, concitavit; idque ut divinitus fieri probaret, in ore abditâ nuce, quam sulphure & igne stipaverat, leniter inspirans, flammam inter verba fundebat. Hoc miraculum primum duo millia ex obviis, mox jure belli refractis ergastulis, sexaginta amplius millium fecit exercitum; regiisque, ne quid malis deesset, decoratus insignibus, castella, oppida, vicos, miserabili direptione vastavit. Quin illud quoque (ultimum belli dedecus) capta sunt castra prætorum; nec nominare ipsos pudebit, castra Manilii, Lentuli, Pisonis, Hypsæi. Itaque qui per fugitivarios retrahi debuissent, prætorios duces, profugos prælio, ipsi sequebantur. Tandem Perpernâ imperatore supplicium de eis sumptum est. Hic enim victos, & apud Ennam novissimè obsessos, quum fame, ex qua pestilentia, consumpsisset, reliquias latronum compedibus & catenis religavit, crucibusque punivit: fuitque

de servis ovatione contentus , ne dignitatem triumphī fervili inscriptione violaret. Vixdum respiraverat insula , quum statim servi , & a Syro reditur ad Cilicem. Athenio pastor , interfecto domino , familiam ergastulo liberatam sub signis ordinat. Ipse veste purpureâ , argenteoque baculo , & regium in morem fronte redimitâ , non minorem , quàm ille fanaticus prior , conflāt exercitum ; acriusque multò , quasi & illum vindicaret , vicos , castella , oppida diripiens , in dominos , in servos infestius , quasi in transfugas , sæviebat. Ab hoc quoque prætorii exercitus cæsi , capta Servilii castra , capta Luculli. Sed Aquilius , Perpernæ usus exemplo , interclusum hostem comœtibz ad extrema compulit ; communitasque copias armis fame facilè delevit : dedidissentque se , nisi suppliciorum metu voluntariam mortem prætulissent. Ac ne de duce quidem supplicium exigi potuit , quamvis in manus venerit : quippe dum circà adprehendendum eum multitudo contendit , inter rixantium manus præda lacerata est.



CAPUT XX.

BELLUM SPARTACIUM.

ENIMVERO servilium armorum dedecus feras : nam etsi per fortunam in omnia obnoxii , tamen quasi secundum genus hominum sunt , & in bona libertatis nostræ adoptantur. Bellum Spartaco duce concitatum quo nomine appellem nescio : quippe quum servi militaverint , gladiatores imperaverint , illi infimæ fortis homines , hi pessimæ , auxere ludibrio calamitatem. Spartacus , Crixus , Oenomaus , effracto Lentuli ludo , cum triginta haud ampliùs ejusdem fortunæ viris eruperunt Capuâ ; servisque ad vexillum & pileum vocatis , quum statim decem ampliùs millia coissent hominum , non modò effugisse contenti , jam vindicari volebant. Prima velut ara viris mons Vesuvius placuit. Ibi quum obsiderentur a Clodio Glabro , per fauces cavi montis vitigineis delapsi vinctis , ad imas ejus descendere radices ; & exitu invio , nihil tale opinantis ducis subito impetu castra rapuere. Inde alia castra. Deinceps Coram , totamque pervagantur Campaniam. Nec villarum atque vicorum vas-

tatione contenti, Nolam atque Luceriam, Thurios atque Metapontum terribili strage populantur. Affluentibus in diem copiis, quum jam esset iustus exercitus, e viminibus, pecudumque tegumentis, inconditos sibi clipeos; e ferro ergastulorum recocto gladios ac tela fecerunt. Ac ne quod decus iusto deesset exercitui, domitis obviis gregibus paratur equitatus, captaque de prætoribus insignia & fasces ad ducem detulere. Nec abnuvit ille de stipendiario Thrace miles, de milite defertor, inde latro, deinde in honore virium gladiator: qui defunctorum quoque prælio ducum funera imperatoriis celebravit exsequiis, captivosque circa rogum iussit armis depugnare, quasi planè expiaturus omne præteritum dedecus, si de gladiatore munerator fuisset. Inde jam consulares quoque aggressus, in Apennino Lentuli exercitum percecìdit: apud Mutinam Caii Cassii castra delevit. Quibus elatus victoriis, de invadenda urbe Romana (quod satis est turpitudini nostræ) deliberavit. Tandem etiam totis imperii viribus contra Mirmillonem confurgitur; pudoremque Romanum Licinius Crassus asseruit: a quo pulsifugatique (pudet dicere) hostes in extrema Italiæ refugerunt. Ibi circa Bruttium angulum clusi,

quum fugam in Siciliam pararent, neque navigia suppeterent, ratesque ex cratibus, & dolia connexa virgultis in rapidissimo freto frustra experirentur; tandem eruptione factâ, dignam viris obiere mortem; & quod sub gladiatore duce oportuit, sine missione pugnatum est. Spartacus ipse in primo agmine fortissimè dimicans, quasi imperator, occisus est.



CAPUT XXI.

BELLUM CIVILE MARIANUM.

HOC deerat unum populi Romani malis, jam ut ipse intra se parricidale ferrum domi stringeret; & in Urbe media ac foro, quasi arena, cives cum civibus gladiatorio more concurrerent. Æquiore animo utcumque ferrem, si plebei ducēs, aut si nobiles, mali saltem, ducatum sceleri præbuiſſent. Jam verò, pro facinus! qui viri! qui imperatores! decora & ornamenta ſeculi ſui Marius, & Sulla, peſſimo facinori ſuam etiam dignitatem præbuerunt. Tribus, ut ſic dixerim, ſideribus agitatum eſt: primo & levi, & modico, tumultu magis quàm bello, intra ipſos armorum duces ſubſiſtente ſæ-

vitiâ ; mox atrociùs & cruentiùs , per totius viscera senatûs grassante victoriâ. Ultimum non civicam modò , sed hostilem quoque rabiem supergressum est ; quum armorum furor totius Italiæ viribus niteretur , eò usque odiis sævientibus , donec deessent , qui occiderentur. Initium & causa belli , inexplibilis honorum Marii fames , dum decretam Sullæ provinciam Sulpiciâ lege sollicitat. Sed impatiens injuriæ statim Sulla legiones circumegit ; dilatoque Mithridate , Esquilinâ , Collinâque portâ geminum urbi infundit agmen. Unde quum consultò Sulpicius & Albinovanus objecissent catervas , fudesque & saxa undique a mœnibus ac tela jacerentur ; ipse quoque jaculatus incendio viam fecit , arcemque Capitolii , quæ Pœnos , quæque Gallos etiam Senones evaserat , quasi captivam victor insedit. Tum ex consulto senatûs adversariis hostibus judicatis , in præsentem tribunum , aliosque diversæ factionis jure sævitum est. Marium fervilis fuga exemit ; immo fortuna alteri bello reservavit. Cornelio Cinnâ , Cnæo Octavio consulibus , malè obrutum resurrexit incendium , & quidem ab ipsorum discordia , quum de revocandis , quos senatus hostes judicaverat , ad populum referretur , cinctâ quidem gladiis

concione : sed vincentibus quibus pax & quies potior , profugus patriâ suâ Cinna confugit ad partes. Redit ab Africa Marius clade major : siquidem carcer , catenæ , fuga , exsilium , horrificaverant dignitatem. Itaque ad nomen tanti viri latè concurritur : servitia (pro nefas !) & ergastula armantur : & facilè invenit exercitum miser imperator. Itaque vi patriam reposcens , unde vi fuerat expulsus , poterat videri jure agere , nisi causam suam sævitiâ corrupisset. Sed quum diis hominibusque infestus rediret , statim primo impetu cliens & alumna Urbis Ostia nefandâ strage diripitur. Mox in urbem quadruplici agmine intratur. Dividere copias Cinna , Marius , Carbo , Sertorius. Hic postquam manus omnis Octavii depulsa Janiculo est , statim ad principum cædem signo dato aliquantò sævius , quàm aut in Punica , aut in Cimbrica urbe , sævitur. Octavii consulis caput pro Rostris exponitur ; Antonii consularis in Marii ipsius mensis : Cæsares a Fimbria in penetralibus domorum suarum trucidantur ; Crassi , pater & filius , in mutuo alter alterius aspectu : Bæbium atque Numitorium per medium forum unci traxere carnificum : Catulus se ignis haustu ludibrio hostium exemit : Merula flamen Dialis in Capi-

tolio Jovis ipsius oculos venarum cruore respersit : Ancharius ipso vidente Mario confossus est , quia fatalem illam scilicet manum non porrexerat salutanti. Hæc tot senatûs funera intra Calendas & Idus Januarii mensis septima illa Marii purpura dedit. Quid futurum fuit , si annum consulatûs implêssset ? Scipione Norbanoque consulibus , tertius ille turbo civilis insanix toto furore detonuit ; quippe quum hinc octo legiones , & quingentæ cohortes starent in armis , inde ab Asia cum victore exercitu Sulla properaret. Et sanè quum tam ferus in Sullanos Marius fuisset ; quantâ sævitiâ opus erat , ut Sulla de Mario vindicaretur ? Primùm apud Capuam sub amne Vulturno signa concurrunt ; & statim Norbani fusus exercitus. Statim omnes Scipionis copix , ostentatâ spe pacis , oppressæ. Tum Marius juvenis , & Carbo consules , quasi desperatâ victoriâ , ne inulti perirent , in antecessum sanguine senatûs sibi parentabant ; obsessâque curiâ , sic de senatu , quasi de carcere , qui jugularentur , educti. Quid funerum in foro , in circo , in patentibus templis ? Nam Quintus Mucius Scævola pontifex , Vestales amplexus aras , tantùm non eodem igne sepelitur. Lamponius atque Telesinus , Samnitum duces ,
atrociùs

atrocibus Pyrrho & Annibale Campaniam Etruriamque populantur ; & sub specie partium se vindicant. Apud Sacriportum Collinamque portam debellatæ omnes hostium copiae. Ibi Marius , hîc Telesinus oppressi. Nec idem tamen cædium , qui belli finis fuit. Stricti enim & in pace gladii ; animadversumque in eos , qui se sponte dediderant. Minus est , quòd apud Sacriportum , & apud Collinam portam , septuaginta amplius millia Sulla concidit. Bellum erat. Quatuor millia deditorum inermium civium in villa publica interfici jussit. Isti tot in pace ; non plures sunt ? Quis autem illos potest computare , quos in Urbe passim , quisquis voluit , occidit ? donec admonente Furfidio , *vivere aliquos debere , ut essent quibus imperarent* ; proposita est ingens illa tabula : & ex ipso Equestris ordinis flore ac senatûs duo millia electi , qui mori juberentur : novi generis edictum. Piget post hæc referre , ludibrio habita fata Carbonis , fata Sorani prætoris , atque Venuleii : Bæbium sine ferro , ritu ferarum , inter manus laniatum : Marium , ducis ipsius fratrem , apud Catuli sepulchrum , oculis , manibus , cruribusque defossis , servatum aliquamdiu , ut per singula membra moreretur. Positis singulorum ho-

minum ferè pœnis , municipia Italiæ splendidissima sub hasta venierunt , Spoletium , Interamnium , Præneste , Florentia. Nam Sulmonem , vetus oppidum focium atque amicum (facinus indignum !) nondum expugnatum , ut obsides jure belli , & modò morte damnati duci jubentur : sic damnatam civitatem jussit Sulla deleri.




CAPUT XXII.

BELLUM SERTORIANUM.

BELLUM Sertorianum quid aliud , quàm Sullanæ proscriptionis hereditas fuit ? hostile potius , an civile dixerim , nescio ; quippe quod Lusitani Celtiberique Romano gesserint duce. Exsul & profugus feralis illius tabulæ , vir summæ quidem , sed calamitosæ virtutis , malis suis maria terrasque permiscuit : & jam Africæ , jam Balearibus insulis fortunam expertus , victusque , in Oceanum , Fortunatasque insulas penetravit : tandem Hispaniam armavit. Viro cum viris facilè convenit. Nec aliàs magis apparuit Hispani militis vigor , quàm Romano duce. Quamquam ille non contentus Hispaniâ ,

ad Mithridatem quoque Ponticosque respexit, regemque classe juvit. Et quid futurum fuit? satis tanto hosti uno imperatore resistere res Romana non potuit. Additus Metello Cnæus Pompeius. Hi copias viri diu, & ancipiti semper acie attrivere: nec tamen prius bello, quam suorum scelere & insidiis, exstinctus est. Copias ejus propè totâ Hispaniâ persequuti, diu & ancipiti semper acie domuerunt. Prima per legatos certamina habita, quum hinc Domitius & Thorius, inde Herculeii proluderent: mox his apud Segoviam, illis apud Anam flumen oppressis, ipsi duces cominus invicem experti, apud Lauronem, atque Sucronem, æquavere clades. Tum illis ad populationem agrorum, his ad urbium excidia conversis, misera inter Romanos duces Hispania discordiæ pœnas dabat; donec oppresso domesticâ fraude Sertorio, victo deditoque Perpernâ, ipsæ quoque in Romanam fidem venere urbes, Osca, Termes, Tutia, Valentia, Auxima, & infame nihil non experta Calagurris. Sic recepta in pacem Hispania. Victores duces externum id magis, quam civile, bellum videri voluerunt, ut triumpharent.



CAPUT XXIII.

BELLUM CIVILE SUB LEPIDO.

MARCO Lepido, Quinto Catulo consulibus, civile bellum pene citius oppressum est, quàm inciperet : sed quantum quàmque latè fax illius motûs ab ipso Sullæ rogo exarsit ! Cupidus namque rerum novarum per insolentiam Lepidus, acta tanti viri rescindere parabat ; nec immeritò, si tamen posset sine magna clade reipublicæ. Nam quum jure belli Sulla dictator proscripsisset inimicos ; qui supererant, revocante Lepido, quid aliud quàm ad bellum vocabantur ? quumque damnatorum civium bona, addicente Sullâ, quamvis malè capta, jure tamen, repetitio eorum procul dubio labefactabat compositam civitatem. Expediebat ergo quasi ægræ faucis reipublicæ requiescere quomodocumque, nè vulnera curatione ipsâ rescinderentur. Ergo quum turbidis concionibus, velut classico, civitatem terruisset, profectus in Etruriam, arma inde & exercitum Urbi admovebat. Sed jam Mulvium pontem collemque Janiculum Lutatius Catulus, Cnæusque

Pompeius , Sullanæ dominationis duces
atque signiferi , alio exercitu infederant.
A quibus primo statim impetu retro
pulsus , hostisque a senatu judicatus , in-
cruentâ fugâ in Etruriam , inde Sardi-
niam recessit ; ibique morbo & pœni-
tentiâ interiit. Victores , quod non te-
mere aliàs in civilibus bellis , pace con-
tenti fuerunt.





LIBER QUARTUS.


CAPUT I.

BELLUM CATILINARIUM.

CATILINAM luxuria primùm , tum hinc conflata egestas rei familiaris , simul occasio , quòd in extremis finibus mundi arma Romana peregrinabantur , in nefaria consilia opprimendæ patriæ suæ compulere. Senatum confodere , consules trucidare , distringere incendiis Urbem , diripere ærarium , totam denique rempublicam funditus tollere , & quidquid nec Annibal videretur optasse , quibus (ô nefas !) fociis aggressus est ? Ipse patricius : sed hoc minus est : Curii , Porcii , Sullæ , Cethegi , Autronii , Vargunteii , atque Longini , quæ familiæ ? quæ senatûs insignia ? Lentulus quoque quum maximè prætor ? Hos omnes immanissimi facinoris satellites habuit. Additum est pignus conjurationis sanguis humanus , quem circumlatum pateris bibere : sum-

mum nefas , nisi amplius esset , propter
 quod biberunt. Actum erat de pulcher-
 rimo imperio , nisi illa conjuratio in Ci-
 ceronem & Antonium consules incidis-
 set ; quorum alter industriâ rem patefe-
 cit, alter manu oppressit. Tanti sceleris
 indicium per Fulviam emersit , vilissi-
 mum scortum , sed parricidii innocens.
 Tum consul habito senatu , in præsentem
 reum Cicero peroravit : sed non amplius
 profectum , quàm ut hostis evaderet , se-
 que ex professo incendium suum restin-
 cturum ruinâ minaretur. Et ille quidem
 ad præparatum a Mallio in Etruria exer-
 citum proficiscitur , signa illaturus Urbi.
 Lentulus destinatum familiæ suæ Sibylli-
 nis versibus regnum sibi vaticinans , ad
 præstitutum a Catilina diem urbe totâ
 viros , faces , tela , disponit. Nec civili
 conspiratione contentus , legatis Allobro-
 gum , qui tum fortè aderant , in arma
 sollicitatis , iisset ultra Alpes furor , nisi
 alterâ proditione Vulturcii , prætoris lit-
 teræ tenerentur. Statim Ciceronis impe-
 rio injecta est barbaris manus. Palam præ-
 tor in senatu vincitur. De supplicio
 agentibus , Cæsar parcendum dignitati ,
 Cato animadvertendum pro scelere cen-
 sebat. Quam sententiam sequutis omni-
 bus , in carcere parricidæ strangulantur.

Quamvis parte conjurationis oppressâ, tamen ab incepto Catilina non destitit : sed infestis ab Etruria signis patriam petens , obvio Antonii exercitu opprimitur. Quàm atrociter dimicatum sit , exitus docuit. Nemo hostium bello superfuit. Quem quis in pugnando ceperat locum, eum amissâ animâ corpore tegebat. Catilina longè a suis inter hostium cadavera repertus est ; pulcherrimâ morte , si pro patria sic concidisset.



CAPUT II.

BELLUM CÆSARIS ET POMPEII.

JAM pene toto orbe pacato , majus erat imperium Romanum , quàm ut ullis externis viribus opprimi posset. Itaque invidens fortuna principi gentium populo , ipsum illum in exitium suum armavit. Ac Mariana quidem Cinnanaque rabies intra Urbem præluferat , quasi experiretur. Sullana tempestas latius , intra Italiam tamen , detonuerat. Cæsaris furor atque Pompeii Urbem , Italiam , gentes , nationes , totum denique , quâ patebat , imperium , quodam quasi diluvio & inflammatione corripuit ; adeo ut non rectè

tantum civile dicatur , ac ne sociale quidem , sed nec externum ; sed potius commune quoddam ex omnibus , & plus quam bellum. Quippe si duces ejus inspicias ; totus senatus in partibus : si exercitus ; hinc undecim legiones , inde decem & octo , flos omnis & robur Italici sanguinis : si auxilia sociorum ; hinc Gallici Germanique delectus ; inde Dejotarus , Ariobarzanes , Tarchondimotus , Cotys , omne Thraciæ , Cappadociæque , Ciliciæ , Macedoniæ , Græciæ , Ætoliæ , totiusque robur Orientis : si moram belli ; quatuor anni , & pro clade rerum breve tempus : si locum & spatium ubi commissum est ; intra Italiam : inde se in Galliam Hispaniamque deflexit , reversumque ab occasu , totis viribus in Epiro Theffaliamque confedit : hinc in Ægyptum subito transiit : inde respexit Asiam : inde Africæ incubuit : postremò in Hispaniam regyravit , & ibi aliquando defecit. Sed non & odia partium finita cum bello. Non enim prius quiescere , quam in Urbe ipsa , medio senatu , eorum , qui victi erant , odia victoris sese cæde fatiarent. Causa tantæ calamitatis eadem , quæ omnium , nimia felicitas. Siquidem Quinto Metello , Lucio Afranio consulibus , quum Romana majestas toto orbe

polleret, recentesque victorias, Ponticos & Armenios triumphos in Pompeianis theatris Roma cantaret; nimia Pompeii potentia apud otiosos, ut solet, cives movit invidiam. Metellus ob imminutum Cretæ triumphum, Cato adversus potentes semper obliquus, detrectare Pompeium, actisque ejus obstrepere. Hic dolor transversum egit; & ad præsidia dignitati paranda impulit. Fortè tunc Crassus genere, divitiis, dignitate florebat; vellet tamen auctiores opes: Cæsar eloquentiâ, & spiritu, ecce jam & consulatu allevabatur: Pompeius tamen super utrumque eminebat. Sic igitur Cæsare dignitatem comparare, Crasso augere, Pompeio retinere cupientibus, omnibusque pariter potentiæ cupidis, de invadenda republica facilè convenit. Ergo quum mutuis viribus in suum quisque decus niteretur, Galliam Cæsar invadit, Crassus Asiam, Pompeius Hispaniam, tres maximos exercitus; & sic orbis imperium societate trium principum occupatur. Decem annos traxit ista dominatio. Exinde, quoniam mutuo metu tenebantur, Crassi morte apud Parthos, & morte Juliæ Cæsaris filiæ, quæ nupta Pompeio, generi focerique concordiam matrimonii fœdere tenebat, statim æmu-

latio erupit. Jam Pompeio suspectæ Cæsaris opes , & Cæsari Pompeiana dignitas gravis. Nec hic ferebat parem , nec ille superiorem. Nefas ! sic de prîncipatu laborabant , tamquam duos tanti imperii fortuna non caperet. Ergo Lentulo Marcelloque consulibus , ruptâ primâ conjurationis fide , de successionem Cæsaris senatus , id est , Pompeius , agitabat : nec ille abnuebat , si ratio sui proximis comitiis haberetur. Consulatus absenti , quem decem tribuni , favente Pompeio , nuper decreverant , tum , dissimulante eodem , negabatur. *Veniret , & peteret majorum more.* Ille contrâ flagitare decreta : ac , *nisi in fide permanerent , non se remittere exercitum.* Ergo ut in hostem decernitur. His Cæsar agitato , statuit præmia armorum armis defendere. Prima civilis belli arena Italia fuit , cujus arces levibus præsidiis Pompeius infederat : sed omnia subito Cæsaris impetu oppressa sunt. Prima Arimino signa cecinerunt. Tum pulsus Etruriâ Libo , Umbriâ Thermus , Domitius Corfinio. Et peractum erat bellum sine sanguine , si Pompeium Brundisii opprimere potuisset : & cœperat : sed ille per obsessi claustra portûs nocturnâ fugâ evasit. Turpe dictu ! modò princeps patrum , pacis bellicque modera-

tor, per triumphatum a se mare, lacerâ & pene inermi nave fugiebat. Nec Pompeius ab Italia, quàm senatus ab Urbe, fugatur prior: quam pene vacuum metu Cæsar ingressus consulem se ipse facit. Ærarium quoque sanctum, quia tardius aperiebant tribuni, jussit effringi; censusque & patrimonium populi Romani antè rapuit, quàm imperium. Pulso fugatoque Pompeio, maluit prius ordinare provincias, quàm ipsum sequi. Siciliam & Sardiniam, annonæ pignora, per legatos habet. Nihil hostile erat in Gallia: pacem ipse fecerat. Sed ad Hispanienses Pompeii exercitus transeunti per eam duci portas claudere ausa Massilia est. Misera! dum cupit pacem, belli metu in bellum incidit: sed quia tutis muris erat, vinci eam sibi jussit absenti. Græcula civitas, non pro mollitie nominis, & vallum rumpere, & incendere machinas ausa, & congredi navibus: sed Brutus, cui mandatum erat bellum, victos terrâ marique perdomuit. Mox dedentibus sese ablata omnia, præter, quam potiores omnibus habebant, libertatem. Anceps, variumque, & cruentum in Hispania bellum cum legatis Cnæi Pompeii, Petreio & Afranio; quos Ilerdæ castra habentes, apud Sicorim amnem obsidere,

& ab oppido intercludere aggreditur. Interim obundatione verni fluminis com-
meatibus prohibetur. Sic fame castra ten-
tata sunt ; obsefforque ipse quasi obside-
batur. Sed ubi pax fluminis rediit , po-
pulationibus & pugnæ campos aperuit :
iterum ferox instat ; & cedentes ad Cel-
tiberiam consequutus , aggere & vallo ,
ac per hæc siti ad deditionem compulit.
Sic citerior Hispania recepta est ; nec ul-
terior moram fecit. Quid enim una post
quinque legiones ? Itaque ultro cedente
Varrone , Gades , fretum , Oceanus ,
omnia felicitatem Cæsaris sequebantur.
Aliquid tamen adversus absentem ducem
ausa fortuna est circa Illyricum & Afri-
cam , quasi de industria prospera ejus ad-
versis radiarentur. Quippe quum fauces
Adriatici maris jussi occupare Dolabella
& Antonius , ille Illyrico , hic Curictico
littore castra posuissent , jam maria latè
tenente Pompeio , repente legatus ejus
Octavius Libo ingentibus copiis classico-
rum circumvenit utrumque. Deditionem
fames extorsit Antonio. Missæ quoque a
Basilo in auxilium ejus rates , quales ino-
pia navium fecerat , novâ Pompeianorum
arte Cilicum , actis sub mare funibus ,
captæ quasi per indaginem. Duas tamen
æstus explicuit : una , quæ Opiterginos

ferebat, in vadis hæsit, memorandumque posteris exemplum dedit. Quippe vix mille juvenum manus, circumfusi undique exercitûs per totum diem tela sustinuit; & quum exitum virtus non haberet, tamen ne in deditionem veniret, hortante tribuno Vulteio, mutuis ictibus in se concucurrit. In Africa quoque par & virtus & calamitas Curionis fuit; qui ad recipiendam provinciam missus, pulso fugatoque Varo jam superbus, subitum Jubæ regis adventum, equitatumque Maurorum sustinere non potuit. Patebat victo fuga, sed pudor suasit, ut amissum suâ temeritate exercitum morte sequeretur. Sed jam debitum par fortunâ flagitante, sedem bello Pompeius Epiron elegerat: nec Cæsar moratur. Quippe ordinatis a tergo omnibus, quamvis hyems media prohiberet, tempestate ad bellum navigavit; positisque ad Oricum castris, quum pars exercitûs, ob inopiam navium cum Antonio relicta, Brundisii moram faceret; adeo impatiens erat, ut ad arcessendos eos, ardente ventis mari, nocte concubiâ, speculatorio navigio, solus ire tentaverit. Exstat ad trepidum tanto discrimine gubernatorem vox ipsius: *Quid times? Cæsarem vehis.* Contractis in unum omnibus undique copiis,

positisque cominus castris , diversa erant ducum consilia. Cæsar pro natura ferox , & conficiendæ rei cupidus , ostentare aciem , provocare , laceßere ; nunc obsidione castrorum , quæ sedecim millium vallo obduxerat (sed quid his obesset obsidio , qui patente mari omnibus copiis abundarent ?) nunc oppugnatione Dyrrhachii irritâ (quippe quam vel situs inexpugnabilem faceret) ad hoc assiduis in eruptione hostium præliis (quo tempore egregia virtus Scævæ centurionis enituit , cujus in scuto centum atque viginti tela sedere) jam verò direptione urbium sociarum , quum Oricum , & Gomphos , & alia castella Theßaliæ vastaret. Pompeius adversus hæcnectere moras , tergiversari , simul ut hostem interclusum undique inopiâ commeatuum tereret , utque ardentissimi ducis confescesceret impetus. Nec diutius profuit duci salutare consilium. Miles otium , socii moram , principes ambitum ducis increpabant. Sic præcipitantibus fati , prælio sumpta est Theßalia ; & Philippicis campis Urbis , imperii , generis humani fata commissa sunt. Numquam uno loco tantum virium populi Romani , tantum dignitatis fortuna vidit , trecenta amplius millia hinc illinc , præter auxilia regum ,

& fociorum. Numquam imminentis ruinae manifestiora prodigia, fuga victimarum, examina in signis, interdiu tenebrae; dux ipse & nocturnâ imagine theatri sui audiens plausum in modum planctûs circumsonare; & manè cum pullo (nefas!) apud principia conspectus. Numquam acrior neque alacrior exercitus Cæsaris fuit. Inde classica prius, inde tela. Annotatum quoque committentis aciem Crassini pilum; qui mox adactò in os gladio, sic inter cadavera repertus, libidinem ac rabiem, quâ pugnaverat, ipsâ novitate vulneris præferebat. Sed nec minùs admirabilis illius exitus belli. Quippe quum Pompeius adeo equitum copiâ abundaret, ut facilè circumventurus sibi Cæsarem videretur, circumventus ipse est. Nam quum diu æquo Marte contenderent, jussuque Pompeii fusus a cornu erupisset equitatus; repente hinc signo dato, Germanorum cohortes tantum in effusos equites fecere impetum, ut illi esse pedites, hi venire in equis viderentur. Hanc stragem fugientis equitatûs levis armaturæ ruina comitata est. Tunc terrore latiùs dato, turbantibus invicem copiis, reliqua strages quasi unâ manu facta est. Nec ulla res magis exitio fuit, quàm ipsa exercitûs magnitudo. Multus

in eo proelio Cæsar fuit, mediufque inter imperatorem & militem. Voces quoque obequitantis exceptæ, altera cruenta, fed docta, & ad victoriam efficax; *Miles, faciem feri*: altera ad jaftationem compofita; *Parce civibus*: quum ipfe fequeretur. Felicem utcumque in malis Pompeium, fi eadem ipfum, quæ exercitum ejus, fortuna traxiffet! Superftes dignitati fuæ vixit, ut cum majore dedecore per Theffalica Tempe equo fugeret: ut unâ naviculâ Lesbôn applicaretur: pulfus Syedris, in deferto Ciliciæ fcopulo fugam in Parthos, Africam, vel Ægyptum agitare: ut denique in Pelufio litore, imperio viliffimi regis, confiliis fpadonum, &, ne quid malis defit, Septimii defertoris fui gladio trucidatus, fub oculis uxoris fuæ liberorumque moreretur. Quis non peractum effe cum Pompeio crederet bellum? Atqui acriùs multò atque vehementiùs Theffalici incendii cineres recaluere. Et in Ægypto quidem adversùs Cæfarem fine partibus bellum. Quippe quum Ptolemæus rex Alexandriæ fumum civilis belli fcelus peregiflet, fœdusque amicitiae cum Cæfare, medio Pompeii capite, fanxiffet; ultionem tanti viri Manibus quærente fortunâ, caufa non defuit. Cleopatra

regis soror, affusa Cæsaris genibus, partem regni reposcebat. Aderat puellæ forma, & quæ duplicaretur ex illo, quòd talis passa videbatur injuriam: odium ipsius regis, qui Pompeii cædem partium fato, non Cæsari dederat; haud dubiè idem in ipsum ausurus, si expedisset. Quam ubi Cæsar restitui jussit in regnum, statim ab eisdem percussoribus Pompeii obsessus in regia, quamvis exiguâ manu, ingentis exercitûs molem mirâ virtute sustinuit. Ac primùm ædificiorum proximorum, atque navalium incendio, infestorum hostium tela submovit: mox in peninsulam Pharon subitus evasit: inde depulsus in maria, mirâ felicitate ad proximam classem enatavit, relicto quidem in fluctibus paludamento, seu fato, seu consilio, ut illud ingruentibus hostium telis saxisque peteretur. Tandem receptus a classicis suis, undique simul hostes adortus, de imbelli ac perfida gente iusta generi Manibus dedit. Quippe & Theodotus magister auctorque totius belli, & ne virilia quidem portenta Pothinus atque Ganymedes, diversâ per mare & terras fugâ & morte consumpti. Regis ipsius corpus obrutum limo repertum est in aureæ loriceæ honore. In Asia quoque novus rerum motus a Ponto, planè

quasi de industria captante fortunâ hunc Mithridatico regno exitum , ut a Pompeio pater , a Cæsare filius vinceretur. Rex Pharnaces magis discordiæ nostræ fiduciâ , quam virtutis suæ , infesto in Cappadociam agmine ruebat : sed hunc Cæsar aggressus , uno , & , ut sic dixerim , non toto prælio , obtrivit ; more fulminis , quod uno eodemque momento venit , percussit , abscessit. Nec vana de se prædicatio est Cæsaris , *antè victum hostem esse , quàm visum*. Sic cum exteris. At in Africa cum civibus multò atrocius , quàm in Pharsalia. Huc reliquias partium naufragarum quidam furoris æstus expulerat ; nec reliquias diceres , sed integrum bellum. Sparsæ magis , quàm oppressæ vires erant. Auxerat sacramentum ipsa clades imperatoris : nec degenerabat ducum successio. Quippe satis amplè sonabant in Pompeiani nominis locum Cato & Scipio. Accessit copiis Mauritaniæ rex Juba , videlicet ut latius vinceret Cæsar. Nihil ergo inter Pharsaliam , & Thapson , nisi quòd amplior , eoque acrior Cæsarianorum impetus fuit , indignantium post Pompeium crevisse bellum. Denique , quod aliàs numquam , ante imperium ducis suâ sponte signa cecinerunt. Strages a Juba cœpit. Ejus elephanti bellorum

rudes , & nuperi a sylva , consternati subito clangore : statim & in fugam exercitus , nec duces fortiùs , quàm ut fugerent , non inconspicuâ tamen morte omnium. Jam Scipio nave fugiebat : sed assequutis eum hostibus , gladium per viscera exegit ; & , ubi esset , quodam requirente , respondit hoc ipsum , *Bene se habet Imperator*. Juba , quum se recepisset in regiam , magnificè epulatus est postero die cum Petreio fugæ comite , superque mensas & pocula interficiendum se ei præbuit. Ille & regi suffecit , & sibi ; quum interim semesi in medio cibi , & parentalia fercula regio simul Romanoque sanguine madebant. Cato non interfuit bello ; positisque apud Bagradam castris , Uticam , velut altera Africæ claustra servabat. Sed acceptâ partium clade , nihil cunctatus , ut sapiente dignum erat , mortem etiam lætus accivit. Nam postquam filium comitesque ab amplexu dimisit , in nocte lecto ad lucernam Platonis libro , qui immortalitatem animæ docet , paululum quievit : tum circa primam vigiliam stricto gladio revelatum manu pectus semel iterumque percussit. Ausi post hoc virum medici violare fomentis. Ille passus , dum abscederent , rescidit plagas ; sequutâque vi sanguinis ,

moribundas manus in ipso vulnere reliquit. Quasi non esset usquam dimicatum, sic arma rursus & partes ; quantòque Africa supra Thessaliam , tantò Africam superabat Hispania. Plurimum quantum favoris partibus dabat fraternitas ducum , & pro uno duos stare Pompeios. Itaque nusquam atrocìus , nec tam ancipiti Marte concursus est. Primùm in ipso ostio Oceani Varus Didiusque legati confligere : sed acrius fuit cum ipso mari , quàm inter se navibus bellum : siquidem , velut furorem civium castigaret Oceanus , utramque classem naufragio cecidit. Quinam ille horror , quum eodem tempore fluctus , procellæ , viri , naves , armamenta confligerent ? adde sitûs ipsius formidinem , vergentia in unum hinc Hispaniæ , inde Mauritanîæ littora ; mare & intestinum , & externum ; imminentesque Herculis speculas ; quum omnia undique simul prælio & tempestate sævirent. Mox circa obsidiones urbium utrimque discursus est , quæ miseræ inter hos atque illos duces societatis Romanæ pœnas dabant. Omnium postrema certaminum Munda. Hîc non pro cetera felicitate , sed anceps , & diu triste prælium ; ut planè videretur nescio quid deliberare fortuna. Sanè & ipse ante aciem mœstior

non ex more Cæsar, sive respectu fragilitatis humanæ, sive nimiam prosperorum suspectam habens continuationem; vel eadem timens, postquam idem esse cœperat, quod Pompeius. Sed in ipso prælio, quod nemo umquam meminerat, quum diu pari Marte acies nihil aliud quàm occiderent, in medio ardore pugnantium subito ingens inter utrosque silentium, quasi convenisset. Hic omnium sensus erat. Novissimè illud invisitatum Cæsaris oculis (nefas) post quatuordecim annos probata veteranorum manus gradum retro dedit. Quòd etsi nondum fugerat, apparebat tamen pudore magis, quàm virtute resistere. Itaque ablegato equo, similis furenti, primam in aciem procurrit. Ibi prensare fugientes, confirmare, per totum denique agmen oculis, manibus, clamore volitare. Dicitur in illa perturbatione & de extremis agitalle secum, & manifestè vultu prætulisse, quasi occupare manu mortem vellet; nisi cohortes hostium quinque per transversam aciem actæ, quas Labienus periclitantibus castris subsidio miserat, fugæ speciem præbuisent. Hoc aut & ipse credidit, aut dux callidus arripuit in occasionem: & quasi in fugientem invecus, simul & suorum erexit animos, & hos-

tis perculit. Nam hi dum se putant vincere, fortiùs sequi; Pompeiani dum fugere credunt suos, fugere cœperunt. Quanta fuerit hostium cœdes, ira, rabiesque victoribus, sic æstimari potest. Hoc a prælio profugi quum se Mundam recepissent, & Cæsar obsideri statim victos imperasset, congestis cadaveribus agger effectus est, quæ pilis jaculisque confixa inter se tenebantur: fœdum etiam inter barbaros! Sed videlicet victoriam desperantibus Pompeii liberis, Cnæum prælio profugum, crure saucio, deserta & avia petentem, Cesonius apud Lauronem oppidum consequutus, pugnantes (adeo nondum desperabat) interfecit. Sextum fortuna in Celtiberiam interim abscondit; aliisque post Cæsarem bellis reservavit. Cæsar in patriam victor invenitur. Primum de Gallia triumphum transmiserat Rhenus, Rhodanus, & ex auro captivus Oceanus. Altera laurus Ægyptia: tunc in ferculis Nilus, Arsinoë, & ad simulacrum ignium ardens Pharus. Tertius de Pharnace currus, & Ponto. Quartus Jubam & Mauros, & bis subactam ostendebat Hispaniam. Pharsalia, & Thapfos, & Munda nusquam. Et quantò majora erant, de quibus non triumphabat! Hic aliquando finis armis fuit. Reliqua

pax incruenta : pensatumque clementiâ bellum. Nemo cæsus imperio præter Afranium ; fatis ignoverat semel : & Faustum Sullam ; didicerat generos timere : filiamque Pompeii cum patruelibus ex Sulla ; hîc posteris cavebatur. Itaque non ingratis civibus, omnes unum in principem congesti honores : circa templa imagines ; in theatro distincta radiis corona ; suggestus in curia ; fastigium in domo ; mensis in cœlo ; ad hoc pater ipse patriæ perpetuusque dictator : novissimè , dubium an ipso volente , oblata pro Rostris ab Antonio consule regni insignia. Quæ omnia, velut insulæ , in destinatam morti victimam congregabantur. Quippe clementiam principis vicit invidia ; gravisque erat liberis ipsa beneficiorum potentia. Nec diutius dilatio donata est : sed Brutus & Cassius , alique patres consenserunt in cædem principis. Quanta vis fati ! manaverat latè conjuratio : libellus etiam Cæsari datus eodem die : nec perlitare centum victimis potuerat. Venit in curiam tamen , expeditionem Parthicam meditans. Ibi in curuli sedentem eum senatus invasit ; tribusque & viginti vulneribus ad terram datus est. Sic ille , qui terrarum Orbem civili sanguine impleverat , tandem ipse sanguine suo curiam implevit.

CAPUT III.

CÆSAR AUGUSTUS.

POPULUS Romanus, Cæsare & Pompeio trucidatis, rediisse in statum pristinæ libertatis videbatur; & redierat, nisi aut Pompeius liberos, aut Cæsar heredem reliquisset: vel, quod utroque perniciosius fuit, si non collega quondam, mox æmulus Cæsarianæ potentiae, fax & turbo sequentis seculi, superfuisset Antonius. Quippe dum Sextus paterna repetit, trepidatum toto mari: dum Octavius mortem patris ulciscitur, iterum fuit movenda Thessalia: dum Antonius varius ingenio, aut successorem Cæsaris indignatur Octavium, aut amore Cleopatæ desciscit in regem, aliter salvus esse non potuit, nisi confugisset ad servitutem. Gratulandum tamen in tanta perturbatione est, quòd potissimum ad Octavium Cæsarem Augustum summa rerum rediit; qui sapientiâ suâ atque solertiâ, perculsum undique & perturbatum ordinavit imperii corpus: quod ita haud dubiè numquam coire & consentire potuisset, nisi unius præsidis nutu, quasi ani-

mâ & mente, regeretur. Marco Antonio ; Publio Dolabellâ consulibus , imperium Romanum jam ad Cæsares transferente fortunâ , varius & multiplex civitatis motus fuit : quodque in annua cœli conversione fieri solet , ut mota sidera tonent , ac suos flexus tempestate significant ; sic cum Romanæ dominationis , id est , humani generis , conversione penitus intrenuit , omnique genere discriminum , civilibus , terrestribus ac navalibus bellis , omne imperii corpus agitatum est.



CAPUT IV.

BELLUM MUTINENSE.


PRIMA civilium motuum causa testamentum Cæsaris fuit , cujus secundus heres Antonius , prælatum sibi Octavium furens , inexpiabile contra adoptionem acerrimi juvenis suscepit bellum. Quippe quum intra decem & octo annos tenerum , obnoxium , & opportunum injuriæ juvenem videret , ipse plenæ ex commilitio Cæsaris dignitatis , lacerare furtis hereditatem , ipsum infectari probris , cunctis artibus cooptationem Juliæ gentis inhibere ; denique ad opprimendum ju-

venem palam arma moliri, & jam parato exercitu in Cisalpina Gallia resistentem motibus suis Decimum Brutum obsidere. Octavius Cæsar, ætate & injuriâ favorabilis, & nominis majestatem, quod sibi induerat, revocatis ad arma veteranis, privatus (quis crederet!) consulem aggreditur: obsidio Mutinæ liberat Brutum: Antonium exuit castris. Tum quidem etiam manu pulcher apparuit: nam cruentus & saucius aquilam, a moriente signifero traditam, suis humeris in castra referebat.

CAPUT V.

BELLUM PERUSINUM.

ALTERUM bellum concitavit agrorum divisio, quos Cæsar veteranis patris, pretium militiæ, persolvebat. Semper aliàs Antonii pessimum ingenium Fulvia, gladio cincta, virilis audaciæ uxor, agitabat. Ergo depulsos agris colonos incitando, iterum in arma ierat. Hic verò jam non privatis, sed totius senatûs suffragiis judicatum hostem Cæsar aggressus, intra Perusiæ muros redegit, compulitque ad extrema deditiois turpi & nihil non expertâ fame.



CAPUT VI.

TRIUMVIRATUS.

QUUM solus etiam gravis paci, gravis reipublicæ esset Antonius, quasi ignis incendio Lepidus accessit. Quid contra duos exercitus necesse fuit venire in cruentissimi fœderis societatem? Diversa omnium vota. Incendit Lepidum divitiarum cupido, quarum spes ex turbatione reipublicæ: Antonium ultionis de his, qui se hostem judicassent. Cæsarem inultus pater, & Manibus ejus graves Cassius & Brutus agitabant. In hoc velut fœdus pax inter tres duces componitur. Apud Confluentes inter Perusiam & Bononiam jungunt manus, & exercitus consalutant. Nullo bono more Triumviratus invaditur; oppressâque armis reipublicâ, redit Sullana proscriptio: cujus atrocitas nihil in se minus habet, quàm numerum centum quadraginta senatorum. Exitus fœdi, truces, miserabiles, toto terrarum orbe fugientium. Pro quibus quis pro dignitate rei ingemiscat, quum Antonius Lucium Cæsarem avunculum suum, Lepidus Lucium Paullum suum fratrem pro-

scripserit ? Romæ capita cæſorum proponere in Roſtris jam uſitatum erat : verum ſic quoque civitas lacrymas tenere non potuit , quum reciſum Ciceronis caput in illis ſuis Roſtris videretur ; nec aliter ad videndum eum , quàm ſolebat ad audiendum , concurreretur. Hæc ſcelera in Antonii Lepidique tabulis. Cæſar percufforibus patris contentus fuit. Hæc quoque , niſi multa fuiſſet , etiam juſta cædes haberetur.

CAPUT VII.

BELLUM CASSII ET BRUTI.

BRUTUS & Cassius ſic Cæſarem , quaſi Tarquinium regem , depulſiſſe regno videbantur : ſed libertatem , quam maximè reſtitutam voluerunt , illo ipſo parricidio perdidere. Igitur cæde perfectâ , quum veteranos Cæſaris , nec immeritò , timerent , ſtatim e curia in Capitolium confugerant. Nec illis ad ultionem deerat animus : ſed ducem non habebant. Igitur quum appareret , quæ ſtrages rei-publicæ immineret , diſplicuit ultio , conſenſu conſulis abolitione diſcordiarum decretâ. Ne tamen publici doloris oculos

ferrent, in provincias ab illo ipso, quem occiderant, Cæsare datas, Syriam & Macedoniam, concesserant. Sic vindicta Cæsaris dilata potius, quàm oppressa est. Igitur ordinata magis ut poterat, quàm ut debebat, respublica: relicto ad urbis præsidium Lepido, Cæsar cum Antonio in Cassium Brutumque succingitur. Illi comparatis ingentibus copiis, eandem illam, quæ fatalis Cnæo Pompeio fuit, arenam infederant. Sed nec tum imminentis cladis destinata signa latuere. Nam & assuetæ cadaverum pabulo volucres castra, quasi jam sua, circumvolabant; & in aciem prodeuntibus obuius Æthiops nimis apertè ferale signum fuit. Ipsique Bruto per noctem, quum illato lumine ex more aliqua secum agitaret, atra quædam imago se obtulit: & *quæ esset*, interrogata; *Tuus*, inquit, *malus Genius*. Hoc dixit, & sub oculis mirantis evanuit. Dispari meliora præfagio in Cæsaris castris omnia aves, victimæque promiserant: sed nihil illo præsentius, quàm quòd Cæsaris medicus somnio admonitus est, ut Cæsar castris excederet, quibus capi imminebat: ut factum est. Acie namque commissâ, quum pari ardore aliquamdiu dimicatum foret, quamvis duces non essent præsentibus, quum alterum

corporis ægritudo, illum metus & ignavia subduxissent; stabat tamen pro partibus invicta fortuna & ultoris, & qui vindicabatur, ut exitus prælii docuit. Primum adeo anceps fuit & par utrimque discrimen. Capta sunt hinc Cæsaris castra, inde Cassii. Sed quantò efficacior est fortuna, quàm virtus! & quàm verum est, quod moriens efflavit, *non in re, sed in verbo tantum esse virtutem!* Victoriæ illi prælio error dedit. Cassius, inclinato cornu suo, quum, captis Cæsaris castris, rapido impetu recipientes se videret equites, fugere arbitratus, evadit in tumulum: inde pulvere & strepitu, etiam nocte vicinâ, eximentibus gestæ rei sensum, quum speculator quoque in id missus, tardius renuntiaret; transactum de partibus ratus, uni ex proximis auferendum præbuit caput. Brutus quum in Cassio etiam suum animum perdidisset, ne quid ex constituti fide resignaret (ita enim, impares ne superessent bello, convenerat) ipse quoque uni comitum suorum confodiendum præbuit latus. Quis sapientissimos viros non miretur ad ultimum non suis manibus usos? nisi si hoc quoque ex persuasione defuit, ne violarent manus, sed in abolitione sanctissimarum piissimarumque animarum iudicio suo, scelere alieno, uterentur.

CAPUT VIII.

BELLUM CUM SEXTO POMPEIO.

SUBLATIS percussoribus Cæsaris, supererat Pompeii domus. Alter juvenum in Hispania occiderat, alter fugâ evaserat; contractisque infelicis belli reliquiis, quum insuper ergastula armasset, Siciliam Sardiniamque habebat. Jam & classe medium mare infederat, ô quam diversus a patre! Ille Cilicas exstinxerat: hic secum piratas navales agitabat. Tantâ mole belli penitus in Siculo freto juvenis oppressus est, ut magni famam ducis ad inferos secum tulisset, si nihil tentâisset ulterius: nisi quod magnæ indolis signum est, sperare semper. Perditis enim rebus profugit; Asiamque velis petit, venturus ibi in manus hostium & catenas, &, quod miserrimum est fortibus viris, ad hostium arbitrium sub percussore moriturus. Non alia post Xerxem miserabilior fuga. Quippe modò trecentarum quinquaginta navium dominus cum sex septemve fugiebat, exstincto prætoris navis lumine, annulis in mare abjectis, pavens atque respectans, & tamen non timens ne periret.

CAPUT IX.

BELLUM PARTHICUM DUCE
VENTIDIO,

QUAMVIS in Cassio & Bruto partes sustulisset ; in Pompeio totum partium nomen abolêssêt ; nondum tamen ad pacis stabilitatem profecerat Cæsar, quum scopulus, & nodus, & mora publicæ securitatis superesset Antonius. Nec ille defuit vitiis, quin periret, immo omnia expertus ambitu & luxuriâ, primùm hostes, deinde cives, tandem etiam terrore sui seculum liberavit. Parthi clade Crassianâ altiùs animos erexerant ; civilesque populi Romani discordias læti acceperant : itaque ut prima adfulsit occasio, non dubitaverunt & erumpere, ultro quidem invitante Labieno, qui missus a Cassio Brutoque (quis furor scelerum!) sollicitaverat hostes in auxilium ; & illi Pacoro duce, regio juvene, dissipant Antoniana præsidia. Saxa legatus, ne veniret in potestatem, a gladio suo impetravit. Denique ablatâ Syriâ, emanabat latius malum, hostibus sub auxilii specie sibi vincentibus ; nisi Ventidius, & hic

legatus Antonii, incredibili felicitate & Labieni copias, ipsumque Pacorum, & omnem Parthicum equitatum, toto inter Orontem & Euphratem sinu latè cecidisset. Viginti ampliùs millium fuit: nec sine consilio ducis; qui simulato metu adeo passus est hostem castris succedere, donec, absumpto jactûs spatio, adimeret usum sagittarum. Rex fortissimè dimicans cecidit. Mox circumlato ejus per urbes, quæ desciverant, capite, Syria sine bello recepta. Sic Crassianam cladem Pacorî cæde pensavimus.



CAPUT X.

BELLUM PARTHICUM CUM ANTONIO.

EXPERTIS invicem Parthis atque Romanis, quum Crassus atque Pacorus utrimque virium mutuarum documenta fecissent, pari rursus reverentiâ integrata amicitia; & quidem ab ipso fœdus Antonio cum rege percussum. Sed immensa vanitas hominis, dum titulorum cupidinè Araxem & Euphratem sub imaginibus suis legi concupiscit; neque causâ, nec consilio, ac ne imaginariâ quidem belli indictione, quasi hoc quoque ex arte.

ducis esset, obrepere; relictâ repentè Syriâ in Parthos impetum facit. Gens præter armorum fiduciam callida simulat trepidationem, & in campos fugam: hic statim quasi victor sequebatur: quum subitò nec magna hostium manus, ex improvîso, & jam in fessos viâ sub vespere, velut nimbus, erupit, & missis undique sagittis duas legiones operuerunt. Nihil acciderat in comparisonem cladis, quæ in posterum diem imminebat, nisi intervenisset deûm miseratio. Unus ex clade Crassiana Parthico habitu castris adequitat, & salute Latinè datâ, quum fidem eo ipso fecisset, quid immineret edocuit: *Jam adfuturum cum omnibus copiis regem: irent retro, peterentque montes: sic quoque hostem fortâsse non defore.* Atque ita sequuta est minor vis hostium, quàm imminebat. Adfuit tamen; deletæque reliquæ copię forent, nisi urgentibus telis in modum grandinis, quâdam forte, quasi docti, procubuissent in genua milites, & elatis super capita scutis, cæsorum speciem præbuisent. Tum Parthus arcus inhibuit: deinde Romani quum se rursus extulissent, adeo res miraculo fuit, ut unus ex barbaris miserit vocem: *Ite, & bene valete, Romani. Meritò vos victores fama gentium loquitur, qui Par-*

thorum tela fugistis. Non minor ex aqua postea, quàm ab hostibus clades. Infesta primùm siti regio; tum quibusdam Salinacidis fluvius infestior; novissimè quia jam ab invalidis & avidè hauriebantur, noxiæ etiam dulces fuere. Mox & ardores per Armeniam, & nives per Capadociam, & utriusque cœli subita mutatio pro pestilentia fuit. Sic vix tertiâ parte de sedecim legionibus reliquâ, quum argentum ejus passim dolabris concideretur; & subinde inter moras mortem a gladiatore suo efflagitâset egregius imperator; tandem perfugit in Syriam. Ibi incredibili quâdam mentis vecordiâ ferocior aliquantò factus est: quasi vicisset, qui evaserat.

CAPUT XI.

BELLUM CUM ANTONIO ET CLEOPATRA.

FUROR Antonii, quatenus ambitu non interiret, luxu & libidine extinctus est. Quippe post Parthos quum exosus arma in otio ageret, captus amore Cleopatrar, quasi bene gestis rebus, in regio se sinu reficiebat. Hæc mulier Ægyptia, ab

ebrio imperatore, pretium libidinum Romanum imperium petit. Et promisit Antonius : quasi facilius esset Partho Romanus. Igitur dominationem parare, nec tacite : sed patriæ, nominis, togæ, fascium oblitus, totus in monstrum illud ut mente, ita animo quoque & cultu, desciverat. Aureum in manu baculum ; ad latus acinaces ; purpurea vestis ingentibus obstricta gemmis ; diadema aderat, ut reginâ rex ipse frueretur. Ad primam novorum motuum famam Cæsar a Brundisio trajecerat, ut venienti bello occurreret : positisque in Epiro castris, Leucadem insulam, montemque Leucaten, & Ambracii sinûs cornua, infestâ classe succinxerat. Nobis quadringentæ amplius naves, ducentæ non minus hostium : sed numerum magnitudo pensabat. Quippe a senis in novenos remorum ordinibus, ad hoc turribus, atque tabulatis allevatæ, castellorum & urbium specie, non sine gemitu maris, & labore ventorum ferebantur : quæ quidem ipsa moles exitio fuit. Cæsar's naves a triremibus in senos non amplius ordines creverant. Itaque habiles in omnia, quæ usus poscebat, ad impetus & recursus flexusque capiendos, illas graves, & ad omnia præpeditas, singulas plures adortæ, mis-

silibus simul , tum rostris , ad hoc ignibus jactis , ad arbitrium dissipavere. Nec ullâ re magis hostilium copiarum apparuit magnitudo , quàm post victoriam. Quippe immensa classis , naufragio belli facta , toto mari ferebat Arabumque , & Sabæorum , & mille aliarum gentium Asiæ spolia ; purpuram aurumque in ripam assiduè mota ventis maria revomebant. Prima dux fugæ Regina , cum aurea puppe veloque purpureo , in altum dedit. Mox sequutus Antonius : sed instare vestigiis Cæsar. Itaque nec præparata in Oceanum fuga , nec munita præsidiis utraque Ægypti cornua , Parætonium atque Pelusium , profuere : propè manu tenebantur. Prior ferrum occupavit Antonius : Regina ad pedes Cæsaris provoluta tentavit oculos ducis , frustra. Nam pulchritudo intra pudicitiam principis fuit. Nec illa de vita , quæ offerebatur , sed de parte regni laborabat. Quod ubi desperavit a principe , servarique se triumpho vidit , incautiorem nacta custodiam , in Mausoleum se (sepulcra regum sic vocant) recipit. Ibi maximos , ut solebat , induta cultus , in differto odoribus folio , juxta suum se collocavit Antonium ; admotisque ad venas serpentibus , sic morte quasi somno soluta est.

CAPUT XII.

BELLA ADVERSUS GENTES EXTERAS.

HIC finis armorum civilium : reliqua adversus exterarum gentes ; quæ, districto circa mala sua imperio , diversis orbis oris emicabant. Nova quippe pax ; necdum assuetæ frenis servitutis tumidæ gentium inflatæque cervices ab imposito nuper jugo resiliebant. Ad Septemtrionem conversa ferme plaga ferocius agebat ; Norici , Illyrii , Pannonii , Dalmatæ , Mysi , Thraces & Daci , Sarmatæ atque Germani. Noricis animos dabant Alpes atque nives , quò bellum non posset ascendere : sed omnes illius cardinis populos , Brennos , Semnones atque Vindelicos , per privignum suum Claudium Drusum perpacavit. Quæ fuerit callidarum gentium feritas , facilè vel mulieres ostendere ; quæ , deficientibus telis , infantes ipsos afflictos humo in ora militum adversa miserunt. Illyrii quoque sub Alpibus agunt , imasque valles earum , ac quædam quasi claustra , custodiunt , abruptis torrentibus impliciti. In hos expeditionem ipse sumpsit , fierique pontes imperavit. Hic se & aquis & hoste turbantibus , cunctanti ad ascensum militi

scutum de manu rapuit ; & in via primus , tunc agmine sequuto , quum lubricus multitudine pons succidisset , faucius manibus ac cruribus , speciosior sanguine , & ipso periculo augustior , terga hostium percecîdit. Pannonii duobus saltibus , ac tribus fluviis , Dravo , Savo , Istroque vallabantur. Populati proximos , intra ripas se recipiebant. In hos domandos Tiberium misit. Cæsi sunt in utrisque fluminibus. Arma victorum non ex more belli cremata , sed jacta sunt , & in profluentes data ; ut ceteris , qui resistebant , victoria sic nuntiaretur. Dalmatæ plerumque sub sylvis agunt : inde in latrocinia promptissimi. Hos jam quidem Marcius incensâ urbe Delminio quasi detruncaverat. Postea Asinius Pollio gregibus , armis , agris multaverat (hic secundus orator) sed Augustus perdomandos Tiberio mandat : qui efferum genus fodere terras coëgit , aurumque venis repurgare ; quod alioquin gens omnium cupidissima , studiosâ diligentîâ anquirat ; ut illud in usus suos servare videatur. Mysi quàm feri , quàm truces fuerint , quàm ipsorum etiam barbari barbarorum , horribile dictu est. Unus ducum , ante aciem postulato silentio : *Qui vos , inquit , estis ?* Responsum invicem : *Romani , gentium domini.* Et illi : *Ita , inquit , si nos*

viceritis. Accepit omen Marcus Crassus. Illi statim ante aciem immolato equo concipere votum, *ut cæſorum extis ducum & litarent, & vefcerentur.* Deos audisse crediderim: nec tubam ſuſtinere potuerunt. Non minimùm terroris incuſſit barbaris Domitius Centurio, ſatis barbaræ, efficaciſ tamen apud paris homines ſtoliditatis, qui foculum gerens ſuper caſſidem, ſuſcitata motu corporis flammam, velut ardenti capite, fundebat. Beſſi, Thracum maximus populus deſciverat. Ille barbarus & ſignis militariſ, & diſciplinâ, armis etiam Romanis aſſueverat; ſed a Piſone perdomiti, in ipſa captivitate rabiem oſtendere: quippe quum catenas morſibus tentarent, feritatem ſuam ipſi puniebant. Daci montibus inhærent. Cotiſonis regiſ imperio, quoties concretus gelu Danubius junxerat ripas, decurrere ſolebant, & vicina populari. Viſum eſt Cæſari Auguſto gentem aditu difficillimam ſubmovere. Miſſo igitur Lentulo, ultra ulteriorem repulit ripam: citrà præſidia conſtituit. Sic tunc Dacia non victa, ſed ſummota, atque dilata eſt. Sarmatæ patentibus campis inequitant. Et hoſ per eundem Lentulum prohibere Danubio ſatis fuit. Nihil præter nives, raræſque ſylvas habent. Tanta barbarieſ eſt, ut pacem non intelligant. Germa-

niam quoque utinam vincere tanti non putasset : magis turpiter amissa est , quàm gloriosè acquisita : sed quatenus sciebat patrem suum Cæsarem , bis trajecto ponte Rheno , quæsisse bellum ; in illius honorem concupiit facere provinciam. Et factum erat , si barbari tam vitia nostra , quàm imperia ferre potuissent. Missus in eam provinciam Drusus , primos domuit Usipetes : inde Tenctheros percucurrit , & Cattos. Jam Marcomannorum spoliis insignem quemdam editum tumulum in tropæi modum excoluit. Inde validissimas nationes , Cheruscas , Suevosque , & Sicambros pariter aggressus est : qui viginti centurionibus incrematis , hoc velut sacramento sumpserant bellum , adeo certâ victoriæ spe , ut prædam in antecessum pactione diviserint. Cherusci equos , Suevi aurum & argentum , Sicambri captivos elegerant : sed omnia retrorsum. Victor namque Drusus equos , pecora , torques eorum , ipsosque prædam divisit , & vendidit. Præterea in tutelam provinciarum præsidia atque custodias ubique disposuit , per Mosam flumen , per Albim , per Visurgim. Nam per Rheni quidem ripam quinquaginta ampliùs castella direxit. Bonnam & Geldubam pontibus junxit , classibusque firmavit. Invisum atque inaccessum in id tempus Hercynium

faltum patefecit. Ea denique in Germania pax erat , ut mutati homines , alia terra , cœlum ipsum mitius molliusque solito videretur. Denique non per adulationem , sed ex meritis , defuncto ibi fortissimo juvene , ipsi , quod numquam aliàs , senatus cognomen ex provincia dedit. Sed difficilius est provincias obtinere , quàm facere. Viribus parantur , jure retinentur. Igitur breve id gaudium. Quippe Germani victi magis , quàm domiti erant ; moresque nostros magis quàm arma sub imperatore Druso suspiciebant : postquam verò ille defunctus , Vari Quintilii libidinem ac superbiam , haud secus quàm sævitiam , odisse cœperunt. Ausus ille agere conventum ; & in castris jus dicebat , quasi violentiam barbarorum & lictoris virgis , & præconis voce , posset inhibere : at illi , qui jam pridem rubigine obsitos enses , inertesque mœrerent equos , ut primùm togas , & sæviora armis jura viderunt , duce Arminio arma corripiunt : quum interim tanta erat Varo pacis fiducia , ut ne prædictâ quidem , & prodictâ per Segestem unum principum conjuratione commoveretur. Itaque improvidum , & nil tale metuentem improvisò adorti , quum ille (ô securitas !) ad tribunal citaret , undique invadunt , castra rapiunt , tres legiones opprimuntur. Varus

perditas res eodem, quo Cannensem diem Paullus, & fato est & animo sequutus. Nihil illâ cæde per paludes, perque sylvas cruentius: nihil insultatione barbarorum intolerantius, præcipuè tamen in caesarum patronos. Aliis oculos, aliis manus amputabant: unius os sutum, recisâ prius linguâ, quam in manu tenens barbarus, *Tandem*, inquit, *vipera*, *sibilare desiste*. Ipsius quoque consulis corpus, quod militum pietas humi abdiderat, effossum. Signa & aquilas duas adhuc barbari possident. Tertiam signifer prius, quàm in manus hostium veniret, evulsit; merfamque intra baltei sui latebras gerens, in cruenta palude sic latuit. Hac clade factum, ut imperium, quod in littore Oceani non steterat, in ripa Rheni fluminis staret. Hæc ad septemtrionem. Sub Meridiano tumultuatum magis, quàm belatum est. Musulanios atque Getulos, accolas Syrtium, Cossio duce compescuit: unde illi *Getulici* nomen. Latius victoria patet. Marmaridas atque Garamantas Curinio subigendos dedit. Potuit & ille redire *Marmaricus*, sed modestior in æstimanda victoria fuit. Ad Orientem plus negotii cum Armeniis. Huc alterum ex Cæsaribus nepotibus suis misit. Ambo fato breves: sed alter inglorius. Massiliæ quippe Lucius morbo solvitur: in Syria Caius ex


vulnere , quum Armeniam ad Parthos se subtrahentem recipit. Armenios , victo rege Tigraue , in hoc unum servitutis genus Pompeius assueverat , ut rectores a nobis acciperent. Intermissum ergo jus per hunc recuperatum , non incruento nec inulto tamen certamine. Quippe Domnes , quem rex Artaxatis præfecerat , simulatâ prodicione , adortus virum intentum libello , quem , ut thesaurorum rationes continentem ipse porrexerat , stricto ferro cruentat vulnere in tempus. Ceterum barbarus undique infesto exercitu oppressus , gladio , & pyrâ , in quam se percussus immisit , superstiti etiamnum Cæsari satisfacit. Sub Occasu pacata fere omnis Hispania , nisi quam Pyrenæi desinentis scopulis inhærentem citerior alluebat Oceanus. Hic duæ validissimæ gentes , Cantabri & Astures , immunes imperii agitant. Cantabrorum & pejor , & altior , & magis pertinax in rebellando animus fuit ; qui non contenti libertatem suam defendere , proximis etiam imperitare tentabant , Vaccæosque , & Curgionios , & Autrigonas crebris incursionibus fatigabant. In hos igitur , quia vehementius agere nuntiabantur , non mandata expeditio , sed sumpta est. Ipse venit Segisamam : castra posuit. Inde partito exercitu totam indidem amplexus Cantabriam ,

efferam gentem , ritu ferarum , quasi indagine debellabat. Nec ab Oceano quies , quum infestâ classe ipsa quoque terga hostium cæderentur. Primum adversus Cantabros sub mœnibus Vellicæ præliatus est. Hinc fuga in eminentissimum Vinnium montem , quem maria prius Oceani , quàm arma Romana ascensura esse crediderant. Tertiò Arracillum oppidum magnâ vi repugnat. Captum tamen postremò fuit. In Edullii montis obsidione (quem perpetuâ quindecim millium fossâ comprehensum cinxit, undique simul adeunte Romano) postquam extrema barbari vident , certatim igne , ferro inter epulas , venenoque , quod ibi vulgò ex arboribus taxeis exprimitur , præcepere mortem ; seque pars major a captivitate , quæ videbatur , vindicavere. Hæc per Antistium , Furnium , Agrippam legatos , hibernans in Tarraconis maritimis Cæsar accepit. Ipse præsens hos deduxit montibus : hos obsidibus astrinxit : hos sub corona jure belli venumdedit. Digna res lauro , digna curru senatui visa est : sed jam Cæsar tantus erat , ut posset triumphos contemnere. Astures per idem tempus ingenti agmine a montibus suis descenderant. Nec temere sumptus , ut barbaris , impes : sed positis castris apud Asturam flumen , trifariam diviso agmine , tria simul Romanorum cas-

tra aggredi parabant. Fuiſſet & anceps, & cruentum, & utinam mutuâ clade certamen, cunctis tam fortibus, tam ſubitò, tam cum conſilio venientibus, niſi Trigæcini prodidiſſent; a quibus præmonitus Carisius, cum exercitu adveniens oppreſſit conſilia: ſic quoque tamen non incruento certamine. Reliquias fuſi exercitûs validiſſima civitas Lancia excepit, ubi adeo certatum eſt, ut quum in captam urbem faces poſcerentur, ægre dux impetraverit veniam; ut victoriæ Romanæ ſtans potiùs eſſet, quàm incenſa, monumentum. Hic finis Auguſto bellicorum certaminum fuit; idem rebellandi finis Hiſpaniæ. Certa mox fides, & æterna pax; quum ipſorum ingenio in pacis partes promptiore; tum conſilio Cæſaris, qui fiduciam montium timens, in quos ſe recipiebant, caſtra ſua, ſed quæ in plano erant, habitare & incolere juſſit. Ingentis eſſe conſilii illud obſervari cœpit. Natura regionis circà omnis aurifera, miniique & chryſocollæ, & aliorum colorum ferax. Itaque exerceri ſolum juſſit. Sic Aſtures & latentes in profundo opes ſuas atque divitias, dum aliis quærunť, noſſe cœperunt. Omnibus ad Occaſum & Meridiem pacatis gentibus, ad Septentrionem quoque, duntaxat intra Rhenum atque Danubium, item ad Orientem in-

tra Cyrum & Euphratem ; illi quoque reliqui qui immunes imperii erant , sentiebant tamen magnitudinem , & victorem gentium populum Romanum reverebantur. Nam & Scythæ misere legatos , & Sarmatæ , amicitiam petentes. Seres etiam , habitantesque sub ipso sole Indi , cum gemmis , & margaritis , elephantes quoque inter munera trahentes , nihil magis , quàm longinquitatem viæ imputabant , quam quadriennio impleverant ; & tamen ipse hominum color ab alio venire cœlo fatebatur. Parthi quoque , quasi victoriæ poeniteret , rapta clade Crassianâ ultro signa retulere. Sic ubique una atque continua totius generis humani aut pax fuit , aut pactio. Aususque tandem Cæsar Augustus , septingentesimo ab Urbe condita anno , Janum Geminum claudere , bis ante se clausum , sub Numa rege , & victâ primùm Carthagine. Hinc conversus ad pacem , pronum in omnia mala , & in luxuriam fluens sæculum , gravibus severisque legibus multis coërcuit. Ob hæc tot facta ingentia *Dictator perpetuus* , & *Pater patriæ* dictus. Tractatum etiam in senatu , an , quia condidisset imperium , *Romulus* vocaretur : sed sanctius & reverentius visum est nomen *Augusti* ; ut scilicet jam tum , dum colit terras , ipso nomine & titulo consecraretur.

F I N I S.





41-

52645

LL

V439

1777

Author Velleius Paterculus, Caius

Title Historiae Romanae libri duo. (1777)

New ed.

University of Toronto Library

DO NOT
REMOVE
THE
CARD
FROM
THIS
POCKET

Acme Library Card Pocket
LOWE-MARTIN CO. LIMITED

